




# Yumi Lotu





# YUMI LOTU

**OL PRE NA SINGSING BILONG LOTU  
KATOLIK**

---

Nihil Obstat: Juergen Ommerborn SVD  
Censor Depatus  
February 1985

Imprimatur: +Raymond Kalisz SVD  
Chairman of Liturgical Catechetical Commission  
February 1985

First Printing: 1985 – 10,000 copies  
Second Printing: 1988 – 10,000 copies  
Third Printing: 1990 – 11,000 copies  
Fourth Printing: 1999 – 5,000 copies  
Fifth Printing: 2008 – 2,000 copies  
Sixth Printing: 2009 – 2,000 copies  
Seventh Printing: 2010 – 2,500 copies  
Eight Printing: 2012 – 2,000 copies  
Ninth Printing: 2015 – 2,000 copies  
Tenth Printing: 2019 – 10,000 copies

**©2019. No part of this book may be produced for sale and distribution without the permission of LCI.**



Published by: Liturgical Catechetical Institute  
P. O. Box 347  
GOROKA-EHP  
Papua New Guinea

---

# TOK I GO PAS

Dia ol bratasusa,

Mipela ol Bisop bilong Katolik Sios insait long Papua Niugini i laik tok amamas na welkam long dispela YUMI LOTU buk. Em i buk bilong pre na singsing bilong lotu, ol i wokim bilong helpim olgeta Katolik manmeri long lotu bung wantaim, long lotu wantaim na litimapim nem bilong God. Ol i bin skelim gen dispela buk na sampela pre na singsing i senis. Mipela i laik givim dispela buk long han bilong ol Katolik bilip manmeri bilong helpim pre na singsing bilong ol.

Long dispela buk bai yu painim ol nambawan pre bilong olgeta Katolik, wantaim sampela pre na singsing bilong wan wan daiosis. Ol dispela pre na singsing inap long kirapim tingting na bilip bilong ol bilip manmeri long kainkain taim na long kainkain sindaun na long kainkain wokabaut. Long wanem, God Triwan i save poromanim ol long olgeta taim. God i ken pulapim ol manmeri long Spirit bilong Jisas long taim ol i lotu na yusim dispela YUMI LOTU buk. Olsem na bai pawa bilong God i ken wok insait long ol, na bai ol i ken givim witnes long kingdom bilong em.

First printing approved by; Archbishops: Peter Kurongku, Port Moresby, Leo Arkfeld, Madang, Albert Leo Bundervoet, Rabaul, George Bernarding, Mt. Hagen.

Tenth Printing, approved by Bishop Darius Kaluza MSF, Bishop of Goroka.





# OL PRE

BUNGIM GOD LONG PRE

BUNGIM KRAIS LONG SAKRAMEN

BUNGIM KRAIS LONG PESTODE



# INSAIT

## **BUNGIM GOD LONG PRE** **13**

### **Ol Nambawan Pre Bilong Ol Katolik** **15**

Mak bilong diwai kros 15

Pre bilong Bikipela, Jisas Krai 15

Tok Bilip bilong ol Aposel 15

Ona long Papa 16

Bilip 16

Hop 16

Laik 16

Sori 16

Ave Maria 16

Ensel bilong God 17

Kwin bilong Heven 17

Pre bilong moning (bilong wan wan manmeri) 18

Pre bilong moning (bilong famili) 18

Pre bilong nait (bilong wan wan wanmeri) 19

Pre bilong nait (bilong famili) 19

Pre i go pas long kaikai 20

Pre bihain long kaikai 20

### **Lotu Rosari** **21**

Ol hap bilong Rosari 21

Pre bilong Fatima 22

Pre bihain long Rosari 22

### **Ol Pre Bilong Onarim na Tenkim God** **23**

God Yu Bikipela (Re 15:3b-4) 23

Litimapim nem bilong God (Ef 1:3-10) 24

|                                                            |           |
|------------------------------------------------------------|-----------|
| Mipela i tenkim Yu, God Papa, Yu gut olgeta                | 25        |
| Yumi litimapim nem bilong Bikpela (Sam 95:1-6)             | 25        |
| Litimapim nem bilong Bikpela (Sam 148)                     | 26        |
| Song bilong amamas long Bikpela (Sam 149:1-5)              | 27        |
| Litimapim nem bilong Bikpela (Sam 150:1-6)                 | 27        |
| Song bilong amamas long God (Sam 67)                       | 28        |
| Song bilong Sekaraia (Lu 1:68-79)                          | 29        |
| Song bilong Maria (Lu 1:46-55)                             | 30        |
| Tenkyu long God (Lukim 2 Ko 1:3-4)                         | 30        |
| <b>Ol Pre Bilong Askim Na Trastim God</b>                  | <b>31</b> |
| Marimari bilong God i no inap lusim yumi                   | 31        |
| Pre bai God i tekewe sin (Sam 51:1-2, 10-12)               | 32        |
| Man i gat hevi na i pre long God i helpim em               | 32        |
| Man i askim God long helpim em                             | 33        |
| Man i bilip tru na i pre long God (Sam 16)                 | 34        |
| <b>Ol Kain Kain Pre</b>                                    | <b>35</b> |
| Pre bilong pikinini                                        | 35        |
| Pre bilong wanpela papa                                    | 35        |
| Pre bilong wanpela mama                                    | 35        |
| Pre long wasensel                                          | 36        |
| Pre bilong famili                                          | 36        |
| Pre bilong lapun                                           | 37        |
| Pre bilong ol yangpela                                     | 37        |
| Pre long Santu Alois, wasman bilong ol<br>yangpela manmeri | 38        |
| Pre long Santu Tomas Akwainas, wasman<br>bilong ol sumatin | 38        |
| Pre bilong meri i gat bel                                  | 38        |

|                                               |    |
|-----------------------------------------------|----|
| Pre bilong papamama long taim pikinini        |    |
| i stap longwe                                 | 38 |
| Pre bilong meri, man bilong em i stap longwe  | 39 |
| Pre bilong marit i gat hevi                   | 39 |
| Pre long taim bilong hevi                     | 39 |
| Pre long taim bilong sik                      | 40 |
| Pre bilong taim bilong traim                  | 40 |
| Pre bilong strongim bilip                     | 40 |
| Pre bilong givim mi yet long God              |    |
| (Santu Ignisius i wokim)                      | 40 |
| Pre bilong wok bung wantaim                   | 41 |
| Pre long Santu Maria (Santu Bernard i wokim)  | 41 |
| Pre long Santu Josep, waspapa bilong Jisas    | 41 |
| Pre bilong helpim Pop, Bisop, Pris na arapela |    |
| wokmanmeri bilong Sios                        | 41 |
| Pre long Santu Rafael, wasman bilong ol pipel |    |
| i wokabaut longwe                             | 42 |
| Pre bilong blesim nupela kar                  | 42 |
| Pre bilong blesim nupela haus                 | 42 |
| Pre bilong blesim nupela bot                  | 43 |
| Pre bilong blesim nupela masin                | 43 |
| Pre bilong blesim bisnis                      | 44 |
| Pre bilong blesim tuls bilong wok             | 44 |
| Pre bilong blesim rosari (korona)             | 44 |
| Pre bilong blesim santu piksa na statyu       | 45 |
| Pre bilong blesim nupela rot                  | 45 |
| Pre bilong blesim nupela bris                 | 46 |

|                                                                  |           |
|------------------------------------------------------------------|-----------|
| <b>Ol Pre Bilong Helpim Sios</b>                                 | <b>47</b> |
| Pre bilong helpim Sios i stap long olgeta hap<br>bilong graun    | 47        |
| Pre long Santu Pita na Pol, tupela wasman<br>bilong Sios         | 47        |
| Pre bilong helpim Kristen komyuniti bilong<br>Daiosis na Peris   | 47        |
| Pre bilong helpim Pop                                            | 48        |
| Pre bilong helpim Bisop                                          | 48        |
| Pre bilong helpim Pris na Diken                                  | 48        |
| Pre bilong singautim wokmanmeri long Sios                        | 49        |
| Pre bilong helpim ol Pris na Brata na Sista                      | 49        |
| Pre bilong helpim ol Katekis na olgeta<br>wokmanmeri bilong Sios | 49        |
| Pre long Santu Teresia, wassantu bilong<br>ol misinari           | 50        |
| Pre long Santu Fransis Sevia, wassantu bilong<br>ol misinari     | 50        |
| <b>Ol Pre Bilong Helpim Komyuniti</b>                            | <b>51</b> |
| Pre long Santu Maikel, wasensel bilong<br>Papua Niugini          | 51        |
| Pre i go long Bleset Pita To Rot                                 | 51        |
| Pre bilong helpim ol bikmanmeri bilong gavman                    | 51        |
| Pre bilong helpim kantri                                         | 52        |
| Pre bilong taim bilong ileksen                                   | 52        |
| Pre bilong stopim pasin korapsen                                 | 53        |
| Pre bai kaikai long gaden i kamap gut                            | 53        |
| Pre long Santu Isidor, wassantu bilong ol fama                   | 53        |

|                                                                         |           |
|-------------------------------------------------------------------------|-----------|
| Pre long Santu Brendan, wassantu bilong ol pipel<br>i raun long solwara | 54        |
| Pre bilong pinisim pait                                                 | 54        |
| Pre bilong miting                                                       | 54        |
| Pre bilong sekan na bel isi (Santu Fransis i wokim)                     | 55        |
| Pre bilong spot                                                         | 55        |
| Pre bilong mekim gut long ol birua                                      | 55        |
| Pre bilong helpim olgeta manmeri                                        | 56        |
| <b><u>BUNGIM KRAIS LONG SAKRAMEN</u></b>                                | <b>57</b> |
| <b>Baptais</b>                                                          | <b>59</b> |
| Pre bilong tenkim God long Baptais                                      | 60        |
| Pre bilong strongim gen promis bilong Baptais                           | 60        |
| Baptais long taim bilong dai                                            | 61        |
| <b>Konpirmasio</b>                                                      | <b>62</b> |
| Pre bilong singautim Holi Spirit                                        | 63        |
| Pre bilong bihainim Holi Spirit                                         | 63        |
| <b>Yukaris</b>                                                          | <b>64</b> |
| <b>Lo na pasin bilong Misa</b>                                          | <b>65</b> |
| Ol pre bilong Misa                                                      | 65        |
| Pre bihain long Misa (1) (Lukim Sam 23)                                 | 75        |
| Pre bihain long Misa (2)                                                | 76        |
| Pre bihain long Misa (3)                                                | 77        |
| Sol bilong Kraiss                                                       | 77        |
| <b>Lo na pasin bilong Sande Lotu</b>                                    | <b>78</b> |
| <b>Lotu Benediksen</b>                                                  | <b>93</b> |

|                                                              |            |
|--------------------------------------------------------------|------------|
| <b>Konpesio (Sakramen bilong sekan)</b>                      | <b>95</b>  |
| Rot bilong Konpesio                                          | 96         |
| Lotu Penans                                                  | 101        |
| <b>Ordo</b>                                                  | <b>104</b> |
| Pre bilong helpim ol Pris (Diken) na singaut<br>long Vokesen | 105        |
| Pre bilong singautim planti Pris (Diken)                     | 105        |
| <b>Marit</b>                                                 | <b>106</b> |
| Pre bilong strongim promis bilong Marit                      | 107        |
| <b>Welim Sikmanmeri</b>                                      | 108        |
| Pre bilong helpim sikmanmeri                                 | 109        |
| Lotu bilong helpim sikmanmeri<br>(taim i nogat pris)         | 109        |
| Pre bilong helpim manmeri i laik dai                         | 112        |
| Pre long taim man o meri i dai pinis                         | 113        |
| <b><u>BUNGIM KRAIS LONG PESTODE</u></b>                      | <b>115</b> |
| <b>Atven</b>                                                 | <b>117</b> |
| Baibel Lotu bilong Atven                                     | 117        |
| Ol pre bilong Atven                                          | 119        |
| Pre wantaim Jisas na Mama Maria                              | 119        |
| Krais, bai Yu kam bek gen                                    | 119        |
| Singaut bilong Jon bilong Baptais (Lu. 3:1-18)               | 120        |
| <b>Krismas</b>                                               | <b>121</b> |
| Baibel Lotu bilong Krismas                                   | 121        |
| Pre bilong Krismas                                           | 123        |

|                                            |            |
|--------------------------------------------|------------|
| <b>Holi Famili</b>                         | <b>124</b> |
| Baibel Lotu bilong Holi Famili             | 124        |
| Liklik korona bilong Holi Famili           | 126        |
| Litani bilong Holi Famili                  | 127        |
| Pre long Holi Famili                       | 129        |
| Pre bilong givim yumi yet long Holi Famili | 130        |
| <b>Las de bilong Yia</b>                   | <b>131</b> |
| Baibel Lotu bilong las de bilong yia       | 131        |
| <b>Niu Yia</b>                             | <b>133</b> |
| Baibel Lotu bilong niu yia                 | 133        |
| <b>Epipani</b>                             | <b>135</b> |
| Baibel Lotu bilong Epipani                 | 135        |
| <b>Len</b>                                 | <b>137</b> |
| Baibel Lotu bilong Len                     | 137        |
| Baibel Lotu bilong onarim Diwai Kros       | 139        |
| Rot bilong Diwai Kros                      | 140        |
| Ol las tok bilong Jisas long Diwai Kros    | 149        |
| Pre bilong tingim pen na dai bilong Jisas  | 150        |
| <b>Ista</b>                                | <b>152</b> |
| Baibel Lotu bilong taim bilong Ista        | 152        |
| Pre bilong Ista                            | 153        |
| <b>Divain Mersi</b>                        | <b>155</b> |
| Liklik korona bilong Marimari bilong God   | 155        |
| Litani bilong Marimari bilong God          | 156        |
| <b>Asensen</b>                             | <b>159</b> |
| Baibel Lotu bilong Asensen                 | 159        |

|                                                                         |            |
|-------------------------------------------------------------------------|------------|
| <b>Pentekos</b>                                                         | <b>161</b> |
| Baibel Lotu bilong Pentekos                                             | 161        |
| Pre bilong Pentekos                                                     | 163        |
| Sotpela pre long Holi Spirit                                            | 163        |
| Kam Holi Spirit                                                         | 164        |
| Litani bilong Holi Spirit                                               | 164        |
| <b>Holi Trinit</b>                                                      | <b>166</b> |
| Baibel Lotu bilong Holi Trinit                                          | 166        |
| <b>Bodi Na Blut Bilong Krai</b>                                         | <b>168</b> |
| Baibel Lotu bilong Bodi na Blut bilong Krai                             | 168        |
| Lotu long taim bilong prosesio bilong Bodi na<br>Blut bilong Krai       | 171        |
| Litani bilong Bodi na Blut bilong Krai                                  | 177        |
| <b>Santu Hat Bilong Jisas</b>                                           | <b>180</b> |
| Baibel Lotu bilong Santu Hat bilong Jisas                               | 180        |
| Pre bilong ol namba wan Fraide                                          | 181        |
| Litani bilong Santu Hat bilong Jisas                                    | 182        |
| <b>Olgeta Santu</b>                                                     | <b>184</b> |
| Baibel Lotu bilong Olgeta Santu                                         | 184        |
| Litani bilong Olgeta Santu                                              | 186        |
| <b>Tingim ol Manmeri i Dai Pinis</b>                                    | <b>188</b> |
| Baibel Lotu bilong ol manmeri i dai pinis                               | 188        |
| Litani bilong helpim ol manmeri i dai pinis                             | 190        |
| Pre bilong singautim helpim bilong ol bratasusa<br>i stap long Klinpaia | 191        |
| Lotu bilong planim bodi bilong man o meri i dai<br>(taim i nogat pris)  | 192        |

|                                                                 |            |
|-----------------------------------------------------------------|------------|
| Lotu bilong planim bodi bilong pikinini<br>(taim i nogat pris ) | 195        |
| <b>Krais i King</b>                                             | <b>199</b> |
| Baibel Lotu bilong Krais i King                                 | 199        |
| <b>Maria</b>                                                    | <b>201</b> |
| Baibel Lotu bilong onarim Santu Maria                           | 201        |
| Pre long Santu Maria (1)                                        | 202        |
| Pre long Santu Maria (2)                                        | 203        |
| Litani bilong Santu Maria                                       | 204        |
| Pre long Santu Maria, Mama bilong Santu Hat<br>bilong Jisas     | 206        |
| Pre long Mama bilong God long taim bilong sori                  | 206        |
| Pre long Santu Maria bilong kisim gutpela save                  | 206        |
| Pre long Santu Maria                                            | 206        |
| <b>OL SINGSING</b>                                              | <b>207</b> |



# **BUNGIM GOD**

## **LONG PRE**





Santu Pol i tok, nambawan tok mi laik kirapim yu long mekim, em i olsem yupela i mas singaut long God long pre.

*“Olsem na mi laik bai ol manmeri bilong olgeta ples ol i mas litimapim han bilong ol na mekim prea. (1 Ti 2:8)*

Katolik sios i skulim yumi olsem:

*“Pre i helpim yumi long sanap strong na karim olgeta hevi bilong wan wan de, bikos God i laikim yumi tru. Pre i save kliaim tingting bilong yumi na helpim yumi long glasm gut wanem samting em i tru.” (Katekismo 408)*

Tasol bai yumi pre olsem wanem? Tru, yumi ken toktok long God long tingting bilong yumi wan wan. Tasol planti taim tingting bilong yumi i sot. Olsem na dispela pre buk i laik helpim ol bilipmanmeri long mekim pre na long bihainim kainkain rot bilong mekim pre.

Dispela buk i no bilong helpim ol wan wan manmeri tasol. Nogat. Em i laik kirapim na strongim tu ol komyuniti long famili, ples, skul o peris long pre wantaim. Taim komyuniti i pre, dispela tok bilong Jisas i kamap tru: *“Sapos tupela o tripela manmeri i kam bung long nem bilong mi, orait, mi yet mi stap namel long ol” (Mt 18.20).* Kristen komyuniti i save stap wantaim, i wok wantaim na i kaikai wantaim. Olsem tasol, ol i mas pre wantaim.

Ol kristen bipo yet long taim bilong ol Aposel i bin mekim olsem:

*“Olgeta dispela manmeri i stap wanbel na ol i save bung na pre. Na ol meri na Maria, em Mama bilong Jisas, na ol brata bilong Jisas, ol tu i save kam na pre wantaim.” (Ap 1:14)*

## OL NAMBAWAN PRE BILONG OL KATOLIK

*Ol pre hia ol i nambawan pre bilong yumi ol Katolik. Long wanem, ol i soim bun bilong bilip bilong ol Katolik bilipmanmeri.*

*Ol bilipmanmeri i bin wokim dispela buk. Ol i wokim bilong helpim pipel bilong God long onarim na tenkim God wantaim.*

*Tasol, ol i wokim tu bilong helpim wan wan manmeri, taim ol i laik pre wan wan tasol. Olgeta Katolik long bipo yet inap long nau ol i laikim ol pre hia na ol i yusim olgeta de.*

*Sampela pre i kamap long Baibel, na sampela ol bilipmanmeri yet i bin wokim. Ol dispela pre i ken helpim yumi long pre gut. Ol i pasim yumi tu wantaim ol bilipmanmeri bilong bipo yet. Tasol ol pre hia i mas kirapim bel bilong wan wan manmeri long traim toktok wantaim God. Dispela samting i no hevi, sapos yumi tingim ol samting God i wokim. Em i no hevi, sapos yumi bilip olsem God i gutpela Papa.*

*Em i lukautim yumi oltaim, em i redi long pogivim yumi oltaim, na em i laikim yumi oltaim.*

### **Mak bilong Diwai Kros**

Long nem bilong Papa, na bilong Pikinini na bilong Holi Spirit. Amen.

### **Pre bilong Bikpela, Jisas Krai**

Papa bilong mipela, yu stap long heven. Mekim nem bilong yu i kamap bikpela. Mekim kingdom bilong yu i kam. Strongim mipela long bihainim laik bilong yu long graun, olsem ol i bihainim long heven. Givim mipela kaikai inap long tude. Pogivim rong bilong mipela, olsem mipela i pogivim ol arapela i mekim rong long mipela. Sambai long mipela long taim bilong traim. Na rausim olgeta samting nogut long mipela. Amen.

### **Tok Bilip bilong Ol Aposel**

Mi bilip long God Papa i strong olgeta, em i mekim kamap heven na graun. Mi bilip long Jisas Krai, em wanpela tasol i Pikinini bilong God. Em i Bikpela bilong yumi. Long strong bilong Holi Spirit,

Maria Virgo i kisim bel, na i karim em. Long taim bilong Ponsius Pailat em i karim pen. Ol i nilim em long diwai kros. Em i dai na ol i planim em. Em i go long ples bilong ol i dai pinis. Long de namba tri em i kirap bek. Em i go bek long heven. Em i sindaun long raithan bilong God Papa i strong olgeta. Bihain bai em i kam bek gen bilong mekim kot long ol i stap yet, na long ol i dai pinis. Mi bilip long Holi Spirit, long Sios i holi na Katolik, long ol santu i wanfamili tasol, long God i pogivim sin, i kirapim bodi, na i givim laip bilong oltaim. Amen.

## **Ona long Papa**

Ona long Papa, na long Pikinini, na long Holi Spirit. Olsem taim bipo, na nau, na oltaim. Amen

## **Bilip**

God, yu tru olgeta. Tok bilong yu i tru. Mi bilipim olgeta tok bilong yu na bilong Katolik Sios. Strongim bilip bilong mi. Amen.

## **Hop**

God, yu gutpela olgeta. Yu save bihainim promis bilong yu oltaim. Mi hop yu pogivim ol sin bilong mi. Mi hop yu givim strong long mi na yu bringim mi long ples bilong yu. Strongim hop bilong mi. Amen.

## **Laik**

God, oltaim yu mekim gut long mi. Mi laikim yu moa long olgeta samting. Helpim mi long laikim ol bratasusa, olsem yu laikim mi. Strongim laik bilong mi. Amen.

## **Sori**

God, yu gut tumas; mi mekim nogut long yu. Mi sori nau. Marimari long mi na pogivim olgeta sin bilong mi. Mi no laik mekim sin moa. Mi laik stap gut. Helpim mi long strong bilong yu. Amen.

## **Ave Maria**

Ave Maria, yu pulap long grasia. Lord i stap long yu. Ol i onarim yu moa long ol meri, na ol i onarim Jisas em i Pikinini bilong bel bilong yu. Santu Maria, Mama bilong God, pre bilong helpim mipela manmeri bilong sin, nau na long taim mipela i dai. Amen.

## **Ensel bilong God**

L: Ensel bilong God i bringim tok long Maria.

**Ol: Na Holi Spirit i mekim Maria i kamap mama bilong Jisas.**

L: Ave Maria, yu pulap long grasia. Lord i stap long yu. Ol i onarim yu moa long ol meri na ol i onarim Jisas em i Pikinini bilong bel bilong yu.

**Ol: Santu Maria, Mama bilong God, pre bilong helpim mipela manmeri bilong sin, nau na long taim mipela i dai. Amen.**

L: Mi harim tok bilong God,

**Ol: Em i ken mekim long mi olsem yu tok.**

L: Ave Maria...

**Ol: Santu Maria...**

L: Pikinini bilong God i kamap man,

**Ol: Na em i stap wantaim yumi.**

L: Ave Maria...

**Ol: Santu Maria...**

L: Mama bilong God, pre bilong helpim mipela.

**Ol: Bai mipela inap i go long heven.**

L: Yumi pre:

**Ol: God Papa, long tok bilong ensel mipela i save: Kraiss, Pikinini bilong yu, i kamap man. Mipela i tingting nau long pen na dai bilong em. Helpim mipela, bai mipela inap i go long heven. Mipela i pre long nem bilong Jisas Kraiss em i Bikpela bilong mipela. Amen.**

## **Kwin bilong Heven (*long taim bilong Ista*)**

L: Kwin bilong heven, Aleluia.

**Ol: Yu amamas, Aleluia.**

L: Bikos Pikinini bilong yu i kirap olsem em i tok, Aleluia.

**Ol: Pre long God bilong helpim mipela, Aleluia.**

L: Virgo Maria, yu amamas tru, Aleluia.

**Ol: Bikos Jisas i kirap tru, Aleluia.**

L: Yumi pre:

**Ol: God Papa, yu mekim mipela i amamas long kirap bilong Pikinini bilong yu, Jisas Kraiss, Bikpela bilong mipela. Mipela i pre bai Mama bilong em, Virgo Maria, i ken helpim mipela long kisim amamas long heven. Mipela i pre long nem bilong Kraiss em i Bikpela bilong mipela. Amen.**

## **Pre bilong moning (*bilong wan wan manmeri*)**

God Papa, mi tenkim yu long dispela nupela de. Mi laik givim mi yet long yu tude. Was gut long bodi na sol bilong mi, bai olgeta tingting na tok na wok bilong mi i ken onarim yu na bringim mi moa klostu long yu na ol bratasusa bilong mi. Amen.

## **Pre bilong moning (*bilong famili*)**

L: God Papa, nupela de i kamap pinis. Mipela i amamas long gutpela slip bilong nait. Yu bin mekim gut long mipela. Yu bin givim dispela nupela de long mipela. Nau famili bilong mipela i bung hia bilong litimapim nem bilong yu,

**Ol: Mipela i laik tenkim yu.**

L: Long famili bilong mipela, long naispela ples bilong mipela, long kaikai, long abus, na long olgeta samting yu givim pinis long mipela,

**Ol: Mipela i tenkim yu.**

L: Long strong bilong bodi bilong mipela, long tingting, long toktok na long wok bai mipela i mekim,

**Ol: Mipela i tenkim yu.**

L: Long bilip bilong mipela, yu soim yu yet long mipela, na mipela i ken kolim yu Papa,

**Ol: Mipela i tenkim yu.**

L: Papa, tude mipela i laik wokabaut wantaim yu, olsem na mipela i pre: Taim mipela i mekim wok bilong mipela, long haus, long ples, long gaden na long skul,

**Ol: Stap wantaim mipela.**

L: Taim mipela i bung wantaim ol wanblut, wantok, na wanwok, na taim mipela i bung wantaim ol manmeri mipela i no laikim tumas, na ol birua bilong mipela,

**Ol: Stap wantaim mipela.**

L: Taim tingting nogut i kamap long mipela, taim mipela i les long wok, taim kain kain traim i kamap long mipela,

**Ol: Stap wantaim mipela.**

L: Strongim mipela, bai long gutpela pasin bilong mipela, mipela i ken helpim ol arapela manmeri long bilip long Krais,

**Ol: Harim pre bilong mipela.**

L: Helpim mipela, bai tude mipela i ken kamap gutpela pikinini bilong yu,

**Ol: Harim pre bilong mipela.**

L: God i strong olgeta, i ken blesim mipela long dispela de, long nem bilong Papa na bilong Pikinini na bilong Holi Spirit.

**Ol: Amen.**

### **Pre bilong nait (*bilong wan wan manmeri*)**

God Papa, mi tenkim yu long dispela de i pinis nau, Mi tenkim yu long ol helpim bilong yu. Mi sori long ol rong mi bin mekim. Nau mi laik slip. Was gut long mi. Givim nupela strong long bodi bilong mi. Sambai long mi, bai mi no ken pret. Na sapos yu laik singautim mi long dispela nait, kisim mi i go long ples bilong yu. Amen.

### **Pre bilong nait (*bilong famili*)**

L: God Papa, de i laik pinis nau. Liklik taim bai mipela i slip. Mipela i laik tenkim yu nau. Long dispela de na long ol gutpela samting i bin kamap long en,

**Ol: Mipela i tenkim yu, Papa.**

L: Long kaikai bilong tude, na long ol gutpela tok na save mipela i bin kisim,

**Ol: Mipela i tenkim yu, Papa.**

L: Long ol manmeri i bin helpim mipela, na i bin mekim gut long mipela,

**Ol: Mipela i tenkim yu, Papa.**

L: Nau mipela i laik pre bilong helpim olgeta manmeri: Tingim papamama na bratasusa bilong mipela na ol manmeri i stap klostu long mipela,

**Ol: God Papa, mekim gut long ol.**

L: Tingim ol wantok bilong mipela, na olgeta manmeri bilong dispela kantri,

**Ol: God Papa, mekim gut long ol.**

L: Tingim ol hetman bilong mipela; ol bikmanmeri bilong gavman, ol bos bilong wok, ol tisa bilong skul, na ol bisop na ol wanwok bilong ol,

**Ol: God Papa, mekim gut long ol.**

L: Nau mipela i tingim olgeta wok bilong tude. Mipela i amamas long olgeta samting mipela i bin mekim stret. Tasol long olgeta samting nogut mipela i bin mekim,

**Ol: God Papa, mipela i tok sori.**

L: Taim mipela i mekim nogut long narapela o givim pen long em,

**Ol: God Papa, mipela i tok sori.**

L: Taim ol manmeri i singaut long mipela na mipela i givim baksait long ol,

**Ol: God Papa, mipela i tok sori.**

L: Taim mipela i les long mekim gutpela tok na wok,

**Ol: God Papa, mipela i tok sori.**


L: God Papa, mipela i stap long han bilong yu. Was long mipela, bai mipela inap slip gut. God i strong olgeta, i ken blesim mipela long dispela nait, long nem bilong Papa, na bilong Pikinini, na bilong Holi Spirit.

**Ol: Amen.**

## **Pre i go pas long kaikai**

God Papa, yu save givim planti gutpela samting long mipela. Blesim mipela na dispela kaikai yu givim long mipela. Mipela i pre long nem bilong Papa, na bilong Pikinini, na bilong Holi Spirit. Amen.

## **Pre bihain long kaikai**



God Papa, mipela i tenkim yu long kaikai yu bin givim mipela. Mekim gut long ol manmeri i bin wok long redim dispela kaikai. Mipela i pre long nem bilong Papa, na bilong Pikinini, na bilong Holi Spirit. Amen.

## LOTU ROSARI

### TOK I GO PAS LONG LOTU ROSARI

*Bipo yet i no gat planti manmeri i save rit. Orait dispela lotu Rosari i bin kamap bilong helpim ol long tingim ol stori bilong wok ridima bilong Jisas. Manmeri i pre rosari i kolim wanpela "Papa bilong mipela" na 10-pela "Ave Maria" na em i tingim wanpela hap bilong laip bilong Jisas na Maria. Ol Pop i save strongim yumi long pre rosari long olgeta de, bai bilip bilong yumi i ken kamap strong.*

*Dispela lotu i stap hia i laik helpim ol manmeri, bai pre bilong rosari i kamap gutpela. Ol i ken pre o singsing bilong redim ol yet long harim rit bilong Baibel. Long wan wan hap bilong rosari, rit bilong Baibel inap helpim tingting bilong ol. Olsem, taim ol pipel i onarim Santu Maria long pre, tingting bilong ol i ken i stap long stori ol i bin harim long Baibel. Em hia rot bilong dispela lotu rosari.*

1. Mak bilong Diwai Kros
2. Tok Bilip
3. Papa bilong mipela
4. Tripela Ave Maria (bilong strongim bilip, hop, na laik)
5. Ona long Papa
6. Kolim wanpela hap bilong Rosari
7. Papa Bilong Mipela, 10-pela Ave Maria, Ona long Papa
8. Pre bilong Fatima
9. Kolim narapela hap gen...na pre i go...

### Ol hap bilong Rosari (*Korona*)

***Misteri bilong Amamas*** (Mande, Sarere)

1. Holi Spirit i mekim Maria i kamap Mama bilong Jisas. (Lu 1:26-38)
2. Maria i go lukim kandere bilong em, Elisabet. (Lu 1:39-49)
3. Maria i karim Jisas. (Lu 2:1-7)
4. Maria na Josep i bringim Jisas i go long tempel. (Lu 2:22-35)
5. Maria na Josep i painim Jisas long tempel. (Lu 2:41-52)

***Misteri bilong Lait*** (Fonde)

1. Jisas i kisim baptais long wara Jordan. (Lu 3: 21-22)
2. Jisas i wokim mirakel long marit kaikai long Kana. (Jn. 2: 1-12)

3. Jisas i autim tok bilong kingdom bilong God. (Mk.1:15)
4. Jisas i kamap narakain long maunten Tabor. (Jn. 19:17)
5. Jisas i givim Yukaris long mipela. (Mk. 14:17-25)

### ***Misteri bilong Sori*** (Tunde, Fraide)

1. Tuhat bilong Jisas i kamap olsem blut. (Mk 14:32-46)
2. Ol i paitim Jisas nogut. (Mk 15:1-20)
3. Ol i putim rop i gat nil long het bilong Jisas. (Mt 27:27-31)
4. Jisas i karim diwai kros. (Lu 23:26-32)
5. Jisas i dai long diwai kros. (Mk 15:22-47)

### ***Misteri bilong Glori*** (Trinde, Sande)

1. Jisas i kirap long ol i dai. (Mk 16:1-13)
2. Jisas i go long heven. (Ap 1:4-11)
3. Jisas i salim Holi Spirit i kam daun. (Ap 2:1-8)
4. Jisas i kisim Maria i go long heven. (Jn 19:25-27)
5. Jisas i mekim Maria i kwin bilong heven na graun. (Lu 1:46-55)

### **Pre bilong Fatima**

Jisas, pogivim ol sin bilong mipela. Helpim mipela, nogut mipela i lus long hel. Bringim mipela i go long heven. Na marimari long ol manmeri i givim baksait long yu. Amen.

### **Pre bihain long Rosari**

L: Kwin bilong heven,

**Ol: Mama bilong marimari, helpim mipela i hop long yu. Mipela ol manmeri bilong sin i singaut long yu. Harim mipela, na marimari long mipela. Long taim bilong dai soim Jisas, Pikinini bilong yu, long mipela. Yu gutpela mama, Virgo Maria.**

L: Mama bilong God, pre bilong helpim mipela.

**Ol: Bai mipela inap i go long heven.**

L: Yumi pre:

**Ol: God Papa, tingim pre bilong Santu Maria, na harim pre bilong mipela. Helpim ol manmeri bilong sin i kam bek long yu na strongim ol pipel bilong yu, bai ol i no lusim yu. Mipela i pre long nem bilong Krais, em i Bikpela bilong mipela. Amen.**

## OL PRE BILONG ONARIM NA TENKIM GOD

*Yumi olgeta manmeri i gat planti askim: Bilong wanem yumi stap hia long graun? Yumi kamap olsem wanem? Ol samting bilong graun i kamap olsem wanem? Husat i bin wokim olgeta dispela samting?*

*Yumi save bilip olsem God i bin wokim yumi na olgeta samting bilong heven na graun. God em i Papa bilong yumi na em i bin kamapim olgeta samting yumi save yusim.*


*Tru, yumi tu i save wokim planti samting. Tasol, yumi save yusim ol samting God i bin kamapim pastaim, na em i bin givim long han bilong yumi. God em i Papa bilong yumi na em i gutpela long yumi. Yumi pilim dispela samting tru na yumi tokaut: “God, yu antap tru. God, yu gutpela tru. Mipela i litimapim nem bilong yu. Mipela i tenkim yu long ol presen bilong yu.”*

### **God Yu Bikpela (Re 15:3b-4)**

“Bikpela, yu God bilong mipela. Em i stret bai olgeta manmeri i tok amamas long yu, na i litimapim nem bilong yu, na i stap aninit long strong bilong yu. Long wanem, yu bin mekim olgeta samting i kamap. Long laik bilong yu yet, yu bin wokim ol dispela samting, na nau ol dispela samting i stap.” (Re 4:11)


“Bikpela, yu God i gat olgeta strong, Yu stap nau, na bipo tru yu stap. Yu kisim pinis bikpela strong bilong yu, na yu kamap king tru. Olsem na mipela i tenkyu long yu.” (Re 11:17)

“Bikpela, yu God i gat olgeta strong, Yu save mekim ol narakain bikpela wok, na taim mipela i lukim, mipela i save kirap nogut tru. King bilong olgeta lain manmeri, ol pasin bilong yu i stret na i tru olgeta! Bikpela, yu wanpela tasol yu stap holi. Olsem na olgeta manmeri i mas pret long yu na litimapim nem bilong yu. Olgeta lain manmeri bai i kam na lotu long yu. Long wanem, stretpela pasin bilong yu i kamap ples klia pinis.” (Re 15:3b-4)



## **Litimapim nem Bilong God (Ef 1:3-10)**

God, yu Papa bilong Bikpela, Jisas Krai.  
Mipela i litimapim nem bilong yu.  
Long Krai yu bin givim mipela olgeta blesing bilong heven,  
bilong helpim spirit bilong mipela.  
God, yu no bin wokim graun yet  
na yu makim mipela pinis bilong Krai,  
bai mipela i ken i stap holi na i no gat asua long ai bilong yu.  
Bipo yet yu marimari long mipela,  
na long wok bilong Jisas Krai  
yu makim mipela long kamap pikinini bilong yu.  
Long laik bilong yu yet yu bin mekim olsem.  
Long nem bilong dispela Pikinini yu laikim tumas,  
yu bin marimari moa yet long mipela.  
Olsem na mipela i mas litimapim nem bilong yu  
long dispela bikpela marimari bilong yu.  
Tru, marimari bilong yu em i bikpela samting tru.  
Krai i bin dai bilong kisim bek mipela,  
na long blut bilong em, em i tekewe olgeta rong bilong mipela.  
Soim dispela marimari gen long mipela,  
na givim olgeta kain save wantaim gutpela tingting long mipela.  
Bipo yu bin tok long dispela samting yu laik mekim long wok bilong Krai.  
Bihainim dispela tingting tasol  
na soim mipela dispela laik bilong yu bipo i stap hait.  
Stiaim olgeta samting i go i go,  
na long taim yu makim pinis,  
bungim olgeta samting long Krai,  
olgeta samting bilong heven na bilong graun tu,  
bai Krai i ken i stap het bilong olgeta samting.



## **Mipela i tenkim Yu, God Papa, Yu gut olgeta**

L: God, yu gutpela Papa, yu laikim mipela tru. Mipela i litimapim nem bilong yu. Olsem na mipela olgeta i tok:

### **Ol: Mipela i tenkim yu, God Papa, yu gut olgeta.**

L: God, yu gutpela Papa, yu salim Pikinini bilong yu Jisas i kam long mipela. Jisas i stretim ol rong bilong mipela. Em i dai long diwai kros bilong kisim bek mipela. Mipela i amamas nau. Olsem na mipela olgeta i tok:

### **Ol: Mipela i tenkim yu, God Papa, yu gut olgeta.**

L: God, yu gutpela Papa, yu salim Holi Spirit i kam long mipela. Em i Spirit bilong Jisas i save wok namel long mipela nau. Em i save helpim mipela long onarim yu nau. Olsem na mipela olgeta i tok:

### **Ol: Mipela i tenkim yu, God Papa, yu gut olgeta.**

L: God, yu gutpela Papa, yu bin bungim mipela na mipela i kamap pipel bilong yu. Yu bin mekim mipela i wanlain tru bilong yu. Yu bin blesim mipela oltaim. Olsem na mipela olgeta i tok:

### **Ol: Mipela i tenkim yu, God Papa, yu gut olgeta.**

L: God, yu gutpela Papa, yu wokim heven na graun. Yu singautim mipela i kam long kingdom bilong yu. Yu laik givim mipela bikipela amamas bilong oltaim. Olsem na mipela olgeta i tok:

### **Ol: Mipela i tenkim yu, God Papa, yu gut olgeta.**

## **Yumi litimapim nem bilong Bikipela (Sam 95:1-6)**

L: Yupela kam, yumi mekim song bilong litimapim nem bilong Bikipela. Yumi tingting long strongpela God, em i kisim bek yumi, na yumi singim song na amamas long em.

### **Ol: Yumi litimapim nem bilong Bikipela.**

L: Yumi go klostu long em na tenkyu long em. Yumi mekim sampela song bilong amamas na litimapim nem bilong em.

### **Ol: Yumi litimapim nem bilong Bikipela.**

L: Long wanem, Bikipela em i strongpela God, em i strongpela king na em i antap long olgeta giaman god.

### **Ol: Yumi litimapim nem bilong Bikipela.**

L: Em i save bosim olgeta hap bilong graun. Long olgeta ples i daun tumas i go inap long olgeta maunten i antap tru.

### **Ol: Yumi litimapim nem bilong Bikipela.**

L: Em yet i wokim graun na solwara, olsem na em i bosim ol.

**Ol: Yumi litimapim nem bilong Bikpela.**

L: Yupela kam, yumi daunim het na yumi lotu long em. Bikpela i bin wokim yumi. Orait yumi go klostu long em na brukim skru.

**Ol: Yumi litimapim nem bilong Bikpela.**

**Litimapim nem bilong Bikpela (Sam 148)**

L: Litimapim nem bilong Bikpela. Yupela olgeta i stap long heven antap, litimapim nem bilong Bikpela.

**Ol: Litimapim nem bilong Bikpela.**

L: Yupela olgeta ensel, litimapim nem bilong em!

Yupela olgeta ami bilong heven, litimapim nem bilong em.

**Ol: Litimapim nem bilong Bikpela.**

L: San na mun, yutupela litimapim nem bilong em!

Na olgeta sta i lait tumas, litimapim nem bilong em!

**Ol: Litimapim nem bilong Bikpela.**

L: Heven antap tru, litimapim nem bilong em.

Wara i stap antap long skai, litimapim nem bilong em!

**Ol: Litimapim nem bilong Bikpela.**

L: Ol dispela samting i mas litimapim nem bilong Bikpela, long wanem, em yet i tok na ol i kamap na i stap.

**Ol: Litimapim nem bilong Bikpela.**

L: Em i tok, na ol i stap oltaim long hap bilong ol, na ol i no inap sakim tok bilong em.

**Ol: Litimapim nem bilong Bikpela.**

L: Yupela ol traipela pis, na ol samting i stap long as bilong solwara i daun moa, na lait i kamap long klaut, na ren ais, na ol klaut nabaut, na strongpela win i save bihainim tok bilong Bikpela, yupela litimapim nem bilong em.

**Ol: Litimapim nem bilong Bikpela.**

L: Yupela ol bikpela maunten na ol liklik mauten, ol diwai i save karim kaikai na ol diwai bilong bus, olgeta abus ol man i save bosim na ol wel abus, na ol pukpuk na ol pisin, yupela litimapim nem bilong Bikpela.

**Ol: Litimapim nem bilong Bikpela.**

L: Yupela ol king na olgeta lain manmeri, na ol gavman na ol arapela hetman, na ol yangpela man na ol yangpela meri, na ol lapun na ol pikinini, yupela olgeta litimapim nem bilong Bikpela.

**Ol: Litimapim nem bilong Bikpela.**

L: Tru tumas, olgeta i mas litimapim nem bilong Bikpela, Biknem bilong em wanpela i winim tru biknem bilong olgeta manmeri. Biknem bilong em i antap tru, i winim heven na graun.

**Ol: Litimapim nem bilong Bikpela.**

L: Em i laikim tru ol Israel na em i save strongim ol manmeri bilong em, olsem na ol i save litimapim nem bilong em.

**Ol: Litimapim nem bilong Bikpela.**

**Song bilong amamas long Bikpela (*Sam 149:1-5*)**

Litimapim nem bilong Bikpela!

Singim nupela song long em.

Yupela ol manmeri i save bihainim em oltaim,

yupela litimapim nem bilong em long taim yupela i bung long lotu.

Yupela ol Israel, yupela mas belgut long God i bin wokim yupela.

Yupela ol manmeri bilong Saion, amamas long king bilong yupela.

Singsing, na litimapim nem bilong em.

Paitim ol kundu na garamut na paitim ol gita

bilong litimapim nem bilong em!

Bikpela i laikim ol manmeri bilong em.

Na em i save litimapim nem bilong ol manmeri i save daunim ol yet, na mekim ol i winim pait.

Ol manmeri bilong God i amamas long ol i win pinis.

Na taim ol i bung long kaikai,

ol i ken mekim ol song bilong amamas.

**Litimapim nem bilong Bikpela (*Sam 150:1-6*)**

L: Litimapim nem bilong God insait long haus bilong em.

**Ol: Yumi amamas long Bikpela strong bilong em i stap long heven.**

L: Em i bin mekim ol bikpela wok. Olsem na yumi litimapim nem bilong em. Em i stap nambawan tru na em i gat biknem i antap tru. Yumi litimapim nem bilong em.

**Ol: Yumi amamas long Bikpela strong bilong em i stap long heven.**

L: Winim biugel na litimapim nem bilong em. Paitim ol gita samting na mekim olkain musik na litimapim nem bilong em.

**Ol: Yumi amamas long Bikpela strong bilong em i stap long heven.**

L: Paitim kundu na mekim singsing na litimapim nem bilong em.  
Paitim gita na winim mambu na litimapim nem bilong em.

**Ol: Yumi amamas long Bikpela strong bilong em i stap long heven.**

L: Paitim ol plet bras na mekim krai bilong en i go na litimapim nem bilong Bikpela. Paitim ol plet bras strong moa, bai krai i kamap bikpela na litimapim nem bilong Bikpela.

**Ol: Yumi amamas long Bikpela strong bilong em i stap long heven.**

L: Yupela olgeta samting i gat laip, yupela litimapim nem bilong Bikpela. Litimapim nem bilong Bikpela.

**Ol: Yumi amamas long Bikpela, strong bilong em i stap long heven.**

### **Song bilong amamas long God (*Sam 67*)**

L: God, yu ken marimari long mipela na mekim gut long mipela.  
Yu ken lukluk i kam long mipela na helpim mipela.

**Ol: Tru tumas, God i mekim gut long mipela.**

L: Olsem na olgeta manmeri i ken save long pasin bilong yu  
na olgeta lain i ken save olsem yu inap kisim bek ol.

**Ol: Tru tumas, God i mekim gut long mipela.**

L: God, mi laik bai olgeta manmeri i ken amamas long yu  
na litimapim nem bilong yu.

**Ol: Tru tumas, God i mekim gut long mipela.**

L: Olgeta lain manmeri i ken belgut na singsing amamas, long wanem, yu bai skelim pasin bilong olgeta manmeri long stretpela kot bilong yu, na yu save stiaim ol lain manmeri long gutpela rot.

**Ol: Tru tumas, God i mekim gut long mipela.**

L: God, mi laik bai olgeta manmeri i ken amamas long yu  
na litimapim nem bilong yu.

**Ol: Tru tumas, God i mekim gut long mipela.**

L: Planti gutpela kaikai i kamap pinis long graun bilong mipela.  
God, em i God bilong mipela,  
em i bin mekim gut tru long mipela.

**Ol: Tru tumas, God i mekim gut long mipela.**

L: Tru tumas, God i mekim gut long mipela.  
Olgeta manmeri bilong graun i mas i stap aninit long em.

**Ol: Tru tumas, God i mekim gut long mipela.**

## **Song bilong Sekaraia (Lu 1:68-79)**

Yumi litimapim nem bilong Bikpela, God bilong Israel.  
Em i kam na i helpim yumi ol manmeri bilong em,  
na em i kisim bek yumi.

Long lain bilong wokman bilong em Devit,  
em i sanapim wangepela strongpela man bilong kisim bek yumi,  
olsem bipo yet em i bin tok long maus bilong ol profet bilong em.  
Em i tok bai em i kisim bek yumi long han bilong ol birua bilong yumi,  
na long han bilong ol man i bel nogut tru long yumi.

Em i marimari long ol tumbuna bilong yumi na i helpim ol.  
Na em i tingim yet dispela kontrak bipo em yet i mekim.  
Em i tok tru antap long tumbuna bilong yumi Abraham.  
Na nau em i laik mekim long yumi olsem bipo em i tok.  
Em i laik kisim bek yumi long han bilong ol birua,  
na yumi ken holim wok bilong em, na yumi no ken pret.

Olsem na olgeta taim yumi stap laip,  
yumi ken wokabaut long ol pasin i stret long ai bilong em,  
na yumi ken pulap long ol gutpela gutpela pasin em i laikim.

Na yu, pikinini,  
bihain bai ol i kolim yu profet bilong God Antap Tru.  
Bai yu go pas long Bikpela, bilong redim  
rot bilong em.  
Bai yu lainim ol manmeri bilong em na  
bai ol i save,  
long bikpela marimari bilong em.

God i laik rausim sin bilong ol na kisim  
bek ol.

Bai em i salim tulait bilong heven i kam long  
yumi, bilong givim lait long ol manmeri i  
stap long ples tudak.

Bai em i stiaim lek bilong yumi, na bai  
yumi wokabaut long rot bilong bel isi.



## **Song bilong Maria (*Lu 1:46-55*)**

Bel bilong mi em i litimapim nem bilong Bikpela.  
Na spirit bilong mi em i amamas long God,  
em i Helpim bilong mi na em i save mekim mi i stap gut tru.  
Mi wokmeri bilong em, mi samting nating,  
tasol em i lukim mi na em i marimari long mi.  
Nau na bihain tu bai olgeta lain manmeri i tok long God  
i bin givim bikpela amamas long mi.  
God i Gat Olgeta Strong,  
em i bin mekim narakain samting tru bilong helpim mi,  
na nem bilong em i stap holi.  
Em i save marimari long ol manmeri i aninit long em.  
Em bai i mekim olsem tasol long ol manmeri i stap nau,  
na long ol manmeri i kamap bihain inap oltaim oltaim.  
Han bilong em i bin mekim strongpela wok.  
Ol manmeri i save ting ol i nambawan tru  
na i litimapim nem bilong ol yet, em i bin rausim ol i go nabaut.  
Em i daunim ol strongpela king,  
na em i litimapim ol manmeri i no gat nem.  
Em i givim planti gutpela samting long ol manmeri i hangre,  
na bel bilong ol i pulap tru.  
Tasol ol manmeri i gat planti samting, em i rausim ol i go nating.  
Em i helpim wokman bilong em, Israel,  
na em i tingim yet promis em i bin mekim long Abraham  
na long ol tumbuna bilong yumi,  
long em bai i marimari oltaim long ol lain bilong ol i kamap bihain.

## **Tenkyu long God (*2 Ko 1:3-4*)**

God, mipela i litimapim nem bilong yu.  
Yu God na Papa bilong Bikpela bilong mipela, Jisas Krais.  
Yu Papa bilong mipela, na yu God bilong marimari.  
Yu God bilong mekim isi bel bilong olgeta manmeri i gat hevi.  
Long olgeta hevi i kamap long mipela,  
yu save mekim isi bel bilong mipela.  
Olsem na mipela inap long mekim isi  
bel bilong ol manmeri i gat kain kain hevi,  
olsem yu save mekim isi bel bilong mipela.

## OL PRE BILONG ASKIM NA TRASTIM GOD

*Yumi ol Kristen i save bilip: God i no stap longwe long yumi. God i redi oltaim long helpim yumi. God i laik givim olgeta gutpela samting long yumi.*

*Baibel i tok olsem: “Papa bilong yupela i stap long heven em bai i amamas long givim ol gutpela samting long ol manmeri i pre long em” Mt 7:11).*

*God i no lusim tingting long yumi long taim yumi gat wari, long taim sik i painim yumi, long taim yumi kamap lapun. Na God i no givim baksait long yumi long taim yumi bikhet na mekim sin. Orait, yumi ken bilip: God i harim ol pre bilong yumi. Tasol yumi mas redi tu long bihainim tok bilong God olsem Jisas i bin tok: “Papa, yu no ken bihainim laik bilong mi. Nogat. Yu mas bihainim laik bilong yu tasol.” Lu 22:42).*

### **Marimari bilong God i no inap lusim yumi (Ro 8:37-39)**

God Papa, Jisas i bin dai na i kirap bek.

Em i stap long rait han bilong yu.

Em i save was bilong helpim mipela.

Yes, Papa, yu save laikim mi tru,

na mi bilip tru olsem,

i no gat wanpela samting

em inap long tekewe mipela long marimari bilong yu.

Ating dai o laip, o ol ensel o ol strongpela spirit,

o samting nau i stap,

o samting bai i kamap bihain,

o kain kain samting i gat strong,

o samting bilong antap,

o samting bilong daunbilo,

o ol arapela samting i stap nabaut,

dispela olgeta samting i no inap pasim laik bilong yu.

Dispela laik yu bin givim mipela long Jisas Krais,

em i Pikinini bilong yu.



## **Pre bai God i tekewe sin (*Sam 51:1-2, 10-12*)**

God, yu as bilong marimari, yu ken sori long mi.

Marimari bilong yu i bikpela tru,

olsem na mi laik yu rausim olgeta pasin nogut bilong mi.

Yu wasim mi olgeta, na bai pasin nogut i no ken i stap moa long mi.

Rausim sin bilong mi na mi ken kamap klin.

God, yu wokim nupela klinpela bel insait long mi.

Putim nupela spirit insait long mi na bai mi bihainim yu tasol.

Nogut yu rausim mi na mi stap longwe long yu.

Larim Spirit bilong yu yet i stap long mi,

na yu no ken tekewe em long mi.

Bipo mi bin amamas long yu bin kisim bek mi,

na nau mi laik bai yu givim mi dispela amamas gen.

Kirapim laik bilong mi long bihainim tok bilong yu,

na strongim mi oltaim long mekim olsem.

## **Man i gat hevi na i pre long God i helpim em (*Sam 6:2-7*)**

Bikpela, mi no gat strong moa,

olsem na yu ken marimari long mi.

Strong bilong mi i pinis olgeta. Yu ken mekim mi i orait gen.

Bel bilong mi i gat bikpela hevi tru.

Tasol Bikpela, yu olsem wanem?

Hamas taim yet bai mi stap long bel hevi?

Bikpela, yu kam, kisim bek mi.

Yu God bilong marimari oltaim,

yu ken helpim mi na bai mi no inap i dai.

Ol manmeri i dai pinis ol i no save tingim yu.

Long ples ol i stap long en ol i no save givim biknem long yu.

Mi singaut, singaut, na strong bilong mi i pinis olgeta.

Olgeta nait aiwara bilong mi i wasim bet bilong mi.

Mi krai moa yet na pilo bilong mi i wara olgeta.

Mi gat planti birua olsem na mi krai krai i stap.

Ai bilong mi i solap. Mi no inap lukim wanpela samting.

## **Man i askim God long helpim em (*Sam 69:1-3,5-8, 13-16*)**

God, helpim mi!

Wara i kamap antap pinis inap long nek bilong mi.

Mi go daun insait long bikpela tais.

I no gat strongpela graun bai mi sanap long en.

Mi wokabaut long wara i daun moa

na tait i laik karamapim mi olgeta.

God, mi wok long singaut, singaut long yu,

na strong bilong mi i pinis.

Na nek bilong mi em i drai,

na ai bilong mi i pen, long wanem,

mi wet longtaim tumas long yu helpim mi.

God, yu save pinis long mi,

mi krankiman tasol.

Ol sin bilong mi i no hait long ai bilong yu.

Bikpela, yu God i Gat Olgeta Strong,

yu no ken larim mi i mekim sampela pasin i no stret,

na bai ol manmeri i bilip long yu, ol i sem.

God bilong mipela Israel,

yu no ken larim mi mekim sampela pasin,

na bai ol man i tok nogut long ol manmeri i save lotu long yu.

Mi save bihainim yu,

olsem na ol man i tok bilas long mi,

na ol i mekim mi sem.

Ol brata bilong mi ol i lukim mi olsem man bilong narapela lain.

Na ol famili bilong mi ol i lukim mi olsem man bilong longwe ples.

Tasol maski, bai mi pre long yu, Bikpela.

God, long wanpela taim yu yet yu makim, yu ken bekim pre bilong mi.

Yu bai mekim olsem, long wanem, yu save laikim mi tumas,

na yu promis pinis long kisim mi bek, na yu no save giaman. Nogat tru.

Yu mas kisim bek mi long dispela tais,

bai mi no inap i go insait na lus long en.

Yu lukautim mi bai ol birua i no inap bagarapim mi,

na dispela wara i daun tumas em i no inap karamapim mi.

Yu no ken larim dispela tait i kisim mi.

Na yu no ken larim mi lus long wara i daun tru, bai matmat i daunim mi.



Bikpela, oltaim yu save laikim mi tru, na dispela i gutpela tumas,  
olsem na yu ken bekim pre bilong mi.  
Yu save marimari moa yet long mi,  
olsem na nau yu ken i kam helpim mi.

### **Man i bilip tru na i pre long God (*Sam 16*)**

God, yu lukautim mi.  
Mi kam long yu bai mi ken i stap gut.  
Yu Bikpela bilong mi.  
Olgeta gutpela samting mi holim, i kam long han bilong yu tasol.  
Ol manmeri bilong God, ol i gutpela manmeri tru.  
Mi save amamas tru long stap wantaim ol.  
Ol manmeri i save ran i go long ol giaman god,  
bai ol i karim planti hevi.  
Mi no ken bung wantaim ol na mekim ofa,  
na mi no ken lotu long ol god bilong ol.  
God, yu tasol yu bilong mi na mi no gat narapela samting moa.  
Yu givim mi olgeta samting mi sot long en.  
Laip bilong mi i stap long han bilong yu.  
Mi kisim olgeta gutpela samting long yu tasol.  
Tru tumas, ol dispela samting i gutpela tru!  
Mi litimapim nem bilong Bikpela, long wanem, em i save stiaim mi.  
Na long nait bel bilong mi i save skulim mi.  
Oltaim mi save pilim God i stap klostu long mi.  
Em i stap klostu na i givim strong long mi,  
olsem na i no gat wanpela samting i ken mekim mi pret na guria.  
Olsem na bel bilong mi i gutpela tru, na spirit bilong mi i amamas.  
Na mi no save pret liklik long wanpela samting.  
Long wanem, bai yu no larim mi go  
i stap long ples bilong ol manmeri i dai pinis.  
Na bai yu no larim man bilong yu yet i sting long matmat,  
long wanem, yu laikim mi tumas.  
Yu yet bai soim mi rot bilong kisim laip.  
Yu stap klostu long mi na mi save amamas moa yet.  
Yu save helpim mi na bel bilong mi i amamas oltaim oltaim.

## OL KAIN KAIN PRE

### Pre bilong pikinini

God Papa, blesim papamama bilong mi.  
Sambai long tupela, bai tupela i lainim mi stret long ol wok  
na pasin bilong ples bilong mi, na long ol wok na lo bilong yu.  
Helpim tupela, bai tupela i ken wokabaut wantaim yu oltaim.  
Na stiaim mi, bai oltaim mi harim tok  
na bihainim gutpela pasin bilong tupela. Amen.

### Pre bilong wanpela papa

God, Papa bilong mi,  
yu bin mekim mi kamap papa bilong dispela famili bilong mi.  
Mi amamas tru long dispela meri yu bin givim mi.  
Mi lukim ol pikinini yu bin givim long mitupela,  
na bel bilong mi i amamas tru.  
Plis, lukautim famili bilong mi.  
Stiaim wok bilong mitupela papamama, bai gutpela pasin bilong mitupela  
i ken soim stretpela rot long ol pikinini.  
Nogut mitupela i skulim ol long maus tasol  
na pasin bilong mitupela i narakain.  
Mekim famili bilong mipela i stap gutpela tru  
olsem famili bilong Jisas na Maria na Josep long Nasaret. Amen.

### Pre bilong wanpela mama

Gutpela Papa, tenkyu tru, yu stap wantaim mi oltaim.  
Tenkyu, yu givim gutpela man long mi. Em i laikim mi.  
Tenkyu tru long ol pikinini yu bin givim long mi.  
Yu yet yu mekim mi inap long lukautim gut ol pikinini.  
Mi amamas, taim mi lukim pikinini i lap namba wan taim.  
Mi amamas long namba wan tok ol i mekim,  
long namba wan taim ol i wokabaut.  
Yes, mi amamas oltaim mi lukim ol pikinini i kamap bikpela liklik.  
Plis, God Papa, lukautim gut ol pikinini bilong mi.  
Mekim ol i kamap gut na strong long laik bilong yu. Amen.

## **Pre long wasensel**

Santu Ensel bilong mi, yu stap long ai bilong God.  
Mi askim yu, helpim mi long harim tok bilong God  
na wokabaut long rot bilong em.  
Satan i laik traim mi long mekim pasin nogut.  
Helpim mi long bihainim gutpela pasin tasol.  
Helpim mi long taim mi gat sik na long taim mi gat hevi.  
Helpim mi long mekim gut long ol arapela manmeri.  
Wantaim yu, mi laik onaim na tenkim God olgeta de. Amen.

## **Pre bilong famili**

L: God, yu kamapim famili bilong mipela: papa, mama na pikinini.  
Yu bungim mipela pinis long laik na amamas.  
Tenkyu, God Papa.

### **Ol: Tenkyu God Papa.**

L: Plis, God Papa, blesim famili bilong mipela,  
bai sik i no ken kisim mipela;  
na bai olgeta wari i ken i stap longwe.

### **Ol: Harim pre bilong mipela.**

L: Lukaut long mipela,  
bai bikpela kros i no ken kirap insait long haus bilong mipela.

### **Ol: Harim pre bilong mipela.**

L: Helpim mipela long sindaun gut na wok gut wantaim.

### **Ol: Harim pre bilong mipela.**

L: Strongim mipela long bihainim gutpela pasin tasol.

### **Ol: Harim pre bilong mipela.**

L: Mekim mipela i sindaun gut wantaim ol manmeri i stap klostu.

### **Ol: Harim pre bilong mipela.**

L: Pogivim rong bilong mipela, taim mipela i bikhet long yu.

### **Ol: Harim pre bilong mipela.**

L: Jisas, stap wantaim mipela  
na bungim mipela wantaim yu long kingdom bilong God.

### **Ol: Amen.**



## Pre bilong lapun

God Papa, marimari long mi. Mi lapun pinis nau.  
Win bilong mi i sot. Mi wokabaut isi isi.  
Sampela taim mi no inap wokabaut,  
mi sik na mi karim pen.  
Bipo mi strong na mi mekim ol kain kain wok. Tasol nau  
mi no inap. Mi sindaun tasol na wetim singaut bilong yu.  
Mipela manmeri bilong graun i mas karim planti hevi.  
God Papa, yu save long ol dispela hevi.  
Tasol mi laik tenkyu long yu long ol gutpela samting  
yu bin givim mi long taim mi strong yet.  
Mekim ol pikinini bilong mi i bihainim gutpela rot.  
Helpim ol long tingim mi. Mi no pret long dai.  
Long wanem, mi save, yu stap wantaim mi. Amen.

## Pre bilong yangpela

God, yu Papa bilong mipela ol yangpela manmeri.  
Mipela i tenkim yu. Yu bin givim laip long mipela.  
Nau mipela i wok long kamap bikpela man na meri.  
Mipela i laik helpim famili,  
na mipela i laik helpim ples na kantri i kamap gut.  
Papa, givim strong bilong yu long mipela.  
Jisas, yu brata bilong mipela,  
helpim mipela long bihainim yu.  
Planti taim mipela i pilim olsem mipela i stap wanpis,  
na mipela i hatwok long kamap gutpela na strongpela  
manmeri. Helpim mipela bai mipela yet i ken sanap  
na mekim wok wankain olsem yu bin mekim. Holi Spirit,  
stiaim mipela bai mipela i ken bihainim pasin bilong  
strongpela bilip,  
na bilong helpim ol bratasusa.  
Blesim mipela na olgeta yangpela manmeri  
bilong Papua Niugini. Amen.



## **Pre long Santu Alois, wasman bilong ol yangpela manmeri**

Santu Alois, God i bin helpim yu long laikim na bihainim klinpela pasin olgeta de bilong laip bilong yu. Na yu no pret long kisim sik, long taim yu go helpim ol sikmanmeri. Yu lukim Jisas long pes bilong ol. Mipela i askim yu, helpim ol yangpela manmeri long bihainim pasin bilong yu. Helpim ol long laikim God moa long olgeta samting bilong graun. Strongim ol long klinpela pasin. Skulim ol long yusim save na strong bilong ol bilong helpim ol arapela manmeri. Amen.


## **Pre long Santu Tomas Akwainas, wasman bilong ol sumatin**

Santu Tomas, God i bin blesim yu wantaim bikpela save. Save bilong yu long olkain samting i antap moa. Ol buk yu bin raitim i helpim planti manmeri inap long nau. Tasol yu no bin litimapim nem bilong yu yet. Nogat. Yu bin mekim ol dispela wok bilong onarim God na bilong helpim ol manmeri. Mipela i askim yu, helpim mipela long stadi gut. Helpim mipela long yusim save bilong mipela long litimapim nem bilong God na long helpim ples na kantri bilong mipela. Amen.

## **Pre bilong meri i gat bel**

God Papa, mi tingting oltaim long pikinini mi laik karim. Mi askim yu, was long mi, bai planti pen, trabel na sik i no ken kamap long mi na long pikinini bilong mi. Mekim pikinini i slip stret long bel bilong mi. Plis God Papa, helpim mi long karim gut dispela pikinini. Kirapim oltaim gutpela tingting insait long mi, bai mi ken was gut long pikinini, wankain olsem Santu Maria i bin was long Jisas. Amen.

## **Pre bilong papamama long taim pikinini i stap longwe**



Sori, God Papa, mipela i wari tumas long pikinini bilong mipela. Em i stap longwe. Em i gutpela pikinini. Mipela i laikim em tumas. Oltaim mipela i tingting long em. Mipela i wetim ol pas na toksave i kam long em. God Papa, lukautim em, nogut sik i painim em o birua i bagarapim em. Helpim em long mekim gut wok bilong em. Plis, salim pikinini i kam bek long mipela, bikos mipela i laik lukim pes bilong em. Nogut mipela i dai na pikinini i stap longwe. Amen.

## **Pre bilong meri, man bilong em i stap longwe**


God Papa, yu bin pasim mi wantaim man bilong mi long marit. Man bilong mi i bin stap longwe long mi longtaim tumas. Olsem na taim mi lukim olgeta wok em i bin mekim, na haus em i bin wokim long mi, mi save sori tru. God Papa, mi laik askim yu, bai yu was gut long em. Mi no laik harim tok olsem: em i gat sik o wanpela samting i paulim em. Plis, God Papa, mekim bai wanpela de em i kam bek long ples, na mitupela i ken stap gut na amamas wantaim. Ol pikinini bilong mitupela tu i krai long papa bilong ol. Tru, sapos papa i stap wantaim ol na i lukautim ol, ol i ken save gut long yu, Bikpela Papa bilong ol, na ol i ken amamas long yu. Mipela olgeta bai onarim yu long nem bilong Jisas Krais i Pikinini bilong yu. Amen.

## **Pre bilong marit i gat hevi**

God Papa, yu bin mekim marit i samting bilong wanpela man na wanpela meri tasol. Long marit bilong mitupela i gat bikpela hevi. Mitupela i lus olgeta nau. Plis God Papa, strongim bek marit bilong mitupela. Marimari long mitupela, bai mitupela i ken painim rot bilong stretim sindaun bilong mitupela. Amen.

## **Pre long taim bilong hevi**

Bikpela, yu God bilong marimari. Bipo yu bin tok, yu laik mekim orait olgeta manmeri; yu save harim oltaim ol manmeri i singaut long yu long taim bilong hevi; yu laik mekim gut long ol. Na olsem yu laik helpim ol. Tude tingim promis bilong yu na tekewe ol dispela samting i daunim mipela. Lukim mipela i sori long ol rong bilong mipela. Helpim mipela, bai ol samting nogut mipela i bin mekim i no ken bagarapim mipela. Strongim mipela, bai samting nogut ol arapela i bin mekim i no ken bagarapim mipela. Marimari long mipela. Mipela i singaut long nem bilong Krais, em i Bikpela bilong mipela. Amen.



## **Pre long taim bilong sik**

God Papa, mi pikinini bilong yu, mi gat sik. Mi save olgeta samting i kam long han bilong yu. Sampela taim yu larim sik i kam painim mipela. Planti taim ol sik i traim bilip bilong mipela. Plis, marimari long mi. God Papa, save bilong yu i bikpela tru. Sapos yu laik tekewe dispela sik bilong mi, mi tenkyu tru long yu. Sapos yu laik sik bilong mi i stap, orait, i ken i stap. Mi no ken skelim laik bilong yu, o kros long yu. Nogat tru. Mi mas tingting long Pikinini bilong yu i karim planti pen tumas. Olsem na mi tu, mi mas karim sik bilong mi wankain olsem Jisas i bin karim diwai kros bilong em. Amen.

## **Pre long taim bilong traim**

Bikpela Jisas, mi gat hevi. Sampela taim, laik bilong mi i save pulim mi long samting nogut. Long taim bilong traim, mi no tingim tumas tok bilong yu na gutpela sindaun bilong ol bratasusa. Nogat. Mi tingim laik bilong mi tasol, na bel bilong mi i giamanim mi long mekim sin. Tasol mi save yu stap klostu long mi, na yu redi long helpim mi long abrusim sin. Yu bin tokim mipela olsem: “Long graun bai yupela i gat hevi. Tasol bel bilong yupela i ken i stap strong. Mi winim pinis pasin bilong dispela graun.” Dispela tok bilong yu i save strongim mi. Sambai long mi nau na oltaim. Amen.

## **Pre bilong strongim bilip**

God Papa, bilip bilong mi i no strong. Planti kain samting bilong graun i laik karamapim bilip bilong mi, olsem gras nogut i karamapim gaden. Sambai long mi. Nogut ol pilai, ol bisnis, ol wok bilong ples, ol wok bilong gavman, na ol wok moni i daunim bilip bilong mi. Helpim mi, bai bilip bilong mi i ken strong olsem traipela diwai, na olgeta wok bilong mi i ken soim bilip bilong mi. Amen.

## **Pre bilong givim mi yet long God (*Santu Ignisius i wokim*)**

Bikpela, kisim mi. Bikpela, kisim mi olgeta. Kisim olgeta tingting bilong mi na save bilong mi na laik bilong mi. Yu tasol yu bin givim olgeta samting long mi. Nau mi laik givim bek long yu, bai yu yet yu ken bosim. Helpim mi, bai mi ken laikim yu tru. Em tasol. Mi no ken singaut long narapela samting. Amen.

## **Pre bilong wok bung wantaim**

God Papa, Jisas i promis pinis, sapos ol manmeri i tingim em na ol i bung long wanpela ples, orait bai em i stap namel long ol. Mipela i tingim dispela tok bilong Jisas na mipela i pre long yu: Mekim mipela i pilim Jisas i stap wantaim mipela. Strongim mipela long bung wantaim long mekim wok (*Kolim wok...*). Mekim mipela i pilim marimari na bel isi bilong yu long taim mipela i autim tok i tru na long taim mipela i mekim gutpela pasin long ol bratasusa. Mipela i pre long nem bilong Jisas Kraiss, em i Bikpela bilong mipela. Amen.

## **Pre long Santu Maria (*Santu Bernard i wokim*)**


Virgo Maria, yu laikim mi. Mi save, sapos mi kam long yu na askim yu, bai yu helpim mi. Mi bilip tru long dispela, olsem na mi kam long yu na mi sanap long ai bilong yu. Mi sori long olgeta rong bilong mi. Yu mama bilong Pikinini bilong God i kamap man, yu no ken pasim yau long pre bilong mi. Marimari long mi, na harim pre bilong mi. Amen.

## **Pre long Santu Josep, waspapa bilong Jisas**

Santu Josep, God i amamas long yu. Em i makim yu bilong lukautim Jisas na Mama bilong em, Maria. Na yu bin mekim gut dispela wok bilong yu. Tude mipela i askim yu: lukautim ol pipel bilong God. Amen.

## **Pre bilong helpim Pop, Bisop, Pris na arapela wokmanmeri bilong Sios**

God Papa mipela i pre bilong helpim Pop (*Nem...*) bai em i ken stiaim na strongim Sios. Helpim Bisop bilong mipela (*Nem...*) na olgeta Pris, bai ol i ken stap wokman tru bilong Jisas. Helpim olgeta arapela wokmanmeri bilong sios bai ol i ken wok wantaim long bringim planti manmeri i go insait long kingdom bilong yu. Helpim mipela, bai mipela i ken stap holi na bung gut wantaim. Na sambai long mipela taim mipela i laik dai, bai mipela i ken i go long heven. Amen.



## **Pre long Santu Rafael, wasman bilong ol pipel i wokabaut longwe**

Santu Rafael, God i bin makim yu bilong lukautim Tobaias taim em i wokabaut i go long ples i longwe. Mipela i askim yu, lukautim mipela ol manmeri i stap long rot na i ran long trak na kar, balus na kanu, bas na bot tude. Helpim mipela long stap klostu long God na long abrusim ol samting nogut. Amen.

## **Pre bilong blesim nupela kar**

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Gutpela Papa, yu strong olgeta. Yu bin givim gutpela tingting na save long ol man long mekim dispela kar. Mipela i askim yu long blesim dispela kar na husat man o meri bai yusim dispela kar, bai ol i ken raun gut long dispela kar na nogat hevi o birua i ken painim ol long rot. Taim ol i raun long kar, Kraisi i ken oltaim stap namel long ol olsem gutpela pren na wasman. Em i stap King wantaim yu na wantaim Holi Spirit, nau na oltaim. Amen.

*(Nau lida i ken tromoi holi wara long kar na long draiva.)*

## **Pre bilong blesim nupela haus**

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Gutpela Papa, mipela i askim yu long blesim na mekim holi dispela haus na tu olgeta famili na olgeta samting i stap insait long dispela haus. Ol gutpela wok na ol pre i kamap insait long dispela haus i ken karim gutpela kaikai insait long laip bilong dispela famili. Wankain olsem yu bin blesim haus bilong Abraham, Aisak na Jekop, blesim na santuim tu dispela haus na olgeta manmeri i kam insait long en. Ol ensel bilong yu ken lukautim gut dispela haus na olgeta manmeri i stap insait long haus, long nem bilong Kraist, em i Bikpela bilong mipela. Amen.

*(Nau lida i ken tromoi holi wara long haus na long famili i stap long en.)*

## Pre bilong blesim nupela bot

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Gupela Papa, yu bin mekim kamap olgeta samting bilong heven na graun. Mipela i askim yu long blesim dispela bot. Mekim bai olkain birua na samting nogut i no ken painim mipela, taim mipela i raun long dispela bot. Strongpela win na wara bai tait i no ken bagarapim o kapsaitim dispela bot. Blesim tu ol manmeri i yusim dispela bot, bai ol i ken oltaim stap aninit long gupela lukaut bilong yu. Mipela i pre long nem bilong Krais, em i Bikpela bilong mipela. Amen.

*(Nau lida i ken tromoi holi wara long bot na long ol manmeri.)*

## Pre bilong blesim nupela masin

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Gupela Papa, mipela i litimapim nem bilong yu long yu bin mekim kamap olgeta samting bilong heven na graun. Yu bin givim gupela save na tingting long ol manmeri bilong mekim ol kainkain samting bilong helpim wok bilong ol hia long graun i kamap gupela. Mipela i singaut long yu na mipela i askim yu long blesim dispela masin, mipela i laik yusim bilong helpim na kamapim ol wok bilong mipela. Wantaim blesing bilong yu, ol manmeri i no ken painim ol hevi o birua, taim ol i yusim dispela masin, na ol wok ol bai mekim wantaim dispela masin i ken givim glori na biknem long yu. Mipela i pre long nem bilong Krais, em i Bikpela bilong mipela. Amen.

*(Nau lida i ken tromoi holi wara long masin na ol manmeri.)*



## Pre bilong blesim bisnis

L. Helpim bilong yumi i kam long nem bilong Bikpela.



**Ol: Em i mekim kamap heven na graun.**

L. God Papa, yu gutpela na yu strong olgeta. Yu laik bai mipela ol manmeri bilong graun i yusim gut olgeta save na tingting, yu bin givim long mipela bilong strongim sindaun bilong mipela hia long graun. Mipela i askim yu, blesim dispela bisnis i bin kamap long hatwok bilong ol manmeri. Blesim tu ol manmeri i bin kamapim dispela bisnis, bai ol i ken ronim long gutpela na stretpela we. Mekim bai ol i no ken painim birua na bai bisnis i ken helpim gut nid bilong ol manmeri. Mipela i pre long nem bilong Krais, em i Bikpela bilong mipela. Amen.

*(Nau lida i ken tromoi holi wara long bisnis na long ol manmeri.)*

## Pre bilong blesim tuls bilong wok

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Gutpela Papa, mipela i litimapim nem bilong yu long wanem, yu bin mekim kamap olgeta samting bilong heven na graun. Yu bin givim gutpela save na tingting long ol manmeri bilong mekim ol kainkain wok bilong ol hia long graun. Mipela i askim yu bai yu blesim ol dispela tuls, mipela i laik yusim bilong mekim wok bilong mipela. Mipela i askim yu long blesim tu ol manmeri, husat bai yusim ol dispela tuls bilong mekim wok bilong ol, bai wok bilong ol i ken karim gutpela kaikai. Na long dispela rot yu tasol i ken kisim glori na biknem. Mipela i pre long nem bilong Krais, em i Bikpela bilong mipela. Amen.

*(Nau lida i ken tromoi holi wara long tuls na long ol manmeri.)*


## Pre bilong blesim rosari (*korona*)

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Ona na biknem i go long yu, God Papa. Yu bin givim pre korona long mipela bilong tingim ol misteri bilong laip, pen na indai

bilong Jisas Krai, Pikinini bilong yu. Yu givim mipela dispela grasia, bai mipela i ken tingim bikpela wok bilong kisim bek mipela. Taim mipela i tingim laip, pen na indai bilong Jisas Krai, mipela i laik onarim tu Santu Virgo Maria, Mama bilong Krai na Mama bilong Sios. Mipela i pre, bai yu ken blesim dispela korona na bai dispela pre i ken karim gutpela kaikai insait long laip na bilip bilong olgeta manmeri i save pre korona. Long nem bilong Krai, em i Bikpela bilong mipela. Amen.



*(Nau lida i ken tromoi holi wara long rosari na manmeri i laik pre long en.)*

## **Pre bilong blesim santu piksa na statyu**

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. God Papa, yu strong olgeta na stap oltaim. Yu no tambu long mipela i wokim ol piksa na statyu bilong ol Santu. Ol dispela piksa/statyu i ken helpim mipela long luksave long holi laip bilong ol Santu bilong yu na tu i ken helpim mipela long stap holi na bihainim pasin bilong ol. Mipela i pre bai yu ken blesim dispela piksa/statyu bilong N., ol i bin wokim bilong tingim na onarim wokman/meri bilong yu. Mekim bai long pre bilong Santu N., mipela i ken stap insait long bikpela grasia bilong yu. Mipela i pre long nem bilong Krai, em i Bikpela bilong mipela. Amen.


*(Lida i ken tromoi holi wara long piksa / statyu na ol manmeri.)*

## **Pre bilong blesim nupela rot**

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. Gutpela Papa, yu bin salim Pikinini bilong yu i kam long mipela, bai em i soim rot i go long yu. Em yet i Rot, Tok Tru na Laip. Mipela i askim yu



long blesim dispela rot na olgeta manmeri i save raun long dispela rot bilong mekim wok bilong ol, bai ol i no ken painim hevi o birua, taim ol i wokabaut long dispela rot. Oltaim yu ken stap klostu long ol na gutpela wokabaut bilong ol hia long graun i ken kisim ol i kamap long heven. Mipela i pre long nem bilong Krais, em i Bikpela bilong mipela. Amen.

*(Lida i ken tromoi holi wara long nupela rot na long ol manmeri.)*

## **Pre bilong blesim nupela bris**

L. Helpim bilong yumi i kam long nem bilong Bikpela.

**Ol: Em i mekim kamap heven na graun.**

L. God Papa, yu gutpela na stretpela olgeta. Oltaim yu laik stiaim wokabaut bilong mipela wantaim ol kain kain gutpela samting. Nau mipela i bung hia bilong askim blesing bilong yu long dispela bris, mipela i bin wokim bilong helpim wokabaut bilong mipela. Harim singaut bilong mipela na blesim dispela nupela bris, bai em i ken helpim gut ol manmeri i yusim. Mekim bai ol i no ken kisim bagarap, taim ol i yusim dispela bris. Oltaim yu ken stap olsem strongpela bris, na lukautim wokabaut bilong ol. Oltaim ol i ken kamap gut long narapela sait, na moa yet long dispela gutpela ples, we yu stap long en. Mipela i pre long nem bilong Krais, em i Bikpela bilong mipela. Amen.

*(Lida i ken tromoi holi wara long nupela bris na ol manmeri.)*



## OL PRE BILONG HELPIM SIOS

### **Pre bilong helpim Sios i stap long olgeta hap bilong graun**

God Papa, blesim mipela na helpim Sios bilong yu i stap long olgeta hap bilong graun. Pulapim em long spirit bilong tok tru na pasin sekan. Tekewe ol kranki tingting na strongim bilip. Sapos Sios i pundaun long wok bilong yu, litimapim em gen. Inapim Sios long mekim wok bilong yu. Mekim em i kamap wanbel gen long taim sampela lain i laik bruk na i go nabaut. God Papa, stiaim Sios bilong yu. Mipela i pre long nem bilong Jisas Krai, em i Bikpela bilong mipela. Amen

### **Pre long Santu Pita na Pol, tupela wasman bilong Sios**

Santu Pita, yu namba wan bilong ol Aposel. Jisas i bin givim ki bilong heven long yu. Em i mekim yu kamap wasman bilong Sios. Jisas i bin pre bilong strongim bilip bilong yu, bai yu inap strongim bilip bilong ol arapela Aposel. Yu bin holim dispela wok inap long taim yu dai long diwai kros, wankain olsem Jisas. Jisas i kolim yu ston. Antap long dispela ston em i sanapim Sios bilong em, na olsem strong bilong hel i no inap win long Sios. Santu Pita, yu namba wan Pop, mipela i singaut long yu: lukautim Pop (*Nem...*). Blesim em na wok bilong em. Santu Pol, pastaim yu birua long Jisas na ol disaipel bilong em. Tasol long strong bilong Jisas yu tanim bel. Na bihain, em i salim yu i go long ol manmeri i no bilip yet long em. Yu kamap bikpela misinari na yu kirapim Sios long planti ples. Yu no malolo liklik inap long taim ol i kilim yu i dai. Santu Pol, yu gutpela tisa bilong God. Ol pas bilong yu i helpim mipela long save moa yet long Jisas. Helpim mipela, bai paia bilong Holi Spirit i ken kirapim mipela long wok wantaim Jisas long mekim kingdom bilong em i kamap long olgeta ples. Amen.

### **Pre bilong helpim Kristen komyuniti bilong Daiosis na Peris**

Bikpela Jisas Krai, yu het bilong Sios, na yu het bilong lain manmeri bilong daiosis (peris) bilong mipela tu. Strongim mipela long pasin bilong laikim ol manmeri, na litimapim na helpim ol. Lukautim ol manmeri i no gat strong. Givim lait bilong tok tru long ol manmeri i tubel. Strongim ol husat i pret na holim han bilong ol

husat i pundaun nabaut. Stiaim ol manmeri i wok long painim rot. Kirapim ol manmeri i les na slek. Helpim mipela, bai mipela i ken givim long ol arapela manmeri wanem samting ol i sot long en, na mipela i ken karim hevi wantaim ol. Amen.

### **Pre bilong helpim Pop**

Bikpela Jisas Krais, mipela i bilip, Sios bilong yu i no ken bagarap, bikos yu stap wantaim em. Olsem na mipela i no wari na pret bai Sios bilong yu i pinis. Mipela i no save long olgeta samting i gutpela long Sios. Olsem na mipela i putim olgeta samting i laik kamap long han bilong yu. Mipela i laik askim wanpela samting tasol: soim gutpela rot long wokman bilong yu, Pop (*Nem...*) bai em inap long lukautim Sios bilong yu. Bihain givim em laip i stap oltaim wantaim yu. Amen.

### **Pre bilong helpim Bisop**

Bikpela, Jisas Krais, yu wasman na het bilong Sios bilong yu. Blesim bisop bilong mipela (*Nem...*) bai gutpela tok na wok bilong em i ken kirapim bel bilong mipela long bihainim tok bilong yu. Sambai long em, bai em i soim mipela pasin bilong laikim God na laikim ol arapela manmeri. Pulapim em long Holi Spirit, bai long gutpela skul bilong em, em i ken stiaim mipela, na mekim mipela i kamap holi pipel bilong yu. Amen.

### **Pre bilong helpim Pris na Diken**

Bikpela, Jisas Krais, yu bin tok olsem: *“Olgeta man i bin ting long nem bilong mi i lusim haus o brata o susa o papa o mama o pikinini o gaden, bai ol i kisim 100 moa, na bai ol i kisim laip i stap gut oltaim oltaim”* (Matyu 19:29). Olsem na mipela i pre bilong helpim ol pris na diken bilong mipela. Helpim ol long Holi Spirit bilong yu, bai ol i skulim mipela gut long tok bilong yu, bikos mipela i hangre oltaim long tok i tru na long laip i stap gut oltaim. Strongim ol, bai ol i no bihainim tingting bilong ol manmeri bilong dispela graun. Stap wantaim ol bai ol inap long strongim bilip bilong mipela. Nogut mipela i lus long rot. Stiaim ol, bai ol i go pas long mipela long pasin bilong laikim God na laikim ol arapela manmeri. Helpim ol, bai ol i mekim ol manmeri i kamap wanbel wantaim God. Na bai ol i bungim ol long lotu bilong Yukaris. Bikpela Jisas Krais, givim

mipela planti pris na diken i pulap long save na pasin bilong yu, bai ol i ken wok long kirapim na lukautim lain bilong yu inap long taim yu kam bek gen. Amen.

### **Pre bilong singautim wokmanmeri long Sios**

Bikpela Jisas Kraiss, yu gutpela wasman bilong mipela. Yu kamdaun bilong oraitim mipela. Yu putim ol wokmanmeri long Sios bilong yu, bai ol i skruim wok bilong yu. Mipela i singaut strong long yu: salim planti gutpela pris i kam long Sios, na planti brata na sista na katekis na ol wokmanmeri tu. Bipo tru yu makim ol pinis long wok bilong yu. Nau mekim, bai ol i bihainim gut singaut bilong yu. Was tru long ol bai ol i stap olsem sol na lait bilong graun, na bai ol i go pas long ol manmeri bilong bilip. Givim gutpela save long ol, bai ol i ken mekim Sios bilong yu i kamap gutpela long olgeta ples, na Sios i ken bringim mipela olgeta i go long heven. Amen.

### **Pre bilong helpim ol Pris na Brata na Sista**

God Papa, yu save singautim ol manmeri, bai ol i lusim olgeta samting na bihainim Kraiss tasol. Mipela i pre bilong helpim ol pris na brata na sista i bihainim pinis singaut bilong yu. Helpim ol, bai ol i wok long bihainim pasin bilong Kraiss. Na olsem ol i ken givim laip bilong ol bilong helpim ol manmeri. Amen.

### **Pre bilong helpim ol Katekis na olgeta wokmanmeri bilong Sios**

Bikpela, Jisas Kraiss, mipela i pre bilong helpim ol katekis na ol le wokmanmeri i skruim wok bilong yu long ples bilong mipela. Yu yet yu bin singautim ol, bai ol i holim wok bilong yu. Long strong bilong ol yet, ol i no inap long mekim bikpela wok bilong yu. Givim lait bilong yu long ol, bai ol i ken skulim mipela gut. Strongim ol, bai ol i ken helpim mipela long bihainim ol lo bilong yu. Mekim ol i kamap holi bai ol i ken go pas long mipela long ol gutpela Kristen pasin. Kirapim laik bilong mipela long harim oltaim tok bilong ol, na wok wantaim ol, bai ples bilong mipela i ken kamap gut. Amen.




### **Pre long Santu Teresia, wassantu bilong ol misinari**

Santu Teresia, laip bilong yu i sotpela, tasol i gutpela tru. Tru, yu no bin lusim kantri bilong yu na kamap misinari. Tasol oltaim yu tingim ol misinari. Oltaim yu pre na karim hevi bilong helpim ol. Na taim sik nogut i painim yu, yu bin ofaim dispela pen long God, bai em i blesim ol misinari. Mipela i askim yu long pre, bai wok bilong ol misinari i kamap gut; bai ol i helpim ol manmeri long bilip long Jisas na kisim laip bilong oltaim. Amen.

### **Pre long Santu Fransis Sevia, wassantu bilong ol misinari**


Santu Fransis, God i bin strongim yu long lusim ples bilong yu na bringim Gutnius i go long ol manmeri i stap longwe tru. God i bin blesim wok bilong yu, na olsem planti manmeri i kamap Kristen. Mipela i askim yu: pre bilong helpim ol misinari i wok long kantri bilong mipela, bai ol i ken stap strong long wok bilong ol. Helpim ol yangpela bilong mipela, bai planti bilong ol i kamap misinari bilong Jisas na ol i ken painim amamas long wok bilong bringim Gutnius bilong Jisas long ol arapela lain manmeri. Amen.



## OL PRE BILONG HELPIM KOMYUNITI

### **Pre long Santu Maikel, wasensel bilong Papua Niugini**

Santu Maikel, yu strongpela han bilong God. Yu ensel i lukautim kantri bilong mipela. Bipo yu bin lukautim ol manmeri i karim Gutnius i kam. Sambai long mipela nau long taim Satan i laik traime mipela. Was gut long Katolik Sios bai em i ken kamap strong. Na bringim bek ol manmeri i stap longwe long God. Wokabaut wantaim mipela long rot i go long heven. Bai mipela wantaim olgeta ensel na ol santu i ken onaim God oltaim oltaim. Amen.



### **Pre i go long Bleset Pita To Rot**

Bikpela Jisas Kraus, mipela i amamas long tingim Bleset Pita To Rot. Yu bin singautim em bilong mekim wok katekis namel long mipela. Holi Spirit i strongim bilip bilong em na em i no lusim wok bilong em long taim bilong hevi. Em i sanap strong na i autim Gutnius inap long dai bilong em. Harim pre bilong em na strongim bilip bilong mipela, bai mipela tu i stap redi long autim Gutnius long pasin bilong mipela, na bung gut long lotu na mekim wok marimari, bai kantri bilong mipela i kamap Kristen kantri tru. Long nem bilong Kraus, em i Bikpela bilong mipela. Amen.

### **Pre bilong helpim bikmanmeri bilong gavman**

Bikpela God, yu laik bai olgeta pipel i sindaun gut wantaim. Mipela i askim yu, soim rot long ol bikmanmeri bilong ol gavman bai ol i ken stretim olkain hevi olsem woa i no ken kamap. Helpim ol, bai ol toktok ol i mekim i ken strongim ol kantri long wok gut wantaim. Helpim ol long stretim ol kros i save kamap namel long ol kantri i gat narakain tingting, bilip, kala skin na kalsa. Long gutpela wok bilong ol gavman, kamapim gutpela taim long olgeta ples. Amen.

## **Pre bilong helpim kantri**

God Papa, yu mekim kamap olgeta ples, na yu wokim tu graun bilong mipela. Yu bilasim ples long ol maunten na bus, solwara na naispela rip. Yu putim ol kain kain manmeri long kantri bilong mipela. Nau olkain manmeri wantaim planti kain tok ples na pasin i stap. Tru, kantri bilong mipela i naispela tru. Tenkyu long olkain gutpela kaikai i save kamap long dispela graun; ol diwai i karim prut, ol kokonas, laulau na karuka. Tenkyu long ol pik i stap long bus na long ples, na ol pis long solwara. God Papa, nupela taim i kamap nau, na kantri i senis planti. Helpim mipela olgeta, bai mipela i no lusim ol gutpela pasin bilong ol tumbuna, na bai mipela i rausim ol pasin bilong tambaran na poisin. Mekim ol lain manmeri i wanbel na i bung wantaim. Nogut ol lain i bruk nabaut na pait wantaim. Mekim mipela, ol manmeri bilong kainkain ples na kala skin, olgeta i wok na stap gut wantaim na mekim nem bilong kantri i go bikpela. Helpim gavman long wok stret bai no gat manmeri i ken pret, tasol mipela olgeta i ken painim gutpela sindaun. Blesim tu ol lapun, bai ol i no wari tumas. Stiaim ol yangpela manmeri, bai ol i no ken tingting tumas long mani na pilai tasol. Kirapim tingting bilong ol, bai ol i helpim kantri na Sios bilong mipela. Amen.

## **Pre long taim bilong ileksen**


God Papa long Sam 72 yu skulim mipela long pre bilong helpim king na lida bilong mipela. Yu laik bai lida “i bosim ol manmeri bilong yu na ol rabisman long stretpela pasin”. Kantri bilong mipela i mas gat gutpela lida bilong lukautim ol pipel bilong yu. Givim mipela wisdom o gutpela save bai mipela i ken skelim gut ol man na meri husat i sanap long ileksen na makim ol gutpela lida tasol. Yu wokim heaven na graun na yu putim ol manmeri long bosim olgeta samting long graun. Helpim mipela long makim ol man na meri husat i gat wisdom na stretpela pasin bai ol i ken mekim ol gutpela lo, mekim ol gutpela polisi bilong gavman, kamapim ol gutpela projek, na lukautim gut mani bilong gavman. Helpim mipela tu long luksave long ol manmeri husat i yusim kainkain rot nogut long winim ileksen. Mipela i mekim dispela strongpela pre long nem bilong Jisas Krais em i Bikpela bilong mipela. Amen.

## **Pre bilong stopim pasin korapsen**

God Papa long Sam 52 yu skulim mipela olsem yu luksave pinis long dispela man husat i no laik na les bai yu helpim em na strongim em. Dispela kain man “i bilip strong long planti mani samting bilong en, na em i ting pasin nogut bai mekim em i stap gut”. Yu tok bai yu bagarapim em olgeta. God Papa, mipela i pre bai yu ken stopim gridi pasin na pasin korapsen i save bagarapim ol pipel long ples, na namel long ol wokmanmeri bilong gavman na ol kampani. Helpim mipela olgeta long harim gut tok bilong yu, na long mekim ol wok bilong mipela long stretpela pasin tasol. Mipela i mekim dispela pre long nem bilong Jisas Kraus em i bikpela bilong mipela. Amen.

## **Pre bai kaikai long gaden i kamap gut**

God Papa, yu bin tok olsem: “Yupela i askim, na bai mi givim long yupela.” Mipela i pre: blesim ol kaikai mipela i bin planim. Makim gut taim bilong san na taim bilong ren, bai olkain kaikai i ken kamap gut na mipela i ken amamas long planti kaikai bilong mipela. Mipela i no laik les long wok bilong mipela. Tasol mipela i no bosim san na ren. Mipela i save wok tasol. Mipela i laik wok gut, na olsem mipela i askim yu long blesim ol wok bilong mipela oltaim. Yu gutpela Papa bilong mipela, marimari nau long mipela ol pikinini bilong yu. Amen.



## **Pre long Santu Isidor, wassantu bilong ol fama**

Santu Isidor, yu save long ol wari na hatwok bilong ol fama, long wanem, yu yet i bin mekim dispela wok planti yia. Helpim ol fama, bai ol i ken wok hat, na ol samting ol i planim bai karim gutpela kaikai. Helpim ol fama long givim tenkyu long God na long serim ol samting ol i bin planim wantaim ol manmeri i hangre. Mekim ol fama na gavman i wok bung wantaim, bai olgeta manmeri i mas gat inap kaikai. Amen.

## **Pre long Santu Brendan, wassantu bilong ol pipel i raun long solwara**

Santu Brendan, planti yia yu bin ran long sip bilong bringim Gutnius bilong Jisas i go long ol manmeri i stap longwe. Long hatwok bilong yu, planti arapela misinari i painim rot i go long planti kantri. Mipela i askim yu, lukautim ol manmeri i ran long kanu o sip, bai ol i no bagarap, tasol ol i ken i stap gut. Helpim ol long tingim God i stap klostu long ol, na bihain bai ol i ken kamap long gutpela ples long heven. Amen.

## **Pre bilong pinisim pait**

God Papa, mipela i bin gat bikpela pait long ples bilong mipela. Nau mipela i bung hia long sekan gen. Pikinini bilong yu i bin lainim mipela long pasin sekan wantaim olgeta manmeri. Sambai long mipela, bai mipela i ken bihainim pasin bilong em. Mipela i askim yu long nem bilong Jisas Kraus, em i Bikpela bilong mipela. Amen.

## **Pre bilong miting**

L: Bikpela Jisas, yu bin tok: *“Sapos tupela o tripela manmeri i ting long nem bilong mi na bung long wanpela ples, orait mi stap namel long ol”* (Mt 18:20). Kam stap wantaim mipela long dispela miting.

### **Ol: Harim pre bilong mipela.**

L: Stiaim tingting bilong mipela, bai mipela i ken kirapim gutpela wok

### **Ol: Harim pre bilong mipela.**

L: Helpim mipela long autim ol toktok stret na bosim gut maus bilong mipela.

### **Ol: Harim pre bilong mipela.**

L: Helpim mipela long putim yau long ol toktok bilong ol narapela manmeri.

### **Ol: Harim pre bilong mipela.**

L: Strongim laik bilong mipela, bai mipela olgeta i bung long wok wantaim, bikos mipela wan wan i no inap.

### **Ol: Harim pre bilong mipela.**

L: Yumi pre:

God Papa, nau mipela laik kirapim dispela bikpela wok bilong (kolim...). Na mipela i laik stretim toktok long en. Mipela i

askim yu, blesim mipela, bai mipela i wanbel long dispela miting. Blesim wok bilong mipela, bai mipela i ken painim gutpela sindaun na mipela i ken amamas long wok wantaim yu na ol bratasusa bilong mipela.

**Ol: Amen.**

### **Pre bilong sekan na bel isi (*Santu Fransis i wokim*)**

Bikpela, mi laik stap wokman bilong yu. Mi laik yu bosim mi. Yusim mi long bringim gutpela taim long ol manmeri. Mi laik soim pasin bilong marimari, long ples ol i pait nabaut. Mi laik kirapim pasin bilong sekan, long ples ol i kros nabaut. Mi laik strongim bilip, long ples ol i no gat strongpela bilip. Mi laik bringim hop, long ol manmeri i givap. Mi laik bringim lait, long ol manmeri i stap long tudak. Mi laik bringim amamas, long ol manmeri i sori. Bikpela, yu God bilong mi, helpim mi. Nogut mi wari tumas long mi yet i stap bel isi. Maski long mi. Mi laik givim bel isi long ol arapela. Maski ol i no tingting tumas long mi, mi laik tingting gut long ol. Maski ol i no marimari long mi, mi laik marimari long ol. Mi bilip, sapos mi strong long pasin bilong givim, bai mi kisim bikpela blesing. Sapos mi save pogiv, bai yu tu pogivim mi. Na sapos mi dai, maski, bai mi kisim laip bilong oltaim. Amen.

### **Pre bilong pilai spot**

God Papa, mipela i tenkim yu, mipela inap long pilai gut na amamas wantaim ol narapela. Helpim mipela long bihainim gut ol lo bilong pilai. Na maski mipela i win o mipela i lus, helpim mipela long amamas tasol. Mipela i pre olsem long nem bilong Jisas Kraiss, em i Bikpela bilong mipela. Amen.

### **Pre bilong mekim gut long ol birua**

Jisas i tok olsem: *“Yupela i harim pinis, bipo ol i bin tok olsem: Yu mas laikim tru ol wantok, na yu mas bel nogut long ol birua bilong yu! Tasol mi tokim yupela olsem: Yupela i mas laikim ol birua bilong yupela na yupela i mas beten, bai God i marimari long ol manmeri i save mekim pasin nogut long yupela. Olsem bai yupela i stap pikinini bilong Papa bilong yupela em i stap long heven.”* (Mt 5:43-45). Yumi pre: God Papa, helpim mipela bai mipela i laikim olgeta manmeri,

wankain olsem mipela i laikim mipela yet. Maski ol i bilong narapela ples o kala skin o wok, helpim mipela long laikim ol. Amen.

### **Pre bilong helpim olgeta manmeri**

God Papa, yu strong olgeta na yu stap oltaim. Was gut long ol ples bilong mipela. Nogut hangre na sik na pait i kamap long mipela. Pikinini bilong yu, Jisas Kraisi, i bin dai long diwai kros bilong kisim bek mipela. Marimari long mipela na pogivim ol sin bilong mipela. Blesim Pop (*Nem....*) na ol bisop na ol pris, bai ol i lukautim gut mipela ol pipel bilong yu. Blesim tu ol lida bilong mipela, bai ol i wok strong oltaim bilong rausim ol pasin nogut na bilong kirapim ol gutpela pasin, bai olgeta ples bilong mipela i kamap gutpela. Bungim ol Kristen i bruk bruk long planti lain, bai ol i kamap wan famili gen. Long strong bilong yu mekim mipela i kamap holi, bai mipela i ken harim oltaim tok bilong yu, na bai yu ken amamas long ol gutpela pasin bilong mipela pikinini bilong yu. Helpim ol manmeri i stap yet na ol i dai pinis. Helpim ol manmeri i gat wari na ol manmeri i stap nogut. Mekim gut long mipela hia long graun, na bihain kisim mipela i go long heven. Amen





# BUNGIM KRAIS



# LONG OL SAKRAMEN



*“Ol sakramen i mak, Krai i bin kamapim na long ol dispela mak Holi Spirit i givim laip na helpim bilong Krai long Sios bilong em. Ol mak bilong ol sakramen i soim yumi wanem samting i kamap tru insait long laip bilong yumi. Ol sakramen inap long karim kaikai sapos yumi kisim ol wantaim gutpela tingting na gutpela bel.” (Katekismo 470).*

Jisas i tokim yumi olsem: *“Mi kam bai ol i ken kisim laip, na bilong laip i ken pulap tru long ol.” (Jn 10:10)* Dispela laip Jisas i laik givim long yumi, em laip bilong em yet. Olsem tasol yumi save kamap poroman bilong em, na pikinini tru bilong God Papa.

Jisas i save go long ol ples nabaut, na i helpim ol manmeri i bagarap. Em i bin promis olsem, *“Mi save stap wantaim yupela olgeta de, i go inap long dispela taim i pinis.” (Mt 28:20)*

Bihain Jisas i go bek long heven. Olsem na yumi no inap lukim em moa long ai bilong yumi. Tasol Jisas em inapim promis bilong em. Em i skruim dispela wok bilong em i go long ol sakramen bilong Sios.

Sakramen em i mak na rot bilong strong na grasia bilong God i kam long yumi ol bilipmanmeri. Jisas yet i namba wan sakramen, na long em God i save bungim yumi.

Long ol 7-pela sakramen yumi save bungim Jisas long ol bikipela taim bilong laip bilong yumi. Long dispela rot Jisas i save givim laip bilong em long yumi na skruim i go wok bilong kisim bek yumi.

Long **Baptais**, yumi kamap pikinini bilong God na memba bilong Sios.

Long **Konpirmasio**, yumi kisim Holi Spirit bilong skulim na strongim yumi ol pipel bilong God.

Long **Yukaris**, yumi kisim Bodi na Blut bilong Jisas olsem kaikai tru bilong yumi na yumi kamap wanbel.

Long **Konpesio**, God i tekewe ol sin yumi yet i mekim, bai Sios bilong em i ken i stap holi na i nogat asua bilong em.

Long **Welim Sikmanmeri**, God i strongim ol sikmanmeri bai ol i kamap orait gen na kisim bel isi.

Long **Ordo**, man i kamap wokman bilong Krai na bilong Kristen komyuniti bilong em, long mak bilong bisop, pris na diken.

Long **Kristen marit**, man na meri i pas wantaim na tupela kamap wanpela tru, wantaim Krai.

## BAPTAIS

Jisas i bin tok olsem: *“Tru tumas mi tokim yu: Sapos man o meri i no kamap nupela long wara na long Holi Spirit, em i no inap i go insait long Kingdom bilong God.”* (Jn 3:5)

Taim Jisas i salim ol Aposel i go, em i tok: *“Olsem na yupela i go mekim olgeta lain manmeri i kamap disaipel bilong mi. Na yupela baptaisim ol long nem bilong Papa na bilong Pikinini na bilong Holi Spirit.”* (Mt 28:19) Sios i bihainim dispela tok bilong Jisas na i redi long baptaisim ol manmeri.

Long sakramen bilong Baptais God i mekim wanem long yumi? Long sakramen bilong Baptais God i rausim yumi long tudak bilong Satan na putim yumi long lait bilong kingdom bilong em.

Em i givim laip bilong em yet long yumi na olsem yumi kamap pikinini bilong em, na memba bilong Sios, em bodi bilong Krais.

Long sakramen bilong Baptais ol bikpela manmeri i save tok “Yesa” long ol gutpela samting God i laik givim long ol.

Tasol olsem wanem long ol pikinini? Ol Katolik papamama i save bringim ol pikinini long kisim Baptais i laik, bai pikinini i mas kamap pikinini bilong God na memba bilong Sios. Em gutpela tingting bilong ol papamama.

Tasol Katolik Sios i strong long wanpela samting: Ol papamama i mas promis pastaim bai ol i lukautim gut dispela nupela laip, Holi Spirit i kirapim long sol bilong pikinini long Baptais. Na tupela i mas promis, bai tupela i soim Kristen pasin long pikinini.

Na Sios i laik tu, bai wanpela narapela memba bilong Kristen komyuniti i sambai long papamama long lukautim bilip na pasin bilong dispela nupela pikinini bilong God.

Sios i save givim sakramen bilong Baptais olsem: Ol i kapsaitim wara long poret bilong man/meri na ol i tok:

(Nem...), MI BAPTAISIM YU LONG NEM BILONG PAPA NA BILONG PIKININI NA BILONG HOLI SPIRIT.

Yu tingting liklik nau: yu baptais pinis. Yu pikinini bilong God. Yu Katolik. Yu nupela manmeri.

### **Pre bilong tenkim God long Baptais**

God Papa, long sakramen bilong Baptais yu mekim mi kamap nupela long wara na long Holu Spirit. Mi tenkim yu. Yu rausim mi long han bilong Satan na yu givim laip bilong yu long mi. Nau mi pikinini bilong yu.

Jisas Kraus, Pikinini bilong God, mi tenkim yu. Long dai na kirap bilong yu, yu bin kirapim mi long nupela laip. Mi pas wantaim yu olsem han na lip i pas long diwai. Nau mi memba bilong Pipel bilong God, Sios bilong yu.

Holi Spirit, mi tenkim yu. Yu stap insait long mi. Stiaim mi, bai wok na wokabaut bilong mi i bihainim laik bilong Papa, na i helpim ol bratasusa. Amen.

### **Pre bilong strongim gen promis bilong Baptais**

Bikpela Jisas Kraus, Ridima bilong mipela, mipela i kisim Baptais pinis, na mipela i tenkim yu long en. Mipela i pikinini bilong God. Mipela i Katolik. Mipela i memba bilong Pipel bilong God. Tude mipela i laik promis gen: Mipela i laik harim tok bilong yu na bihainim yu oltaim. Long olgeta Sande mipela i laik lotu wantaim ol wanbilip bilong mipela, na mipela i laik givim mipela olgeta long yu. Mipela i laik kisim Komunio planti taim, bai yu poromanip mipela long olgeta wok na wokabaut bilong mipela. Mipela i laik givim baksait long ol samting nogut. Na mipela i no sem long soim bilip bilong mipela long ai bilong olgeta manmeri. Mipela i laik strong long ol Kristen pasin. Jisas, helpim mipela long Holu Spirit bilong yu. Amen.

## **Baptais long taim bilong dai**

*Sapos wanpela man o meri o pikinini i laik dai na i no kisim baptais, tasol i no gat pris o katekis, yu yet inap long baptaisim em. Nogut yu larim em i dai nating. Long Baptais yu inap long opim rot i go long heven long em. Sapos em i pikinini yet, yu kapsaitim wara long poret bilong em na yu tok:*

**“(NEM...), MI BAPTAISIM YU LONG NEM BILONG PAPA NA BILONG PIKININI NA BILONG HOLI SPIRIT”.**

*Sapos em i bikpela man o meri, yu mas askim long laik bilong em na yu mekim pre bilong bilip na bilong sori wantaim em. Bihain yu baptaisim em. I gutpela sapos i gat sampela arapela Katolik i sanap wantaim yu long taim yu baptaisim em. Bihain, yu mas tok save long peris pris long dispela Baptais.*



## KONPIRMASIO

Jisas i bin promis long salim Holi Spirit i kam long ol manmeri i laik bihainim em. Em i tok olsem: *“Tasol Helpim tru bilong strongim yupela em Holi Spirit. Na long nem bilong mi Papa bai i salim em i kam. Em bai skulim yupela long olgeta samting.”* (Jn 14:26)

Taim yumi kamap Kristen, Jisas i salim dispela Holi Spirit i kam long yumi. Holi Spirit em i presen bilong God. Holi Spirit i save stiaim tok na pasin bilong yumi.

Long Konpirmasio, Holi Spirit i save skruim wok bilong em i go bikipela moa. Em i save strongim yumi long mekim wok bilong Jisas, na long strong bilong Holi Spirit yumi pas moa wantaim Sios. Baibel i tok olsem Holi Spirit i kam na kirapim sios: *“Bikipela De bilong Pentekos i kam pinis, na ol manmeri i bilip long Jisas ol i bung long wanpela haus. Na wantu wanpela nois i kam long heven, em i olsem krai bilong strongpela win, na i pulapim tru dispela haus ol i sindaun i stap long en. Na ol i lukim samting olsem paia i kamap, na i luk olsem planti tang bilong man. Na ol dispela tang i go nabaut na i stap long olgeta bilong ol. Na Holi Spirit i pulap long olgeta dispela manmeri.”* (Ap 2:1-4)


Dispela wanpela Spirit tasol i bin kam long ol Aposel long Pentekos na rausim pret long bel bilong ol na i strongim bilip bilong ol. Na ol i go telimautim tok bilong God long olgeta manmeri na soim pasin Kristen long ol. Man o meri i kisim Konpirmasio pinis, em i no ken i stap moa olsem wanpela pikinini. Nogat. Em yet i mas sanap strong long bilip na i mas soim dispela bilip na ol pasin bilong bilipmanmeri long ol narapela manmeri, long famili na lain bilong em, long ples, long skul, na long ples bilong wok. Em i mas helpim Jisas na Sios bilong em long kirapim bilip na daunim ol pasin nogut.

Bisop i save givim dispela sakramen bilong Konpirmasio long ol manmeri. Em i save putim han antap long ol na welim ol na em i tok:

LONG DISPELA MAK HIA KISIM HOLI SPIRIT GOD PAPA I GIVIM LONG YU.

## **Pre bilong singautim Holi Spirit**

God, yu strong olgeta, yu Papa bilong Jisas Kraiss i Bikpela bilong mipela. Long wara na long Holi Spirit yu bin lusim sin bilong mi, na yu bin givim nupela laip long mi.



Salim Holi Spirit i kam long mi, bai em i ken helpim na stiaim mi. Em i ken givim save long mi long skelim ol kain kain tingting, na em i ken helpim mi long kisim gut mining bilong tok bilong yu.

Em i ken stretim tingting bilong mi, bai mi ken sanap strong na mi no ken pret long tokaut stret long wanem samting i gutpela na wanem samting i nogut. Em i ken sambai long mi, bai mi ken save gut long yu, adorim yu na amamas long yu. Amen.

## **Pre bilong bihainim Holi Spirit**

Jisas, Bikpela na Ridima bilong mi, mi tenkim yu long sakramen bilong Konpirmasio. Em i givim strong bilong Holi Spirit long mi, bai mi inap bilip oltaim long ol tok bilong God, na mi inap long bihainim oltaim ol lo bilong em. Em i mekim mi sanap strong long bilip bilong mi, bai mi inap lukautim bilip bilong mi na bilong ol Kristen manmeri tu.


Jisas, tude mi laik tokaut gen: Mi laik stap gutpela Kristen oltaim. Mi laik bihainim Kristen pasin long lotu na long ples bilong mi. Mi laik helpim Kristen komyuniti bilong mi na ol wokmanmeri bilong Sios long ol wok bilong lotu. Mi laik tokaut long ol narapela manmeri tu long lotu bilong yu, bai ol i ken save gut long en, na ol i ken kamap gutpela Kristen. Jisas, helpim mi long Spirit bilong yu. Amen.

## YUKARIS

*“Long nait Judas i bin putim Jisas long han bilong ol birua, long dispela nait Bikpela Jisas i kisim bret, na i tenkyu long God, na i brukim, na i tok: ‘Dispela em i bodi bilong mi, mi givim bilong helpim yupela. Yupela i mas mekim olsem bilong tingim mi’”* (1 Ko 11:23-24). Dispela hap tok Santu Pol i givim long yumi, em i tokaut long Yukaris i stap long Katolik Sios. Narapela nem yumi save kolim Misa. Long Baptais na long Konpirmasio yumi save kamap memba bilong Bodi bilong Krai. Long Yukaris dispela wok bilong mekim yumi kamap wanlain, em i kamap ples klia tru. Komunio em i mak, yumi wanbilip tru na yumi olgeta wantaim i stap Bodi bilong Krai. *“I gat wanpela bret tasol, na yumi olgeta i save kaikai long dispela wanpela bret, olsem na yumi planti manmeri yumi stap wanpela bodi tasol”* (1 Ko 10:17).

Jisas em i bin givim em yet olsem ofa long God Papa.

Long Misa yumi bungim Jisas long dispela ofa bilong em. Yumi sanap aninit long diwai kros long maunten Golgota na yumi yet i kamap ofa wantaim Jisas long dai na kirap bilong em, na em i sanap namel long yumi olsem Bikpela bilong yumi. Olsem na Sios i laik bai yumi selebretim Misa long olgeta Sande, bikos dispela em i namba wan we bilong bungim Bikpela Jisas na bilong litimapim nem bilong God Papa. Em i namba wan we bilong givim bikpela tenkyu long God, long olgeta gutpela samting em i bin givim long yumi. Long Misa yumi kaikai dispela bret i gat laip Jisas yet i bin promis long givim yumi. *“Mi dispela bret i gat laip na i lusim heven na i kam daun. Sapos wanpela man o meri i kaikai dispela bret, em bai i gat laip i stap oltaim. Na dispela bret bai mi givim long em, em i bodi bilong mi. Mi givim bai ol manmeri bilong graun ol i ken kisim laip.”* (Jn 6:51).



## LO NA PASIN BILONG MISA

### Ol pre bilong Misa

#### Bigin

P: Long nem bilong Papa, na bilong Pikinini, na bilong Holi Spirit.

**Ol: Amen.**

A) P: Bikpela, Jisas Krai, i ken marimari long yupela, God i ken sori long yupela, na Holi Spirit i ken i stap wantaim yupela olgeta.

**Ol: Na wantaim spirit bilong yu.**

B) P: God, Papa bilong yumi, wantaim Bikpela Jisas Krai, em i ken marimari long yupela, na bel isi bilong em i ken i stap wantaim yupela.

**Ol: Na wantaim spirit bilong yu.**

#### Lotu Sori

A) P: Ol bratasusa, nau yumi autim sori long ol sin bilong yumi long God Papa, bai yumi redi gut long mekim dispela Misa. *(sarap liklik taim).*

**Ol: Mi tokaut long God i strong olgeta, na long yupela, ol bratasusa. Mi bin mekim planti sin tumas, long tingting, long toktok, long pasin nogut mi bin mekim, na long ol gutpela wok mi les long mekim. Tru, i rong bilong mi, i rong bilong mi, i bikpela rong bilong mi. Olsem na mi askim Santu Maria, i Virgo oltaim, olgeta ensel na santu, na yupela ol bratasusa, yupela pre, bai God i marimari long mi.**

P: God i strong olgeta, i ken marimari long yumi, na i ken tekewe ol sin bilong yumi, na i ken bringim yumi long laip bilong oltaim.

**Ol: Amen**

B) P: Ol bratasusa, ... *(sarap liklik taim)*

P: Mipela i mekim planti sin tumas. Lord, yu marimari.

**Ol: Lord, yu marimari.**

P: Yu givim strong long mipela. Lord, oraitim mipela.

**Ol: Lord, oraitim mipela.**

P: God i strong olgeta ...

**Ol: Amen.**

P: Lord yu marimari.

**Ol: Lord, yu marimari**

P: Krai, yu marimari.

**Ol: Krai, yu marimari**

P: Lord, yu marimari.

**Ol: Lord, yu marimari**

C) P: Ol bratasusa, ... (*sarap liklik taim*)

P: Yu kam bilong oraitim ol manmeri i sori long sin bilong ol.  
Lord, yu marimari. (*o: Kyrie, eleison*)

**Ol: Lord, yu marimari. (o: Kyrie, eleison)**

P: Yu kam bilong singautim bek ol manmeri bilong sin. Krai,  
yu marimari. (*o: Christe, eleison*)

**Ol: Krai, yu marimari. (o: Christe, eleison)**

P: Yu sindaun long raithan bilong Papa, na yu pre bilong  
helpim mipela. Lord, yu marimari. (*o: Kyrie, eleison*)

**Ol: Lord, yu marimari. (o: Kyrie, eleison)**

P: God i strong olgeta...

**Ol: Amen.**

## **Ona long God**

P: Ona long God i stap antap,

**Ol: na long graun gutpela taim long ol manmeri,  
God i laikim ol tumas.**

**Lord God, yu King bilong heven, yu Papa i strong olgeta.  
Mipela i tok amamas long yu.**

**Mipela i adorim yu.**

**Mipela i litimapim nem bilong yu.**

**Mipela i tenkim yu long bikpela bilas bilong yu.**

**Lord Jisas Krai, yu wangepela tasol i Pikinini bilong God.**

**Yu Lem bilong God i tekewe olgeta sin,  
marimari long mipela.**

**Yu tekewe olgeta sin, harim pre bilong mipela.**

**Yu sindaun long raithan bilong God Papa,**

**marimari long mipela.**  
**Lord Jisas Krai, yu tasol yu holi.**  
**Yu tasol, yu Lord. Yu tasol, yu antap tru.**  
**Na wantaim Holi Spirit,**  
**yu stap long bilas bilong God Papa. Amen.**

## **Lotu bilong Tok bilong God**

### **Rit namba wan**

*Taim rit i pinis, rida i tok: Dispela em i tok bilong God:*

**Ol: Yumi tenkim God.**

### **Rit namba tu**

#### **Gutnius**

*(Bipo long ritim gutnius pris o diken i pre long em yet: God, yu strong olgeta, stretim tingting na maus bilong mi, bai mi inap tokaut gut long Gutnius bilong yu.)*

*(Bipo long gutnius)*

P: Harim Gutnius bilong Jisas Krai, N...i raitim

**Ol: Ona long yu, Lord.**

*(Bihain long Gutnius)*

P: Dispela em i Gutnius bilong Bikpela...

**Ol: Ona long yu, Bikpela Jisas Krai.**

## **Skul long Tok bilong God (Homili)**

### **Tok Bilip bilong Naisia**

P: Mi bilip long God wanpela tasol.

**Ol: Long God Papa i strong olgeta.**

**Em i mekim kamap heven na graun,**  
**olgeta samting, mipela i save lukim,**  
**na olgeta samting, mipela i no save lukim.**  
**Mi bilip long Bikpela, Jisas Krai,**

em wanpela tasol i Pikinini bilong God.  
 Long taim olgeta samting i no kamap yet,  
 em i stap pinis wantaim Papa.  
 Em i God, i kamap long God.  
 Em i lait, i kamap long lait,  
 na em i God tru, i kamap long God tru.  
 Em i kisim laip long God Papa,  
 na i no gat wanpela i bin kamapim em.  
 Em i wankain tru olsem Papa.  
 Long em olgeta samting i bin kamap.  
 Em i laik kisim bek olgeta manmeri,  
 na em i kam daun long heven.  
 Long strong bilong Holi Spirit Maria Virgo  
 i kisim bel, na i karim em.  
 Long taim bilong Ponsius Pailat ol i nilim em  
 long diwai kros, na em i karim pen  
 bilong kisim bek mipela.  
 Em i dai, na ol i planim em.  
 Long de namba tri em i kirap bek olsem Baibel i tok.  
 Em i go bek long heven, na i sindaun long raithan bilong Papa.  
 Bihain bai em i kam bek gen wantaim bikpela bilas,  
 bilong mekim kot long ol i stap yet, na long ol i dai pinis.  
 Na kingdom bilong em i no inap pinis.  
 Mi bilip long Holi Spirit, em i Bikpela, na em i save givim laip.  
 Em i kamap long Papa wantaim Pikinini.  
 Mi adorim na onarim em wantaim Papa na Pikinini.  
 Em i bin autim tok long maus bilong ol profet.  
 Mi bilip long Sios i wanpela, na i holi, na i Katolik,  
 na i kam long ol Aposel.  
 Mi bilip long wanpela Baptais bilong pogivim sin.  
 Mi wet long kirap bilong ol manmeri i dai pinis,  
 na long laip i kamap bihain. Amen.

(o: ol i ken pre **Tok Bilip bilong ol Aposel**)

**P:** Mi bilip long God Papa i strong olgeta,  
**Ol:** em i mekim kamap heven na graun.  
 Mi bilip long Jisas Krais,

em wanpela tasol i Pikinini bilong God.  
 Em i Bikipela bilong yumi.  
 Long strong bilong Holi Spirit,  
 Maria Virgo i kisim bel, na i karim em.  
 Long taim bilong Ponsius Pailat em i karim pen.  
 Ol i nilim em long diwai kros.  
 Em i dai na ol i planim em.  
 Em i go long ples bilong ol i dai pinis.  
 Long de namba tri em i kirap bek.  
 Em i go bek long heven.  
 Em i sindaun long raithan bilong God Papa i strong olgeta.  
 Bihain bai em i kam bek gen bilong mekim kot long ol i stap yet, na long ol i dai pinis.  
 Mi bilip long Holi Spirit, long Sios i holi na Katolik,  
 long ol santu i wanfamili tasol, long God i pogivim sin, i kirapim bodi, na i givim laip bilong oltaim. Amen.

### **Pre bilong pipel bilong God**

*Nau ol i mekim dispela pre ol i kolim: "Pre bilong Pipel bilong God." Em i pre askim tasol, na ol pre i mas sotpela. No ken stori o givim skul insait long dispela pre.*

*(Bekim bihain long olgeta pre)*

**Ol: Harim pre bilong mipela**

### **Lotu bilong Yukaris**

*Pater i putim liklik hap wara long kap i gat wain na i tok:*

P: Ona i go long yu, God bilong heven na graun. Yu save givim olkain gutpela samting long mipela. Nau mipela i bringim long yu dispela bret i kamap long graun na long wok bilong ol manmeri. Bai i kamap bret bilong givim laip long mipela.

**Ol: Ona long yu, God. Ona long yu oltaim.**

P: Dispela wara i bung wantaim wain, em i mak bilong yumi bung wantaim Kraiss. Kraiss yet i bin kamap man, na em i bin kisim laip bilong yumi. Na nau yumi kisim laip bilong God.

P: Ona i go long yu, God bilong heven na graun. Yu save givim

olkain gutpela samting long mipela. Nau mipela i bringim long yu dispela wain, i kamap long rop wain na long wok bilong ol manmeri. Bai i kamap dring bilong givim laip long mipela.

**Ol: Ona long yu, God. Ona long yu oltaim.**

P: God, wasim mi na rausim ol rong bilong mi. Klinim mi na ol sin bilong mi bai i lus. God Papa, mipela i daunim mipela yet, na mipela i sori long ol sin bilong mipela. Olsem na mipela i askim yu, bai yu ken amamas long dispela ofa, nau mipela i bringim i kam long yu.

P: Ol bratasusa, yupela pre, bai God Papa, i strong olgeta, i ken laikim dispela ofa bilong mi na bilong yupela.  
(*Olgeta manmeri i sanap, na ol i bekim*)

**Ol: Bikpela i ken kisim dispela ofa long han bilong yu, bilong litimapim nem bilong em, na bilong helpim mipela na holi Sios bilong em.**

P: (*Nau pris i pre*) God Papa ...

**Ol: Amen.**

## **Bikpela pre tenkyu (*namba 2*)**

P: Lord i stap wantaim yupela.

**Ol: Na wantaim spirit bilong yu.**

P: Litimapim hat bilong yupela.

**Ol: Mipela i litimapim long Lord.**

P: Yumi tenkim God, i Lord bilong yumi.

**Ol: Em i gutpela na i stret.**

P: Tru, i gutpela na i stret,  
oltaim na long olgeta ples,  
mipela i tenkim yu, God Papa, yu strong olgeta na yu stap oltaim.  
Yes, givim tenkyu long yu em i wok bilong mipela,  
na i oraitim mipela long nem bilong Jisas Kraiss,  
em i Pikinini bilong yu, yu laikim em tumas.  
Jisas em i Tok bilong yu,  
na long em yu mekim olgeta samting i kamap.  
Yu salim em i kam bilong oraitim mipela.  
Holi Spirit i mekim em i kamap man.  
Maria Virgo i karim em.  
Jisas i bihainim laik bilong yu,

na taim em i karim pen long diwai kros,  
em i kisim bek mipela, bai mipela i pipel bilong yu.  
Em i win long indai,  
na nau mipela inap long kirap bek wantaim em.  
Olsem na wantaim ol ensel na ol santu,  
mipela i givim tenkyu na ona long yu, na mipela i sing (tok):

**Ol: Holi, Holi, Holi Lord, God yu strong olgeta.**

**Heven na graun i pulap long bilas bilong yu.**

**Hosana long God i stap antap.**

**Litimapim nem bilong em i kam long nem bilong Lord.**

**Hosana long God i stap antap.**

P: Tru tumas, God yu holi. Yu Papa bilong olgeta samting i holi.  
Mipela i askim yu, long Spirit bilong yu, Mekim holi dispela  
bret na wain, bai tupela i kamap Bodi na Blut bilong Jisas Krai,  
em i Bikipela bilong mipela.

P: Taim Jisas i laik karim pen, em i kisim bret.  
Em i tenkim yu, em i brukim bret, em i givim long ol  
disaipel bilong em, na em i tok:

**YUPELA OLGETA, KISIM NA KAIKAI LONG EN.**

**DISPELA EM I BODI BILONG MI.**

**BAI MI GIVIM BILONG ORAITIM YUPELA.**

Na long wankain pasin, taim ol i kaikai pinis, Jisas kisim kap. Em  
i tenkim yu gen. Em i givim kap long ol disaipel bilong em, na em  
i tok:

**YUPELA OLGETA, KISIM NA DRING LONG EN.**

**DISPELA EM I KAP BILONG BLUT BILONG MI.**

**EM I BLUT BILONG NUPELA KONTRAK I STAP OLTAIM.**

**DISPELA BLUT BAI I LUS BILONG TEKEWE SIN**

**BILONG YUPELA NA BILONG PLANTI MANMERI.**

**YUPELA MEKIM OLSEM BILONG TINGIM MI GEN.**

P: Nau yumi telimautim bilip bilong yumi.

**Ol: Krai, yu dai. Krai, yu kirap bek. Krai, bai yu kam bek gen.**

O:

**Ol: Lord, mipela i tokaut long indai bilong yu, na mipela i autim  
bilip long kirap bilong yu, inap long taim yu kam bek.**

O:

P: Yumi tokaut olgeta taim.

**Ol: Lord, olgeta taim mipela i kaikai dispela bret, na dring long dispela kap, mipela i telimautim indai bilong yu, inap long taim yu kam bek.**

O:

P: Yumi litimapim nem bilong Jisas, Ridima.

**Ol: Lord, yu Ridima bilong mipela, yu oraitim mipela pinis long indai na kirap bilong yu, helpim mipela nau.**

P: Yes, Papa, Jisas i dai na em i kirap bek. Nau mipela i tingim em. Olsem na mipela i ofaim yu dispela bret i givim laip, na dispela kap i oraitim mipela. Mipela i tenkim yu, yu bungim mipela hia long ai bilong yu bilong mekim dispela Misa. Mipela i kisim Bodi na Blut bilong Krai na mipela i pre, bai Holi Spirit i ken mekim mipela olgeta i kamap wan. God Papa, tingim Sios bilong yu long olgeta hap bilong graun. Mekim mipela i kamap wanfamili tru, wantaim Pop N., na Bisop N., na olgeta wanwok bilong ol. Tingim tu ol bratasusa bilong mipela i dai pinis, na ol arapela manmeri i dai bipo na i wet long kirap bek. Bringim ol i go i stap wantaim yu. Mipela i askim yu, Papa, marimari long mipela tu. Bai wantaim Santu Maria Virgo, i Mama bilong God, wantaim Santu Josep, man bilong em, wantaim ol Aposel na olgeta santu, mipela i ken bung long laip bilong oltaim, na adorim na litimapim nem bilong yu long Jisas Krai, em i Pikinini bilong yu.

*Bikpela Pre Tenkyu i pinis, pris i kisim kalis na plet wantaim hostia na litimapim tupela wantaim, na em i sing (tok):*

P: Dispela Jisas Krai, long wok bilong Holi Spirit, em tasol i rot bilong givim ona na biknem long yu, God Papa, nau na oltaim.

**Ol: Amen.**

## **Pre bilong Bikpela, Jisas Krai**

P: Tru, God em i Papa bilong yumi, na yumi pikinini bilong em. Nau yumi pre olsem Jisas yet i skulim yumi:

**Ol: Papa bilong mipela, yu stap long heven.  
 Mekim nem bilong yu i kamap bikpela.  
 Mekim kingdom bilong yu i kam.  
 Strongim mipela long bihainim laik bilong yu long graun,  
 olsem ol i bihainim long heven.  
 Givim mipela kaikai inap long tude.  
 Pogivim rong bilong mipela,  
 olsem mipela i pogivim ol arapela i mekim rong long mipela.  
 Sambai long mipela long taim bilong traim.  
 Na rausim olgeta samting nogut long mipela.**

**P:** God Papa, mipela i pre,  
 tekewe olgeta samting nogut long mipela.  
 Givim gutpela taim long mipela.  
 Na helpim mipela long marimari bilong yu,  
 bai mipela inap long abrusim sin,  
 na bai no gat samting i ken mekim mipela i pret,  
 na paulim tingting bilong mipela.  
 Olsem bai mipela i ken amamas na wetim kambek bilong Jisas Kraiss,  
 em i Ridima bilong mipela.

**Ol: Kingdom na strong na biknem, em i bilong yu tasol,  
 oltaim oltaim. Amen**

### **Mak bilong bel isi: taim bilong sekan**

**P:** Bikpela, Jisas Kraiss, bipo yu tok long ol Aposel bilong yu,  
 “Bel isi i stap wantaim yupela.  
 Yes, gutpela taim bilong mi, mi givim long yupela.”  
 Mipela i tingim dispela tok bilong yu, na mipela i pre,  
 Jisas, marimari long mipela,  
 na yu no ken tingim ol sin bilong mipela.  
 Tingim tasol bilip bilong Sios bilong yu.  
 Givim gutpela taim bilong yu long mipela,  
 na mekim mipela i kamap wanbel tru.  
 Yu Bikpela bilong mipela, nau na oltaim.

**Ol: Amen.**

**P:** Gutpela taim bilong Lord i stap oltaim wantaim yupela.

**Ol: Na wantaim spirit bilong yu.**

**P:** Ol bratasua, yumi givim mak bilong bel isi long ol bratasusa.

*(Pris yet i pre: Dispela Bodi na Blut bilong Jisas Krais, nau mi putim wantaim, i ken givim laip bilong oltaim long yumi, long taim yumi kaikai.)*

## **Lem bilong God**

**Ol: Lem bilong God, yu tekewe sin bilong olgeta manmeri, marimari long mipela.**

**Lem bilong God, yu tekewe sin bilong olgeta manmeri, marimari long mipela.**

**Lem bilong God, yu tekewe sin bilong olgeta manmeri, givim gutpela taim long mipela.**

*(Pris yet i pre: Bikpela, Jisas Krais, mi laik kisim Bodi na Blut bilong yu. Mi bilip, yu laikim olgeta manmeri bilong graun, na yu marimari long ol. Nau mi askim yu, bai Bodi na Blut bilong yu i no ken bringim mi long kot na mi lus. Nogat. Em i ken mekim gut bodi na sol bilong mi.)*

## **Komunio**

P: Dispela em i Jisas Krais, Lem bilong God, em i tekewe ol sin bilong olgeta manmeri. Ol manmeri, God i singautim ol long kaikai bilong em, ol i ken amamas.

**Ol: Lord, mi no inap, bai yu kam insait long haus bilong mi. Yu tok tasol na sol bilong mi i orait.**

P: Bodi bilong Krais i ken bringim mi long laip bilong oltaim. Blut bilong Krais i ken bringim mi long laip bilong oltaim.

P: Bodi bilong Krais:

**Ol: Amen.**

P: Blut bilong Krais:

**Ol: Amen.**

*(Pris yet i pre: God Papa, dispela Bodi na Blut bilong Krais, mipela i kaikai pinis, i ken stretim pasin na tingting bilong mipela na i ken givim laip bilong oltaim long mipela.)*

## **Pre bihain long Komunio**

P: Yumi pre:...

**Ol: Amen.**

## **Pinis bilong Misa**

P: Lord i stap wantaim yupela.

**Ol: Na wantaim spirit bilong yu.**

P: God i strong olgeta, i ken blesim yupela;  
Papa, na Pikinini, na Holi Spirit.

**Ol: Amen.**

P: Yupela i go, Misa i pinis.

**Ol: Yumi tenkim God.**

## **Pre bihain long Misa (1) (*Lukim Sam 23*)**

L: God, yu wasman bilong mi, na mi sipsip bilong yu.

**Ol: God, yu wasman bilong mi, na mi sipsip bilong yu.**

L: Yu mekim mi i slip long gutpela gras. Yu bringim mi i go long wara, bai mi ken dring na malolo.

**Ol: God, yu wasman bilong mi, na mi sipsip bilong yu.**

L: Yu save oraitim spirit bilong mi. Yu helpim mi long mekim stretpela pasin bai nem bilong yu i no go daun.

**Ol: God, yu wasman bilong mi, na mi sipsip bilong yu.**

L: Maski mi wokabaut long ples nogut na bikpela tudak, tasol mi noken pret long samting nogut. Long wanem, yu stap wantaim mi.

**Ol: God, yu wasman bilong mi, na mi sipsip bilong yu.**

L: Yu was long mi. Ol birua i stap nabaut. Tasol mi kaikai i stap. Yu save lukautim mi gut na mi amamas moa yet.

**Ol: God, yu wasman bilong mi, na mi sipsip bilong yu.**

L: Tru tumas, God, sori bilong yu bai i stap wantaim mi long olgeta de mi stap long dispela graun. Na bai mi stap long haus bilong yu oltaim.

**Ol: God, yu wasman bilong mi, na mi sipsip bilong yu.**

## **Pre bihain long Misa (2)**

### **Bilip**

L: Jisas, yu stap nau wantaim mi.

**Ol: Mi bilip long yu.**

L: Jisas, yu Ridima bilong mi.

**Ol: Mi bilip long yu.**

L: Jisas, yu brata bilong mi.

**Ol: Mi bilip long yu.**

### **Hop**

L: Jisas, yu save tekewe sin bilong mi.

**Ol: Mi hop long yu.**

L: Jisas, yu bringim mi i go long heven.

**Ol: Mi hop long yu.**

L: Jisas, nau na taim bilong dai.

**Ol: Mi hop long yu.**

### **Laik**

L: Jisas, yu kam bilong kisim bek ol manmeri i lus long sin.

**Ol: Mi laikim yu.**

L: Jisas, yu kam na soim God Papa long mipela.

**Ol: Mi laikim yu.**

L: Jisas, yu kam bilong mekim olgeta manmeri i bratasusa tru.

**Ol: Mi laikim yu.**

### **Tenkim**

L: Jisas, yu stap insait long mi.

**Ol: Mi tenkim yu.**

L: Jisas, yu bin mekim mi pikinini bilong God.

**Ol: Mi tenkim yu.**

L: Jisas, yu pogivim ol sin bilong mi.

**Ol: Mi tenkim yu.**

L: Jisas, yu strongim mi long dispela holi kaikai.

**Ol: Mi tenkim yu.**

L: Jisas, bai yu kirapim mi wantaim ol manmeri i dai pinis.

**Ol: Mi tenkim yu.**

## Givim

L: Jisas, mi givim tingting bilong mi long yu. Mi laik bihainim tingting bilong yu tasol.

**Ol: Mi bilong yu olgeta.**

L: Jisas, mi givim maus bilong mi long yu. Mi laik mekim gutpela tok tasol.

**Ol: Mi bilong yu olgeta.**

L: Jisas, mi givim han bilong mi long yu. Mi laik helpim ol manmeri.

**Ol: Mi bilong yu olgeta.**

## Pre bihain long Misa (3)

L: Jisas, yu Bikpela bilong mipela, mipela i kisim pinis Bodi na Blut bilong yu. Mekim gut long mipela, bai mipela inap long go long heven.

**Ol: Jisas, yu kamapim dispela sakramen, bai mipela i ken kaikai Bodi bilong yu, bilong telimautim pen na dai bilong yu inap long taim yu kam bek gen.**

L: Jisas, yu Ridima na pren bilong mipela.

**Ol: Mipela i adorim yu i stap long dispela sakramen. Marimari long mipela na mekim mipela i laikim yu moa long olgeta samting. Amen**

## Sol bilong Krais

Sol bilong Krais, mekim mi holi.  
Bodi bilong Krais, yu laip bilong mi.  
Blut bilong Krais, yu dring bilong mi.  
Wara bilong sait bilong Krais, wasim mi.  
Pen bilong Krais, strongim mi.  
Gutpela Jisas, harim mi.  
Long sua bilong yu, haitim mi.  
Taim mi laik lus, holim mi.  
Long birua nogut lukautim mi.  
Long taim bilong dai, kisim mi.  
Long ples bilong ol santu, bringim mi.  
Na oltaim stap wantaim mi. Amen.



# LO NA PASIN BILONG SANDE LOTU

## Lotu Bilong Bigin

### 1. Singsing Bilong Bigin

*(Lotu Lida wantaim ol lain i helpim em long dispela lotu, ol i wokabaut i go long Alta.)*

### 2. Mak Bilong Diwai Kros

L: Long nem bilong Papa, na bilong Pikinini, na bilong Holi Spirit.  
**Ol: Amen.**

### 3. Tok Welkam

L: Yumi litimapim nem bilong God. Em i Papa bilong yumi, na em i as bilong olgeta pasin marimari na pasin sori.

**Ol: Yumi litimapim nem bilong Bikpela oltaim oltaim. Amen.**

o

L: Yumi amamas long Bikpela Jisas Krai. Em i stap nau wantaim yumi long Tok bilong em, na long pasin bilong laikim, em i bungim yumi wantaim.

**Ol: Yumi litimapim nem bilong Bikpela oltaim oltaim. Amen.**

o

L: Yumi litimapim nem bilong Papa, na bilong Pikinini, na bilong Holi Spirit.

**Ol: Yumi litimapim nem bilong Bikpela oltaim oltaim. Amen.**

o

L: Bikpela Jisas Krai i marimari long yumi. God i sori long yumi, na Holi Spirit i stap wantaim yumi olgeta.

**Ol: Amen.**

o

L: God Papa bilong yumi wantaim Bikpela Jisas Krai, tupela i ken marimari long yumi na mekim bel bilong yumi i stap isi.

**Ol: Amen.**

L: Ol bratasusa, nau em i Sande gen.  
Em i de bilong God.

Yumi kam bung hia long mekim lotu. Long dispela lotu, yumi laik bung wantaim olgeta manmeri, ol i pre long ol arapela ples. Yumi laik bung wantaim ol pris na ol Katolik bilipmanmeri, ol i lotu long olgeta ples bilong graun. Yumi laik stap insait long ofa na pre bilong Krai. Long Jisas Krai tasol, yumi inap long givim tenkyu na ona long God Papa.

#### 4. Lotu Sori

L: Nau yumi autim sori long olgeta sin yumi bin mekim long God na long ol bratasusa: *(ol i sarap liklik taim)*

**Ol: Mi tokaut long God i strong olgeta, na long yupela, ol bratasusa: Mi bin mekim planti sin tumas, long tingting, long toktok, long pasin nogut mi bin mekim, na long ol gutpela wok mi les long mekim.**

*(Ol i paitim bros bilong ol tripela taim na ol i tok)*

**Tru, i rong bilong mi, i rong bilong mi, i bikpela rong bilong mi; olsem na mi askim Santu Maria i Virgo oltaim, olgeta ensel na santu, na yupela ol bratasusa, yupela pre, bai God i marimari long mi.**

L: God i ken marimari long yumi, na em i ken lusim sin bilong yumi, olsem bai yumi inap long mekim gutpela lotu nau.

**Ol: Amen.**

*(I gutpela sapos ol i singim dispela hap bilong "Lord, yu marimari")*

L: Lord, Yu marimari

**Ol: Lord, Yu marimari.**

L: Krai, Yu marimari.

**Ol: Krai, Yu marimari.**

L: Lord, Yu marimari.

**Ol: Lord, Yu marimari.**

#### 5. Singing Ona Long God

*(Long ol Sande na long ol Pestode. Tasol long ol Sande bilong Atven na Len nogat).*

L: Ona long God i stap antap,

**Ol: Na long graun gutpela taim long ol manmeri, God i laikim ol tumas. Lord God, yu King bilong heven, yu Papa i strong**

olgeta. Mipela i tok amamas long yu.  
Mipela i adorim yu.  
Mipela i litimapim nem bilong yu.  
Mipela i tenkim yu long bikpela bilas bilong yu.  
Lord Jisas Kraiss, yu wanpela tasol i Pikinini bilong God.  
Yu Lem bilong God i tekewe olgeta sin, marimari long mipela.  
Yu tekewe olgeta sin, harim pre bilong mipela.  
Yu sindaun long raithan bilong God Papa, marimari long mipela.  
Lord Jisas Kraiss, yu tasol yu holi.  
Yu tasol yu Lord. Yu tasol yu antap tru. Na wantaim Holi Spirit, yu stap long bilas bilong God Papa. Amen.

## **6. Pre Bilong Bigin**

L: Yumi pre:

*(Ol i sarap liklik taim na lida i autim pre bilong bigin).*

Ol: Amen.

## **Lotu Bilong Tok Bilong God**

L: Nau, yumi sindaun na harim tok bilong God.

### **1. Rit Namba Wan**

Rida: Rit i kam long ... *(long pinisim rit em i tok)*: Dispela em i tok bilong God.

Ol: Yumi tenkim God.

### **2. Song bilong Bekim**

### **3. Rit Namba Tu**

Rida: Rit i kam long ... *(long pinisim rit em i tok)*: Dispela em i tok bilong God

Ol: Yumi tenkim God.

### **4. Welkamim Gutnius**

*(Singsing Aleluia. No gat Aleluia long taim bilong Len)*

## 5. Rit Bilong Gutnius

*(Katekis i ritim Gutnius. Tasol em i no ken tok: Lord i stap wantaim yupela)*

L: Harim Gutnius bilong Jisas Krai, Santu... i raitim.

**Ol: Ona long Yu, Lord.**

*(Bihain long Rit)*

L: Dispela em i Gutnius bilong Bikpela.

**Ol: Ona long yu, Bikpela Jisas Krai.**

## 6. Skul *(Katekis i givim skul)*

## 7. Autim Bilip

L: Yumi harim pinis tok bilong God. Nau yumi kirap na telimautim Bilip bilong yumi.

### **Bilip bilong Ol Aposel:**

L: Mi bilip long God Papa i strong olgeta,

**Ol: em i mekim kamap heven na graun.**

**Mi bilip long Jisas Krai,**

**em wampela tasol i Pikinini bilong God.**

**Em i Bikpela bilong yumi.**

**Long strong bilong Holi Spirit,**

**Maria Virgo i kisim bel, na i karim em.**

**Long taim bilong Ponsius Pailat em i karim pen.**

**Ol i nilim em long diwai kros.**

**Em i dai na ol i planim em.**

**Em i go long ples bilong ol i dai pinis.**

**Long de namba tri em i kirap bek. Em i go bek long heven.**

**Em i sindaun long raithan bilong God Papa i strong olgeta.**

**Bihain bai Em i kam bek gen**

**bilong mekim kot long ol i stap yet,**

**na long ol i dai pinis.**

**Mi bilip long Holi Spirit,**

**long Sios i holi na i Katolik,**

**long ol santu i wanfamili tasol,**

**long God i pogivim sin, i kirapim bodi,  
na i givim laip bilong oltaim. Amen.**

0

### **Bilip bilong Ol Naisia:**

**L: Mi bilip long God wanpela tasol.**

**Ol: Long God Papa i strong olgeta.**

**Em i mekim kamap heven na graun,  
olgeta samting, mipela i save lukim, na olgeta samting,  
mipela i no save lukim.**

**Mi bilip long Bikpela, Jisas Krai,  
em wanpela tasol i Pikinini bilong God.**

**Long taim olgeta samting i no kamap yet,  
em i stap pinis wantaim Papa.**

**Em i God, i kamap long God. Em i lait, i kamap long lait,  
na em i God tru, i kamap long God tru.**

**Em i kisim laip long God Papa,  
na i no gat wanpela i bin kamapim em.**

**Em i wankain tru olsem Papa.**

**Long em olgeta samting i bin kamap.**

**Em i laik kisim bek olgeta manmeri,  
na em i kam daun long heven.**

**Long strong bilong Holi Spirit Maria Virgo i kisim bel,  
na i karim em.**

**Long taim bilong Ponsius Pailat**

**ol i nilim em long diwai kros,  
na em i karim pen bilong kisim bek mipela.**

**Em i dai, na ol i planim em.**

**Long de namba tri em i kirap bek olsem Baibel i tok.**

**Em i go bek long heven,**

**na i sindaun long raithan bilong Papa.**

**Bihain bai em i kam bek gen wantaim bikpela bilas,  
bilong mekim kot long ol i stap yet,**

**na long ol i dai pinis.**

**Na kingdom bilong em i no inap pinis.**

**Mi bilip long Holi Spirit, em i Bikpela,  
na em i save givim laip.**

**Em i kamap long Papa wantaim Pikinini.**

**Mi adorim na onarim em wantaim Papa na Pikinini.**  
**Em i bin autim tok long maus bilong ol profet.**  
**Mi bilip long Sios i wanpela, na i holi, na i Katolik,**  
**na i kam long ol aposel.**  
**Mi bilip long wanpela Baptais bilong pogivim sin.**  
**Mi wet long kirap bilong ol manmeri i dai pinis,**  
**na long laip i kamap bihain. Amen.**

## **8. Pre Bilong Ol Bilipmanmeri**

*(Hia i gat sampela Pre bilong ol Bilipmanmeri)*

- L: Ol bratasusa, yumi pre long God Papa i strong olgeta. Em i laik bai olgeta manmeri i painim em, na i save long Tok bilong em. Olsem na yumi laik pre nau long em.
- L: Yumi pre bilong helpim Sios bai God Papa i blesim Pop ..., Bisop ..., ol arapela Bisop na ol wanwok bilong ol. Yumi pre:

**Ol: Harim Pre bilong mipela.**

- L: Yumi pre bilong helpim ol manmeri bilong graun bai God i helpim ol long sindaun wantaim pasin wanbel. Yumi pre:

**Ol: Harim Pre bilong mipela.**

- L: Yumi pre bilong helpim olgeta manmeri i gat kain kain hevi, bai God i tekewe hevi bilong ol. Yumi pre:

**Ol: Harim Pre bilong mipela.**

- L: Yumi pre bilong helpim yumi yet na ol Kristen komyuniti bilong yumi, bai God i amamas long sindaun na wok bilong yumi. Yumi pre:

**Ol: Harim Pre bilong mipela.**

- L: Yumi i ken autim sampela arapela prea moa. *(Ol i sarap liklik taim)*
- L: God Papa, yu save was oltaim long mipela. Harim ol pre bilong mipela, sios bilong yu, bai mipela i kisim ol samting nau mipela i singaut long en. Mipela i pre long nem bilong Kraiss, em i Bikpela bilong mipela.

**Ol: Amen.**

## **9. Taim Bilong Sekan.**

- L: Ol bratasusa, Jisas i bin skulim yumi olsem:

*“Sapos yu bringim ofa bilong yu i kam long alta, na yu tingim brata o susa bilong yu em i gat tok long yu, orait yu mas lusim*

*ofa bilong yu i stap klostu long alta. Na yu go pastaim na stretim tok wantaim brata na susa bilong yu. Stretim pinis, orait nau yu ken i go na givim ofa bilong yu long God”.*

Bipo yumi bringim ol presen bilong yumi i go long alta, yumi mas stap wanbel wantaim arapela. Olsem, yumi sekan nau wantaim ol arapela bilong soim yumi stap gut wantaim ol.

*(Ol manmeri i ken serim mak bilong sekan na bel isi, bilong soim olsem ol i laik stap wanbel).*

## **10. Bungim Koleksen**

L: Nau yumi laik bungim ol ofa bilong yumi. Yumi laik givim dispela olsem mak bilong soim; yumi kisim ol samting long han bilong God. Nau yumi givim ofa bilong yumi bilong tenkim em na helpim ol bratasusa.

*(Ol i singsing ofa, bungim koleksen na bringim ofa i go long Alta)*

L: Yumi sanap nau na yumi pre:

**Ol: God Papa, kisim ol dispela ofa i makim wok mipela i bin mekim. Mipela i laik givim mipela yet long yu wantaim dispela ofa long lukautim haus lotu bilong yu na ol wokmanmeri bilong yu na ol tarangu. Na mipela i tingting long bikpela presen Jisas i bin givim long mipela long dai na kirap bilong em. Mekim mipela i holi, bai mipela i ken litimapim nem bilong yu oltaim. Mipela i pre long nem bilong Krais em i Bikpela bilong mipela. Amen.**

*Sapos i gat Santu Komunio — Bihainim “A”; pes 84*

*Sapos i no gat Santu Komunio—Bihainim “B”; pes 88*

## **A. Lotu Bilong Kisim Santu Komunio**

### **1. Komunio Minista (KM)**

*KM i go pas long dispela hap bilong lotu. Em i toksave long lotu bilong Komunio. Em i ken tok long tingting bilong em, o em i ken tok olsem:*

KM: Ol bratasusa, nau Jisas i laik kam long yumi long komunio. Na long komunio em i laik bungim yumi na mekim yumi kamap wanbel. Yumi nildaun na welkamim Jisas long singsing.

*Nau KM i kisim Santu Yukaris long Tabernakel na i putim long alta.*

## **2. Pre Bilong Komunio**

KM: Nau yumi tingim Jisas i laik bungim yumi long Yukaris.

Jisas, yu bin tok: *“Mi dispela bret i gat laip na i lusim heven na i kam daun. Sapos wanpela man o meri i kaikai dispela bret em bai i stap laip oltaim.”* Yumi pre:

**Ol: Givim dispela kaikai long mipela.**

KM: Jisas, yu bin tok: *“Dispela bret mi givim long yupela, em i bodi bilong mi. Mi givim bai ol manmeri bilong graun i ken kisim laip.”* Yumi pre:

**Ol: Givim dispela kaikai long mipela.**

KM: Jisas, yu bin tok: *“Tru tumas mi tokim yupela: Sapos yupela i no kaikai bodi bilong Pikinini Bilong Man, na sapos yupela i no dringim blut bilong em, bai yupela i no gat laip long yupela.”* Yumi pre:

**Ol: Givim dispela kaikai long mipela.**

KM: Jisas, yu bin tok: *“Bodi bilong mi em i kaikai tru na blut bilong mi em i samting tru bilong dring.”* Yumi pre:

**Ol: Givim dispela kaikai long mipela.**

KM: Jisas yu bin tok: *“Manmeri i kaikai bodi bilong mi na i dringim blut bilong mi, ol i stap long mi, na mi stap long ol.”* Yumi pre:

**Ol: Givim dispela kaikai long mipela.**

KM: Jisas, yu bin tok: *“Mi givim lo long yupela olsem: Yupela i mas laikim tru ol bratasusa. Sapos man o meri i laikim mi, em bai i bihainim tok bilong mi. Na Papa bilong mi em bai i laikim dispela man na meri. Na bai mitupela i kam long em na i stap wantaim em oltaim, oltaim.”*

**Ol: Amen**

## **3. Pre Bilong Bikpela, Jisas Kraais**

KM: Tru, God em i Papa bilong yumi na yumi pikinini bilong em. Nau yumi pre olsem Jisas yet i skulim yumi.

**Ol: Papa bilong mipela, yu stap long heven.  
Mekim nem bilong yu i kamap bikpela.  
Mekim kingdom bilong yu i kam.  
Strongim mipela long bihainim laik bilong yu long graun,  
olsem ol i bihainim long heven.  
Givim mipela kaikai inap long tude.  
Pogivim rong bilong mipela,  
olsem mipela i pogivim ol arapela i mekim rong long mipela.  
Sambai long mipela long taim bilong traim.  
Na rausim olgeta samting nogut long mipela. Amen.**

*No gat singsing bilong Lem bilong God. Dispela singsing i  
poromanim oltaim pasin bilong Pris taim em i brukim Holi Bret.*

*No gat mak bilong sekan hia. Em i bin kamap pinis bipo long givim ofa.*

#### **4. Tilim Santu Komunio**

*KM i brukim skru, holim wanpela hostia long han, apim na  
soim long ol manmeri na em i tok:*

**KM:** Dispela em i Jisas Krai, Lem bilong God, em i tekewe ol sin  
bilong olgeta manmeri. Ol manmeri, God i singautim ol long  
kaikai bilong em, em ol i ken amamas.

**Ol: Lord, mi no inap, bai yu kam insait long haus bilong mi. Yu  
tok tasol na sol bilong mi i orait.**

#### **5. KM i Givim Bodi Bilong Krai Long Ol Manmeri**

*Em i Tok:*

**KM:** Bodi bilong Krai.

**Ol: Amen.**

#### **6. Ol i Kirapim Singsing Bilong Holi Yukaris**

#### **7. Pre Bihain Long Komunio**

**KM:** Yumi pre:

God Papa, nau tasol mipela i bin kisim Jisas long komunio.  
Mekim bai em yet i ken stiaim tingting na laik bilong mipela.  
Nogut mipela i bihainim tingting na laik bilong mipela yet.

Kirapim bel bilong mipela gen long mekim olkain gutpela wok na pasin. Mipela i pre long nem bilong Jisas Krai, em i Bikpela bilong mipela.

**Ol: Amen.**

## **8. Ol i Ken Kirapim Singsing Bilong Tenkyu**

### **9. Ol Manmeri i Ken Pre:**

#### **Sol bilong Krai:**

**Ol: Sol bilong Krai, mekim mi holi.**

**Bodi bilong Krai, yu laip bilong mi.**

**Blut bilong Krai, yu dring bilong mi.**

**Wara bilong sait bilong Krai, wasim mi.**

**Pen bilong Krai, strongim mi.**

**Gutpela Jisas, harim mi. Long sua bilong yu, haitim mi.**

**Taim mi laik lus, holim mi. Long taim bilong dai, kisim mi.**

**Long ples bilong ol santu, bringim mi.**

**Na oltaim stap wantaim mi. Amen.**

O

#### **Song bilong Maria:**

**Ol: Sol bilong mi i givim bikpela ona long Lord.**

**Bel bilong mi i hepi tru long God i Ridima bilong mi.**

**Em i lukdaun long wokmeri bilong em.**

**Nau na oltaim olgeta man i givim biknem long mi.**

**God antap i mekim gut long mi.**

**Em i marimari long ol i pret long em.**

**Em i soim strong bilong han bilong em,**

**na i daunim ol man i bikheth long em.**

**Em i daunim ol man i strongpela,**

**na i putim antap ol man i stap daunbilo tru.**

**Em i givim ol gutpela samting long ol man i hangre.**

**Em i rausim ol man i gat planti samting.**

**Em i was gut long ol man bilong Israel.**

**Olsem em i promisim Abraham na lain bilong em.**

**Ona long Papa na long Pikinini na long Holi Spirit,  
olsem taim bipo nau na oltaim. Amen.**

## **Pinisim Lotu**

### **10. Pre Bilong Pinis.**

L: Yumi pre... *(ol i sarap liklik taim na pre)*

**Ol: Amen.**

### **11. Toksave Bilong Ol Samting Bilong Lotu Na Wok.**

L: Yumi olgeta sindaun na harim sampela toksave.

### **12. Pre Bilong Blesim.**

L: Yumi olgeta sanap. Orait, lotu bilong yumi i pinis.

Yumi askim God Papa, bai em i blesim yumi.

God Papa bilong yumi, em i ken marimari long yumi  
na givim bel isi long yumi. God i strong olgeta i blesim yumi,  
long nem bilong Papa na bilong Pikinini, na bilong Holi Spirit.

**Ol: Amen.**

o

L: God Papa bilong yumi wantaim Bikpela Jisas Kraus i ken marimari  
long yumi na givim bel isi long yumi. Yumi ken litimapim nem  
bilong Papa na bilong Pikinini na bilong Holi Spirit

**Ol: Amen.**

L: Yumi go nau na mekim gut long ol arapela manmeri.

**Ol: Yumi tenkim God.**

## **13. Singing Bilong Pinisim Lotu.**

### **B. Lotu, Sapos Nogat Santu Komunio**

#### **1. Pre Bilong Onaim Na Tenkim God.**

L: God Papa, yu strong olgeta, yu gut olgeta. Mipela i tenkim yu,  
yu God bilong mipela ol pipel bilong yu. Mipela i kolim yu Papa  
bilong mipela. Olsem mipela olgeta i tok:

**Ol: Mipela i tenkim yu, God Papa, yu gut olgeta.**

L: God Papa, mipela i tenkim yu. Yu save long mipela wan wan.  
Na yu singautim mipela wan wan bilong litimapim nem bilong  
yu. Olsem na mipela olgeta i tok:

**Ol: Mipela i tenkim yu God Papa, yu gut olgeta.**

L: God Papa, yu holim heven na graun long han bilong yu, yu mekim mipela i kamap. Na yu singautim mipela, bai mipela i kamap wan wantaim yu na i stap pipel bilong yu. Olsem mipela olgeta i tok:

**Ol: Mipela i tenkim yu, God Papa, yu gut olgeta.**

L: God Papa, mipela i onaim yu, yu God bilong olgeta samting. Mipela i onaim yu hia long lotu na long ples. Mipela i onaim yu long ol pipel, yu mekim ol i kamap bratasusa bilong mipela. Olsem mipela olgeta i tok:

**Ol: Mipela i tenkim yu, God Papa, yu gut olgeta.**

L: God Papa, mipela i onaim yu long olgeta samting yu wokim long heven na long graun. Mipela i onaim yu long Jisas Kraiss, em i Bikipela bilong mipela. Olsem mipela olgeta i tok:

**Ol: Mipela i tenkim yu, God Papa yu gut olgeta.**

L: God Papa, mipela i onaim yu wantaim ol manmeri i stap nau na wantaim ol gutpela manmeri i dai pinis. Olsem mipela olgeta i tok:

**Ol: Mipela i tenkim yu, God Papa yu gut olgeta.**

## **2. Tingim Santu Yukaris Na Mekim Pre Bilong Sios i Wanfamili Tasol**

L: God Papa, long nem bilong Kraiss, Pikinini bilong yu na brata bilong mipela, mipela i bung hia long (*..kolim nem bilong ples...*) bilong tenkim yu na litimapim nem bilong Yu. Mipela i askim yu, mekim mipela i wanlain tru wantaim Pop ..., Bisop ..., na wantaim pris bilong mipela.

**Ol: God Papa, yu stap wantaim mipela.**

L: Mipela i tingim olgeta pipel bilong yu, ol i bilip long yu na ol i dai pinis. Givim gutpela taim long ol.

**Ol: God Papa, yu stap wantaim mipela.**

L: Mipela i tingim Santu Virgo Maria, mama bilong Kraiss, Santu Josep, man bilong em, Santu Maikel, Santu ... (*..kolim nem bilong wassantu...*) wantaim olgeta ensel na Santu mipela i save onaim. Mipela i bilip, ol i pre bilong helpim mipela.

**Ol: God Papa, yu stap wantaim mipela.**

L: God Papa, mipela i bilip tru long ofa bilong Jisas, na mipela i laikim tru Santu Misa. Tasol mipela i no gat pris i stap wantaim mipela nau. Olsem na long dispela lotu mipela i tingim Misa,

pris bilong mipela i mekim Misa long narapela hap, na olgeta arapela pris i mekim Misa long olgeta ples bilong graun. Mipela i laik bung wantaim ol na givim tenkyu na ona long yu.

**Ol: God Papa, yu stap wantaim mipela.**

### **3. Pre Bilong Bikpela, Jisas Krais**

L: Tru, God em i Papa bilong yumi na yumi pikinini bilong em. Nau yumi pre olsem Jisas yet i skulim yumi.

**Ol: Papa bilong mipela, yu stap long heven.**

**Mekim nem bilong yu i kamap bikpela. Mekim kingdom bilong yu i kam. Strongim mipela long bihainim laik bilong yu long graun, olsem ol i bihainim long heven.**

**Givim mipela kaikai inap long tude.**

**Pogivim rong bilong mipela, olsem mipela i pogivim ol arapela i mekim rong long mipela.**

**Sambai long mipela long taim bilong traim.**

**Na rausim olgeta samting nogut long mipela. Amen.**

### **4. Komunio Bilong Spirit**

L: Ol bratasusa, taim yumi pre “*givim mipela kaikai inap long tude*”, yumi no ken ting long kaikai bilong graun tasol. Nogat. Yumi mas tingim dispela tok bilong Jisas, “*Bodi bilong mi em i kaikai tru, na blut bilong mi em i samting tru bilong dring. Manmeri i kaikai bodi bilong mi na dringim blut bilong mi, ol i stap long mi na mi stap long ol*”. Yumi bilip tru long dispela tok bilong Jisas na yumi pre:

**Ol: Jisas, yu kaikai tru bilong mipela. Mipela i laikim yu tru. Kam na stap wantaim mipela. Strongim mipela. Mekim mipela holi. Stap wantaim mipela oltaim.**

L: Yumi sarap liklik taim nau. Yumi askim Jisas Krais, bai em i pas tru wantaim yumi wan wan. (*sarap liklik taim*)

### **5. Ol i ken singim wanpela singsing bilong Holi Yukaris**

### **6. Ol Manmeri i Ken Pre:**

## Sol bilong Krai:

**Ol:** Sol bilong Krai, mekim mi holi.  
Bodi bilong Krai, yu laip bilong mi.  
Blut bilong Krai, yu dring bilong mi.  
Wara bilong sait bilong Krai, wasim mi.  
Pen bilong Krai, strongim mi.  
Gutpela Jisas, harim mi.  
Long sua bilong yu, haitim mi.  
Taim mi laik lus, holim mi.  
Long taim bilong dai, kisim mi.  
Long ples bilong ol santu, bringim mi.  
Na oltaim stap wantaim mi. Amen.

O

## Song bilong Maria:

**Ol:** Sol bilong mi i givim bikpela ona long Lord.  
Bel bilong mi i hepi tru long God i Ridima bilong mi.  
Em i lukdaun long wokmeri bilong em.  
Nau na oltaim olgeta man i givim biknem long mi.  
God antap i mekim gut long mi.  
Em i marimari long ol i pret long em.  
Em i soim strong bilong han bilong em,  
na i daunim ol man i bikhet long em.  
Em i daunim ol man i strongpela,  
na i putim antap ol man i stap daunbilo tru.  
Em i givim ol gutpela samting long ol man i hangre.  
Em i rausim ol man i gat planti samting.  
Em i was gut long ol man bilong Israel.  
Olsem em i promisim Abraham na lain bilong em.  
Ona long Papa na long Pikinini na long Holi Spirit,  
olsem taim bipo nau na oltaim. Amen.

## Pinisim Lotu

### 7. Pre Bilong Pinis

L: Yumi pre... *(ol i sarap liklik taim na pre)*

**Ol:** Amen.

## 8. Toksave Bilong Ol Samting Bilong Lotu Na Wok.

L: Yumi olgeta sindaun na harim sampela toksave.

## 9. Pre Bilong Blesim.

L: Yumi olgeta sanap. Orait, lotu bilong yumi i pinis. Yumi askim God Papa, bai em i blesim yumi. God Papa bilong yumi, em i ken marimari long yumi na givim bel isi long yumi. God i strong olgeta i blesim yumi, long nem bilong Papa na bilong Pikinini, na bilong Holi Spirit.

**Ol: Amen**

O

L: God Papa bilong yumi wantaim Bikpela Jisas Krais i ken marimari long yumi na givim bel isi long yumi. Yumi ken litimapim nem bilong Papa na bilong Pikinini na bilong Holi Spirit.

**Ol: Amen.**

L: Yumi go nau na mekim gut long ol arapela manmeri.

**Ol: Yumi tenkim God.**

## 10. Singsing Bilong Pinisim Lotu



# **LOTU BENEDIKSEN (*adorim Holi Yukaris na blesing*)**

## **1. Singsing bilong bigin**

*Makim wanpela singsing bilong onarim Yukaris, o bilong Pestode. Taim ol i singsing, pris o diken i bringim Hostia i kam long tabernakel, na em i putim long monstrans antap long alta. Dispela em bilong helpim ol pipel long tingim Krais i stap namel long ol. Bihain, pris i nildaun na adorim Jisas long Yukaris. Em i tromoi insens bilong givim ona long Jisas.*

## **2. Rit bilong Tok bilong God**

### **3. Skul**

*(Pris, diken o katekis i ken givim skul)*

### **4. Pre**

Pre bilong Sande o bilong Pestode, o ol narapela pre  
*(Pris na pipel i ken pre wantaim)*

### **5. Singsing**

Bilong onarim Yukaris.  
*(Pris i ken tromoi insens gen)*

### **6. Pre bipo long blesing**

P: Yu givim bret bilong heven long ol manmeri (Aleluia).

**Ol: Em i nambawan tru (Aleluia).**

P: Yumi pre:

Jisas, yu bin givim dispela gutpela sakramen long mipela,  
bai mipela i tingting long pen na dai bilong yu.  
Mipela i askim yu, helpim mipela long onarim  
sakramen bilong Bodi na Blut bilong yu,  
bai mipela i ken kisim oltaim strong bilong oraitim mipela.  
Yu stap king nau na oltaim.

**Ol: Amen.**

## 7. Blessing

*Pris i go long alta na em i holim monstrans bilong blesim ol pipel long mak bilong diwai kros. Ministran i ken paitim belo na tromoi insens bilong givim ona long Jisas. Ol pipel i sarap na pre long tingting bilong ol.*

## 8. Pre bihain long blessing

P: Yumi litimapim nem bilong God, na nem bilong ol pren bilong em.

**Ol: Yumi onarim God.**

**Yumi onarim nem bilong em.**

**Yumi onarim Jisas Kraiss, em i God tru na man tru.**

**Yumi onarim nem bilong Jisas.**

**Yumi onarim Jisas long dispela sakramen bilong alta.**

**Yumi onarim Hat bilong Jisas.**

**Yumi onarim Blut bilong Jisas.**

**Yumi onarim Holi Spirit.**

**Yumi onarim Santu Maria, Mama bilong God.**

**Yumi onarim nem bilong Maria, Virgo Imakulata.**

**Yumi onarim Maria, God i kisim em i go long heven.**

**Yumi onarim Santu Josep, man bilong Maria.**

**Yumi onarim God long ol ensel na long ol santu.**

## 9. Singing bilong Pinis

*Makim wanpela singsing bilong onarim Yukaris o bilong Pestode. (Pris i putim Yukaris i go bek long tabernakel na lotu i pinis.)*



## KONPESIO (*Sakramen bilong sekan*)

Jisas i laik skulim yumi long bikpela marimari bilong God Papa. Yumi olgeta i save mekim sin long God Papa na long ol bratasusa bilong yumi. Tasol yumi ken tenkyu long God; bikos em i givim yumi wanpela rot bilong kam bek long em. Jisas i bin givim Sios bilong em dispela sakramen bilong kamap wanbel gen wantaim God.

Dispela sakramen i sanap long tok bilong Buk Baibel: *“Na em i tokim ol: ‘Bel bilong yupela i ken i stap isi...Yupela kisim Holi Spirit. Sapos yupela i lusim sin bilong ol manmeri, orait sin bilong ol bai i lus. Na sapos yupela i no lusim sin bilong ol manmeri, orait sin bilong ol bai i stap yet.’”* (Jn 20:19-23)

Krais yet i givim pawa bilong pogivim sin. Em i soim rot long painim bel isi. Krais i givim dispela pawa long Sios bilong em. Sios i makim ol bisop na pris bilong holim dispela wok bilong harim konpesio – na pogivim ol sin. Taim yumi konpes long pris, yumi konpes long Krais yet. Krais yet i pogivim sin bilong yumi.

Yumi no ken lusim konpesio longpela taim tumas. Nogat. *“Sapos yumi tok, mi no gat sin, orait, yumi giamanim bel bilong yumi yet, na tok tru i no stap long bel bilong yumi,”* (1 Jn 1:8).

Olsem em i gutpela sapos sampela taim long yia yumi konpes. *“Na sapos yumi autim sin bilong yumi, orait God bai i mekim olsem em i bin tok...Em i lusim sin bilong yumi”.* (1 Jn 1:9)

Konpesio em i wanpela gutpela rot tru bilong bungim Krais. Em i mekim yumi orait gen long taim em i pogivim ol sin bilong yumi. Tasol yumi save, pris i no stap klostu olgeta taim. Olsem na, sampela taim i no gat rot bilong mekim konpesio. Tasol, sapos yumi mekim tok sori na yumi sori tru long ol sin bilong yumi na yumi singaut long marimari bilong God, God bai i pogivim ol sin bilong yumi. Long sakramen bilong Yukaris tu, yumi bungim Krais na em i save tekewe ol sin bilong yumi. Long lotu penans bilong Misa, sapos yumi gat trupela sori, God bai pogivim ol sin bilong yumi. Tasol i gat lo bilong Sios i tok olsem: Yumi mas autim ol bikpela sin long pris long konpesio. Na yumi ken kolim ol liklik sin tu sapos yumi laik.

## Rot bilong Konpesio

### 1. Pre bilong bigin

Holi Spirit, mekim klia tingting bilong mi, bai mi ken tingim bek olgeta sin bilong mi. Helpim mi, bai mi ken sori tru long ol sin bilong mi. Gutpela Jisas, yu laikim mi tru, olsem na yu bin dai long diwai kros bilong tekewe olgeta sin bilong mi. Planti taim yu lusim pinis ol rong bilong mi, bikos yu gutpela na yu laikim mi tumas. Tasol mi bin lusim tingting long yu gen, yu gutpela God bilong mi. Nau mi sori na mi laik kamap pren bilong yu. Maria, mama bilong mi, helpim mi long mekim gutpela konpesio.

o:

God, yu gutpela Papa bilong mi, mi kam hia, mi laik konpes. Kliaim tingting bilong mi, bai mi ken luksave gut long olgeta sin bilong mi. Helpim mi, bai mi ken sori tru, na bai mi ken kolim stret olgeta sin bilong mi long pris.

*(Sapos yu laik, yu ken ritim wanpela tok bilong God long helpim yu. Em hia sampela rit:)*

|                |                                                                            |
|----------------|----------------------------------------------------------------------------|
| Matyu 9:9-13   | Jisas i singautim Matyu.                                                   |
| Matyu 12:43-45 | Spirit nogut em i kam bek gen.                                             |
| Matyu 18:15-22 | Pasin bilong stretim bratasusa i bin mekim rong.                           |
| Matyu 25:14-30 | Tok piksa bilong ol wokboi i kisim mani bilong wok bisnis.                 |
| Mak 2:1-12     | Jisas i mekim orait wanpela man han lek nogut.                             |
| Mak 12:28-33   | Namba wan lo bilong God.                                                   |
| Luk 3:3-14     | Jon bilong Baptais em i autim tok.                                         |
| Luk 4:1-3      | Satan i traim Jisas.                                                       |
| Luk 6:20-23    | Jisas i tok long ol rabis manmeri i ken amamas na mani manmeri i ken krai. |
| Luk 7:36-50    | Wanpela meri bilong sin em i welim lek bilong Jisas.                       |
| Luk 8:4-15     | Man i tromoi pikinini kaikai long gaden.                                   |
| Luk 10:25-37   | Man bilong Samaria em i sori long birua.                                   |
| Luk 12:22-31   | Pasin bilong wari na tingting planti.                                      |
| Luk 12:35-48   | Tok piksa bilong ol wokboi ol i redi i stap.                               |
| Luk 13:6-9     | Tok piksa bilong diwai i no karim kaikai.                                  |
| Luk 15:1-7     | Tok piksa bilong sipsip i lus.                                             |

|              |                                                    |
|--------------|----------------------------------------------------|
| Luk 15:8-10  | Tok piksa bilong mani i lus.                       |
| Luk 15:11-32 | Tok piksa bilong yangpela man i lusim papa.        |
| Luk 17:11-19 | Jisas i mekim klin 10-pela man i gat lepra.        |
| Luk 18:9-14  | Tok piksa bilong Farisi na man bilong kisim takis. |
| Luk 19:1-10  | Stori bilong Sakias.                               |
| Luk 22:54-62 | Pita i tok, "Mi no save long Jisas."               |
| Jon 8:1-11   | Meri i bin bagarapim marit.                        |
| Jon 10:19-23 | Ol disaipel ol i lukim Jisas.                      |
| Rom 13:11-14 | Yumi mas wokabaut stret.                           |
| Jems 1:22-27 | Yu mas harim tok na bihainim.                      |

## **2. Rot bilong tingim bek ol sin**

### **Tingim Tenpela Lo bilong God**

Mi Bikpela, mi God bilong yu. Yu no ken mekim pasin haiden.  
 Yu no ken kolim nating nem bilong God.  
 Yu mas onarim de bilong God.  
 Yu mas mekim gut long papamama bilong yu.  
 Yu no ken kilim man/meri i dai.  
 Yu no ken brukim marit.  
 Yu no ken stil.  
 Yu no ken giaman.  
 Yu no ken mangalim meri bilong narapela man.  
 Yu no ken mangalim samting bilong narapela manmeri.

### **Ol pasin bilong lotuim na onarim God**

Yu les long harim Tok bilong God?  
 Yu kolim nating nem bilong God?  
 Yu kros long God?  
 Yu haitim bilip bilong yu?  
 Yu sem long Sios o pasin Kristen bilong yu?  
 Yu les long mekim pre long haus na long ples?  
 Yu lotu long Sande o yu les?  
 Yu pre gut wantaim ol arapela manmeri long taim bilong lotu?  
 Yu helpim wok bilong Sios long pre, wok na long ofa bilong yu?  
 Tingting bilong yu i save pas tumas long ol samting bilong graun?  
 Yu mekim pasin bilong tumbuna: bilong rausim sik, bilong painim abus, bilong mekim marila, bilong painim posin man?

## **Ol pasin bilong sindaun gut**

Yu brata (susa) tru bilong olgeta manmeri olsem Jisas i bin soim yumi?  
Yu mekim gut long ol arapela manmeri, maski wanem asples na tok ples bilong ol?  
Yu man (meri) bilong marimari na sekan?  
Yu man (meri) bilong pait o kros o spak?  
Yu bagarapim narapela manmeri o famili bilong yu long olkain pilai (pilai laki) bilong winim mani?  
Yu daunim arapela manmeri?  
Yu hambak na yu tingting yu antap moa?  
Yu mekim tok baksait na tok stil?  
Yu bagarapim gutnem bilong arapela manmeri?

## **Pasin bilong marit na famili**

Marit bilong yu i stret long pasin bilong Katolik Sios?  
Yu mangalim narapela meri o narapela man?  
Yu brukim marit?  
Yu tambuim nating bodi bilong yu long meri o man bilong yu?  
Papamama, yu lukautim gut meri bilong yu, man bilong yu, na pikinini bilong yu long wok na long mani bilong yu?  
Papamama, yupela i lainim pikinini bilong yupela long pasin bilong pre na bilong lotu?  
Yupela i lainim pikinini tu long pasin bilong wok?  
Yupela stretim pikinini, taim em i bikheth na i mekim rong, o yupela i tok, “Maski, em i laik bilong em”?  
Yu mekim tok nogut, taim yu belhat?  
Taim pikinini i gat sik, yu bringim em i go kwik long haus sik?  
Papamama, yupela i helpim pikinini bilong yupela, bai ol i marit long Sios?  
Papamama, yupela helpim pikinini bilong yupela, bai ol i kamap pater, brata o sista?

## **Wok bilong ples**

Papamama, yupela i wok stret bilong helpim kantri bilong yumi i kamap gut?  
Oltaim yu mekim wok bilong yu insait long komyuniti?  
Yu peim takis long gavman?  
Yu save mekim toktok bilong bagarapim wok bilong gavman?

Long taim bilong ileksen yu save sekim gut na vot o yu bihainim rot nogut?

Yu lida yu rispektim ol pipel o yu yusim ol tasol?

Yu bagarapim ples bilong yu long les pasin bilong yu?

Yu holim gutpela wok, o yu sindaun nating na pinisim mani bilong arapela manmeri?

## **Lukautim bodi**

Yu lukautim gut bodi bilong yu: go long dokta, kisim marasin?

Yu bagarapim yu yet long pasin spak?

Yu tingting long kilim i dai narapela man/meri?

Yu mekim pasin pamuk wantaim marit man o meri?

Yu yangpela man o meri, yu tokpilai i gat sem long yangpela meri o yangpela man?

Yu mekim pasin pamuk wantaim yangpela man o meri?

Yu pilai long skin bilong yu yet?

Yu mekim bisnis pamuk?

Man o meri, yu mekim pasin pamuk long arapela man o meri?

Yangpela meri o mama, yu kilim pikinini long bel, o kaikai marasin bilong rausim pikinini long bel?

Mama, yu pasim bel bai pikinini i no inap kamap?

Yu kisim pil o lup o narapela marasin bilong pasim bel?

## **Mekim stret long ol manmeri**

Yu singaut long bikpela kompensesen tumas bilong baim bodi bilong manmeri i kisim birua?

Yu givim stretpela pe long ol wokmanmeri bilong yu o pe i daun tumas?

Yu save singautim stretpela pe long olkain wok bisnis bilong yu o prais i antap tumas?

Yu bekim dinau?

Yu mekim stret wok bilong yu, o yu stilim taim na mani bilong bos bilong yu long pasin nogut bilong yu?

Yu mekim pasin raskol long rot o long solwara?

Yu save kisim braiberi (gris moni) o nogat?

Yu mekim tok i tru, o yu man/meri bilong giaman?

Yu stilim o bagarapim samting bilong narapela manmeri?

Yu givim bek ol samting yu bin stilim?

### 3. Pre bilong Sori

*(Kolim wanpela bilong ol dispela pre sori)*

God, yu gut tumas; mi mekim nogut long yu. Mi sori nau. Marimari long mi na pogivim olgeta sin bilong mi. Mi no laik mekim sin moa. Mi laik stap gut. Helpim mi long strong bilong yu. Amen.

o:

God Papa, yu tasol yu gutpela, na mipela i mas givim olgeta laik bilong mipela long yu. Mi sori tru long olgeta sin mi bin mekim, long ol samting nogut mi bin mekim, na long ol samting mi bin les long mekim. Mi sori, mi bin mekim nogut long yu. Mi bilip yu save helpim mi, olsem na mi promis nau, mi laik abrusim pasin bilong sin na mi no laik mekim nogut long yu gen. Tingim bikpela wok Jisas i bin mekim long diwai kros, na marimari long mi. Amen.

o:

Papa, mi bin mekim sin long yu. Nau mi no inap bai yu kolim mi pikinini bilong yu. Mi man (meri) bilong sin. Marimari long mi. Amen. *(Lukim Lu 15:18-19)*

o:

Jisas, Pikinini bilong God, marimari long mi, man (meri) bilong sin. Amen.

### 4. Telimautim sin long Pris

Jisas, marimari long mi, mi bin mekim sin. Mi no bin konpes inap long...

*(tokim pris long las taim yu bin konpes na yu telimautim ol sin bilong yu. Autim ol sin pinis, yu tok:)*

Em tasol, mi sori tru long ol sin bilong mi.

### 5. Blesing bilong tekewe sin (absolusio)

*(Nau pris i litimapim han bilong em bilong blesim man o meri i bin konpes, na em i tok:)*

God em i Papa bilong marimari. Long dai na kirap bek bilong Pikinini bilong em, em i belgut gen long yumi ol manmeri. Em i bin salim Holi Spirit i kamdaun long yumi bilong tekewe ol sin bilong yumi. Long wok bilong Sios, God i ken pogivim olgeta

sin bilong yu na givim bel isi long yu. Na olsem mi tekewe olgeta sin bilong yu long nem bilong Papa, na bilong Pikinini na bilong Holi Spirit. Amen.

## 6. Penans

*(Pris i bin makim wanpela penans long yu. Dispela penans em i wanpela wok o pre bilong helpim yu bilong stretim sindaun bilong yu.)*

## 7. Pre bilong tenkyu bihain long Konpesio

God, yu gutpela Papa bilong mi, yu lusim pinis olgeta sin bilong mi. Mi tenkim yu. Jisas, Ridima bilong mi, long blut bilong yu, yu bin oraitim mi. Nau mi laik stap gut. Holi Spirit, strongim na helpim mi long bihainim stretpela pasin bilong Jisas Kraus. Amen.



## Lotu Penans

### 1. Singsing bilong bigin

O God, mi laikim yu tumas, Yu harim maus bilong mi oltaim.

O

Yu putim yau long pre bilong mi, olsem mi mas singautim yu.

*(sapos ol i laik, ol i ken yusim narapela singsing)*

L: Ol bratasusa, yumi bung wantaim bilong singautim marimari bilong God. Pastaim yumi tok tenkyu long God Papa. Em i bin mekim yumi kamap pikinini bilong em. Yumi pre:

**Ol: God, Papa, yu bin mekim mipela wan wan i kamap pikinini bilong yu. Yu tokim mipela pinis, yu Papa tru bilong mipela. Yu laikim mipela tumas. Oltaim yu redi long pogivim ol rong bilong mipela. Helpim mipela bai mipela i ken i stap gutpela pikinini bilong yu gen. God Papa, mipela i tenkim yu tru. Amen.**

*(Ol i singsing)*

Mi laik singautim nem bilong yu, bikos mi stap nogut tumas. (2x)

O

O God, yu save mekim stret, na nau yu marimari gen. (2x)

*(o narapela singsing)*

## 2. Rit bilong Tok bilong God

*(Ol i ken yusim Lu 15:11-24, o narapela rit.)*

L: Nau yumi laik harim tok bilong God. Rit i tok, God i laikim yumi tru na em i save pogivim yumi. Tok bilong God i kam long Gutnius, Luk i raitim.

R: Lu 15:11-13

L: Taim yumi mekim rong, yumi mekim nogut long God Papa bilong yumi. Yumi no laik stap klostu long gutpela Papa i laikim yumi tumas. Em i pasin bilong yumi. Tasol God i gutpela tru. Em i no save givim baksait long yumi. Nogat. Em i laikim yumi tumas na em i laik yumi stap klostu long em oltaim. Em i singautim yumi long kam stap klostu long em.

R: Nau ritim: Lu 15:14-24

L: Long stori, papa i amamas, taim pikinini bilong em i kam bek long em: Olsem tasol, God Papa i save amamas tru, taim yumi sori long ol sin bilong yumi na yumi tanim bel. God i save pogivim ol sin bilong yumi. Na yumi ken i stap gutpela pikinini bilong em gen.

*(Ol pipel i ken sarap liklik taim nau, na tingim dispela tok bilong God)*

L: Yumi pre: God Papa, mipela i kam long yu,  
na mipela i singaut long yu.

**Ol: Harim pre bilong mipela.**

L: God Papa, helpim mipela long bihainim gen laik bilong yu.

**Ol: Harim pre bilong mipela.**

L: God Papa, soim mipela pasin bilong gutpela pikinini bilong yu.

**Ol: Harim pre bilong mipela.**

## 3. Pre long Holi Spirit

L: Yumi askim Holi Spirit long helpim yumi nau long tingim na skelim ol pasin bilong yumi.

**Ol: Kam Holi Spirit, kam long sol bilong mipela, na pulapim mipela long pasin bilong laikim yu na ol manmeri.**

L: God, salim Spirit bilong yu, bai laip i kamap.

**Ol: Na bai graun i kamap nupela gen.**

L: Yumi pre:

God, long helpim bilong Holi Spirit givim gutpela tingting long mipela. Long dispela Holi Spirit helpim mipela long save gut long stretpela pasin, na mekim mipela i amamas oltaim long gutpela tok bilong em. Mipela i pre long nem bilong Krais, em i Bikpela bilong mipela.

**Ol: Amen.**

#### **4. Tingim bek ol sin**

L: Yupela i sindaun isi na bekim ol askim bilong mi long bel bilong yupela yet.

*(Lida i ken yusim sampela tok i stap long lista bilong tingim bek ol sin. Em i no mas ritim olgeta lista, em i ken ritim sampela tasol.)*

L: Nau yumi olgeta i tokim God Papa, yumi sori long olgeta sin bilong yumi na yumi laik lusim ol dispela pasin nogut.

**Ol: Mi tokaut long God i strong olgeta, na long yupela, ol bratasusa: Mi bin mekim planti sin tumas, long tingting, long toktok, long pasin nogut mi bin mekim, na long ol gutpela wok mi les long mekim. Tru, i rong bilong mi, i rong bilong mi, i bikpela rong bilong mi. Olsem, na mi askim Santu Maria, i virgo oltaim, olgeta ensel na santu, na yupela ol bratasusa, yupela pre bai God i marimari long mi.**

*(Sapos pris i stap, ol manmeri i ken konpes nau. Sapos i no gat konpesio, lida i ken tok:)*

L: God i strong olgeta i ken marimari long yumi, na i ken tekewe ol sin bilong yumi, na i ken bringim yumi long laip bilong oltaim.

**Ol: Amen.**

#### **5. Singsing bilong Pinis**

Nau mi ken stap bel isi gen, bikos yu mekim gut long mi.

o

Mi wokabaut long ai bilong God, long taim mi stap yet hia long graun.

*(o narapela singsing bilong tenkyu)*

## ORDO

Jisas i singautim planti man i kamap disaipel bilong em, tasol em i makim 12-pela i stap aposel bilong em na em i givim kain kain wok long ol. Em yet i tokim ol: *“Yupela i mas i go mekim olgeta lain manmeri i kamap disaipel bilong mi. Na yupela baptaisim ol long nem bilong Papa na bilong Pikinini na bilong Holi Spirit. Na yupela lainim ol long bihainim olgeta tok mi bin givim long yupela.”* (Mt 28:18-20)

Olsem na ol aposel i bin telimautim Gutnius bilong Kingdom bilong God long planti ples na ol i singautim ol pipel long tanim bel. Ol i baptaisim ol na tekewe sin bilong ol. Ol i kirapim tu ol Kristen komyuniti. Na ol i stiaim ol long tok bilong God na strongim ol long Bodi na Blut bilong Krai.

Dispela wok ol aposel i bin givim long sampela arapela man, taim ol i putim han antap long ol. Long dispela pasin ol i makim ol olsem wokman bilong helpim ol Kristen komyuniti i kamap strong.

Nau, long Katolik Sios, i gat wanpela sakramen bilong makim ol kain wokman olsem; yumi kolim Ordo. Nambawan lain bilong kisim Ordo em ol bisop: ol bisop i senis bilong ol aposel, na ol i holim dispela wok Jisas i bin givim long ol aposel. Bisop i mas kamap namba wan wokman bilong helpim Kristen komyuniti bilong em. I gat narapela lain i save kisim Ordo tu: em ol pris.



Ol pris i stap aninit long bisop bilong helpim em long mekim wok bilong em. Na narapela lain, ol diken, ol tu i kisim Ordo long han bilong bisop, na ol i stap aninit long em bilong sambai long mekim Kristen komyuniti i kamap strong. Long taim bilong Ordo, ol dispela lain i kisim nupela strong bilong Holi Spirit bilong mekim wok bilong ol long ai bilong Kristen komyuniti.

## **Pre bilong helpim ol Pris (Diken) na singaut long Vokesen**

God Papa, long laik bilong yu yet yu bin singautim sampela man bilong holim wok pris. Mipela i askim yu, strongim ol pris bilong mipela. Helpim ol long wok gut wantaim bisop bilong ol. Blesim wok bilong ol, bai Gutnius bilong yu i sutim tru lewa bilong olgeta manmeri. Mekim ol i amamas long wok ol i mekim long nem na pawa bilong yu. Strongim ol, bai ol i no ken lusim dispela bikpela wok, tasol ol i ken holim gut inap long dai bilong ol. Mipela i askim yu long nem bilong Jisas Kraus, em i Bikpela bilong mipela. Amen.

## **Pre bilong singautim planti Pris (Diken)**

Jisas, yu Ridima bilong ol manmeri. Yu kam bilong oraitim mipela olgeta. Yu yet yu singautim ol aposel bilong holim wok bilong yu. Nau mipela i askim yu, bai yu marimari long pipel bilong yu. Singautim ol gutpela man bai ol i laikim wok pris. Long wanem, planti peris i no gat pris. Long Spirit bilong yu mekim ol pris i kamap holi. Sambai long ol, bai ol i olsem lait bilong graun, na gutpela tok na pasin bilong ol i ken soim rot long ol manmeri. Tekewe pret long ol long autim tok bilong yu, bai mipela i ken harim na bihainim. Strongim ol long taim bilong traim na long taim bilong hevi. Blesim wok bilong ol, bai lotu bilong yu i ken kamap long olgeta ples, na olgeta manmeri i ken onaim nem bilong yu. Amen.



## MARIT

God yet i bin kamapim pasin bilong marit. Em yet i bin wokim man na meri bilong sindaun wantaim na pas wantaim. God yet i bin tok, *“Em i no gutpela long dispela man i stap wanpis. Mi mas mekim kamap wanpela poroman i stap bilong helpim em.”* (Stat 2:18). Jisas i bin skulim yumi long dispela samting long taim em i tok olsem, *“Bipo tru, long taim God i wokim olgeta samting, em i wokim ol manmeri na em i mekim ol i kamap man na meri. Olsem na man i save lusim papamama na i pas wantaim meri bilong em, na tupela bai i kamap wanpela bodi tasol.’ God i tok olsem na tupela i no i stap olsem tupela moa. Nogat. Tupela i kamap olsem wanpela bodi tasol. Olsem na samting God i pasim pinis, em man i no ken katim.”* (Mk 10:6-9)

As bilong marit i olsem: man na meri i bung tru long laip bilong tupela, na tupela i kamap wanpela. Tupela i mas poroman tru long olgeta wok, toktok, na pasin bilong tupela. Tupela i pasim tok long i stap poroman inap long taim wanpela bilong tupela i dai.

Long Baibel, marit em i piksa bilong laik tru bilong God. Yumi ken lukim dispela kain laik tru bilong God long Olpela Testamen. God i laikim Israel oltaim, olsem meri tru bilong em, maski Israel i gat asua na i mekim rong. Na long Nupela Testamen yumi lukim Jisas i laikim Sios bilong em olsem meri bilong em. Em i givim laip bilong em long helpim Sios. Laik bilong God Papa i go long Israel na laik bilong Jisas i go long Sios, dispela i soim rot long ol marit. Maritman i mas helpim na strongim meri bilong em, na maritmeri i mas mekim olsem long man bilong em. Tupela i mas tilim olgeta gutpela samting wantaim. Tupela i mas karim olgeta wok na hevi wantaim long laip bilong tupela.

Sakramen bilong marit i pasim man na meri wantaim. Na long tingting bilong God, pikinini i ken kamap long dispela laik i pasim tupela. Olsem na man na meri i gat wok bilong lukautim tupela yet na pikinini bilong tupela. Insait long komyuniti tupela i gat wok bilong strongim Sios na bilong soim gutpela pasin Kristen. Tupela i save bungim Jisas long dispela sakramen. Jisas i stap wantaim tupela

oltaim, na olsem marit em i rot bilong tupela i kamap holi. Ol wok na ol amamas i strongim laik bilong tupela insait long marit, na i helpim tupela i kamap holi. Long Kristen marit man i mas helpim na strongim meri long bilip, na pre na lotu, na long olgeta gutpela pasin. Na meri i mas mekim wankain long man bilong em. Marit bilong tupela Katolik (na bilong wanpela Katolik na arapela i no Katolik) i mas kamap long ples klia. Long ai bilong Kristen komyuniti, man i givim dispela sakramen long meri bilong em, na meri i givim sakramen long man bilong em. Taim wanpela man (meri) i givim dispela sakramen long narapela, wan wan i tok:

MI (*Nem...*) MI LAIK KISIM YU (*Nem...*) MAN/MERI BILONG MI. MI PROMIS BAI MI SINDAUN GUT WANTAIM YU LONG GUTPELA TAIM NA LONG TAIM NOGUT, LONG TAIM MITUPELA I STAP GUT NA LONG TAIM MITUPELA I GAT SIK. MI PROMIS BAI MI LAIKIM YU NA MEKIM GUT LONG YU OLGETA DE INAP LONG TAIM MI DAI.

*Tupela i mekim dispela tok long ai bilong Kristen komyuniti, na long ai bilong pris o diken.*

### **Pre bilong strongim promis bilong Marit**

Gutpela Jisas, yu bin mekim mitupela i stap wantaim long strongpela laik. Na yu yet i pasim mitupela, taim mitupela i bin mekim promis bilong marit. Yu laik bai mitupela i mas stap gut wantaim, bilong painim amamas na bilong skruim wok bilong kingdom bilong yu. Yu laik, bai marit bilong mitupela i stap olsem piksa bilong bikipela laik bilong yu long ol pipel bilong yu. Dispela laik, mitupela i save, i no ken senis. Dispela laik i no ken dai.

Mitupela i tenkim yu. Na mitupela i askim yu: blesim dispela marit yu yet i bin kamapim. Helpim mitupela long painim amamas long ol wok, pilai, na bisnis bilong mitupela. Strongim mitupela long gutpasin. Helpim mitupela long pre wantaim, olgeta de. Strongim bodi bilong mitupela tu, bai mitupela i no ken bagarap long bikipela sik. Givim longpela laip long mitupela, bai mitupela i ken helpim planti arapela manmeri, na mitupela i ken lukim ol pikinini bilong pikinini bilong mitupela. Bihain, bringim mitupela i go long heven, bai mitupela i ken lukim yu na amamas oltaim. Amen.

## WELIM SIKMANMERI

Taim Jisas i wokabaut yet long graun em i soim marimari bilong em planti taim long ol sikmanmeri na em i oraitim ol. Strong na marimari bilong Jisas i stap yet. Nau tu Jisas i laik helpim ol manmeri i gat sik. Em i redi long helpim ol long sakramen bilong welim sikmanmeri.

Tru, i gutpela sapos yumi helpim ol sikmanmeri na bringim ol i go long dokta. Tasol yumi no ken lus tingting long painim helpim bilong Jisas long sakramen bilong welim sikmanmeri.

Aposel Jems i raitim olsem: *“Ating namel long yupela i gat wanpela brata o susa i gat sik? Orait em i mas singautim ol hetman bilong Sios. Long nem bilong Bikpela ol i mas putim wel long bodi bilong em, na ol i mas pre bilong helpim em.”* (Je 5:14) Olsem na yumi no ken les long singautim pris i kam.

Taim yumi wetim pris, i gutpela sapos yumi stretim haus na klinim tebol tu. Na moa yet: singautim ol famili na pren i kam pre wantaim sikman (meri), bai tingting bilong em i redi long bungim Jisas long sakramen bilong Welim Sikmanmeri. Helpim em, bai em i redi long mekim gutpela konpesio na long kisim komunio. Pre sori wantaim sikman (meri) olsem: “Papa, mi bin mekim sin. Marimari long mi. Yu no ken kotim mi. Mi laik stap gut nau.”

Na taim pris i kam, yupela stap na lotu wantaim. Pre bilong ol bilipmanmeri i helpim tru bratasusa bilong yumi i gat sik, na tu i strongim bilip bilong em. Taim pris i welim sikman (meri), em bai i tok olsem:

P: LONG DISPELA WEL HOLI, MI WELIM YU LONG EN, NA LONG BIKPELA MARIMARI BILONG EM, GOD I KEN HELPIM YU LONG STRONG BILONG HOLI SPIRIT.

**OI: AMEN.**

P: BIKPELA I BIN TEKEWE SIN BILONG YU, NA TU EM I KEN ORAITIM YU, NA KIRAPIM YU GEN LONG LAIK BILONG EM.

**OI: AMEN.**

## **Pre bilong helpim sikmanmeri**

Bikpela, Jisas Krais, mipela i tingting long strong na marimari bilong yu. Marimari long brata/susa bilong mipela i gat sik. Strong bilong yu inap long helpim em. Kam helpim em. Kam stap wantaim em. Sapos yu stap wantaim em, em i no mas pret moa. Long wanem, yu Jisas, yu bin win long Satan na win long dai. Brata/susa bilong mipela i sori long ol sin bilong em. Yu pogivim ol sin bilong em, bai em i ken stap bel isi. Helpim em tu long winim sik bilong em, sapos yu laik. Tasol sapos sik i bagarapim em tru, em i no mas pret tumas. Em i ken save: yu laik singautim em i kam long yu. Mipela i bilip: man/meri i stap wantaim yu, em bai i painim laip bilong oltaim.

Jisas, yu kam. Mipela i bilip long yu.

Jisas, yu kam. Mipela i wetim helpim bilong yu.

Jisas, yu kam. Mipela i laikim yu. Amen.



## **Lotu bilong helpim sikmanmeri (*taim i nogat pris*)**

*(Long taim i no gat pris, lida i ken wokim wanpela lotu long tingting bilong em yet. Em hia wanpela rot bilong stiaim em.)*

### **1. Singsing bilong bigin**

*(sapos planti manmeri i stap.)*

### **2. Pre bilong redi**

L: Bikpela, Jisas Krais,

Lukim mipela i bung hia long nem bilong yu, na mipela i askim yu, bai yu harim pre bilong mipela, long wanem, mipela i bilip tru long sori na marimari bilong yu.

Lukautim dispela brata/susa bilong mipela i gat sik, (na lukautim olgeta sikmanmeri i stap hia.) Soim mipela olgeta rot bilong bel isi na amamas bilong kingdom bilong yu. Yu stap oltaim oltaim.

**Ol: Amen.**

### 3. Tok i go pas

L: Jisas i bin helpim na oraitim planti manmeri. Strong bilong em i ken wok insait long yumi tu. Yumi mas bilip strong long Jisas i laik helpim yumi. Na yumi mas wok long rausim ol samting i ken pasim rot long Jisas. Olsem na yumi mas tingim bek ol sin yumi bin mekim. Na yumi mas askim God, bai em i pogivim ol rong bilong yumi.

### 4. Tok bilong God

*(Lida i ken painim arapela rit bilong Baibel).*

|            |                                                   |
|------------|---------------------------------------------------|
| Mk 1:29-30 | Jisas i mekim orait mama bilong meri bilong Pita. |
| Mk 1:40-45 | Jisas i mekim klin wanpela man i gat lepra.       |
| Lu 5:17-26 | Jisas i mekim orait wanpela man han lek nogut.    |
| Ap 3:1-10  | Wanpela man lek nogut i kamap gutpela.            |

### 5. Skul

Jisas i gat strong bilong stretim sikman/meri. Planti taim em i pinisim sik bilong bodi wantaim sik i stap long sol. Sampela taim Jisas i strongim sol tasol, bai sikman/meri inap long bilip moa strong na em inap long karim diwai kros wantaim Jisas.

### 6. Singsing

#### 7. Pre

L: God Papa,  
Pikinini bilong yu, Jisas, i bin helpim ol sikmanmeri. Sambai long mipela, taim mipela i pre bilong helpim ol. Givim strong long mipela, bai mipela inap long karim olgeta sik na hevi olsem diwai kros bilong mipela. Mipela i pre:

**Ol: Harim pre bilong mipela.**

L: Helpim ol dokta na nes, bai ol i painim as bilong sik na painim tumas marasin bilong winim sik. Mipela i pre:

**Ol: Harim pre bilong mipela.**

L: Mipela i pre bilong helpim ol sikmanmeri i karim bikpela pen tumas. Mipela i pre:

**Ol: Harim pre bilong mipela.**

L: Mipela i pre bilong helpim olgeta manmeri i gat kain kain wari.  
Mipela i pre:

**Ol: Harim pre bilong mipela.**

L: Mipela i pre bilong helpim ol famili na wantok i save lukautim mipela. Mipela i pre:

**Ol: Harim pre bilong mipela.**

*(Ol i ken skruim askim long laik bilong ol)*

L: God Papa, harim dispela ol pre mipela mekim bilong helpim olgeta manmeri i gat sik. Salim Holi Spirit bilong yu i kam, bai ol i kisim strong bilong karim hevi bilong ol. Mipela i askim yu long nem bilong Krais, em i Bikpela bilong mipela.

**Ol: Amen.**

## **8. Blesim marasin**

L: Yumi pre:

God Papa, yu bin putim strong bilong pinisim sik insait long planti kain rop na lip. Blesim na strongim dispela marasin, dokta i bin givim long sikman/meri. Na mekim bai dispela marasin i ken wok long oraitim sikman/meri. Mipela i pre long nem bilong Krais, em i Bikpela bilong mipela.

**Ol: Amen.**

*(Blesim marasin long mak bilong diwai kros, o tromoim holi wara antap long en long mak bilong diwai kros.)*

## **9. Blesim sikmanmeri**

*(Putim han long sikmanmeri na pre:)*

L: God Papa, long nem bilong Jisas mipela i putim han long dispela brata/susa i gat sik. Mipela pre, bai dispela man/meri i ken kisim orait long sol na long bodi, bai strong bilong yu i ken kamap ples klia na mipela i ken bilip tru long yu. Mipela i pre long nem bilong Krais, em i Bikpela bilong mipela.

**Ol: Amen.**

## **10. Singsing bilong pinis**

## **Pre bilong helpim manmeri i laik dai**

*Man/meri i dai wantaim Jisas, em bai i painim laip bilong oltaim. Yumi sori long man/meri i laik i dai. Yumi mas soim sori bilong yumi na helpim em. Putim wanpela diwai kros na rosari long han bilong em. Kolim ol sotpela pre klostu long em. Sapos em i no save toktok moa, em i ken bihainim yu long tingting bilong em tasol. Na ol arapela manmeri i ken pre.*

L: Jisas, mi bilip long yu.

**Ol: Jisas, mi bilip long yu**

L: Jisas, mi hop long yu.

**Ol: Jisas, mi hop long yu**

L: Jisas, mi laikim yu.

**Ol: Jisas, mi laikim yu.**

L: Jisas, mi sori long ol sin bilong mi.

**Ol: Jisas, mi sori long ol sin bilong mi**

L: Jisas, kam nau long mi.

**Ol: Jisas, kam nau long mi.**

L: Maria, mama bilong mi, helpim mi.

**Ol: Maria, mama bilong mi, helpim mi.**

L: Santu Josep, sambai long mi.

**Ol: Santu Josep, sambai long mi.**

L: God Papa, kisim sol bilong mi i go long yu.

**Ol: God Papa, kisim sol bilong mi i go long yu.**

L: Brata/susa bilong mi (*nem...*)

God em i bin kamapim yu. Yu go bek nau long God, em i bin wokim yu long graun. Kraiss, em i bin dai long diwai kros long helpim yu, em i ken bringim yu long gutpela taim tru. Kraiss bai i kisim yu i go long kingdom bilong em. Kraiss, gutpela wasman, i ken putim yu insait long banis bilong em. Em i ken pogivim ol sin bilong yu, na putim yu wantaim ol pipel bilong em. Bai yu ken lukim pes bilong Jisas Kraiss Ridima bilong yu, na yu ken amamas wantaim God oltaim oltaim.

**Ol: Amen.**

## Pre long taim man o meri i dai pinis

L: Yupela ol santu, yupela i kam,

**Ol: Yupela ol ensel, kisim sol bilong em na bringim em i go long God.**

L: Papa bilong mipela,

**Ol: Yu stap long heven ...**

L: Ave Maria,

**Ol: Yu pulap long grasia...**

L: Bikpela, Jisas, givim malolo bilong oltaim long em.

**Ol: Na lait bilong yu i ken i stap wantaim em oltaim oltaim.**

L: Yumi pre:

God Papa, yu save marimari oltaim.

Plis, marimari long brata/susa (*nem...*), nau tasol i bin dai.

Salim ensel bilong yu i kam kisim em i go long heven,

bai em i kam i stap wantaim yu

long amamas bilong laip bilong oltaim.

**Ol: Amen.**







Long ol pestode bilong Katolik Sios, bikpela wok bilong Jisas Kraus bilong kisim bek yumi ol manmeri i kamap ples klia.

Long ol dispela pestode yumi no tingim ol wok bilong Jisas i olsem samting i bin kamap long taim bipo tasol. Nogat. Jisas i stap laip insait long Sios na i mekim wok bilong em i kamap nau, long Spirit bilong em. Wok bilong Holi Spirit insait long Sios i kamap ples klia long laip bilong ol santu na long laip bilong ol gutpela Kristen tu. Bilong tingim dispela wok bilong Holi Spirit, Sios i makim sampela pestode bilong Santu Maria na bilong ol arapela santu.

**Atven** - Yumi redi, bai Jisas i kam: Yumi tingim ol tok bilong ol profet bilong bipo, toksave bilong ensel i go long Maria, na wok bilong Jon Baptais em i redim rot bilong Jisas. Ol Juda i bin wetim Ridima i kamap long Betlehem. Yumi wetim em i kam bek gen bilong inapim Kingdom bilong em, na bilong givim Kingdom bilong em long God Papa.

**Krismas** - Jisas i lait bilong yumi. Yumi tingim Jisas i bin kamap long Betlehem (25 Desemba). Em i memba bilong wanpela famili (Sande bihain long Krismas). Santu Maria i Mama bilong God (1 Janueri). Jisas i singautim ol saveman (pestode bilong Epipani – Tri King). Yumi amamas, na long komyuniti bilong yumi, yumi givim welkam long Jisas.

**Len** - Yumi tingim pen na dai bilong Jisas i bin tekewe ol sin bilong yumi. Yumi redim ol katekumen bilong kisim Baptais. Yumi yet i tanim bel na kamap gutpela Kristen. Long Holi Wik yumi tingim wok na indai bilong Jisas, na yumi dai long pasin bilong sin.

**Ista** - Yumi tingim Jisas i win long indai, na olsem yumi gat rot bilong kisim laip.

**Asensen** - Jisas i go bek long Papa long redim ples bilong yumi.

**Pentekos** - Jisas i salim Holi Spirit i kam bilong givim nupela laip long Sios. Holi Spirit i mekim yumi kamap wanpela Kristen komyuniti. Em i strongim yumi long mekim wok bilong Jisas, bai olgeta manmeri i ken bilip long em.

# ATVEN

## Baibel Lotu bilong Atven

### 1. Singsing bilong Bigin

#### 2. Pre

L: God Papa, promis bilong yu i stap bipo tru inap long nau. Em promis bilong salim wanpela helpim i kam. Long dispela lotu mipela i tingim Jisas, Ridima bilong mipela. Mipela i bilip yu inapim tru ol promis bilong yu long dispela Jisas Krais. Em i bin oraitim mipela na em i laik kam bek gen bilong inapim olgeta tok bilong em long kingdom bilong yu. Helpim mipela long stap redi, taim Jisas i kam bek bilong bungim mipela. Mipela i pre long nem bilong Jisas Krais em i Bikpela bilong mipela.

**Ol: Amen.**

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God

*(Lida i ken yusim wanpela bilong ol dispela rit i stap hia)*

Wik 1: Lu 1:26-38                      Ensel i tokim Maria olsem Jisas bai i kam.

Wik 2: Lu 21:25-28; 34-36 Bihain bai Pikinini bilong Man bai i kam.

Wik 3: Lu 3:1-18                      Jon bilong Baptais em i autim tok.

Wik 4: Lu 1:39-45                      Maria i go lukim Elisabet.

#### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul.)*

### 6. Singsing bilong Atven

## 7. Pre

*(Ol i ken bihainim ol pre i stap hia, o yusim narapela pre).*

L: Bikpela, Jisas Krais, yu King na Ridima bilong mipela.  
Yu kamap man wankain olsem mipela, bikos yu laik tekewe ol sin bilong mipela na yu laik bringim ol manmeri i kam bek long Papa bilong yu. Mipela i singaut nau long yu:

**Ol: Jisas, soim bikpela strong bilong yu. Kam oraitim mipela.**

L: Jisas, yu bin wet long tok orait bilong Santu Maria, na yu kamdaun na yu kamap man. Helpim mipela tu long tok wankain olsem Santu Maria: ‘Mi harim tok bilong God’.

**Ol: Jisas, soim bikpela strong bilong yu. Kam oraitim mipela.**

L: Jisas, yu kamap pikinini bilong Santu Maria, Mama bilong yu i no gat sin. Tekewe sin bilong mipela, bai mipela i kamap holi olsem Santu Maria.

**Ol: Jisas, soim bikpela strong bilong yu. Kam oraitim mipela.**

L: Jisas, strongim mipela, bai mipela inap sakim Satan long taim em i laik pulim mipela long tingting na laik bilong em.

**Ol: Jisas, soim bikpela strong bilong yu. Kam oraitim mipela.**

L: Jisas, helpim olgeta manmeri i holim wok bilong yu, bai ol i ken bringim planti sinmanmeri i kam bek long stretpela pasin nau long dispela taim bilong Atven.

**Ol: Jisas, soim bikpela strong bilong yu. Kam oraitim mipela.**

L: Jisas, givim lait long ol manmeri i stap long tudak bilong sin na long ol manmeri i bin lusim bilip long yu, bai ol i ken kam bek long yu.

**Ol: Jisas, soim bikpela strong bilong yu. Kam oraitim mipela.**

L: Yumi pre:

God Papa, harim pre bilong mipela. Soim bikpela strong bilong yu, na rausim olgeta tudak long mipela. Mipela i pre long nem bilong Jisas Krais, em i Bikpela bilong mipela.

**Ol: Amen.**

## 8. Singsing bilong pinis, o Benediksen

## **Ol pre bilong Atven**

### **Pre wantaim Jisas na Mama Maria**

L: Bikpela, Jisas Krai, mipela olgeta i bin mekim sin.  
Sapos yu no kam, mipela i no inap orait.

**Ol: Jisas, kam na oraitim mipela.**

L: Mipela i bin mekim rong na mipela inap long lus olgeta.  
Mipela i singaut long yu: Kam, kisim bek mipela. Kam, bringim marimari bilong God long mipela.

**Ol: Jisas, kam na oraitim mipela.**

L: Maria, Mama bilong Jisas, God i bin promis bai Pikinini bilong yu i brukim pawa bilong Satan. God i bin blesim yu na sin bilong Adam i no stap long yu.

**Ol: Maria, yu amamas, God i stap wantaim yu.**

L: Maria, Ensel Gabriel i bringim tok bilong God i kam long yu.  
Yu bin kisim dispela tok, na pikinini bilong God i kamap man.  
Em i oraitim mipela, ol manmeri bilong sin.

**Ol: Maria, yu amamas, God i stap wantaim yu.**

L: Yumi Pre:  
God Papa, long tok bilong ensel mipela i save, Jisas, Pikinini bilong yu, i kamap man. Helpim mipela, bai mipela i bihainim Jisas na em i ken bringim mipela long heven.

**Ol: Amen.**

### **Krais, bai Yu kam bek gen**

L: Bikpela, Jisas Krai, ai bilong mipela i no lukim yu. Tasol long taim yu kam bek gen, bai mipela i lukim yu.

**Ol: Mipela i bilip, bai yu kambek gen wantaim bikpela bilas bilong yu.**

L: Bai yu bringim mipela i go long ples yu bin redim long haus bilong Papa bilong yu.

**Ol: Mipela i bilip, bai yu kambek gen wantaim bikpela bilas bilong yu.**

L: Bai yu pinisim dai na olgeta sori na krai bilong mipela; na bai mipela i pulap long nupela laip bilong yu.

**Ol: Mipela i bilip, bai yu kambek gen wantaim bikpela bilas bilong yu.**

L: Bai mipela i kaikai wantaim yu long bikpela kaikai long heven na dring long gutpela wara i gat laip bilong oltaim.

**Ol: Mipela i bilip, bai yu kambek gen wantaim bikpela bilas bilong yu.**

### **Singaut bilong Jon bilong Baptais (Lu. 3:1-18)**

L: God Papa, yu bin salim wanpela man i go pas bilong redim rot bilong Pikinini bilong yu, Jisas. Nem bilong dispela man em Jon bilong Baptais. Bipo profet Aisaia i tok long em: “Long ples i no gat man, maus bilong wanpela man i singaut, ‘Redim rot bilong Bikpela, stretim ol rot bilong em’.” Na long maus bilong Jon bilong Baptais yu tokim mipela:

“Yupela tanim bel. Kingdom bilong heven em i kam klostu pinis.”

**Ol: Helpim mipela long tanim bel na mekim penans.**

L: Jon bilong Baptais i singaut:

“Olgeta rot i gat ston nabaut, bai ol i mekim gut. Na bai olgeta manmeri i ken lukim wok God i mekim bilong kisim bek yumi.”

**Ol: Tekewe olgeta pasin giaman bilong mipela.**

L: “Man i gat tupela siot, em i mas givim wanpela long man i no gat. Na man i gat kaikai, em i mas mekim olsem tu.”

**Ol: Helpim mipela long tilim ol samting wantaim ol arapela manmeri.**

L: “Yupela i no ken paitim man nabaut o mekim kot giaman long ol bilong pulim mani bilong ol. Yupela i mas holim pe bilong yupela stret tasol”.

**Ol: Helpim mipela long stap stret na long lusim tingting nogut.**

L: “Namel long yupela wanpela man i sanap i stap na yupela i no save long em.”

**Ol: Givim mipela strongpela bilip, bai mipela i ken save long Pikinini bilong yu na laikim em.**

L: God Papa, yu bin salim Jon bilong Baptais bilong telimautim tok long ol manmeri bai ol i mas tanim bel. Na planti manmeri i go long Jon na ol i autim sin bilong ol na ol i kisim baptais. Mipela i askim yu nau, kirapim bel bilong mipela i wetim Jisas, em i laik i kam gen bilong kisim mipela i go i stap long heven wantaim em.

**Ol: Amen.**

# KRISMAS

## Baibel Lotu bilong Krismas

### 1. Singsing bilong bigin

#### 2. Pre

L: God Papa,  
mipela i tingim Jisas Krais, Pikinini bilong yu i kamap man.  
Mama Maria i karim em.  
Marimari bilong yu i kamap ples klia long dispela Jisas Krais.  
Mekim mipela inap long soim dispela marimari bilong yu  
long ol pipel. Mipela i pre long nem bilong Jisas Krais,  
em i Bikpela bilong mipela.

Ol: Amen.

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God

*(Lida i ken yusim wanpela bilong ol dispela rit hia)*

|             |                                                |
|-------------|------------------------------------------------|
| Mt 1: 18-25 | Maria i karim Jisas.                           |
| Lu 2:1-20   | Maria i karim Jisas.                           |
| Jn 1:1-18   | Tok i gat laip em i kamap man.                 |
| Ta 2:11-14  | Yumi mas i stap klin na wetim De bilong Krais. |
| Ta 3:4-7    | Yumi mas sanap strong long gutpela pasin.      |
| Hi 1:1-6    | Pikinini bilong God i givim tok long yumi.     |

#### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul.)*

### 6. Singsing bilong Krismas

## 7. Pre

L: Tude Ridima i kamap pinis long mipela, em Jisas Krais.

**Ol: Yumi singsing na tenkim na onaim God,  
em i Bikpela bilong yumi.**

L: God Papa, Pikinini bilong yu i kamdaun, em i kamap man. Em i stap wantaim mipela.

**Ol: Yumi singsing na tenkim na onaim God,  
em i Bikpela bilong yumi.**

L: Yumi lukim pinis marimari bilong God. Em i dispela Pikinini bilong God, Papa i bin salim em na em i kam. Marimari na stretpela pasin i pulap long em.

**Ol: Yumi singsing na tenkim na onaim God,  
em i Bikpela bilong yumi.**

L: Jisas, yu lait bilong ol manmeri, yu kam pinis bilong mekim ol manmeri i amamas. Salim lait bilong yu i kam insait long mipela na rausim tudak bilong sin.

**Ol: Jisas, harim pre bilong mipela.**

L: Jisas, givim lait bilong yu long olgeta manmeri, bai ol i ken save: yu Ridima yu kam bilong bringim gutpela taim long mipela.

**Ol: Jisas, harim pre bilong mipela.**

L: Jisas, yu king bilong gutpela taim, mekim ol pipel i pinisim ol kros na pait.

**Ol: Jisas, harim pre bilong mipela.**

L: Yumi pre:

Bikpela Jisas, yu kam pinis olsem lait bilong graun na yu rausim tudak bilong sin. Mipela i askim yu: Givim dispela lait long mipela, bai mipela i ken bihainim yu tasol. Yu king na Bikpela bilong mipela.

**Ol: Amen.**

## 8. Singsing bilong pinis, o Benediksen

## **Pre bilong Krismas**

L: Jisas, Pikinini bilong God, mipela i lotu long yu. Yu kam daun long graun bilong kisim bek mipela. Yu daunim yu yet na yu kamap man. Yu haitim biknem bilong yu.

**Ol: Bikpela, Jisas, mipela i kam bilong adorim yu.**

L: Mipela i save nau long bikpela marimari bilong God.  
Em i salim yu i kam bilong soim rot i go long heven.

**Ol: Mipela i tenkim yu.**

L: Mipela i amamas long yu. Yu bin i go pas long mipela long dispela rot. Na nau yu wokabaut wantaim mipela bilong bringim mipela long heven.

**Ol: Mipela i tenkim yu.**

L: Yu save blesim mipela, na olsem mipela i bilong yu nau na oltaim. Mipela i no laik lusim yu gen. Mipela i laik singsing wantaim ol ensel bilong heven.

**Ol: Ona i go long God i stap antap, na long graun gutpela taim long ol manmeri God i laikim ol tumas.**

L: Yumi pre:

**Ol: God Papa,**

**Virgo Maria i bin karim Jisas, Pikinini bilong yu na Ridima bilong mipela. Strongim bilip bilong mipela, bai mipela i ken bihainim em na stap wantaim em long heven. Amen.**



# HOLI FAMILI

## Baibel Lotu Bilong Holi Famili

### 1. Singsing Bilong Bigin

#### 2. Pre

L: God Papa, mipela i tingim Jisas Krai, Pikinini bilong yu i kamap man. Em i bin harim tok bilong santu Maria na santu Josep na soim gutpela piksa long olgeta famili bilong mipela. Mipela i askim yu, mekim famili bilong mipela i kamap holi na helpim mipela long soim dispela pasin holi bilong yu long olgeta manmeri. Mipela i pre long nem bilong Jisas Krai, em i Bikpela bilong mipela.

**Ol: Amen.**

#### 3. Toksave Long Rit

*(Lotu lida i ken tokaut long mining bilong pestode na bilong rit)*

#### 4. Rit Bilong Tok Bilong God

*(Lotu lida i ken yusim wanpela bilong ol dispela rit hia)*

|             |                                                |
|-------------|------------------------------------------------|
| Mt. 2:13-15 | Josep wantaim meri na pikinini i go long Isip. |
| Mt. 2:19-23 | Josep wantaim meri na pikinini i kambek.       |
| Lk. 2:22-32 | Josep na Maria i bringim Jisas long tempel.    |
| Lk. 2:41-52 | Yangpela manki Jisas i go long tempel.         |

#### 5. Skul

*(Ol pipel i ken sarap na tingting liklik long dispela rit, o lotu lida i ken givim sotpela skul.)*

### 6. Singsing Bilong Holi Famili

#### 7. Pre

L: God Papa, Pikinini bilong yu i kamdaun, na em i kamap man. Na tu em i kamap pikinini bilong Maria na Josep long liklik taun Nasaret. Mipela i tenkim yu long salim Jisas i kam long famili bilong mipela na mipela i tok:

**Ol: Mipela i litimapim nem bilong Yu, Bikpela bilong mipela.**

L: God Papa, mipela i lukim pinis marimari bilong yu long dispela Pikinini yu salim em i kam. Marimari long olgeta famili bilong mipela. Mipela i pre:

**Ol: Harim pre bilong mipela.**

L: God Papa, yu salim Jisas olsem lait bilong ol manmeri. Salim lait bilong yu i kam insait long ol famili bilong mipela na rausim tudak bilong sin. Mipela i pre:

**Ol: Harim pre bilong mipela.**

L: God Papa, givim lait bilong yu long olgeta manmeri, bai ol i ken save: yu salim Ridima i kam bilong bringim gutpela taim long olgeta famili. Mipela i pre:

**Ol: Harim pre bilong mipela.**

L: God Papa, yu salim Jisas olsem king bilong bel isi na gutpela taim. Pinisim ol kros na pait insait long ol famili bilong mipela. Mipela i pre:

**Ol: Harim pre bilong mipela.**

L: Yumi pre:

Bikpela Jisas, yu kamap man na yu stap wantaim famili bilong yu long Nasaret. Mipela i askim yu: strongim olgeta famili bilong mipela na marimari long ol famili i karim kainkain hevi. Yu king na Bikpela bilong mipela, nau na oltaim.

**Ol: Amen.**

## **8. Singsing Bilong Pinis, o Benediksen**



## Liklik Korona bilong Holi Famili

*Statim liklik korona wantaim mak kruse na pre:*

L: God, yu kam helpim mipela,

**Ol: Bikpela, kam kwik na sambai long mipela.**

L: Ona i go long Papa, na long Pikinini, na long Holi Spirit,

**Ol: Olsem taim bipo, na nau, na oltaim. Amen.**

*Long bikpela bis bilong korona yumi pre:*

L: Givim ona na biknem long Jisas Krais, Pikinini bilong God,

**Ol: Husat i bin harim tok bilong Santu Maria na Santu Josep.**

*Long liklik bis bilong korona yumi pre:*

L: Jisas, Maria, Josep,

**Ol: Givim lait long mipela, helpim mipela, sambai long mipela.**

*Bihain long wanpela hap (tenpela bis) yumi pre:*

L: Ona i go long Papa, na long Pikinini, na long Holi Spirit,

**Ol: Olsem taim bipo, na nau, na oltaim. Amen.**

*Bilong pinisim liklik korona yumi pre:*

**Bikpela Jisas Krais, yu bin harim tok bilong santu Maria na santu Josep, na mekim laip bilong famili i kamap holi. Helpim mipela long bihainim gutpela pasin bilong Holi Famili bilong Yu, bai mipela i ken stap wantaim em long laip bilong oltaim. Amen.**



## **Litani bilong Holi Famili**

**L: Lord, marimari long mipela.**

Ol: Kraiss, marimari long mipela.

**L: Lord, marimari long mipela.**

Ol: Kraiss, harim pre bilong mipela.

**L: God, Papa long heven,**

Ol: Marimari long mipela.

**L: God, Pikinini, Ridima bilong ol manmeri,**

Ol: Marimari long mipela.

**L: God, Holi Spirit,**

Ol: Marimari long mipela.

**L: Holi Trinit, wanpela God tasol,**

Ol: Marimari long mipela.

**L: Jisas, Maria na Josep,**

Ol: Pre bilong helpim mipela.

**L: Jisas, Maria na Josep, mipela i onaim yupela,**

Ol: Pre bilong helpim mipela.

**L: Jisas, Maria na Josep, ol i kolim yupela olsem “Holi Famili”  
bilong oltaim,**

Ol: Pre bilong helpim mipela.

**L: Jisas, Maria na Josep, pikinini, mama na papa bilong Holi Famili,**

Ol: Pre bilong helpim mipela.

**L: Jisas, Maria na Josep, pikinini bilong God, meri i klin olgeta  
na stretpela man,**

Ol: Pre bilong helpim mipela.

**L: Jisas, Maria na Josep, yupela i strong bilong olgeta famili i  
painim hevi,**

Ol: Pre bilong helpim mipela.

**L: Jisas, Maria na Josep, yupela i piksa bilong Holi Trinit hia  
long graun,**

Ol: Pre bilong helpim mipela.

**L: Holi Famili, yu bungim bikpela hevi tru,**

Ol: Pre bilong helpim mipela.

**L: Holi Famili, yu karim bikpela pen long wokabaut i go  
long Betlehem,**

Ol: Pre bilong helpim mipela.

**L: Holi Famili, nogat wanpela i welkamim yu long Betlehem,**

Ol: Pre bilong helpim mipela.

**L: Holi Famili, ol wasman bilong sipsip i kam lukim yu,**

Ol: Pre bilong helpim mipela.

**L: Holi Famili, ol i putim yu long haus bilong bulmakau,**

Ol: Pre bilong helpim mipela.

**L: Holi Famili, ol ensel i presim yu,**

Ol: Pre bilong helpim mipela.

**L: Holi Famili, ol saveman bilong san kamap i luksave long yu  
na onaim yu,**

Ol: Pre bilong helpim mipela.

**L: Holi Famili, lapun Simeon i tok welkam long yu insait  
long tempel,**

Ol: Pre bilong helpim mipela.

**L: Holi Famili, ol i mekim nogut long yu na rausim yu i go long  
narapela kantri,**

Ol: Pre bilong helpim mipela.

**L: Holi Famili, yu hait long Nasaret na i nogat wanpela i save  
long yu,**

Ol: Pre bilong helpim mipela.

**L: Holi Famili, yu harim na bihainim olgeta lo bilong God,**

Ol: Pre bilong helpim mipela.

**L: Holi Famili, yu gutpela piksa tru bilong Kristen famili,**

Ol: Pre bilong helpim mipela.

**L: Holi Famili, yu namel ples bilong bel isi na gutpela sindaun,**

Ol: Pre bilong helpim mipela.

**L: Holi Famili, waspapa bilong yu, em i gutpela piksa bilong  
olgeta papa i save lukautim famili,**

Ol: Pre bilong helpim mipela.

**L: Holi Famili, mama bilong yu, em i gutpela piksa bilong  
olgeta mama i save wok hat,**

Ol: Pre bilong helpim mipela.

**L: Holi Famili, Pikinini bilong yu, em i gutpela piksa bilong  
olgeta pikinini i save harim tok,**

Ol: Pre bilong helpim mipela.

**L: Holi Famili, i stap rabis long ol samting bilong graun, tasol  
pulap long bikpela blesing bilong heven,**

Ol: Pre bilong helpim mipela.

**L: Holi Famili, i stap rabis long ai bilong olgeta manmeri, tasol i gat biknem long heven,**

**Ol: Pre bilong helpim mipela.**

**L: Holi Famili, yu givim sapot bilong mipela long laip na hop long taim bilong dai,**

**Ol: Pre bilong helpim mipela.**

**L: Holi Famili, yu wassantu bilong mipela na lukautim mipela,**

**Ol: Pre bilong helpim mipela.**

**L: Lem bilong God, yu tekewe sin bilong olgeta manmeri,**

**Ol: Marimari long mipela.**

**L: Lem bilong God, yu tekewe sin bilong olgeta manmeri,**

**Ol: Marimari long mipela.**

**L: Lem bilong God, Yu tekewe sin bilong olgeta manmeri,**

**Ol: Givim gupela taim long mipela.**

**L: Yumi pre:**

**O God bilong gupela pasin na stretpela tingting bilong oltaim.**

**Yu bin singautim mipela long stap wantaim Famili bilong yu.**

**Givim mipela grasia bilong onaim Jisas, Maria na Josep na bihainim ol long dispela laip, bai mipela i ken stap amamas wantaim ol long laip bilong oltaim. Mipela i askim dispela samting long nem bilong Krais em i Bikpela bilong mipela.**

**Ol: Amen.**

## **Pre long Holi Famili**

Jisas, Pikinini bilong God na Pikinini bilong Maria, blesim famili bilong mipela. Kamapim namel long mipela pasin wanbel na bel isi na pasin bilong laikim narapela, yu bin painim pinis insait long famili bilong yu long liklik taun Nasaret.

Maria, Mama bilong Jisas na Mama bilong mipela, strongim famili bilong mipela long bilip na laikpasin bilong yu. Long taim mipela i gat hevi na long taim mipela i amamas bringim mipela i kam klostu long Jisas, Pikinini bilong yu.

Josep, waspapa bilong Jisas, na man bilong Maria, lukautim gut famili bilong mipela. Helpim mipela long taim bikpela hevi na wari i daunim tingting bilong mipela.

Holi Famili bilong Nasaret, mekim famili bilong mipela i kamap wan wantaim yu. Helpim mipela long kamap manmeri bilong bel isi. Strongim laikpasin bilong mipela long grasia bilong yu, bai mipela inap winim ol pasin nogut na traim i save kamap long famili bilong mipela. Putim God stret long bel na tingting bilong mipela na larim em i stap namel long haus na famili bilong mipela, inap mipela olgeta i kamap wanpela famili tasol, na painim amamas na bel isi long trupela haus bilong mipela wantaim yu. Amen.

### **Pre bilong givim yumi yet long Holi Famili.**

Jisas, mipela i laikim yu tru, yu Ridima bilong mipela. Yu bin lusim heven na kamdaun long dispela graun bilong skulim mipela, bilong soim rot long mipela na bilong kisim bek mipela. Yu bin daunim yu yet na stap planti yia long liklik ples Nasaret na harim tok bilong Santu Maria na Santu Josep. Long dispela rot yu mekim famili bilong yu i kamap holi na soim gutpela piksa long olgeta famili bilong mipela. Mipela i laik askim yu, bai yu kisim, blesim na lukautim famili bilong mipela i stap hia. Em i givim em yet olgeta long yu tude. Sambai long mipela na lukautim mipela long bihainim pasin holi, laikpasin, wanbel pasin na pasin bilong helpim ol arapela manmeri, bai mipela i ken kamap wankaim olsem Holi Famili bilong yu. Helpim mipela long kamap wan long hat na long sol, bai mipela i ken kisim amamas na glori bilong oltaim wantaim yu long heven.

Mama Maria, yu gutpela mama bilong Jisas na mama bilong mipela tu. Long marimari bilong yu helpim mipela long mekim dispela pre i kamap gutpela tru long ai bilong Jisas Krais, bai mipela i ken kisim grasia bilong em na kamap gutpela Kristen famili tru.

Santu Josep, yu waspapa bilong Jisas na man bilong Maria. Long strongpela pre bilong yu helpim mipela long olgeta samting mipela i nidim long mak bilong bodi na sol bilong mipela. Sambai long mipela moa yet long taim bilong indai, bai wanpela de mipela i ken stap wantaim yu long heven na litimapim nem bilong Jisas na Maria oltaim oltaim. Amen.

# **LAS DE BILONG YIA**

## **Baibel Lotu bilong Las De bilong Yia**

### **1. Singsing Bilong Bigin**

#### **2. Pre**

L: Yumi laik tingting long ol de bilong dispela yia i go pinis. Yumi laik tenkyu long God long olgeta samting em i bin givim yumi. Na yumi sori long ol sin yumi bin mekim. Na yumi tenkim God long ol gutpela wok, yumi bin mekim.

Yumi pre:

God Papa, olgeta gutpela samting i kamap long yu tasol. Mipela i tenkim yu long dispela yia i laik pinis nau. Mipela i tenkim yu long ol gutpela wok mipela i bin mekim. Na mipela i sori long ol gutpela wok mipela i les long mekim. Stiaim mipela long dispela nupela yia i laik kamap, bai mipela i ken mekim ol gutpela wok tasol. Mipela i pre long nem bilong Jisas Kraus, em i Bikpela bilong mipela.

**Ol: Amen.**

### **3. Toksave long rit**

*(Lida i ken tokaut long mining bilong pestode na bilong rit)*

### **4. Rit bilong Tok bilong God**

*(Lida i ken yusim wanpela bilong ol dispela rit hia.)*

|             |                                           |
|-------------|-------------------------------------------|
| Ap 17:24-31 | God i wokim graun wantaim olgeta samting. |
| Ef 1:15-21  | God i ken givim gutpela save long yumi.   |
| 1 Pi 1:3-9  | Gutpela laip tru i wetim yumi long heven. |

#### **5. Skul**

*(Ol pipel i ken sarap na tingting liklik long dispela rit, o lida i ken givim sotpela skul.)*

### **6. Singsing**

## 7. Pre

L: Ol bratasusa, nau yumi sori long ol sin yumi bin mekim long dispela yia i laik pinis, na yumi redi long nupela yia.

**Ol: Mi tokaut long God i strong olgeta...**

L: God Papa, mipela i save kisim olgeta samting long han bilong yu. Blesim mipela long olgeta de bilong dispela nupela yia. Mipela pre:

**Ol: Harim pre bilong mipela.**

L: Strongim bilip na hop na laik bilong mipela. Mipela i pre:

**Ol: Harim pre bilong mipela.**

L: Givim gutpela taim long olgeta pipel bilong dispela graun. Mipela i pre:

**Ol: Harim pre bilong mipela.**

L: Blesim ol pikinini na ol lapun: Givim bel isi long olgeta manmeri. Mipela i pre:

**Ol: Harim pre bilong mipela.**

L: Kisim ol manmeri ol i dai pinis long dispela yia, i go long ples bilong yu. Mipela i pre:

**Ol: Harim pre bilong mipela.**

L: God yet i ken blesim yumi long nem bilong Papa na bilong Pikinini na bilong Holi Spirit.

**Ol: Amen.**

## 8. Singsing bilong pinis, o Benediksen



# NIU YIA

## Baibel Lotu bilong Niu Yia

### 1. Singsing bilong begin

#### 2. Pre

L: God Papa, yu makim Jisas Krai i king bilong olgeta pipel na ples. Olgeta graun na olgeta taim i bilong em tasol. Long dispela lotu mipela i laik bung wantaim Jisas Krai na mipela i laik tenkim yu long ol blesing bilong dispela yia i go pinis, na mipela i laik askim yu long helpim mipela long dispela nupela yia i stat nau. Mipela i pre long nem bilong Jisas Krai, em i Bikpela bilong mipela.

**Ol: Amen.**

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God

*(Lida i ken yusim wanpela bilong ol dispela rit hia).*

Ga 4:4-7                Long Krai yumi wokbai i kamap pikinini bilong God

Re 1:4-8                Jisas bai kam bek

Re 1:12-19            Mi paslain tru na mi las tru

#### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul)*

#### 6. Singsing

#### 7. Pre

L: God Papa, yu bosim olgeta yia na olgeta taim. Long begin bilong dispela nupela yia mipela i askim yu:

**Ol: Papa, stap wantaim mipela.**

L: God Papa, olgeta samting yu bin wokim, i stap long han bilong Yu. Lukautim olgeta kantri na olgeta pipel, bai mipela i ken kamap wanfamili.

**Ol: Papa, bungim olgeta kantri na pipel.**

L: God Papa, yu bin wokim dispela graun na yu lukim ol wok bilong yu i gutpela. Helpim mipela long bung wantaim na lukautim gut graun bilong mipela.

**Ol: Papa, blesim ol wok bilong mipela.**

L: God Papa, mipela i amamas long Papua Niugini. Yu bin givim dispela graun long ol tumbuna bilong mipela. Helpim mipela long dispela nupela yia, bai mipela i ken kamap Kristen kantri tru.

**Ol: Papa, tenkyu long kantri bilong mipela.**

L: God Papa, tok bilong Jisas i bin kamap long Papua Niugini. Long dispela tok yu save stiaim mipela. Helpim mipela long bihainim tru dispela rot yu bin makim long mipela.

**Ol: Papa, tenkyu long tok bilong yu.**

L: God Papa, nau mipela i pre, bai yu helpim ples bilong mipela. Blesim ol pipel na ol lida bilong mipela. Strongim ol long wok wantaim, bai ples i go het. Oraitim ol sikmanmeri na helpim mipela long lukautim olgeta pipel i sot long kain kain samting. Mipela i askim dispela samting long nem bilong Jisas Krais, em i Bikpela bilong mipela.

**Ol: Amen.**

## **8. Singsing bilong pinis, o Benediksen**



# EIPANI

## Baibel Lotu bilong Epipani

### 1. Singsing bilong bigin

#### 2. Pre

L: God Papa, tude yu bin soim Jisas, Pikinini bilong yu, long olgeta pipel. Lait bilong wanpela sta i soim rot long ol. Mipela tu i save long yu, long bilip bilong mipela. Sambai long mipela, na soim rot long mipela, bai wanpela de mipela i ken lukim yu tru long bikpela bilas bilong heven. Dispela samting mipela i askim yu long nem bilong Jisas Kraus, em i Bikpela bilong mipela, Pikinini bilong yu. Em i stap laip na em i King wantaim yu na wantaim Holi Spirit, God bilong oltaim.

**Ol: Amen.**

### 3. Toksave long rit

*(Lida i ken tokaut long mining bilong pestode na bilong rit)*

### 4. Rit bilong Tok bilong God

Mt 2:1-12      Ol saveman bilong ol arapela lain i kam lukim Jisas.  
Ef 3:2-3; 5-6      Gutnius i go long ol manmeri bilong ol arapela lain.

#### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul.)*

### 6. Singsing

#### 7. Pre (*Sam 95*)

L: Yupela kam! Yumi mekim song bilong litimapim nem bilong Bikpela. Yumi tingting long strongpela God i kisim bek yumi, na yumi singim song na amamas long em.

**Ol: Tude God i kam long yumi, yumi nildaun na adorim em.**

L: Yumi go klostu long em na tenkyu long em. Yumi mekim sampela song bilong amamas na litimapim nem bilong em.

**Ol: Tude God i kam long yumi, yumi nildaun na adorim em.**

L: Long wanem, Bikpela em i strongpela God. Em i strong-pela king na em i antap long olgeta giaman god.

**Ol: Tude God i kam long yumi, yumi nildaun na adorim em.**

L: Em i save bosim olgeta hap graun, long olgeta ples i daun tumas, i go inap long olgeta maunten i antap tru.

**Ol: Tude God i kam long yumi, yumi nildaun na adorim em.**

L: Em yet i wokim graun na solwara, olsem na em i bosim ol.

**Ol: Tude God i kam long yumi, yumi nildaun na adorim em.**

L: Yupela kam, yumi daunim het na lotu long em. Bikpela i bin wokim yumi. Orait, yumi go klostu long em na brukim skru.

**Ol: Tude God i kam long yumi, yumi nildaun na adorim em.**

## 8. Singsing bilong Pinis, o Benediksen



# LEN

## Baibel Lotu bilong Len

### 1. Singsing bilong bigin

#### 2. Pre

L: God Papa, Jisas i bin karim planti hevi na pen, na olsem em i kamap man bilong harim tok. Em i save bihainim laik bilong yu. Helpim mipela long dispela lotu long bung tru wantaim Jisas long ol hevi i kam long mipela. Na mekim mipela i kamap manmeri bilong harim tok. Mipela i pre long nem bilong Jisas Kraus, em i Bikpela bilong mipela.

Ol: Amen.

### 3. Toksave long rit

*(Lida i ken tokaut long mining bilong pestode na bilong rit)*

### 4. Rit bilong Tok bilong God

*(Lida i ken yusim wanpela bilong ol dispela rit hia)*

|                        |                                                              |
|------------------------|--------------------------------------------------------------|
| Wik 1: Lu 14:25-33     | Manmeri i mas tingting gut pastaim na bihainim Jisas.        |
| Wik 2: Mt 6:1-6; 16-18 | Pasin bilong helpim ol manmeri, mekim pre na tambuim kaikai. |
| Wik 3: Mk 9:2-20       | Bodi bilong Jisas em i kamap narakain.                       |
| Wik 4: Jn 2:13-25      | Jisas i rausim ol man i wokim bisnis long tempel.            |
| Wik 5: Jn 3:14-21      | Bai ol i litimapim Pikinini bilong Man.                      |
| Wik 6: Jn 12:20-33     | Sapos pikinini wit i no pundaun long graun na i dai.         |

### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul.)*

### 6. Singsing bilong Len

## 7. Pre

L: Bikpela, Jisas Kraiss, long dispela taim bilong Len, klinim mipela pipel bilong yu. Redim mipela long bung wantaim yu long de bilong kirap gen. Mipela i pre:

**Ol: Harim pre bilong mipela.**

L: Helpim mipela long mekim gutpela lotu nau long taim bilong Len. Strongim mipela long mekim penans na planti gutpela wok. Mipela i pre:

**Ol: Harim pre bilong mipela.**

L: Givim strong long ol manmeri i laik stretim pasin bilong ol, bai ol i ken painim yu tru. Mipela i pre:

**Ol: Harim pre bilong mipela.**

L: Strongim ol bratasusa bilong mipela i gat sik. Mipela i pre:

**Ol: Harim pre bilong mipela.**

L: Skulim mipela long karim gut ol hevi bilong graun; em i olsem diwai kros bilong mipela. Mipela i pre:

**Ol: Harim pre bilong mipela.**

L: Helpim mipela tu, bai mipela i no ken tingting long mipela tasol. Mekim mipela i redi oltaim long helpim ol narapela manmeri. Mipela i pre:

**Ol: Harim pre bilong mipela.**

L: Yumi pre:

God Papa, yu save marimari oltaim. Nau long taim bilong Len, mipela i laik mekim sampela penans na putim tambu long ol pasin nogut. Mipela i askim yu; pogivim ol rong bilong mipela. Mipela i pre long nem bilong Jisas Kraiss, em i Bikpela bilong mipela.

**Ol: Amen.**

## 8. Singing bilong pinis, o Benediksen



# **Baibel Lotu bilong Onarim Diwai Kros**

## **1. Singsing bilong bigin**

### **2. Pre**

L: Jisas, mipela i onaim diwai kros bilong yu.

**Ol: Jisas, mipela i onaim diwai kros bilong yu.**

L: Mipela i tenkim yu long dai na kirap bilong yu.

Diwai kros i bringim bikpela amamas long mipela.

**Ol: Jisas, mipela i onaim diwai kros bilong yu.**

L: Jisas, marimari long mipela na blesim mipela.

**Ol: Jisas, mipela i onaim diwai kros bilong yu.**

### **3. Toksave long rit**

*(Lida i ken tokaut long mining bilong pestode na bilong rit)*

### **4. Rit bilong Tok bilong God**

1 Ko 1:18-25 Tok bilong diwai kros em i strong bilong God

### **5. Skul**

*(Ol pipel i ken sarap liklik taim na tingting long dispela rit,  
o lida i ken givim sotpela skul.)*

### **6. Singsing bilong Diwai Kros**

#### **7. Pre**

L: Jisas, marimari long ol bratasusa i no stap wantaim yu.

Mipela i pre:

**Ol: Harim pre bilong mipela.**

L: Jisas, marimari long ol manmeri i karim hevi, sik na pen, na long ol manmeri i stap rabis na i no gat pren i helpim ol. Mipela i pre:

**Ol: Harim pre bilong mipela.**

L: Jisas, marimari long ol manmeri i stap long tudak bilong sin na ol i pret long dai. Mipela i pre:

**Ol: Harim pre bilong mipela.**

L: Jisas, marimari long mipela taim mipela i les long karim diwai kros. Mipela i pre:

**Ol: Harim pre bilong mipela.**

L: Yumi pre:

God Papa, Jisas i bihainim tok bilong yu i go inap long em i dai long diwai kros. Long diwai kros em i oraitim mipela. Long diwai kros yu bin litimapim em antap tru, na nau em i sindaun long raithan bilong yu. Helpim mipela long karim diwai kros bilong mipela, inap mipela i kamap long yu long heven.

**Ol: Amen.**

## **8. Singsing bilong Pinis, o Benediksen**



### **Rot bilong Diwai Kros**

#### **Singsing bilong bigin**

O God Papa gut na strong! Marimari helpim mi.  
Jisas Kraiss, Yu Son blong God! Marimari helpim mi.  
O God Holi Spirit! Marimari helpim mi.  
Jisas! Jisas! Bipo Yu bin karim kruse,  
mi laik sori nau long Yu, Lord.

*Mi sori tru, mi sori tru,  
Mi ting long Yu, O Jisas,  
Yu dai long santu kruse.*

Ol stesin: (singim ves tasol bilong song)

1. Ol i kotim Yu, O Jisas, ol i laik Yu dai long diwai kros.
2. Yu, O Jisas, kisim kruse, em i hevi, rot i longwe.
3. Yu, O Jisas, pilim kruse, em i hevi, Yu pundaun long graun.
4. Lukim Mama i kam klostu, em i krai, i sori tru long Yu.
5. Strong blong Yu nau i laik pinis, Saimon i mas karim diwai kros.
6. Blut i pasim ai bilong Yu. Pes blong Yu i pulap tru long blut.
7. Yu, O Jisas, Yu pundaun gen, strong blong Yu i lus olgeta.
8. Planti meri ol i sori, ol i kam na ol i krai long Yu.

9. Namba tri taim Yu pundaun nau, Yu kirap na go long maunten.
10. Ol i rausim klos blong Yu nau, sua i op na blut i kamap
11. Ol i nilim yu long kruse, Yu laik dai blong helpim mipela.
12. Yu, O Jisas, win long Satan. Yu bin dai long mi, Ridima.
13. Ol i lusim Yu long kruse, putim Yu long lek blong Mama.
14. Ol i planim Yu, O Jisas, pasim ston na lusim matmat.

## **Pre bilong bigin**

L: Gutpela Jisas, yu Ridima bilong olgeta manmeri. Yu bin dai long diwai kros bilong tekewe ol sin bilong mipela long blut bilong yu. Lukdaun long mipela nau. Mipela i laik bihainim rot, yu bin karim diwai kros long en. Mipela i laik tingim pen na dai bilong yu. Mipela i sori tru long ol sin bilong mipela. Na mipela i laik stap gut oltaim inap long dai bilong mipela. Jisas, helpim mipela long strong bilong yu.

**Ol: Amen**

## **Stesin 1: Pailat i kotim Jisas**

L: Bikpela, Jisas Krai, mipela i lotu long yu.

**Ol: Yu kisim bek mipela long diwai kros bilong yu.**

L: Ol hetman bilong ol Juda ol i no tingim ol gutpela wok Jisas i bin mekim. Ol i bringim em long kot. Ol i laik bai em i mas dai. Jisas i stret olgeta. Em i no bin mekim liklik rong. Tasol Pailat i pret, na em i orait long Jisas i dai long diwai kros. Kot i no stret liklik, tasol Jisas i no bekim tok.

Yumi pre:

**Ol: Jisas, yu redi long dai long diwai kros bilong tekewe sin bilong mipela. Helpim mipela, bai mipela i ken luksave long ol sin bilong mipela na mipela i ken sori tru long ol sin. Mipela i laik bihainim yu nau na oltaim. Nogut mipela i kamap long kot bilong yu na mipela i lus olgeta. Amen.**

L: Jisas, diwai kros bilong yu,

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 2: Jisas i karim Diwai Kros bilong Em**

L: Bikpela Jisas Krai, mipela i lotu long yu.

**Ol: Yu kisim bek mipela long diwai kros bilong yu.**

L: Jisas i lukim diwai kros i hevi tumas. Tasol em i redi long karim diwai kros bilong em. Em i laik karim bilong helpim yumi. Em i laik go pas long yumi, bai yumi ken bihainim em oltaim.

Yumi pre:

**Ol: Jisas, sampela taim mipela tu i mas karim pen, olsem diwai kros bilong mipela. Mipela i redi long karim dispela diwai kros wantaim yu, bilong bekim ol sin bilong mipela na bilong kisim bek ol manmeri bilong sin. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 3: Jisas i pundaun aninit long Diwai Kros**

L: Bikpela, Jisas Krai, mipela i lotu long yu.

**Ol: Yu kisim bek mipela long diwai kros bilong yu.**

L: Tru, Jisas i Pikinini bilong God na i strong olgeta. Tasol em i pundaun aninit long diwai kros. Ol soldia i no marimari long em. Ol i lap long em. Ol i paitim em, bai em i kirap na i karim gen diwai kros bilong em.

Yumi pre:

**Ol: Jisas, ol sin bilong mipela i mekim diwai kros bilong yu i hevi tumas. Yu pundaun, bikos mipela i pundaun long sin. Yu laik strongim mipela, bai mipela i ken kirap na wokabaut gen long gupela rot. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

#### **Stesin 4: Jisas i bungim Mama bilong Em long rot**

L: Bikpela Jisas Kraiss, mipela i lotu long yu.

**Ol: Yu kisim bek mipela long diwai kros bilong yu.**

L: Maria i wet long rot. Em i lukim Jisas i wokabaut namel long ol man nogut. Mama i sori tumas long pikinini bilong em. Jisas tu i lukim mama, na bel bilong em i sori tru long em.

Yumi pre:

**Ol: Jisas, mipela i sori tumas long yu. Mipela yet, mipela i as bilong ol pen bilong yu. Yu bihainim laik bilong God Papa. Na olsem yu karim ol pen bilong stretim ol rong bilong mipela. Helpim mipela, bai mipela i sori tru long ol sin bilong mipela. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

#### **Stesin 5: Saimon bilong Sairini i helpim Jisas long karim Diwai Kros**

L: Bikpela, Jisas Kraiss, mipela i lotu long yu.

**Ol: Yu kisim bek mipela long diwai kros bilong yu.**

L: Jisas i no gat strong moa, na ol i pret, bai em i dai long rot. Ol i lukim Saimon bilong Sairini i kam, na ol i pulim em bilong helpim Jisas long karim diwai kros. Saimon i lukim Jisas na i marimari long em.

Yumi pre:

**Ol: Jisas, mipela i lukim Saimon i helpim yu na mipela i tingim tok bilong yu: “*Sapos yupela i helpim narapela, yupela i helpim mi.*” Mipela i laik marimari oltaim long ol arapela, wankain olsem yu save marimari oltaim long mipela. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 6: Veronika i marimari long Jisas**

L: Bikpela, Jisas Krais, mipela i lotu long yu.

**Ol: Yu kisim bek mipela long diwai kros bilong yu.**

L: Veronika i lukim pes bilong Jisas i bagarap olgeta long blut na tuhat. Veronika i no sem na i no pret long ol man. Nogat. Em i sori long Jisas na i givim hap laplap long em, bai em i klinim pes bilong em. Yumi pre:

**Ol: Mipela tu i no ken sem. Na mipela i no ken pret long autim bilip bilong mipela long ol arapela manmeri. Oltaim mipela i laik soim gutpela pasin Kristen long ol. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 7: Jisas i pundaun gen aninit long Diwai Kros**

L: Bikpela, Jisas Krais, mipela i lotu long yu.

**Ol: Yu kisim bek mipela long diwai kros bilong yu.**

L: Jisas i karim planti pen tumas. Ol i paitim em. Ol i bin putim rop i gat nil long het bilong em. Em i laik karim diwai kros, tasol em i no gat strong moa. Diwai kros i hevi tumas na i daunim em gen. Ol soldia i no marimari long em. Ol i hariapim em tasol, bai em i kirap kwik na i wokabaut gen.

Yumi pre:

**Ol: Jisas, mipela i sem tumas long ol pasin bilong mipela. Planti taim mipela i sori long ol sin bilong mipela. Mipela i save konpes na mipela i save kisim komunio, tasol mipela i pundaun gen long sin. Marimari long mipela na strongim mipela, bai mipela inap long kirap gen na bihainim yu. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 8: Ol meri bilong Jerusalem i krai long Jisas**

L: Bikpela, Jisas Krais, mipela i lotu long yu.

**Ol: Yu kisim bek mipela long diwai kros bilong yu.**

L: Sampela gutpela meri ol i lukim Jisas na ol i sori long em. Ol i krai long bikpela pen bilong em. Jisas i tokim ol: *“Yupela meri bilong Jerusalem, yupela i no ken krai long mi. Mobeta yupela i krai long yupela yet na long ol pikinini bilong yupela.”* Jisas i laik skulim yumi olsem; i mobeta yumi krai long ol sin bilong yumi, bikos ol sin i as bilong pen na dai bilong em.

Yumi pre:

**Ol: Jisas, mipela i laik tingim oltaim tok bilong yu. Mipela i laik sori tru long ol sin bilong mipela. Mipela i no laik mekim sin gen. Mipela i sori tu long ol sin bilong ol arapela manmeri, na mipela i laik bringim ol i kam bek long gutpela rot. Helpim mipela olgeta. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 9: Jisas i pundaun namba tri taim aninit long Diwai Kros**

L: Bikpela, Jisas Krais, mipela i lotu long yu.

**Ol: Yu kisim bek mipela long diwai kros bilong yu.**

L: Jisas i kam klostu long maunten Golgota. Tasol em i no inap long go antap long en. Strong bilong em i lus olgeta. Em i pundaun gen na i slip long graun aninit long diwai kros. Tasol em i tingim yumi na em i kirap na i karim diwai kros i go antap long maunten.

Yumi pre:

**Ol: Jisas, yu pundaun gen, bikos mipela i save pundaun long sin. Mipela i daunim mipela yet na mipela i pre; helpim mipela long abrusim ol traim nogut. Strongim mipela long komunio bai mipela i ken stap gut. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

### **Stesin 10: Ol i rausim klos bilong Jisas**

L: Bikpela, Jisas Kraiss, mipela i lotu long yu.

**Ol: Yu kisim bek mipela long diwai kros bilong yu.**

L: Jisas i kamap pinis long Golgota. Ol soldia i rausim ol klos bilong em, na blut i ran gen long ol sua bilong em. Jisas i sanap nating long ai bilong ol man. Em i rabis tru nau. Em i no gat namba, i no gat nem moa.

Yumi pre:

**Ol: Jisas, yu sanap nating. Yu laik skulim mipela long lusim bilas nating bilong graun. Mipela i lukim blut tasol i bilasim bodi bilong yu, na mipela i sem long pasin mangal bilong mipela. Helpim mipela, bai mipela i ken stap gut na mipela i ken kamap long bikpela bilas bilong heven. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

### **Stesin 11: Ol i nilim Jisas long Diwai Kros**

L: Bikpela, Jisas Kraiss, mipela i lotu long yu.

**Ol: Yu kisim bek mipela long diwai kros bilong yu.**

L: Ol soldia i slipim Jisas long diwai kros na ol i taitim tru tupela han na tupela lek bilong em, na ol i nilim long diwai kros. Jisas i pilim draipela pen gen. Blut bilong em i ran bikpela gen. Em i karim ol dispela pen, bikos em i laikim yumi na i laik kisim bek yumi long dai bilong em.

Yumi pre:

**Ol: Jisas, mipela i lukim han na lek bilong yu, nil i sutim. Bipo han bilong yu i mekim gut long ol sikmanmeri, na lek bilong yu i wokabaut bilong bringim tok bilong God long olgeta manmeri. Helpim mipela long mekim gutpela wok na stretpela pasin tasol. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## **Stesin 12: Jisas i dai long Diwai Kros**

L: Bikpela, Jisas Krai, mipela i lotu long yu.

**Ol: Yu kisim bek mipela long diwai kros bilong yu.**

L: Taim Jisas i hangamap long diwai kros, bodi bilong em i pen olgeta. Maria, mama bilong em, Santu Jon na Maria bilong Magdala, ol i sanap klostu long diwai kros. Ol arapela manmeri ol i no ting moa long Jisas. Tasol Jisas i wari tru long ol. Em i pre na i dai bilong helpim ol, na bilong helpim yumi tu.

*(Nildaun nau na sarap liklik taim)*

Yumi pre:

**Ol: Jisas, yu God tru, tasol yu no ting long holim pas dispela pasin bilong stap wankain olsem God. Nogat, yu daunim yu yet na yu bihainim tok bilong Papa i go inap yu dai, yes i go inap yu dai long diwai kros. Long dispela samting God i litimapim yu na putim yu antap tru. Na God Papa i givim yu wanpela nem i winim olgeta arapela nem. Long dispela nem, mipela olgeta i brukim skru. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu**

### **Stesin 13: Ol i lusim Jisas long Diwai Kros**

L: Bikpela, Jisas Krai, mipela i lotu long yu.

**Ol: Yu kisim bek mipela long diwai kros bilong yu.**

L: Taim Jisas i dai pinis, sampela pren bilong em i kam. Ol i go antap long diwai kros na i lusim nil long han na lek bilong Jisas. Ol i putim bodi bilong Jisas long klinpela laplap bilong planim em. Mama bilong em wantaim ol pren bilong em i pilim bikpela sori tru bikos Jisas i no stap moa wantaim ol.

Yumi pre:

**Ol: Jisas, bikpela wok bilong yu i pinis. Tasol wok bilong mipela i stap yet. Strongim mipela olgeta de, bai mipela i ken pinisim gut ol wok God Papa i bin givim mipela. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

### **Stesin 14: Ol i planim Jisas**

L: Bikpela, Jisas Krai, mipela i lotu long yu.

**Ol: Yu kisim bek mipela long diwai kros bilong yu.**

L: Josep, man bilong Arimatia, wantaim Nikodimas tupela i litimapim bodi bilong Jisas na putim em long matmat. Bihain ol i pasim hul long wanpela bikpela ston. Olsem ol i planim Jisas. Yumi pre:

**Ol: Jisas, ol i bin putim bodi bilong yu long matmat. Tru, yu dai olgeta. Nau yu stap wantaim ol manmeri i dai pinis. Tasol mipela i bilip, yu win long dai na yu kirap. Na olgeta manmeri i bilip long yu, ol tu bai kirap gen. Strongim bilip bilong mipela. Amen.**

L: Jisas, diwai kros bilong yu

**Ol: Em i diwai kros bilong mipela.**

L: Dai bilong yu

**Ol: Em i laip bilong mipela.**

L: Jisas, yu go pas

**Ol: Tru, mipela i laik bihainim yu.**

## Pre bilong pinisim lotu

God Papa, Pikinini bilong yu i soim bikipela laik bilong yu long mipela. Em i stretim ol rong bilong mipela. Mipela i tenkim yu. Helpim mipela long lusim pasin bilong sin. Strongim mipela bai mipela i ken i stap gut. Amen.

## Singsing bilong Pinis

Yu bin dai na Yu kirap gen. yu go pas, mi kirap tu bihain. Mi sori tru. Mi sori tru. Mi ting long Yu, O Jisas. Yu dai long santu kruse.

*Mi sori tru, mi sori tru, mi ting long Yu, O Jisas,  
Yu dai long santu kruse.*



## Ol las tok bilong Jisas long Diwai Kros

L: Jisas, taim yu hangamap long diwai kros yu bin pre:

*“Papa, yu ken lusim sin bilong ol. Ol i no save long dispela samting ol i mekim.”* (Lu 23:34) Jisas, yu soim bikipela laik long ol manmeri, maski sampela i mekim rong long yu. Mipela i askim yu, strongim mipela long pogivim ol rong ol manmeri i mekim long mipela.

**Ol: Lord, yu marimari. Krai, yu marimari. Lord, yu marimari.**

L: Jisas, taim man nogut i hangamap long diwai kros wantaim yu, em i askim yu: Jisas, taim yu kamap king, yu ken tingting long mi. Na yu tokim em olsem: *“Mi tok tru long yu: Nau bai yu stap wantaim mi long heaven”* (Lu 23:42-43). Jisas, yu promisim gutpela taim bilong oltaim long olgeta manmeri. Tasol mipela i mas tanim bel pastaim na bilip long Gutnius bilong yu. Mipela i askim yu, helpim mipela i sori long ol sin bilong mipela. Mipela i singaut long marimari bilong yu.

**Ol: Lord, yu marimari. Krai, Yu marimari. Lord, yu marimari.**

L: Jisas i tokim mama bilong em: *“Meri, dispela man em i pikinini bilong yu. Na em i tokim dispela disaipel: ‘Dispela meri em i mama bilong yu’”* (Jn 19:26-27). Jisas, yu pilim bikipela pen, taim yu lusim mama bilong yu. Mipela i askim yu, strongim mipela, taim papamama o bratasusa o gutpela pren i dai na lusim mipela.

**Ol: Lord, yu marimari. Krai, yu marimari. Lord, yu marimari.**

L: Jisas, yu singaut strong: *“God bilong mi, God bilong mi, bilong wanem yu lusim mi”* (Mt 27:46). Jisas, yu pilim bel hevi tru, taim yu stap wanpis na ol arapela i lusim yu. Mipela i askim yu, wokabaut wantaim mipela hia long graun. Na taim mipela i laik i dai, yu stap klostu long mipela.

**Ol: Lord, yu marimari. Krai, yu marimari. Lord, yu marimari.**

L: Jisas, yu singaut: *“Nek bilong mi i drai”* (Jn 19:28). Na ol i givim wain long yu na yu dring liklik. Jisas, helpim mipela long mekim gut long ol manmeri i hangre na i karim planti pen.

**Ol: Lord, yu marimari. Krai, yu marimari. Lord, yu marimari.**

L: Jisas yu singaut: *“Em i pinis nau”* (Jn 19:30a). Yu pinisim ol wok, God i bin makim bilong yu. Mipela i askim yu long helpim mipela long mekim na pinisim wok, Papa i bin givim mipela.

**Ol: Lord, yu marimari. Krai, yu marimari. Lord, yu marimari.**

L: Jisas, yu singaut strong moa: *“Papa, mi putim spirit bilong mi long han bilong yu”* (Lu 23:46). Yu tok olsem, na yu daunim het bilong yu, na yu dai. Jisas, mipela i askim yu, rausim ol pret bilong dai long mipela. Na bringim mipela i go long ples bilong yu.

**Ol: Lord, yu marimari. Krai, yu marimari. Lord, yu marimari.**

## **Pre bilong tingim pen na dai bilong Jisas**

L: Bikpela, Jisas Krai, long gaden Getsemani yu nildaun na yu pre. Yu tingim ol rong bilong mipela. Yu ting long rot God Papa i bin makim bilong stretim ol dispela rong. Yu tingim pen na dai i laik kamap long diwai kros, na yu guria, na yu pret. Tuhai bilong yu i kamap olsem blut. Tasol yu no surik. Yu bihainim laik bilong Papa bilong yu.

**Ol: Yu Lem bilong God, yu tekewe sin bilong mipela.**

L: Bikpela, Jisas Krai, ol i pasim yu long pos na ol i paitim yu nogut tru. Blut bilong yu i ran i go daun long graun. Ol i raunim het bilong yu long rop i gat nil. Ol i pasim ai bilong yu. Ol i spet long yu na paitim het bilong yu long stik. Ol i lap nogut long pen bilong yu. Tasol yu no bekim rong bilong ol.


**Ol: Yu Lem bilong God, yu tekewe sin bilong mipela.**

L: Bikpela, Jisas Krais, yu karim diwai kros long Golgota. Antap long dispela maunten ol i nilim yu long diwai kros. Inap long tripela aua yu hangamap long en. Olgeta hap bilong bodi bilong yu i pen tumas. Na yu wari tru long ol manmeri i givim baksait long yu. Yu ting long ol manmeri i no laik i kam long yu, bai yu ken oraitim ol. Yu ting long ol manmeri i bel nogut long yu na long Papa bilong yu. Yu pre long Papa bai em i marimari long mipela olgeta. Yu wanpela tasol, yu stretim ol rong bilong mipela long pen na dai bilong yu.

**Ol: Yu Lem bilong God, yu tekewe sin bilong mipela.**

L: Yumi pre:

**Ol: God Papa, Pikinini bilong yu i soim bikpela laik bilong yu long mipela. Em i stretim ol rong bilong mipela. Mipela i tenkim yu. Helpim mipela long lusim pasin bilong sin. Strongim mipela bai mipela i ken i stap gut. Amen.**



# ISTA

## Baibel Lotu bilong taim bilong Ista

### 1. Singsing bilong begin

### 2. Pre

L: God Papa, long dispela de bilong Ista, Jisas Krais, Pikinini bilong yu, i bin kirap bek, na em i winim strong bilong dai. Em i bin opim gen rot bilong nupela laip long mipela. Olsem na mipela i singsing amamas long dispela bikpela pestode bilong Kirap bilong Jisas Krais. Na mipela i pre, bai Holi Spirit bilong yu i ken kirapim mipela tu long dispela nupela laip, na bai mipela i ken wokabaut olsem pikinini bilong lait. Mipela i askim dispela samting long nem bilong Jisas Krais, em i Bikpela bilong mipela, Pikinini bilong yu. Em i stap laip na em i king wantaim yu na wantaim Holi Spirit, God bilong oltaim.

**Ol: Amen.**

### 3. Toksave long rit

*(Lida i ken tokaut long mining bilong pestode na bilong rit)*

### 4. Rit bilong Tok bilong God

*(Lida i ken yusim wanpela bilong ol dispela rit hia.)*

|              |                            |
|--------------|----------------------------|
| Mk 16:1-7    | Jisas i kirap bek.         |
| Lu 24:35-48  | Ol disaipel i lukim Jisas. |
| Jn 20:1-9    | Jisas i kirap bek.         |
| Jn 20: 19-23 | Ol disaipel i lukim Jisas. |
| Jn 20:24-31  | Tomas i lukim Jisas.       |
| Jn 15:1-17   | Jisas em i diwai wain tru. |

### 5. Skul

*(Ol pipel i sarap liklik taim na tingting long dispela rit, o lida i ken givim sotpela skul.)*

### 6. Singsing bilong Ista

## 7. Pre

*(Ol i ken bihainim dispela pre, o yusim narapela pre).*

L: Yupela i mas holim wankain tingting olsem Krai Jisas i bin tingim.

**Ol: Krai yu dai, Krai yu kirap bek, Krai bai yu kam bek gen.**

L: Em i stap God tru, tasol em i no ting long holimpas dispela pasin bilong i stap wankain olsem God.

**Ol: Krai yu dai, Krai yu kirap bek, Krai bai yu kam bek gen.**

L: Em i lusim dispela pasin, na em i kamap man, na em i kisim pasin olsem wokboi nating.

**Ol: Krai yu dai, Krai yu kirap bek, Krai bai yu kam bek gen.**

L: Ol manmeri i lukim em i stap man tru. Na em i daunim em yet na i bihainim tok bilong God, i go inap long em i dai, yes, inap long em i dai long diwai kros.

**Ol: Krai yu dai, Krai yu kirap bek, Krai bai yu kam bek gen.**

L: Long dispela tasol God i litimapim em na putim em antap tru. Na God i givim em wanpela nem i winim olgeta arapela nem.

**Ol: Krai yu dai, Krai yu kirap bek, Krai bai yu kam bek gen.**

L: Em i givim dispela nem long Jisas, bai olgeta manmeri long heaven na long graun na aninit long graun ol i ken kolim nem bilong Jisas na brukim skru long em.

**Ol: Krai yu dai, Krai yu kirap bek, Krai bai yu kam bek gen.**

L: Na olgeta manmeri i mas tokaut olsem: “Jisas Krai em i Bikpela.” Na bai nem bilong God Papa em i stap antap tru.

**Ol: Amen.**

## 8. Singsing bilong pinis, o Benediksen

### Pre bilong Ista

L: God i bin wokim dispela de, yumi amamas long en, Aleluia. Inap long tripela de Jisas i stap long matmat. Tasol long Sande moning em i orait gen. Em i kirap.

**Ol: Yumi amamas na yumi singaut: Aleluia.**

L: Jisas, yu bin dai long diwai kros. Tasol long strong bilong yu yet, yu kirap na winim dai. Yu God tru. Mipela i bilip long yu. Helpim mipela i bilip oltaim long yu.

**Ol: Yumi amamas na yumi singaut: Aleluia.**

L: Bikpela, Jisas Kraus, mipela i amamas long kirap bilong yu. Mipela i amamas wantaim mama bilong yu na wantaim ol aposel. Tru, mipela i no lukim yu long ai bilong mipela, tasol mipela i bilip yu stap namel long mipela. Yu bin givim dispela bilip long mipela. Mipela i tenkim Yu.

**Ol: Yumi amamas na yumi singaut: Aleluia.**

L: Yu no save wokabaut wantaim mipela olsem yu bin wokabaut wantaim tupela disaipel long rot i go long Emaus. Tasol mipela i bilip, yu stap wantaim mipela. Mipela i bilip yu laikim mipela.

**Ol: Yumi amamas na yumi singaut: Aleluia.**

L: Mipela i no lukim ol sua bilong yu olsem Tomas. Tasol mipela i tok wantaim em: “Yu Bikpela bilong mi, yu God bilong mi.”

**Ol: Yumi amamas na yumi singaut: Aleluia.**

L: Yumi pre:

God Papa, tude Pikinini bilong yu i win long dai. Tude em i opim heven gen. Mipela i bilip long em. Mipela i hop long em. Mipela i laikim em. Helpim mipela long bihainim em oltaim, bai mipela inap stap wantaim em long heven.

**Ol: Amen.**



## DIVAIN MERSI

### Liklik Korona bilong Marimari bilong God

*Jisas i skulim Sista Faustina wanpela pre yumi kolim: 'Pre bilong Marimari bilong God'. Long dispela pre mipela i ofaim long God Papa, Bodi na Blut bilong Pikinini bilong em, Jisas, em i God na man, na Papa i laikim em tumas. Long dispela pre mipela i bung wantaim ofa Jisas i mekim long Diwai Kros bilong kisim bek olgeta manmeri.*

Bilong statim liklik korona yumi pre:

**Ol:      Papa bilong mipela ...**  
          **Ave Maria ...**  
          **Mi bilip long God Papa ...**

Long ol bis bilong korona i makim 'Papa bilong mipela', yumi pre:

**L: God Papa bilong oltaim, Mi ofaim long Yu Bodi na Blut, Sol na Godpasin bilong Jisas Krai, Pikinini bilong Yu, Yu laikim em tumas, na Em i Bikpela bilong mipela,**

**Ol:** bai yu ken marimari na pogivim sin bilong mipela na sin bilong olgeta manmeri bilong graun.

Long ol bis bilong korona i makim 'Ave Maria', yumi pre:

**L: God Papa, yu tingim pen bilong Jisas,**

**Ol:** na yu marimari long mipela na long olgeta manmeri bilong graun. (10x)

Long taim yu pinisim 'liklik korona bilong marimari bilong God' yumi pre:

**Ol:** Santu God, Santu God i strong olgeta, Santu God bilong Oltaim, Yu marimari long mipela na long olgeta manmeri bilong graun. (3x)

**L: Santu Faustina**

**Ol:** Pre long helpim mipela.

## **Litani bilong Marimari bilong God**

*Laikpasin bilong God em i plaua, na marimari bilong em, em i prut bilong dispela plaua. Ol manmeri i gat tubel na i no trastim God, ol i ken ritim dispela litani na kamap lain pipel i trastim God olgeta.*

**L: Marimari bilong God i kapsait long bel bilong Papa.**

Ol: Mi trastim Yu.

**L: Marimari bilong God, nambawan pasin bilong God,**

Ol: Mi trastim Yu.

**L: Marimari bilong God, em i misteri manmeri i no inap long skelim na luksave long en,**

Ol: Mi trastim Yu.

**L: Marimari bilong God, em i olsem wara i ran strong na em i kam long God Triwan,**

Ol: Mi trastim Yu.

**L: Marimari bilong God, ol manmeri na ol ensel i no klia tru long en,**

Ol: Mi trastim Yu.

**L: Marimari bilong God, long em tasol laip na amamas i save kamap,**

Ol: Mi trastim Yu.

**L: Marimari bilong God, i winim olgeta samting bilong heven na graun,**

Ol: Mi trastim Yu.

**L: Marimari bilong God, as bilong ol mak na mirakel,**

Ol: Mi trastim Yu.

**L: Marimari bilong God, karamapim olgeta samting God i bin wokim pinis,**

Ol: Mi trastim Yu.

**L: Marimari bilong God, i kam daun long graun olsem Tok bilong God i kamap man,**

Ol: Mi trastim Yu.

**L: Marimari bilong God, i bin kapsait long sua bilong Hat bilong Jisas,**

Ol: Mi trastim Yu.

**L: Marimari bilong God, i stap long Hat bilong Jisas, na em i bilong helpim yumi olgeta, tasol moa yet long ol bikpela sinmanmeri,**

Ol: Mi trastim Yu.

**L: Marimari bilong God, i bikpela moa moa yet long Yukaris,**

Ol: Mi trastim Yu.

**L: Marimari bilong God, i bin kamapim Holi Sios,**

Ol: Mi trastim Yu.

**L: Marimari bilong God, long sakramen bilong Baptais,**

Ol: Mi trastim Yu.

**L: Marimari bilong God, long wok Ridima bilong Jisas em i oraitim mipela long ai bilong God,**

Ol: Mi trastim Yu.

**L: Marimari bilong God, i save wokabaut wantaim mipela olgeta de bilong laip bilong mipela long dispela graun,**

Ol: Mi trastim Yu.

**L: Marimari bilong God, i save sambai long mipela long taim bilong indai,**

Ol: Mi trastim Yu.

**L: Marimari bilong God, i givim mipela laip bilong oltaim,**

Ol: Mi trastim Yu.

**L: Marimari bilong God, i stap wantaim mipela long olgeta taim,**

Ol: Mi trastim Yu.

**L: Marimari bilong God i sevim mipela long paia bilong hel,**

Ol: Mi trastim Yu.

**L: Marimari bilong God, i save helpim ol sinmanmeri long tanim bel,**

Ol: Mi trastim Yu.

**L: Marimari bilong God, i mekim ol ensel i kirap nogut na tingting planti, na ol santu i no inap skelim na luksave long en,**

Ol: Mi trastim Yu.

**L: Marimari bilong God, i nogat wanpela i klia long dispela misteri bilong God,**

Ol: Mi trastim Yu.

**L: Marimari bilong God, i bin sevim mipela long ol sin na wari na hevi bilong mipela,**

Ol: Mi trastim Yu.

**L: Marimari bilong God, i kisim mipela long taim mipela i stap olsem samting nating na givim laip long mipela,**

**Ol: Mi trastim Yu.**

**L: Marimari bilong God, i save karamapim olgeta wok bilong God,**

**Ol: Mi trastim Yu.**

**L: Marimari bilong God, mipela olgeta i stap insait long en,**

**Ol: Mi trastim Yu.**

**L: Marimari bilong God, switpela marasin bilong olgeta manmeri, husat i karim pen na kain kain hevi na wari,**

**Ol: Mi trastim Yu.**

**L: Marimari bilong God, wanpela rot tasol long givim hop long ol manmeri i laik lus,**

**Ol: Mi trastim Yu.**

**L: Marimari bilong God, malolo bilong oltaim na bel isi long taim bilong pret,**

**Ol: Mi trastim Yu.**

**L: Marimari bilong God, bikpela amamas bilong ol santu,**

**Ol: Mi trastim Yu.**


**L: Marimari bilong God, i mekim ol pipel i trastim gen long taim olgeta hop i lus pinis,**

**Ol: Mi trastim Yu.**

**L: Yumi pre:**

**God Papa bilong oltaim, marimari bilong Yu i nogat pinis long en, na Yu pulap long bel isi, lukluk wantaim marimari long mipela na mekim mipela i pulap long dispela marimari bilong Yu, olsem long taim bilong hevi na wari, bai mipela i no lusim hop o pilim nogut tru, tasol wantaim bikpela trastim i go long Yu. Mipela i bihainim laik bilong Yu, bikos Yu God bilong marimari na Yu gutpela olgeta.**

**Ol: Amen.**



# ASENSEN

## Baibel Lotu bilong Asensen

### 1. Singsing bilong begin

### 2. Pre

L: God Papa, yu strong olgeta. Mipela i amamas na tenkim yu, long wanem, Jisas, Pikinini bilong yu, i go bek long heven bilong redim ples bilong mipela. Jisas, hetman bilong mipela, i kisim biknem pinis. Papa, sambai long mipela, lain pipel bilong yu, bai mipela i ken strong inap long taim yu singautim mipela tu bilong kisim biknem wantaim em. Mipela i askim dispela samting long nem bilong Jisas Kraus, em i Bikpela bilong mipela, Pikinini bilong yu. Em i stap laip na em i king wantaim yu na wantaim Holi Spirit, God bilong oltaim.

**Ol: Amen.**

### 3. Toksave long rit

*(Lida i tokaut long mining bilong pestode na bilong rit)*

### 4. Rit bilong Tok bilong God

*(Lida i ken yusim wanpela bilong ol dispela rit hia)*

|             |                                                  |
|-------------|--------------------------------------------------|
| Mt 28:16-20 | Jisas i givim wok misin long ol disaipel.        |
| Jn 13:31-35 | Mi givim nupela lo long yupela.                  |
| Jn 14:1-7   | Jisas em i rot bilong ol manmeri i go long Papa. |
| Ap 1:3-11   | Jisas i go long heven.                           |

### 5. Skul

*(Ol pipel i sarap liklik taim na tingting long dispela rit, o lida i ken givim sotpela skul)*

## 6. Singsing bilong Asensen

### 7. Pre

L: Bikpela, Jisas Krais, yu tokim ol aposel olsem: “Liklik taim bai mi lusim yupela na mi go bek long Papa.” Tasol, yu tokim mipela tu: “Yupela i no ken pret. Mi laik go redim ples bilong yupela long haus bilong Papa bilong mi.” Bihain bai yu kam bek na kisim mipela i go long dispela gutpela ples.

**Ol: Mipela i amamas. Mipela i tenkim yu.**

L: Bikpela, Jisas Krais, liklik taim tasol na mipela tu i mas lusim dispela graun. Graun i no ples tru bilong mipela. Mipela i laik tingting oltaim long ples tru bilong mipela. Helpim mipela long bihainim yu nau, bai mipela inap painim yu bihain long dai.


**Ol: Mipela i laik bihainim yu oltaim.**

L: Bikpela, Jisas Krais, planti samting i laik paulim tingting bilong mipela. Planti samting i laik pulim mipela long rot nogut. Helpim mipela long Bret bilong Laip, bai mipela i no ken lus.

**Ol: Kam oltaim long mipela long Holi Komunio.**

L: Yumi pre:

**Ol: God Papa, mipela i bilip: Pikinini bilong yu i go bek long heven. Mipela i bilip em i redim ples bilong mipela. Mekim mipela i tingim oltaim dispela ples. Helpim mipela long bihainim oltaim laik bilong yu, bai mipela inap stap wantaim yu long haus bilong yu. Amen.**



## 8. Singsing bilong pinis, o Benediksen



## PENTEKOS

**Baibel Lotu bilong Pentekos (*ol i ken yusim long Novena tu*)**

### **1. Singsing bilong begin**

#### **2. Pre**

A. L: God Papa, yu strong olgeta, long planti de mipela i bin amamas long pestode bilong Ista na mipela i bin tingim Kirap bilong Jisas. Nau mipela i pre, bai Holi Spirit i ken bungim olgeta pipel bilong graun long wanpela bilip na ol i ken litimapim nem bilong yu. Mipela i pre olsem long strong bilong dispela Holi Spirit, na long nem bilong Jisas Kraiss, em i Bikpela bilong mipela.

**Ol: Amen.**

o:

B. L: God Papa, yu bin mekim mipela i kamap nupela pinis long Baptais, tasol Holi Spirit i mas strongim mipela nau. Em i ken pulapim mipela long lait bilong yu. Mipela i pre olsem long strong bilong dispela Holi Spirit, na long nem bilong Jisas Kraiss, em i Bikpela bilong mipela.

**Ol: Amen.**

o:

C. L: God Papa, long dispela pestode yu bin salim Holi Spirit i kam bilong mekim Sios bilong yu holi, bai Sios i ken telimautim gutnius bilong yu long olgeta pipel bilong graun. Mipela pre, tilim strong bilong dispela Holi Spirit i go long olgeta hap bilong graun, bai em i ken pulapim bel bilong olgeta manmeri bilong bilip. Mipela i askim dispela samting long strong bilong Holi Spirit na long nem bilong Jisas Kraiss, Pikinini bilong yu. Em i stap laip na em i king wantaim yu na wantaim Holi Spirit, God bilong oltaim.

**Ol: Amen.**

### **3. Toksave long rit**

*(Lida i ken tokaut long mining bilong pestode na bilong rit)*

## 4. Rit bilong Tok bilong God

*(Lida i ken yusim wanpela bilong ol dispela rit.)*

|                                |                                                   |
|--------------------------------|---------------------------------------------------|
| De 1: Jn 3:1-8                 | Man i kamap nupela gen long Holi Spirit.          |
| De 2: Ap 2:22-23; 32-33; 37-38 | Bai God i givim Holi Spirit long yupela.          |
| De 3: Jn 16:5-7; 12-15         | Wok bilong Holi Spirit.                           |
| De 4: Ga 5:13, 16, 22, 25      | Pasin bilong Holi Spirit.                         |
| De 5: Ap 1:3-8                 | Jisas bai salim Holi Spirit i kam.                |
| De 6: Jn 14:15-17              | Jisas bai salim Holi Spirit i kam.                |
| De 7: Jn 14:23-26              | Helpim tru bilong yupela em i Holi Spirit.        |
| De 8: Ap 8:14-17               | Ol i kisim Holi Spirit long Samaria.              |
| De 9: Ap 19:1-6                | Ol i kisim baptais long nem bilong Bikpela Jisas. |

## 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul.)*

## 6. Singsing bilong Pentekos

### 7. Pre

*(Ol i ken bihainim dispela pre, o yusim narapela pre.)*

- L: Holi Spirit, strongim bilip bilong mipela.  
**Ol: Kam, Holi Spirit, kam, mipela i singaut long yu.**  
L: Holi Spirit, givim gutpela tingting long mipela.  
**Ol: Kam, Holi Spirit, kam, mipela i singaut long yu.**  
L: Holi Spirit, stiaim mipela long tok tru na stretpela pasin.  
**Ol: Kam, Holi Spirit, kam, mipela i singaut long yu.**  
L: Holi Spirit, pulapim mipela long save bilong God.  
**Ol: Kam, Holi Spirit, kam, mipela i singaut long yu.**  
L: Holi Spirit, helpim mipela long laikim God na ol manmeri.  
**Ol: Kam, Holi Spirit, kam, mipela i singaut long yu.**  
L: Holi Spirit, helpim mipela long kamap nupela manmeri.  
**Ol: Kam, Holi Spirit, kam, mipela i singaut long yu.**  
L: Holi Spirit, helpim mipela long pre gut.  
**Ol: Kam, Holi Spirit, kam, mipela i singaut long yu.**  
L: Holi Spirit, tekewe mipela long pasin bilong sin na dai.  
**Ol: Kam, Holi Spirit, kam, mipela i singaut long yu.**

L: Holi Spirit, helpim mipela long mekim wok bilong God.

**Ol: Kam, Holi Spirit, kam, mipela i singaut long yu.**

L: Yumi pre:

God Papa, kirapim nupela Pentekos nau long taim bilong mipela.

Givim Holi Spirit long Sios bilong yu, na strongim em long nem bilong Jisas Kraiss, em i Bikpela bilong mipela.

**Ol: Amen.**

## **8. Singsing bilong pinis, o Benediksen**

### **Pre bilong Pentekos**

L: Holi Spirit, long de bilong Pentekos yu bin kam daun long ol aposel. Yu laik stap oltaim long Sios bilong yu, bai em i holim wok Ridima bilong Jisas inap long las de.

**Ol: Holi Spirit, mekim pipel bilong yu i holi.**

L: Yu Spirit bilong save. Yu mekim klia tok bilong Jisas long mipela. Yu soim rot i go long heven long mipela.

**Ol: Holi Spirit, givim save long mipela.**

L: Yu Spirit bilong strong. Yu strongim ol aposel na ol i no pret long autim tok bilong Jisas. Ol i no pret long dai. Strongim mipela long winim traim nogut.

**Ol: Holi Spirit, sambai long mipela.**

L: Yu Spirit bilong gutpela pasin. Yu laik wok insait long ol pikinini bilong God, bai ol i kamap holi. Kam, stap wantaim mipela na kirapim gutpela tingting na laik insait long mipela.

**Ol: Holi Spirit, kam daun long mipela.**

L: Yu Spirit bilong stap oltaim long mipela. Givim save na strong long mipela, bai laip bilong Kraiss i ken pulap tru long mipela. Bihain bringim mipela i go long laip i stap oltaim oltaim.

**Ol: Amen.**

### **Sotpela pre long Holi Spirit**

Spirit bilong pasin holi, mekim mi holi.

Spirit bilong tok i tru, sutim bel bilong mi.

Spirit bilong bikpela laik, givim dispela laik long mi.

Spirit bilong marimari, tanim bel bilong mi.

Spirit bilong gutpela taim, mekim graun i kamap nupela.  
Spirit bilong laip tru, kirapim bel bilong mi.  
Spirit bilong bikpela strong, strongim mi.  
Spirit i stap oltaim, givim laip bilong oltaim long mi. Amen.

## **Kam Holi Spirit**

L: Kam, Holi Spirit, kam long sol bilong mipela,  
na pulapim mipela long pasin bilong laikim yu na ol manmeri.  
God, salim Spirit bilong yu, bai laip i kamap.

### **Ol: Na bai graun i kamap nupela gen.**

L: Yumi pre:  
God, long helpim bilong Holi Spirit givim gutpela tingting  
long mipela. Long dispela Holi Spirit helpim mipela long  
save gut long stretpela pasin, na mekim mipela i amamas  
oltaim long gutpela tok bilong em. Mipela i pre long nem  
bilong Krais, em i Bikpela bilong mipela.

**Ol: Amen.**

## **Litani bilong Holi Spirit**

**L: Lord, marimari long mipela.**

Ol: Krais, marimari long mipela.

**L: Lord, marimari long mipela.**

Ol: Krais, harim pre bilong mipela.

**L: God Papa long heven,**

Ol: Marimari long mipela.

**L: God Pikinini, Ridima bilong ol manmeri.**

Ol: Marimari long mipela.

**L: God Holi Spirit,**

Ol: Marimari long mipela.

**L: Holi Trinit, wanpela God tasol,**

Ol: Marimari long mipela.

**L: Holi Spirit, yu kam long Papa na long Pikinini,**

Ol: Marimari long mipela.

**L: Holi Spirit, yu wankain olsem Papa na Pikinini,**

Ol: Marimari long mipela.

**L: Holi Spirit, mipela i pre na onaim yu wantaim Papa na  
wantaim Pikinini,**

Ol: Marimari long mipela.

**L: Holi Spirit, yu Bikpela i givim laip long mipela,**

Ol: Marimari long mipela.

**L: Holi Spirit, yu Spirit bilong bilip na hop na laik,**

Ol: Marimari long mipela.

**L: Holi Spirit, yu Spirit bilong tok i tru na laik,**

Ol: Marimari long mipela.

**L: Holi Spirit, yu Spirit bilong save i skelim kain kain tingting,**

Ol: Marimari long mipela.

**L: Holi Spirit, yu Spirit bilong mekim klia tok bilong God,**

Ol: Marimari long mipela.

**L: Holi Spirit, yu Spirit bilong stretpela pasin,**

Ol: Marimari long mipela.

**L: Holi Spirit, yu Spirit bilong strongim mipela long winim pret  
na mekim gutpela toktok,**


Ol: Marimari long mipela.

**L: Holi Spirit, yu Spirit bilong amamas na gutpela taim,**

Ol: Marimari long mipela.

**L: Yumi pre: God Papa, salim Holi Spirit i kam long mipela,  
bai mipela i save wanem samting i stret,  
na mipela i ken amamas long strong na  
tok tru bilong em. Mipela i pre long nem  
bilong Jisas Krai, em i Bikpela bilong  
mipela.**

Ol: Amen.



# HOLI TRINITI

## Baibel Lotu bilong Holi Trinit

### 1. Singsing bilong bigin

### 2. Pre

L: God Papa, tingting bilong mipela i no inap long yu. Tasol long wok bilong Jisas, Pikinini bilong yu, yu bin soim yu yet long mipela. Yu bin salim Jisas bilong bringim tok i tru. Na yu bin salim Holi Spirit i kam bilong strongim mipela long bihainim dispela tok. Na olsem mipela i bilip, yu God, yu Triwan. Strongim mipela nau long dispela bilip, bai mipela i ken litimapim nem bilong yu oltaim. Mipela i askim dispela samting long nem bilong Jisas Krai, em i Bikpela bilong mipela, Pikinini bilong yu. Em i stap laip na em i king wantaim yu na wantaim Holi Spirit, God bilong oltaim.

**Ol: Amen.**

### 3. Toksave long rit

*(Lida i ken tokaut long mining bilong pestode na bilong rit.)*

### 4. Rit bilong Tok bilong God

*(Lida i ken yusim wangepela bilong ol dispela rit hia.)*

|                |                                                                              |
|----------------|------------------------------------------------------------------------------|
| Mt 28:16-20    | Baptaisim ol long nem bilong Papa, na bilong Pikinini na bilong Holi Spirit. |
| Jn 3:6-18      | God i gat wangepela pikinini tasol i stap.                                   |
| Ro 8:14-17     | Holi Spirit i mekim yumi kamap pikinini bilong God.                          |
| 2 Kol 13:11-13 | God Papa, Bikpela Jisas Krai na Holi Spirit.                                 |

### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul)*

### 6. Singsing bilong Holi Trinit

## 7. Pre

L: Mipela i onaim na adorim yu, Holi Triniti, yu God Papa, Pikinini, na Holi Spirit.

**Ol: Mipela i onaim yu na lotuim yu oltaim.**

L: God Papa, yu bin wokim olgeta samting. Yu mekim kamap heven na graun. Taim olgeta samting i no kamap yet na Pikinini i kamap long yu. Em i wankain tru olsem yu. Holi Spirit i kamap long yu na long Pikinini. Yu wokim mipela ol manmeri.

**Ol: Mipela i onaim yu na lotuim yu oltaim.**

L: God Pikinini, Jisas Kraiss, yu God i kamap long God, yu lait i kamap long lait, yu God tru i kamap long God tru. Yu kamap long God Papa, tasol i no gat wanpela i wokim yu. Yu Pikinini bilong God, yu wanpela tasol. Yu oraitim mipela long diwai kros. Yu dai na yu kirap. Yu salim Holi Spirit i kam long mipela. Em i helpim mipela nau long graun.

**Ol: Mipela i onaim yu na lotuim yu oltaim.**


L: God Holi Spirit, yu givim nupela laip long mipela. Mipela i adorim yu wantaim Papa na wantaim Pikinini. Yu mekim mipela holi, na yu skruim i go ol wok bilong Jisas bilong stretim mipela. Mipela i amamas long yu, mipela i tenkim yu.

**Ol: Mipela i onaim yu na lotuim yu oltaim.**

L: Ona long Papa na long Pikinini na long Holi Spirit.

**Ol: Olsem taim bipo na nau na oltaim. Amen.**

## 8. Singsing bilong pinis, o Benediksen



# **BODI NA BLUT BILONG KRAIS**

## **Baibel Lotu bilong Bodi na Blut bilong Krai**

### **1. Singsing bilong bigin**

#### **2. Pre**

A. L: God Papa, ol pipel bilong yu i bin tenkim yu long ol kain kain ofa. Tasol ofa bilong Jisas long diwai kros i winim ol dispela ofa. Long Yukaris Jisas i ofaim em yet long yu, bilong oraitim mipela. Mipela i tenkim yu long nem bilong Jisas Krai, em i Bikpela bilong mipela.

**Ol: Amen.**

o:

B. L: God Papa, yu givim planti kain kaikai bilong strongim bodi bilong mipela. Tenkyu tru. Tasol Jisas i tok: “Yupela i no ken wok long kisim kain kaikai i save bagarap tasol. Nogat. Yupela i mas wok long kisim kaikai i save stap oltaim.” Nau mipela i bung hia bilong tingim dispela kaikai Jisas i givim pinis long mipela long Holi Komunio. Mekim mipela i hangre oltaim long dispela kaikai. Mipela i pre long nem bilong Jisas Krai, em i Bikpela bilong mipela.

**Ol: Amen.**

o:

C. L: Bikpela, Jisas Krai, yu bin givim dispela gutpela sakramen long mipela, bai mipela i tingting long pen na dai bilong yu. Mipela i askim yu, helpim mipela long onaim sakramen bilong Bodi na Blut bilong yu, bai mipela i ken kisim oltaim strong bilong oraitim mipela. Yu stap king wantaim Papa na wantaim Holi Spirit, God bilong oltaim.

**Ol: Amen.**

### **3. Toksave long rit**

*(Lida i ken tokaut long mining bilong pestode na bilong rit.)*

### **4. Rit bilong Tok bilong God**

*(Lida i ken yusim wanpela bilong ol rit i stap long narapela pes)*

Hi 10:12-14      Ofa bilong Kraiss em inap tru long tekewe sin.  
Jn 6:53-59      Jisas em i bret bilong heven.  
1 Kol 10:16-17   I gat wanpela bret tasol.

## 5. Skul

*(Ol pipel i ken sarap liklik taim na tingim dispela rit, o lida i ken givim sotpela skul.)*

## 6. Singsing bilong Yukaris

### 7. Pre

A. L: God Papa, Jisas Kraiss, Pikinini bilong yu, em i Bikpela na Ridima bilong mipela. Long diwai kross em i givim Bodi na Blut bilong em olsem gutpela, klinpela ofa bilong kisim bek mipela. Dispela wanpela ofa i tekewe olgeta sin bilong graun na i opim dua bilong heven long mipela, bai mipela i ken i stap wantaim yu long bikpela amamas.

**Ol: God Papa, lukim Pikinini bilong yu na marimari long mipela.**

L: God Papa, yu gut olgeta. Yu laik bai dispela ofa, Jisas i bin givim long diwai kross, i ken i stap inap long taim em i kam bek gen. Olsem na long Gutfonde nait Jisas i kamapim sakramen bilong Yukaris na i givim long Sios bilong tingim em.

**Ol: God Papa, lukim Pikinini bilong yu na marimari long mipela.**

L: Olgeta taim yumi mekim Misa na kisim Bodi na Blut bilong Jisas, yumi telimautim dai bilong Jisas inap long taim em i kam bek gen.

**Ol: God Papa, lukim Pikinini bilong yu na marimari long mipela.**

L: Yumi pre:

God Papa, long olgeta lotu bilong Yukaris mipela i tenkim yu. Mekim mipela na olgeta Kristen i pas oltaim wantaim Jisas, Pikinini bilong yu. Strongim mipela long harim tok bilong yu na long laikim yu tru, bai mipela yet i ken kamap gutpela ofa long yu.

**Ol: Amen.**

o:

B. L: Bikpela, Jisas, yu Ridima bilong ol manmeri. Long baptais yu givim laip bilong God long mipela. Na yu givim yu yet olsem kaikai bilong mipela, bilong strongim dispela laip.

**Ol: Bikpela, Jisas, kam long mipela. Marimari long mipela.**

L: Bikpela, Jisas, yu Bret bilong Laip bilong oltaim. Givim laip bilong yu long mipela nau.

**Ol: Bikpela, Jisas, kam long mipela. Marimari long mipela.**

L: Bikpela, Jisas, long Gutfonde nait yu pre long Papa bilong yu olsem: “Mekim ol i stap wanpela olsem mitupela i stap wanpela.” Hia long Yukaris mekim mipela i kamap wanfamili.

**Ol: Bikpela, Jisas, kam long mipela. Marimari long mipela.**

L: Yumi pre:

Bikpela, Jisas, yu bin kisim bek olgeta manmeri. Salim Spirit bilong trupela laik i kam long mipela, bai mipela i stap memba tru bilong lain bilong Krai, na wanpela i ken helpim narapela. Mekim mipela olgeta i save kisim wankain kaikai, i stap tu long wanpela tingting na wanpela laik.

**Ol: Amen.**

O:

C. L: Bikpela, Jisas, yu stap namel long mipela, yu king na wasman bilong mipela. Yu singautim ol manmeri i karim hevi, bai ol i kam long yu na kisim strong. Mipela i kam long yu na mipela i askim yu; stap oltaim wantaim mipela na helpim mipela.

**Ol: Bikpela, Jisas, stap oltaim wantaim mipela.**

L: Bikpela, Jisas, yu lait tru bilong mipela. Yu no lusim mipela. Helpim mipela long wokabaut oltaim long gutpela rot bilong yu.

**Ol: Bikpela, Jisas, stap oltaim wantaim mipela.**

L: Bikpela, Jisas, sambai long mipela long taim bilong traim na givim mipela strong bilong sakim Satan.

**Ol: Bikpela, Jisas, stap oltaim wantaim mipela.**

L: Yumi pre:

Bikpela, Jisas, stap wantaim mipela long taim sik na pen na taim nogut i laik daunim mipela. Mekim mipela inap long karim gut ol pen na long winim laip bilong oltaim.

**Ol: Amen.**

## **8. Singsing bilong pinis, o Benediksen**

# **Lotu long taim bilong Prosesio bilong Bodi na Blut bilong Krai**

**(Alta 1)**

## **1. Singsing bilong Yukari**

### **2. Pre**

P: Bikpela, Jisas Krai, yu Ridima bilong mipela, yu God tru na man tru. Yu stap amamas wantaim Papa bilong yu na wantaim Holi Spirit. Na yu stap hia tu long hostia namel long mipela long olgeta de. Tru, planti taim mipela i no onaim yu gut, na mipela i mekim sin long les pasin o paul pasin bilong mipela. Mipela i sori long ol dispela rong. Tude mipela i laik onaim yu long dispela sakramen, na mipela i laik tenkim yu long bikpela marimari bilong yu. Yu stap king, nau na oltaim.

**Ol: Amen.**

## **3. Rit bilong Tok bilong God**

Lu 10:1-2      Jisas i salim 72 man long wok misin.

### **4. Skul**

*(Ol pipel i ken sarap liklik taim na tingim dispela rit, o pris o lida i ken givim sotpela skul.)*

## **5. Singsing bilong Yukari**

### **6. Pre**

P: God Papa, yu tingting long ol manmeri i no save yet long Gutnius bilong Pikinini bilong yu. Olsem na mipela i pre long yu; marimari long ol manmeri i no save yet long yu, bai ol i bilip long Gutnius bilong Pikinini bilong yu, Jisas Krai, na ol i luksave long yu. Mipela i pre:

**Ol: Harim pre bilong mipela.**

P: Singautim planti manmeri bilong mekim wok bilong yu long olgeta ples bilong graun. Mipela i pre:

**Ol: Harim pre bilong mipela.**

P: Strongim ol Kristen, bai ol i no pret na sem long soim bilip bilong ol long ol arapela manmeri. Mipela i pre:

**Ol: Harim pre bilong mipela.**

P: Sambai na wok wantaim ol wokmanmeri bilong Sios, bai Gutnius i ken kamap long olgeta ples. Mipela i pre:

**Ol: Harim pre bilong mipela.**

P: Yumi pre:

God Papa, kaikai bilong gaden i redi pinis, tasol ol wokmanmeri i no planti. Mipela i pre long yu, bai yu salim planti wokmanmeri long gaden bilong yu bilong lukautim wok bilong yu. Mipela i pre long nem bilong Jisas Krais, em i Bikipela bilong mipela.

**Ol: Amen.**

## **7. Benediksen, prosesio i go long narapela alta.**

**(Alta 2)**

### **1. Singsing bilong Yukaris**

#### **2. Pre**

P: Bikipela, Jisas Krais, yu bin tok: “Mi dispela bret i gat laip na i lusim heven na i kam daun. Sapos wanpela man o meri i kaikai dispela bret, em bai i gat laip i stap oltaim. Na dispela bret bai mi givim long em, em i bodi bilong mi. Mi givim bai ol manmeri long graun ol i ken kisim laip.” Mipela i tenkim yu long dispela kaikai. Yu stap king, nau na oltaim.

**Ol: Amen.**

### **3. Rit bilong Tok bilong God**

Mk 6:34-44 Jisas i givim kaikai long 5,000 manmeri.

#### **4. Skul**

*(Ol pipel i ken sarap liklik taim na tingim dispela rit, o pris o lida i ken givim sotpela skul.)*

### **5. Singsing bilong Yukaris**

## **6. Pre**

P: Bikpela, Jisas Krais, yu lukim planti manmeri ol i hangre long tok bilong yu. Na yu skulim ol. Tasol yu lukim ol i hangre tu long kisim kaikai bilong graun. Na yu helpim ol. Olsem na mipela i pre long yu; kirapim laik bilong mipela long harim oltaim tok bilong yu. Mipela i pre:

### **Ol: Harim pre bilong mipela**

P: Mekim mipela i amamas long kisim oltaim Holi Komunio, em kaikai yu yet i givim long mipela. Mipela i pre:

### **Ol: Harim pre bilong mipela.**

P: Blesim ol kaikai, mipela i bin planim long gaden bilong mipela. Mipela i pre:

### **Ol: Harim pre bilong mipela.**

P: Makim gut taim bilong san na bilong ren, bai olkain kaikai i ken kamap gut, na mipela i ken amamas long planti kaikai bilong mipela. Mipela i pre:

### **Ol: Harim pre bilong mipela.**

P: Strongim mipela, bai mipela i wok gut. Na bai mipela inap long helpim tu ol bratasusa bilong mipela i stap hangre. Mipela i pre:

### **Ol: Harim pre bilong mipela.**

P: Blesim olgeta wok bisnis bilong mipela, bai mipela i ken ranim gut dispela wok bilong mekim ples bilong mipela i go het. Mipela i pre:

### **Ol: Harim pre bilong mipela.**

P: Lukautim olgeta wok, gavman bilong mipela i kirapim, na sambai long ol manmeri i lukautim dispela wok. Mipela i pre:

### **Ol: Harim pre bilong mipela.**

P: Yumi pre:

God Papa, mipela i no laik les long ol wok bilong mipela, tasol mipela i no bosim san na ren. Mipela i save wok tasol. Na sapos yu no blesim dispela wok bilong mipela, bai mipela i wok nating tasol. Blesim oltaim ol wok bilong mipela, na marimari long mipela. Mipela i pre olsem long nem bilong Jisas Krais, em i Bikpela bilong mipela.

**Ol: Amen.**

## **7. Benediksen, prosesio i go long narapela alta.**

### (Alta 3)

## 1. Singsing bilong Yukaris

### 2. Pre

P: Bikpela, Jisas Krais, yu laip na strong bilong mipela. Mipela i save, sapos mipela i no pas wantaim yu, mipela i no inap stap gut, long wanem, yu tasol i givim laip na strong long mipela. Mipela i kam bilong tenkim na adorim yu. Yu stap king, nau na oltaim.

**Ol: Amen.**

## 3. Rit bilong Tok bilong God

Jn 15:5-12      Jisas em i diwai wain tru.

### 4. Skul

*(Ol pipel i ken sarap liklik taim na tingim dispela rit, o pris o lida i ken givim sotpela skul.)*

## 5. Singsing bilong Yukaris

### 6. Pre

P: Bikpela, Jisas Krais, yu bin tok:

“Man o meri i stap long mi na mi stap long em, em i save karim planti kaikai. Sapos yupela i lusim mi, yupela i no inap mekim wanpela samting.” Olsem na mipela i pre long yu: Blesim Pop (Nem...) na bisop bilong mipela (Nem...). Strongim ol long wok bilong yu. Mipela i pre:

**Ol: Harim pre bilong mipela.**

P: Mekim holi ol pris, brata na sista. Mipela i pre:

**Ol: Harim pre bilong mipela.**

P: Strongim ol katekis, sios lida na olgeta manmeri i mekim wok bilong Sios. Mipela i pre:

**Ol: Harim pre bilong mipela.**

P: Mekim bai ol manmeri i holim wok bilong gavman i bihainim tok bilong yu, taim ol i wokim ol lo bilong kantri. Mipela i pre:

**Ol: Harim pre bilong mipela.**

P: Kirapim gutpela laik insait long ol manmeri i lukautim ol pipel i gat sik, bai ol i bihainim pasin marimari bilong yu. Mipela i pre:

**Ol: Harim pre bilong mipela.**

P: Mekim mipela i amamas long wok wantaim yu oltaim. Mipela i pre:

**Ol: Harim pre bilong mipela.**

P: Yumi pre:

God Papa, yu bin givim save na strong long mipela bilong holim kain kain wok. Helpim mipela, bai mipela i mekim ol dispela wok wantaim Jisas, na bai olgeta wok bilong mipela i ken litimapim nem bilong yu na i helpim mipela na ol bratasusa, Mipela i pre long nem bilong Jisas Kraiss, em i Bikpela bilong mipela.

**Ol: Amen.**

## **7. Benediksen, prosesio i go long narapela alta.**

**(Alta 4)**

### **1. Singsing bilong Yukaris**

#### **2. Pre**

P: Bikpela Jisas Kraiss, mipela i gat ai, tasol planti taim mipela i no save lukim gut, na mipela i gat yau, tasol mipela i no save harim gut. Opim ai na yau bilong mipela bai mipela i ken luksave gut long yu, taim mipela i harim tok bilong yu na kisim yu long Komunio. Yu stap king nau na oltaim.

**Ol: Amen.**

### **3. Rit bilong Tok bilong God**

Lu 24:13-35 Jisas i wokabaut wantaim tupela disaipel long rot i go long Emaus.

#### **4. Skul**

*(Ol pipel i ken sarap liklik taim na tingim dispela rit, o pris o lida i ken givim sotpela skul.)*

### **5. Singsing bilong Yukaris**

## **6. Pre**

P: God Papa, yu bin givim laip long mipela, na yu no laik bai mipela i bagarapim dispela presen. Mekim, bai olgeta Misa na Komunio i ken helpim mipela long lukautim gut dispela laip long graun na wanpela de i ken bringim mipela long kisim laip long heven. Mipela i pre:

### **Ol: Harim pre bilong mipela.**

P: God Papa, blesim wok bilong olgeta komunio minista, na givim strong long ol, bai olgeta taim ol i redi long bringim Bodi bilong Jisas long olgeta manmeri i wetim em. Mipela i pre:

### **Ol: Harim pre bilong mipela.**

P: God Papa, bringim bek ol manmeri i bin lusim yu na Holi Sios bilong yu. Helpim ol long lukim klia, yu tasol i ken givim amamas i no save pinis. Mipela i pre:

### **Ol: Harim pre bilong mipela**

P: God Papa, helpim ol yangpela i laik marit long lukim klia olsem gutpela marit ol i ken wokim antap long ston tasol, na dispela ston em Jisas na Bodi bilong em. Mipela i pre:

### **Ol: Harim pre bilong mipela.**

P: God Papa, helpim mipela, bai mipela i no wari tumas na pas long samting i stap nau na tumora i pinis. Opim ai bilong mipela, bai mipela i ken klia, long wanem samting mipela i ken pas tru long en. Mipela i pre:

### **Ol: Harim pre bilong mipela.**

P: God Papa, lukdaun long ol manmeri i bin kisim Bodi na Blut bilong yu na nau ol i lusim dispela graun. Bringim ol i kam long bikpela kaikai yu bin redim long haus bilong yu. Mipela i pre:

### **Ol: Harim pre bilong mipela.**

P: Yumi pre:

God yu strong olgeta na yu save stap oltaim, lukdaun long ol gutpela pasin bilong mipela na helpim mipela bai long taim bilong dai mipela i ken kisim kaikai bilong heven, em i Bodi na Blut bilong Jisas Krais, Pikinini bilong yu na Bikpela bilong mipela.

**Ol: Amen.**

## **7. Benediksen**

## **Litani bilong Bodi na Blut bilong Kraiss**

**L: Lord, marimari long mipela.**

Ol: Kraiss, marimari long mipela.

**L: Lord, marimari long mipela.**

Ol: Kraiss, harim pre bilong mipela.

**L: God Papa long heven,**

Ol: Marimari long mipela

**L: Jisas, yu bret i givim laip,**

Ol: Marimari long mipela.

**L: Jisas, yu God na man,**

Ol: Marimari long mipela.

**L: Jisas, yu stap long hostia,**

Ol: Marimari long mipela.

**L: Jisas, yu stap namel long mipela,**

Ol: Marimari long mipela.

**L: Jisas, yu Lem bilong Pasova,**

Ol: Marimari long mipela.

**L: Jisas, yu ofa bilong olgeta manmeri,**

Ol: Marimari long mipela.

**L: Jisas, yu as bilong olgeta strong,**

Ol: Marimari long mipela.

**L: Jisas, yu kaikai bilong mipela,**

Ol: Marimari long mipela.

**L: Jisas, yu as bilong amamas bilong mipela,**

Ol: Marimari long mipela.

**L: Jisas, yu oraitim ol sikmanmeri,**

Ol: Marimari long mipela.

**L: Jisas, yu mekim gut long ol manmeri i bel hevi,**

Ol: Marimari long mipela.

**L: Jisas, yu strongim ol manmeri i laik dai,**

Ol: Marimari long mipela.

**L: Jisas, yu as bilong hop bilong mipela,**

Ol: Marimari long mipela.

**L: Jisas, yu bret bilong heven,**

Ol: Marimari long mipela.

**L: Long ofa bilong diwai kros,**

Ol: Oraitim mipela.

**L: Long blut bilong yu i lus,**  
 Ol: Oraitim mipela.  
**L: Long bikpela laik bilong yu,**  
 Ol: Oraitim mipela.  
**L: Long Kirap bilong yu,**  
 Ol: Oraitim mipela.  
**L: Long Go Bek Long Heven bilong yu,**  
 Ol: Oraitim mipela.  
**L: Long taim yu stap hia long Holi Yukaris,**  
 Ol: Oraitim mipela.  
**L: Long dispela taim yu kam bek gen,**  
 Ol: Oraitim mipela.  
**L: Mipela ol manmeri bilong sin i singaut,**  
 Ol: Harim pre bilong mipela.  
**L: Strongim bilip bilong mipela,**  
 Ol: Harim pre bilong mipela.  
**L: Mekim mipela i telimautim dai bilong yu,**  
 Ol: Harim pre bilong mipela.  
**L: Mekim mipela i amamas long Kirap bilong yu,**  
 Ol: Harim pre bilong mipela.  
**L: Mekim mipela i laikim tru kaikai bilong yu,**  
 Ol: Harim pre bilong mipela.  
**L: Mekim mipela i kamap wanbel long kaikai bilong yu,**  
 Ol: Harim pre bilong mipela.  
**L: Bai i no gat wangepela bilong mipela i lus,**  
 Ol: Harim pre bilong mipela.  
**L: Bai mipela i wokabaut long strong bilong kaikai bilong yu,**  
 Ol: Harim pre bilong mipela.  
**L: Bringim mipela i stap long kaikai bilong laip bilong oltaim,**  
 Ol: Harim pre bilong mipela.  
**L: Lem bilong God, yu tekewe sin bilong olgeta manmeri,**  
 Ol: Marimari long mipela.  
**L: Lem bilong God, yu tekewe sin bilong olgeta manmeri,**  
 Ol: Marimari long mipela.  
**L: Lem bilong God, yu tekewe sin bilong olgeta manmeri,**  
 Ol: Marimari long mipela.

P: Yumi pre:

Jisas, yu givim dispela gutpela sakramen long mipela, bai mipela i tingting long pen na dai bilong yu. Mipela i askim yu, helpim mipela long onaim sakramen bilong Bodi na Blut bilong yu, bai mipela i ken kisim oltaim strong bilong oraitim mipela. Yu stap king wantaim Papa na wantaim Holi Spirit, God bilong oltaim.

**Ol: Amen**



# SANTU HAT BILONG JISAS

## Baibel Lotu bilong Santu Hat bilong Jisas

### 1. Singsing bilong bigin

#### 2. Pre

L: God Papa, yu laikim mipela olgeta manmeri bilong graun. Olsem na yu bin givim Jisas, Pikinini bilong yu, long mipela. Taim em i dai long diwai kros, wampela soldia i sutim sait bilong em long spia na blut na wara i kamaut. Dispela em i mak bilong soim bikpela marimari bilong yu long mipela. Yu bin mekim olsem, bai mipela olgeta i ken bilip long em na kisim laip long nem bilong em. Mipela i pre long nem bilong Jisas Kraus, em i Bikpela bilong mipela.

Ol: Amen.

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God

*(Lida i ken yusim wampela bilong ol dispela rit hia.)*

Mt 11:25-30    Yupela kam long mi na kisim malolo.

Jn 19:31-37    Soldia i sutim sait bilong Jisas.

1 Jn 4:7-16    God i save marimari long yumi.

#### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul)*

#### 6. Singsing bilong Santu Hat

#### 7. Pre

*(Ol i ken bihainim dispela pre, o yusim narapela pre.)*

L: Jisas, yu bin tok: “Mi sori long ol dispela manmeri. Ol i stap wantaim mi tripela de na ol i no gat kaikai. Mi no laik salim ol i go bek hangre. Nogut ol i dai long rot.” Na, “Yupela ol manmeri i

mekim hat wok na i karim bikpela hevi, yupela olgeta i kam long mi, bai mi givim yupela malolo.”

**Ol: Jisas, yu laikim tru olgeta manmeri, olsem na yu marimari long ol. Yu helpim ol sikmanmeri. Yu givim kaikai long ol manmeri i hangre. Yu autim Gutnius long ol rabis manmeri na yu singautim ol manmeri i no stap gut.**

L: Bikpela, Jisas Kraus yu bin tok olsem: “Mi tok tru long yupela olgeta, samting yupela i bin mekim long wanpela man o meri hia i no gat nem liklik, ol dispela samting yupela i bin mekim long mi.” Strongim mipela long tingim na helpim ol arapela manmeri i karim hevi.

**Ol: Pulapim mipela long laik bilong yu, bai mipela i ken bihainim pasin sori bilong yu. Opm ai bilong mipela, bai mipela i ken lukim ol wari na pen ol arapela manmeri i karim. Sapos mipela i mekim gut tru long ol, bai olgeta manmeri i ken save, mipela i disaipel bilong yu. Amen.**

## **8. Singsing bilong pinis, o Benediksen**

### **Pre bilong ol namba wan Fraide**

L: Santu Hat bilong Jisas, mipela i bilip long yu, mipela i hop long yu na mipela i laikim yu.

**Ol: Mipela i onaim yu na mipela i tenkim yu.**

L: Long marimari bilong Santu Hat bilong yu, yu bin dai long diwai kros. Taim yu hangamap long diwai kros, wanpela soldia i sutim sait bilong yu. Hat bilong yu i op nau, bai mipela i ken lukim mak bilong marimari bilong yu.

**Ol: Mipela i onaim yu na mipela i tenkim yu.**

L: Marimari bilong Santu Hat bilong yu i mekim kamap sakramen bilong Holi Yukaris. Long dispela sakramen, Santu Hat bilong yu i laik marimari long mipela inap long las de. Long dispela sakramen, Santu Hat bilong yu i laik tilim ol helpim long mipela, bai hat bilong mipela i olsem Hat bilong yu.

**Ol: Mipela i onaim yu na mipela i tenkim yu.**

L: Yumi pre:

Santu Hat bilong Jisas, helpim mipela. Mipela i no laik mekim sin gen. Strongim mipela long pasin marimari, bai mipela i ken kamap long laip bilong oltaim.

**Ol: Amen.**

## **Litani bilong Santu Hat bilong Jisas**

**L: Lord, marimari long mipela.**

Ol: Krai, marimari long mipela.

**L: Lord, marimari long mipela.**

Ol: Krai, harim pre bilong mipela.

**L: God Papa long heven,**

Ol: Marimari long mipela.

**L: God Pikinini, Ridima bilong olgeta manmeri,**

Ol: Marimari long mipela.

**L: God Holi Spirit,**

Ol: Marimari long mipela.

**L: Holi Trinit, wampela God tasol,**

Ol: Marimari long mipela.

**L: Hat bilong Jisas, Pikinini bilong Papa, i stap oltaim,**

Ol: Marimari long mipela.

**L: Hat bilong Jisas, Holi Spirit i mekim yu i kamap man,**

Ol: Marimari long mipela.

**L: Hat bilong Jisas, yu gat bikpela nem tru,**

Ol: Marimari long mipela.

**L: Hat bilong Jisas yu mak bilong God i stap wantaim mipela,**

Ol: Marimari long mipela.

**L: Hat bilong Jisas, yu haus bilong God na dua bilong heven,**

Ol: Marimari long mipela.

**L: Hat bilong Jisas, yu laikim mipela tumas,**

Ol: Marimari long mipela.

**L: Hat bilong Jisas, yu pulap long stretpela pasin,**

Ol: Marimari long mipela.

**L: Hat bilong Jisas, marimari bilong yu i bikpela tru,**

Ol: Marimari long mipela.

**L: Hat bilong Jisas, yu king bilong olgeta manmeri,**

Ol: Marimari long mipela.

**L: Hat bilong Jisas, olgeta pasin bilong God i stap long yu,**

Ol: Marimari long mipela.

**L: Hat bilong Jisas, Papa bilong yu i amamas long yu,**

Ol: Marimari long mipela.

**L: Hat bilong Jisas, strong bilong yu i mekim mipela olgeta i orait.**

Ol: Marimari long mipela.

- L: Hat bilong Jisas, olgeta manmeri i wet long yu,**  
**Ol: Marimari long mipela.**
- L: Hat bilong Jisas, yu save givim planti samting long ol manmeri i singaut long yu,**  
**Ol: Marimari long mipela.**
- L: Hat bilong Jisas, laip na pasin holi i kamap long yu tasol,**  
**Ol: Marimari long mipela.**
- L: Hat bilong Jisas, yu tekewe ol sin bilong mipela,**  
**Ol: Marimari long mipela.**
- L: Hat bilong Jisas, ol sin bilong mipela i mekim nogut long yu.**  
**Ol: Marimari long mipela.**
- L: Hat bilong Jisas, yu harim tok inap long taim yu dai,**  
**Ol: Marimari long mipela.**
- L: Hat bilong Jisas, spia i sutim yu,**  
**Ol: Marimari long mipela.**
- L: Hat bilong Jisas, yu mekim gut bel bilong ol manmeri i sori.**  
**Ol: Marimari long mipela.**
- L: Hat bilong Jisas, yu givim laip na kirap long dai long mipela.**  
**Ol: Marimari long mipela.**
- L: Hat bilong Jisas, yu helpim mipela long sekan na kamap wanbel gen wantaim Papa.**  
**Ol: Marimari long mipela.**
- L: Hat bilong Jisas, yu mekim orait ol manmeri i hop long yu,**  
**Ol: Marimari long mipela.**
- L: Hat bilong Jisas, yu hop bilong ol manmeri i dai wantaim yu**  
**Ol: Marimari long mipela.**
- L: Yumi pre:**  
**God yu strong olgeta, na yu stap oltaim. Tingting long Hat bilong Pikinini bilong yu, em yu laikim tumas, na long ona em i bin givim long yu. Tekewe ol sin bilong ol manmeri i singautim marimari bilong yu. Mipela i pre long nem bilong Pikinini bilong yu, Jisas Kraus. Em i stap laip na em i king wantaim yu na wantaim Holi Spirit, nau na oltaim.**  
**Ol: Amen.**

# OLGETA SANTU

## Baibel Lotu bilong Olgeta Santu

### 1. Singsing bilong bigin

#### 2. Pre

L: God Papa, long olgeta taim, na long olgeta hap bilong graun, planti brata na susa bilong mipela i bin kamap holi long helpim bilong yu. Mipela i amamas, ol i go pas long mipela long heven. Helpim mipela long pre bilong ol, bai mipela i ken bihainim ol, na bai mipela inap bungim ol long amamas bilong heven. Mipela i pre long nem bilong Jisas Krais, em i Bikpela bilong mipela.

Ol: Amen.

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God.

*(Lida i ken yusim wanpela bilong ol dispela rit hia)*

Mt 5:1-12            Jisas i autim tok antap long maunten.

Re 7:2-4, 9-14    Bikpela lain manmeri bilong God.

1 Jn 3:1-3            Nau yumi stap pikinini bilong God.

#### 5. Skul

*(Ol pipel i ken sarap liklik taim na tingting long dispela rit, o lida i ken givim sotpela skul)*

### 6. Singsing bilong Olgeta Santu

#### 7. Pre

*(Ol i ken bihainim dispela pre, o yusim narapela.)*

L: Yupela ol santu bilong God, yupela i ken amamas, long wanem, yupela i kamap pinis pren bilong Jisas Krais i Bikpela bilong yumi. Mipela i laik askim yupela nau, bai yupela i helpim mipela long pre bilong yupela. Helpim mipela long bihainim oltaim ol lo bilong God.

**Ol: Yupela ol santu, helpim mipela.**

L: Pre bilong helpim mipela, bai mipela i no ken sem long autim bilip bilong mipela.

**Ol: Yupela ol santu, helpim mipela.**

L: Pre bilong helpim mipela, bai mipela i kamap stretpela manmeri, olsem Papa long heven em i stretpela.

**Ol: Yupela ol santu, helpim mipela.**

L: Pre bilong helpim mipela, bai mipela i lusim pasin bilong sin i bagarapim sindaun bilong mipela.

**Ol: Yupela ol santu, helpim mipela.**

L: Pre bilong helpim mipela, bai mipela i no ken tingting tumas long ol samting bilong dispela graun na lus tingting long ol bikipela samting bilong heven.

**Ol: Yupela ol santu, helpim mipela.**

L: Pre bilong helpim mipela, bai mipela i bilip long God, olsem wanpela pikinini i save bilip long papa bilong em,

**Ol: Yupela ol santu, helpim mipela.**

L: Pre bilong helpim mipela bai mipela i wok hat long kamap gutpela Kristen, na bai mipela inap bung wantaim yupela long heven.

**Ol: Yupela ol santu, helpim mipela.**

L: Yumi pre:

God yu strong olgeta, mipela i tingim ol gutpela wok bilong ol santu. Mipela i save, ol i bung na pre bilong helpim mipela, olsem na mipela i askim yu, harim pre bilong ol santu na marimari long mipela. Mipela i pre long nem bilong Jisas Krais, em i Bikipela bilong mipela.

**Ol: Amen.**

## **8. Singsing bilong pinis, o Benediksen**



## **Litani bilong Olgeta Santu**

*(Em bigin bilong wanpela litani. Lida i ken skruim lista bilong ol santu, na kolim nem bilong sampela santu i gat wok long dispela lain, o long dispela ples)*

**L: Lord, marimari long mipela.**

Ol: Krais, marimari long mipela.

**L: Lord, marimari long mipela.**

Ol: Krais, harim pre bilong mipela.

**L: God, Papa long heven,**

Ol: Marimari long mipela.

**L: God Pikinini, Ridima bilong ol manmeri,**

Ol: Marimari long mipela.

**L: God, Holi Spirit,**

Ol: Marimari long mipela.

**L: Holi Triniti, wanpela God tasol,**

Ol: Marimari long mipela.

**L: Santu Maria, Mama bilong God**

Ol: Pre bilong helpim mipela.

**L: Santu Maikel,**

Ol: Pre bilong helpim mipela.

**L: Olgeta holi ensel bilong God,**

Ol: Pre bilong helpim mipela.

**L: Olgeta holi patriak na profet,**

Ol: Pre bilong helpim mipela.

**L: Santu Josep,**

Ol: Pre bilong helpim mipela.

**L: Santu Jon Baptais,**

Ol: Pre bilong helpim mipela.

**L: Santu Pita na Pol,**

Ol: Pre bilong helpim mipela.

**L: Santu Andru,**

Ol: Pre bilong helpim mipela.

**L: Santu Jems,**

Ol: Pre bilong helpim mipela.

**L: Santu Jon,**

Ol: Pre bilong helpim mipela.

**L: Santu Agnes**

Ol: Pre bilong helpim mipela.

**L: Santu Benedik**

Ol: Pre bilong helpim mipela.

**L: Santu Felisiti na Perpetua**

Ol: Pre bilong helpim mipela.

**L: Santu Tomas Akwainas**

Ol: Pre bilong helpim mipela.

**L: Santu Dominik**

Ol: Pre bilong helpim mipela.

**L: Santu Fransis bilong Asisi**

Ol: Pre bilong helpim mipela.

**L: Santu Klara**

Ol: Pre bilong helpim mipela.

**L: Santu Don Bosco**

Ol: Pre bilong helpim mipela.

**L: Santu Jon Viani**

Ol: Pre bilong helpim mipela.

**L: Santu Teresa bilong Pikinini Jisas**

Ol: Pre bilong helpim mipela.

**L: Santu Padre Pio**

Ol: Pre bilong helpim mipela.

**L: Santu Teresa bilong Kalkata**

Ol: Pre bilong helpim mipela.

**L: Santu Pita Torot**

Ol: Pre bilong helpim mipela.

**L: Santu Jon Masukoni**

Ol: Pre bilong helpim mipela.

**L: Santu Pita Sanel**

Ol: Pre bilong helpim mipela.

*(Lida i ken skruim ol nem bilong sampela santu moa, sapos em i laik.)*

**L: Yumi pre: God yu strong olgeta, mipela i tingim ol gutpela wok bilong ol santu. Mipela i save, ol i bung na pre bilong helpim mipela, olsem na mipela i askim yu, harim pre bilong ol na marimari long mipela. Mipela i pre olsem long nem bilong Jisas Kraus, em i Bikpela bilong mipela.**

Ol: Amen.



# TINGIM OL MANMERI I DAI PINIS

**Baibel Lotu bilong tingim ol manmeri i dai pinis**

## **1. Singsing bilong bigin**

### **2. Pre**

L: God Papa, harim pre bilong mipela. Mipela i bilip, Jisas, Pikinini bilong yu, i kirap bek long matmat. Olsem na mipela i wet, bai yu kirapim bek ol lain bilong mipela i dai pinis, na bai yu givim laip i stap gut oltaim long ol. Mipela i askim dispela samting long nem bilong Jisas Kraus, em i Bikpela bilong mipela, Pikinini bilong yu. Em i stap laip na em i king wantaim yu na wantaim Holi Spirit, God bilong oltaim.

**Ol: Amen.**

### **3. Toksave long rit**

*(Lida i ken tokaut long mining bilong pestode na bilong rit)*

### **4. Rit bilong Tok bilong God**

*(Lida i ken yusim wangepela bilong ol dispela rit hia.)*

Jon 6:37-40

Mi no ken lusim wangepela bilong ol manmeri.

Jon 11:17-27

As bilong ol manmeri i kirap bek, em Jisas.

Ap 10:34-36, 42-43

Jisas em i Bikpela bilong ol manmeri i stap laip na bilong ol i dai pinis.

### **5. Skul**

*(Ol pipel i ken sarap liklik taim na tingting long dispela rit, o lida i ken givim sotpela skul.)*

### **6. Singsing bilong tingim ol manmeri i dai pinis**

### **7. Pre**

L: God Papa, mipela i askim yu long helpim ol bratasusa i stap long klinpaia (purgatory). Yu Papa bilong ol, na yu laik bai ol i stap wantaim yu. Tasol ol i stap yet longwe long yu, bikos ol i

no bekim gut ol sin bilong ol. Marimari long ol na singautim ol i kam long yu long heven. Mipela i pre:

**Ol: Harim pre bilong mipela.**

L: Jisas, mipela i pre long yu bilong helpim ol bratasusa i stap long klinpaia. Yu bin karim planti pen tumas, na yu bin dai long diwai kros bilong kisim bek ol long blut bilong yu. Mipela i pre:

**Ol: Harim pre bilong mipela.**

L: Holu Spirit, mipela i pre long yu bilong helpim bratasusa i stap long klinpaia. Yu bin helpim ol long taim ol i stap yet long graun. Givim helpim nau long ol, bai ol i ken klin olgeta, na kamap holi, na ol inap long go long ples tru bilong ol. Mipela i pre:

**Ol: Harim pre bilong mipela.**

L: Santu Mama bilong God, long pre bilong yu helpim ol bratasusa i stap long klinpaia. Ol i wet, bai dua bilong heven i op long ol. Mipela i pre:

**Ol: Harim pre bilong mipela.**

L: Ol ensel na ol santu, long pre bilong yupela helpim ol bratasusa i stap long klinpaia, bai ol i ken i stap wantaim yupela long amamas bilong oltaim long heven. Mipela i pre:

**Ol: Harim pre bilong mipela**

L: Yumi pre:

God bilong marimari, harim ol pre bilong mipela na helpim mipela. Mipela i sori long ol bratasusa bilong mipela i dai pinis na ol i stap yet long klinpaia. Mipela i tingim bikpela wok Jisas i bin mekim bilong kisim bek mipela ol manmeri bilong sin. Tingim dai na kirap bilong em, na kisim ol bratasusa bilong mipela i go long amamas bilong heven. Mipela i pre long nem bilong Jisas Kraus, em i Bikpela bilong mipela.

**Ol: Amen.**

## **8. Singsing bilong pinis, o Benediksen**

## **Litani bilong helpim ol manmeri i dai pinis**

**L: Yumi autim bilip bilong yumi:**

Ol: Krai, yu dai. Krai, yu kirap bek. Krai, bai yu kam bek gen.

**L: Jisas, yu dai long diwai kros,**

Ol: Marimari long ol i bin dai.

**L: Jisas, yu kirap bek long ol i dai,**

Ol: Marimari long ol i bin dai.

**L: Jisas, yu save givim strong long ol i laik dai,**

Ol: Marimari long ol i bin dai.

**L: Jisas, yu opim dua bilong laip bilong oltaim.**

Ol: Marimari long ol i bin dai.

**L: Mipela i pre bilong helpim ol manmeri i dai pinis,**

Ol: Givim amamas bilong oltaim long ol.

**L: Lusim ol sin bilong ol,**

Ol: Givim amamas bilong oltaim long ol.

**L: Bringim ol i go long kingdom bilong God.**

Ol: Givim amamas bilong oltaim long ol.

**L: Yumi autim bilip bilong yumi:**

Ol: Krai, yu dai. Krai, yu kirap bek. Krai, bai yu kam bek gen.

**L: Marimari long mipela ol manmeri bilong sin,**

Ol: Harim pre bilong mipela.

**L: Givim gutpela taim long ol manmeri i dai pinis,**

Ol: Harim pre bilong mipela.

**L: Bai ol i lukim pes bilong yu,**

Ol: Harim pre bilong mipela.

**L: Bai ol i amamas wantaim yu long laip bilong oltaim.**

Ol: Harim pre bilong mipela.

**L: Marimari long ol manmeri, ol i nogat wanpela i tingim ol,**

Ol: Harim pre bilong mipela.

**L: Bringim ol papamama, bratasusa na ol pren bilong mipela i go long ples bilong yu,**

Ol: Harim pre bilong mipela.

**L: Bringim ol pris bilong mipela na ol manmeri i bin mekim gut long mipela i go long lait bilong oltaim,**

Ol: Harim pre bilong mipela.

**L: Kisim ol manmeri bilong peris bilong mipela i dai pinis i go long kingdom bilong yu,**

Ol: Harim pre bilong mipela.

**L: Kirapim olgeta manmeri i dai pinis, bai ol i ken stap laip oltaim,**

Ol: Harim pre bilong mipela.

**L: Yumi autim bilip bilong yumi:**

Ol: Kraais, yu dai. Kraais, yu kirap bek. Kraais, bai yu kam bek gen.

**L: God Papa, mipela i askim yu, marimari long ol manmeri i dai pinis. Pogivim ol rong bilong ol. Long baptais yu bin givim laip bilong yu long ol. Nau bringim ol i go long kingdom bilong lait na bilong gutpela taim. Mipela i pre long nem bilong Jisas Kraais, em i Bikpela bilong mipela.**

Ol: Amen.

### **Pre bilong singautim helpim bilong ol bratasusa i stap long Klinpaia (*Purgatory*)**

**L: Yupela ol bratasusa i stap long klinpaia, nau mipela i pre long yupela, bai yupela tu i helpim mipela. Yupela i stap pinis long ples i nogat traim na sin long en. Tasol mipela i stap yet long ples bilong traim. Sambai long mipela, bai mipela i ken win long ol traim na long ol sin, na bai mipela i ken wokabaut long rot i go long God. Pre bilong helpim mipela, bai mipela i ken stap gut oltaim inap long dai bilong mipela.**

Ol: Yupela pre bilong helpim mipela, bai yumi olgeta i ken amamas oltaim long ples tru bilong yumi long heven. Amen.



# **Lotu bilong planim bodi bilong man o meri i dai (*taim nogat pris*)**

## **1. Bigin**

*Long taim ol pipel i bung pinis bilong planim bodi bilong man/meri i bin dai, lida i givim gude long ol. Em i soim sori bilong em i go long famili na lain bilong daiman/meri. Em i strongim ol long sampela gutpela tok bilong Kristen bilip. Em i ken kolim sampela tok bilong Baibel, olsem:*

L: Yupela ol manmeri i save hatwok tru na i karim ol bikpela hevi, yupela olgeta kam long mi, na bai mi givim malolo long yupela. (*Mt 11:28*)

o:

L: Yumi litimapim nem bilong God,  
em i God na Papa bilong Bikpela bilong yumi Jisas Kraais.  
Em i Papa bilong yumi,  
na em i as bilong olgeta pasin marimari na pasin sori.  
Em i God bilong mekim isi bel bilong olgeta manmeri i gat hevi.  
Long olgeta hevi i kamap long mipela,  
em i save mekim isi bel bilong mipela. (*2 Ko 1:3-4*)

*Lida i ken blesim bodi bilong daiman/meri long holi wara, sapos em i laik. Nau em i ken kolim Sam 23 o 130, o narapela pre bilong Baibel. Dispela pre i pinis, em i tok:*

L: Lord i stap wantaim yupela.

**Ol: Na wantaim spirit bilong yu.**

L: Yumi pre:

God Papa, harim pre bilong mipela na marimari long pikinini bilong yu (*nem*) i dai pinis.

Yu yet yu bin singautim em.

Bungim em wantaim ol santu insait long kingdom bilong yu.

Em i ples bilong lait na malolo.

Mipela i askim yu long nem bilong Kraais,

em i Bikpela bilong mipela.

**Ol: Amen.**

## 2. Rit bilong Tok bilong God

*I gat planti rit bilong planim man/meri. Lida i ken makim wanpela long dispela lista:*

Mt 5:1-2; Mk 15:33-39; Lu 12:35-40; Jn 14:1-6.

L: Nau yumi harim Gutnius bilong Jisas Krais, Santu (...) i raitim.

**Ol: Ona long yu Lord.**

L: Dispela em i Gutnius bilong Bikpela.

**Ol: Ona long yu, Bikpela Jisas Krais.**

## 3. Sotpela skul long Tok bilong God

Ol bratasusa, yumi bilip, brata/susa bilong yumi (*nem...*) i stap wantaim Krais. Tru, bel bilong yumi i hevi, tasol yumi no ken krai olsem ol manmeri i no gat bilip, bikos Jisas i tok, bai em i kirapim manmeri i dai pinis. Man o meri i bilip long Jisas, maski bodi bilong em i dai pinis, bai em i gat laip.

## 4. Pre bilong pipel bilong God

L: Yumi pre long Jisas Krais bilong helpim brata/susa bilong mipela (*nem...*). Krais i tok olsem, “*Kirap bek, em mi yet. Na laip, em mi yet. Na man/meri i bilip long mi, maski sapos em i dai, em bai i stap laip yet. Na olgeta manmeri i stap laip na i bilip long mi, bai ol i no i dai. Nogat.*” (Jn 11:25-26)

L: Jisas, yu bin krai taim pren bilong yu Lasarus i dai. Mekim gut nau long mipela i gat bikpela bel hevi. Mipela i bilip na mipela i pre:

**Ol: Harim pre bilong mipela.**

L: Yu save kirapim ol manmeri i dai pinis.

Givim laip bilong oltaim long dispela brata/susa bilong mipela (*nem...*). Mipela i pre:

**Ol: Harim pre bilong mipela.**

L: Brata/susa bilong mipela (*nem...*) i bin kisim baptais (na pris i bin welim em long holi wel bilong oraitim em). Bungim em wantaim ol santu bilong yu. Mipela i pre:

**Ol: Harim pre bilong mipela.**

L: Brata/susa bilong mipela i bin kisim Bodi na Blut bilong yu.  
Singautim em i sindaun long kaikai bilong yu long heven.  
Mipela i pre:

**Ol: Harim pre bilong mipela.**

L: Bikpela, Jisas, mekim gut long mipela i sori nau long brata/susa bilong mipela i dai pinis. Bilip bilong mipela i ken strongim bel bilong mipela, taim mipela i stap yet na wetim laip bilong oltaim. Mipela i pre:

**Ol: Harim pre bilong mipela.**

L: Nau yumi pre olsem Jisas i bin lainim yumi.

**Ol: Papa bilong mipela...**

## **5. Wokabaut i go long matmat**

*(Sapos ol i no bin blesim matmat yet, lida i blesim nau.)*

L: Yumi pre:

Bikpela, Jisas Krai,

yu bin slip long matmat inap long tripela de,  
na olsem yu bin blesim olgeta matmat bilong ol manmeri i bilip long yu.

I tru, bodi bilong ol i stap long graun,  
tasol ol i bilip wanpela de bai ol i kirap gen  
wankain olsem yu bin kirap.

Givim gutpela malolo long brata/susa bilong mipela *(nem...)*,  
bodi bilong em i stap hia long matmat.

Em bai i wet inap long taim yu kirapim em gen.

Long dispela taim em bai i lukim yu tru long kingdom bilong yu,  
we yu stap oltaim oltaim.

**Ol: Amen.**

*(Pre i pinis, nau lida i ken tromoi holi wara long bodi bilong daiman/meri na long hul bilong matmat. Bihain, putim bokis long hul)*

## **6. Tok gutbai long daiman/meri**

*Sapos lida na olgeta manmeri i bung bilong planim man/meri, ol i mekim tok gutbai long daimanmeri klostu long hul bilong matmat. Lida i sanap klostu long bokis na em i tokim ol pipel olsem:*

L: Nau yumi laik tok gutbai long brata/susa bilong yumi. Tru, bel bilong yumi i pas, tasol yumi mas bilip olsem: wanpela de bai yumi lukim brata/susa bilong yumi gen na amamas wantaim em. Long marimari bilong God, dispela bel hevi i pasim yumi tude, em bai i pinis, na amamas bai i kamap, taim yumi bungim brata/susa bilong yumi gen long kingdom bilong God. Olsem na wanpela i mas strongim narapela long bilip bilong yumi long Jisas Krai.

**Ol: Amen.**

L: Yupela ol santu bilong God, kam helpim em.  
Yupela ol ensel bilong God, kam bungim em.

**Ol: Kisim em i go lukim pes bilong God.**

L: Yupela ol ensel na santu, bungim em wantaim Krai.

**Ol: Kisim em i go lukim pes bilong God.**

L: Yupela ol ensel na santu, bringim em long amamas bilong oltaim.

**Ol: Kisim em i go lukim pes bilong God.**

L: Yumi pre:

God Papa, mipela i laik givim nau brata/susa bilong mipela (*nem...*) long yu. Em i lusim pinis dispela graun, na nau em i sanap long ai bilong yu. Long marimari na sori bilong yu, pogivim olkain sin na rong em i bin mekim long taim em i stap yet long graun. Mipela i pre long nem bilong Krai, em i Bikpela bilong mipela.

**Ol: Amen.**

## **7. Singsing bilong pinis**

### **Lotu bilong planim bodi bilong pikinini (taim nogat pris)**

#### **1. Bigin**

*Ol i go insait long haus na lida i givim gude long ol.  
Lida i soim sori bilong em i go long famili na lain bilong  
pikinini i dai pinis, na em i strongim ol long sampela  
gutpela tok bilong Kristen bilip. Em i ken kolim sampela tok  
bilong Baibel, olsem:*

L: Yumi litimapim nem bilong God,  
em i God na Papa bilong Bikpela bilong yumi Jisas Krai.  
Em i Papa bilong yumi,  
na em i as bilong olgeta pasin marimari na pasin sori.  
Em i God bilong mekim isi bel bilong olgeta manmeri i gat hevi.  
Long olgeta hevi i kamap long mipela,  
em i save mekim isi bel bilong mipela. (2 Ko 1:3-4)

L: Yumi pre:  
God Papa, harim pre mipela i mekim bilong helpim (*nem...*).  
Em i dai pinis na mipela i krai long em.  
Mipela i bilip,  
dispela pikinini nau em i stap laip long kingdom bilong yu,  
na mipela i wet long lukim em gen,  
na bungim em long amamas bilong heven.  
Mipela i pre long nem bilong Krai,  
em i Bikpela bilong mipela.

**Ol: Amen.**

## **2. Rit bilong Tok bilong God**

*(I gat sampela rit i tok long pikinini, na lida i ken kisim  
wanpela bilong dispela lista.)*

Re 6:3-9; Ef 1:3-5; Re 7:9-10, 15-17; Mt 11:25-30; Mt 19:13-14;  
Lu 9:46-48; Jn 14:1-6.

L: Nau yumi harim rit i kam long (...).

**Ol: Ona long yu Lord.**

*Rit i pinis:*

L: Dispela em i tok bilong God.

**Ol: Ona long yu Krai.**

## **3. Sotpela skul long Tok bilong God**

L: Ol bratasusa,  
Jisas i laikim tumas ol pikinini.  
Em i laikim tu dispela pikinini i dai pinis,  
nau yumi laik planim em.  
Yumi bilip,

Jisas i kisim em i go long ples bilong em long heven,  
na bai em i kirapim tu bodi bilong em long las de.

#### **4. Pre bilong pipel bilong God**

L: Ol pren, God em i Papa bilong pasin marimari.  
Yumi askim em nau long helpim yumi. God Papa,  
kisim dispela pikinini i go long laip bilong oltaim.  
Mipela pre:

##### **Ol: Harim pre bilong mipela.**

L: Mekim gut bel bilong papamama na lain i sori tumas long  
pikinini i dai pinis.  
Mipela i pre:

##### **Ol: Harim pre bilong mipela.**

L: Pulapim ol long strongpela laik bilong yu.  
Mipela i pre:

##### **Ol: Harim pre bilong mipela.**

L: Strongim bilip na hop bilong ol.  
Mipela i pre:

##### **Ol: Harim pre bilong mipela.**

L: Strongim mipela i wokabaut yet long rot,  
bai mipela i holimpas wok bilong yu.  
Mipela, i pre:

##### **Ol: Harim pre bilong mipela.**

L: Helpim mipela long tingim laip i stap gut oltaim.  
Mipela i pre:

##### **Ol: Harim pre bilong mipela.**

L: God Papa,  
long pre bilong Santu Maria, Mama bilong Jisas, helpim mipela.  
God Papa, Maria i bin sanap klostu long diwai kros,  
na em i lukim pikinini bilong em i dai.  
Long pre bilong Santu Maria,  
helpim dispela papamama i bel hevi tumas.  
Givim bel isi long tupela.  
Bringim tupela i kamap long laip bilong oltaim.  
Mipela i pre long nem bilong Krais, em i Bikpela bilong mipela.

##### **Ol: Amen.**

## **5. Wokabaut i go long matmat**

*(Ol i ken kirapim singsing long tok ples, o kolim wanpela sam, olsem Sam 23 o 25, o 42-43.)*

## **6. Blesim hul bilong matmat**

*(Sapos ol i no bin blesim matmat bipo, lida i ken blesim nau.)*

- L: God Papa, long marimari bilong yu,  
ol manmeri i gat bilip bai ol inap painim malolo bilong oltaim.  
Blesim dispela hul bilong matmat na salim ensel bilong yu, bai  
em i was long en.  
Mipela i laik planim bodi bilong dispela pikinini.  
Kisim em i go long ples bilong yu,  
bai wantaim ol santu em i ken amamas long yu oltaim oltaim.  
Mipela i pre long nem bilong Krai,  
em i Bikpela bilong mipela.

**Ol: Amen.**

*(putim bokis long hul)*

## **7. Tok gutbai long pikinini**

- L: Yumi givim bek pikinini long han bilong God.  
Nau yumi wan wan i gutbai long em.

*(Nau bihainim pasin gutbai bilong ples)*

## **8. Singsing bilong pinis**

# KRAIS I KING

## Baibel Lotu bilong Krai i King

### 1. Singsing bilong bigin

#### 2. Pre

L: God Papa, yu laik bai olgeta samting i kamap nupela gen long strong bilong Pikinini bilong yu. Yu bin makim em i King bilong heven na graun. Mipela i pre, bai mipela i ken bung wantaim olgeta samting yu bin wokim, na litimapim nem bilong yu oltaim oltaim. Mipela i pre long nem bilong Jisas Krai, em i Bikipela bilong mipela.

**Ol: Amen.**

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God

*(Lida i ken yusim wanpela bilong ol dispela rit hia.)*

Mat 25:31-46

Pikinini bilong Man bai i kam olsem King.

Jon 18:33-37

Ating yu wanpela king, a?

1 Ko 15:20-26, 28

Krai em i namba wan.

Re 1:5-8

Jisas em i Bikipela bilong olgeta king.

#### 5. Skul.

*(Ol pipel i ken sarap liklik taim na tingting long dispela rit, o lida i ken givim sotpela skul.)*

### 6. Singsing bilong Krai i King

#### 7. Pre

L: Yumi adorim na onaim Jisas Krai i winim indai. Em i King bilong heven na graun, na jas bilong olgeta manmeri.

**Ol: Ona na biknem long yu, Bikipela Jisas Krai. Yu winim strong bilong indai. Yu kirapim mipela long dai, na givim laip i stap oltaim.**

L: Yu sindaun nau long raithan bilong Papa, tasol bihain bai yu kam bek long mekim kot long ol i stap yet na long ol i dai pinis.

**Ol: Ona na biknem long yu, Bikpela Jisas Krai. Yu winim strong bilong indai. Yu kirapim mipela long dai na givim laip i stap oltaim.**

L: Bikpela, Jisas Krai, yu king bilong ol king na yu Bikpela bilong ol bikpela. Stiaim mipela, bai mipela i ken bihainim laik bilong yu. Mipela i pre:

**Ol: Harim pre bilong mipela.**

L: Marimari long mipela na mekim gutpela kot long mipela. Yu no ken tingim ol sin bilong mipela, tasol yu ken sori long mipela. Mipela i pre:

**Ol: Harim pre bilong mipela.**

L: Helpim mipela, bai mipela i no ken lusim yu, na sambai long mipela long taim mipela i laik dai. Mipela i pre:

**Ol: Harim pre bilong mipela.**

L: Yumi pre:

God Papa, Jisas Krai i bin bihainim laik bilong yu i go inap long em i dai long diwai kros. Long dispela tasol yu litimapim em na putim em antap tru. Na yu givim wanpela nem long em i winim olgeta arapela nem. Yu givim dispela nem long Jisas, bai olgeta manmeri long heven na long graun, na aninit long graun, ol i ken kolim nem bilong Jisas na brukim skru long em. Na olgeta i mas tokaut olsem: “Jisas Krai em i Bikpela.” Na bai nem bilong yu, Papa, em i stap antap.

**Ol: Amen.**

## **8. Singsing bilong pinis, o Benediksen**



# MARIA

## Baibel Lotu bilong onarim Santu Maria

### 1. Singsing bilong bigin

#### 2. Pre

L: God Papa, yu laik bai Pikinini bilong yu i kamap man.  
Olsem na yu bin salim ensel i bringim tok long Maria,  
bai em i kamap mama bilong Jisas.  
Em i no save gut olsem wanem dispela tok bilong yu bai i ken  
kamap long em.  
Na yu strongim em, na em i tok yesa long yu.  
Mipela i askim yu, strongim bilip bilong mipela tu,  
bai mipela i bihainim laik bilong yu oltaim,  
na bai mipela i ken onaim yu olgeta de.  
Mipela i pre long nem bilong Jisas Krai,  
em i Bikpela bilong mipela.

**Ol: Amen.**

#### 3. Toksave long rit

*(Lida i ken tokaut long mining bilong pestode na bilong rit)*

#### 4. Rit bilong Tok bilong God

*(Lida i ken yusim wanpela bilong ol dispela rit hia)*

|             |                                                      |
|-------------|------------------------------------------------------|
| Mat 1:18-23 | Maria i karim Jisas.                                 |
| Luk 1:26-33 | Ensel i tokim Maria long Jisas bai i kamap.          |
| Luk 2:22-40 | Maria tupela Josep i bringim Jisas i go long Tempel. |

#### 5. Skul

*(Ol pipel i ken sarap liklik taim na tingting long dispela rit,  
o lida i ken givim sotpela skul.)*

### 6. Singsing bilong onarim Santu Maria

#### 7. Pre

*(Ol i ken bihainim dispela pre, o yusim narapela pre.)*

L: God Papa, mipela i amamas long bikipela strong bilong yu. Yu onaim Maria moa long olgeta arapela manmeri bilong graun. Em i poroman bilong mipela. Em i bilip tru long tok bilong yu na oltaim em i harim tok bilong yu.

**Ol: Mipela i tenkim na onaim yu, nau na oltaim.**

L: Jisas, Pikinini bilong God, mipela i amamas, bikos yu bin makim Santu Maria i kamap mama bilong yu. Em i lukautim yu gut tru hia long graun. Yu bin makim em i Mama bilong mipela tu, bai em i ken lukautim mipela.

**Ol: Mipela i tenkim na onaim yu, nau na oltaim.**

L: God Holi Spirit, mipela i laik onaim yu. Yu bin pulapim Santu Maria long strong bilong yu. Na olsem em i ken helpim mipela.

**Ol: Mipela i tenkim na onaim yu, nau na oltaim.**

L: Santu Maria, Mama bilong God, mipela i amamas long bikipela bilas God i bin givim yu. Mipela i kolim yu Kwin na Mama bilong mipela. Yu save lukautim mipela oltaim, olsem na mipela i laik tenkim yu.

**Ol: Mipela i tenkim na onaim yu, nau na oltaim.**

L: Ave, Maria, yu pulap long grasia. Lord i stap long yu. Ol i onaim yu moa long ol meri, na ol i onaim Jisas, Em i Pikinini bilong bel bilong yu.

**Ol: Santu Maria, Mama bilong God, pre bilong helpim mipela manmeri bilong sin, nau na long taim mipela i dai. Amen.**

## **8. Singsing bilong pinis, o Benediksen**

### **Pre long Santu Maria (1)**

L: God Papa, mipela i kam long ai bilong yu. Mipela i tenkim yu long ol presen yu bin givim long Maria. Mipela i amamas long em. Em i nambawan bilong mipela olgeta. Mipela i onaim Maria long dispela de.

**Ol: Maria, Mama bilong God, pre bilong helpim mipela.**

L: Santu Maria, Virgo oltaim, God i no wokim heaven na graun yet na em i tingim yu pinis. Em i amamas long yu. Em i makim yu bilong karim Pikinini bilong em, Jisas. Ol profet i bin autim tok long yu. Yu dispela meri, God i bin promis bilong daunim ol birua bilong mipela.

**Ol: Maria, Mama bilong God, pre bilong helpim mipela.**

L: Santu Maria, Mama bilong God, yu pulap long blesing bilong God. Yu orait long askim bilong ensel Gabriel. Na Tok bilong God i kamap man. Yu kisim bel long strong bilong Holi Spirit.

**Ol: Maria, Mama bilong God, pre bilong helpim mipela.**

L: Santu Maria, Kwin bilong heven, Jisas i makim yu bilong helpim mipela. Em i tok, mipela i mas kam long yu. Em i kisim yu i go long heven. Yu kwin bilong mipela na bilong ol ensel wantaim. Helpim mipela nau.

**Ol: Maria, Mama bilong God, pre long helpim mipela.**

L: Yumi pre:

God Papa, helpim mipela long pre bilong Santu Maria, bai mipela i ken stap gutpela pikinini bilong yu, na bai mipela i ken wokabaut long rot bilong yu na kamap long yu. Mipela i laik amamas wantaim yu na Santu Maria na ol santu long heven.

**Ol: Amen.**

## **Pre long Santu Maria (2)**

L: Santu Maria, yu Mama bilong God. Yu Mama bilong mipela tu. Harim pre bilong mipela. Mipela ol pikinini bilong yu i kam long yu. Mipela i laik onaim yu.

**Ol: Ave Maria...**

L: Santu Maria, sin bilong Adam i no stap long yu. God i bin givim strong long yu. Yu wok wantaim Pikinini bilong yu bilong daunim strong bilong Satan. Yu strongpela na gutpela tru.

**Ol: Ave Maria ...**

L: Santu Maria, God i bin putim yu antap long olgeta ensel na santu. Em i makim yu kwin bilong heven na graun.

**Ol: Ave Maria ...**

L: Santu Maria, mipela i bilip, sapos mipela i singaut long yu, mipela i no ken lus. Mipela i askim yu lukautim mipela. Soim rot long ol manmeri i stap yet long tudak. Marimari long ol sinmanmeri. Sambai long mipela, taim Satan i laik traim mipela. Tekewe ol sik na pen na sori long mipela. Mipela i laik stap wantaim yu nau na oltaim.

**Ol: Amen.**

## Litani bilong Santu Maria

**L: Lord, marimari long mipela.**

Ol: Kraiss, marimari long mipela.

**L: Lord, marimari long mipela.**

Ol: Kraiss, harim pre bilong mipela.

**L: God, Papa long heaven,**

Ol: Marimari long mipela.

**L: God, Pikinini, Ridima bilong ol manmeri,**

Ol: Marimari long mipela.

**L: God, Holi Spirit,**

Ol: Marimari long mipela

**L: Holi Trinititi, wampela God tasol,**

Ol: Marimari long mipela.

**L: Santu Maria,**

Ol: Pre bilong helpim mipela.

**L: Santu Mama bilong God,**

Ol: Pre bilong helpim mipela.

**L: Santu Virgo, yu go pas long lain bilong ol virgo,**

Ol: Pre bilong helpim mipela.

**L: Mama bilong Kraiss,**

Ol: Pre bilong helpim mipela.

**L: Mama bilong Sios**

Ol: Pre bilong helpim mipela.

**L: Mama, yu gutpela tru,**

Ol: Pre bilong helpim mipela.

**L: Mama, yu stretpela tru,**

Ol: Pre bilong helpim mipela.

**L: Mama, yu pulap long strong bilong God,**

Ol: Pre bilong helpim mipela.

**L: Virgo, yu pulap long gutpela save,**

Ol: Pre bilong helpim mipela.

**L: Virgo, yu marimari tru,**

Ol: Pre bilong helpim mipela.

**L: Virgo, yu bilip tru,**

Ol: Pre bilong helpim mipela.

**L: Maria, yu hop bilong mipela,**

Ol: Pre bilong helpim mipela.



**L: Maria, yu helpim bilong ol sikmanmeri,**

Ol: Pre bilong helpim mipela.

**L: Maria, yu strong bilong ol manmeri i gat hevi,**

Ol: Pre bilong helpim mipela.

**L: Maria, yu helpim bilong ol Kristen manmeri,**

Ol: Pre bilong helpim mipela.

**L: Yu Kwin bilong ol ensel,**

Ol: Pre bilong helpim mipela.

**L: Yu Kwin bilong ol profet,**

Ol: Pre bilong helpim mipela.

**L: Yu Kwin bilong ol aposel,**

Ol: Pre bilong helpim mipela.

**L: Yu Kwin bilong ol martir,**

Ol: Pre bilong helpim mipela.

**L: Yu Kwin bilong ol santu,**

Ol: Pre bilong helpim mipela.

**L: Yu Kwin i no gat sin,**

Ol: Pre bilong helpim mipela.

**L: Yu Kwin i stap nau long heven,**

Ol: Pre bilong helpim mipela.

**L: Yu Kwin bilong ol famili,**

Ol: Pre bilong helpim mipela.

**L: Yu Kwin bilong gutpela taim tru,**

Ol: Pre bilong helpim mipela.

**L: Santu Maria, Mama bilong God, pre bilong helpim mipela.**

Ol: Bai mipela i ken go long heven.

**L: Yumi pre:**

God Papa, sambai long mipela lain pipel bilong yu, bai mipela i ken stap gut olgeta. Long pre bilong Santu Maria, i Virgo oltaim, tekewe ol taim bilong sori na hevi hia long graun. Na mekim mipela i kamap long amamas bilong laip bilong oltaim. Mipela i pre long nem bilong Jisas Krai, em i Bikpela bilong mipela.

Ol: Amen.

## **Pre long Santu Maria, Mama bilong Santu Hat bilong Jisas**

Santu Maria, Mama bilong Santu Hat bilong Jisas, Jisas i givim bikpela ona long yu. Em i makim yu Mama bilong em. Yu stap nau wantaim em long amamas bilong heven. Mipela i onaim yu, mipela i tenkim yu. Tokim Jisas long ol wari bilong mipela, Em i save harim pre bilong yu. Helpim mipela i bihainim Pikinini bilong yu, bai kingdom bilong em i ken i kam. Na bai olgeta manmeri i ken harim tok bilong em. Soim ol manmeri olsem, Hat bilong Jisas i op, na marimari bilong em i kapsait i kam long mipela. Olgeta gutpela pasin i save kamap long dispela Hat bilong em. Mipela i laik painim malolo na sekan long en. Maria, Mama bilong Santu Hat bilong Jisas, na gutpela Mama tru bilong mipela, harim pre bilong mipela. Amen.

## **Pre long Mama bilong God long taim bilong sori**

Maria, Virgo na Mama, taim Jisas i karim pen na i dai long diwai kros, bikpela sori i sutim lewa bilong yu olsem bainat. Tasol bilip bilong yu i strongim yu long karim dispela hevi. Mipela i askim yu, strongim bilip bilong mipela, bai mipela tu inap long karim ol pen na hevi. Blesim ol Kristen i save painim hevi, bikos ol i bihainim Jisas. Helpim ol long tingim bikpela amamas i wetim ol long heven. Amen.

## **Pre long Santu Maria bilong kisim gutpela save**

Santu Maria, God i bin makim yu bilong kamap Mama bilong Ridima, Jisas Krai. Sin bilong Adam i no pas long yu. Yu holi olgeta. Mipela i amamas long yu. Mipela i askim yu, helpim mipela bai mipela i sori tru long ol sin bilong mipela. Helpim mipela long skelim gut ol samting, bai mipela i ken bihainim laik bilong God tasol. Helpim olgeta Kristen long bung long wankain tingting na pasin, bai kingdom bilong God i ken i stap namel long mipela. Amen


## **Pre long Santu Maria (*Santu Jon bilong Damaskus i wokim*)**

Bikpela Mama bilong mipela, harim pre bilong mipela i singaut long yu. Kisim ol pre bilong mipela na bringim ol i go long Pikinini bilong yu, Jisas Krai. Em i God, na em wanpela tasol inap mekim gut long mipela. Maria, yu no gat sin. Yu Mama bilong mipela, was oltaim long mipela. Amen.



# OL SINGSING





## **OL SINGSING BILONG TAIM BILONG YIA**

### **ATVEN**

1. Kamdaun, kamdaun, Ridima tru
2. Yu kam, Yu kam, Ridima tru
3. Ol manmeri, redi gut nau
4. Emanuel, Yu kam
5. Taim Lord i kam
6. Yu Mama blong Ridima tru
7. Kam Lord, soim pes blong Yu long mipela
8. O kam, o kam, Emanuel
9. Bipo ol sta i stap long skai
10. Yumi ting long Jisas Krai
11. Redim rot long Bikipela (Misa Boikin)

### **KRISMAS**

12. Kam yumi olgeta
13. Krismas nait, holi nait
14. Wan bikipela lait
15. Yu liklik Jisas
16. Wapela liklik plaua
17. Husat i gat bilip
18. Yumi harim ensel nau
19. Taim ol man i slip long nait
20. Yumi go long Bet'hem ples nau
21. Yumi sing long Betlehem
22. Yupela manmeri, yupela i kam
23. Kam Kristen Pipel kam
24. Long biknait wapela lait i kamap
25. Harim nau ol ensel sing
26. Man longwe i lukim ol sta
27. Maria karim Jisas
28. God Son i stap long Betlehem
29. Olgeta hap blong graun
30. Krismas nait nau i lait

## **LEN**

31. Ai blong mi
32. Yupela ensel, yupela kam lukim
33. Husat i save wari long mi?
34. Lukim husat i kam klostu
35. Kam klostu, Jisas Krai
36. O Yu ting long mi
37. O God Papa gut na strong (1)
38. Harim, God, long krai bilong mi
39. Long diwai kros Yu karim.
40. Diwai Kros, gut tru na santu
41. O Lord, mipela mekim rong
42. O Jisas, Het bilong Yu

## **HOLI WIK**

### **Pam Sande**

43. Pikinini blong ol Juda
44. Bikpela King i Kamap
45. Krai i King tru

### **Gut Fonde**

46. Mi Givim Nupela Lo
47. Gut Fonde nait, O Jisas
48. Long Gut Fonde nait
49. Apinun long Holi Fonde
50. Yu mas laikim tru (Misa Boikin)

### **Gut Fraide**

51. Diwai kros gutpela tru
52. Lord blong mi
53. Lukim man
54. O Jisas i dai
55. Yumi krai
56. O pipel bilong Mi

## **ISTA**

- 57. Em i orait gen
- 58. Jisas i kirap tude
- 59. Jisas Ridima i kirap
- 60. Jisas i kirap gen
- 61. Yumi singsing nau long Jisas
- 62. Aleluia, mipela i singsing
- 63. Maria Mama, yu no krai
- 64. Pipel blong God, kalap na sing
- 65. Jisas i kirap
- 66. Jisas Krai i kirap gen
- 67. Aleluia, bikpela pait i kamap bipo
- 68. Kwin bilong heven, yu amamas long Son
- 69. Kam bung wantaim
- 70. San i brukim moning
- 71. Hipurei long Lord
- 72. Mi kirap pinis
- 73. Aleluia, Krai i kirap
- 74. Taim angelo i rausim ston

## **ASENSEN**

- 75. Jisas i go antap tude
- 76. Jisas i win tru
- 77. Ensel bilong heven opim dua

## **PENTEKOS**

- 78. Yu kam daun long mipela
- 79. Kam God Spirit bilong laip
- 80. Yu kam, God Spirit
- 81. Kam Holi Spirit
- 82. Yu, Holi Spirit, kam long mi
- 83. God Spirit
- 84. Kam nau Holi Spirit
- 85. Lord, taim yu stap long graun
- 86. Kam Spirit blong God

- 87. Kamdaun nau, Holi Spirit
- 88. Spirit bilong God
- 89. Long wanpela Spirit
- 90. Kam, o Holi Spirit, kam, mi wetim Yu
- 91. Kam, o Holi Spirit, kam strongim ol
- 92. Holi Spirit, Yu God tru (Misa Maiwara 2)
- 93. Kam God Spirit bilong laip

### **GOD NA TRINITY**

- 94. Papa, mi bilip long yu
- 95. God, Yu strongpela tumas
- 96. God Yu Santu, God Yu tru
- 97. Papa bilong mipela, Yu yet wokim ol samting
- 98. Yumi bung hia na singsing
- 99. Yu Tripela i stap wankain
- 100. Long dispela Pestode
- 101. O Papa God (O Lord, my God)
- 102. God Papa, God Papa, bikpela tru
- 103. Ona long God
- 104. God i gutpela
- 105. God i wokim mi

### **HOLI YUKARIS**

- 106. Jisas yu tok: Mi bret blong laip
- 107. Yumi adorim Jisas hia
- 108. Mi ting long yu, o Jisas
- 109. Lord Jisas, mi bilip yu stap
- 110. Yumi laik adorim Jisas (1) (Tantum ergo)
- 111. Yumi laik adorim Jisas (2) (Tantum ergo)
- 112. O Jisas God, o Jisas Man
- 113. Kam long mi
- 114. Sol blong Ridima
- 115. O Bret blong laip
- 116. Jisas Em i sindaun
- 117. Jisas, Jisas, kam long mi

118. Nau mi laik adorim Yu
119. Nau mi kisim Jisas Krais
120. Singaut strong
121. Sol bilong Jisas
122. Yu Lord, o Yu Lord
123. Yumi bung wantaim long Jisas
124. Maus blong mi i singsing
125. O Jisas hia long hostia
126. Jisas i wasman blong mi
127. Man i kaikai bodi blong Mi
128. Jisas, mi bilip long Yu
129. Hia long alta
130. O Jisas, God, Yu stap long hostia
131. Man i kaikai mit blong mi (Misa Maiwara 3)
132. Jisas mi bilip tru oltaim (Misa Pur)
133. Jisas mi bilip (Misa Sumatin)
134. Yumi kisim bret (Misa Kalibobo)
135. Yumi kaikai nau (Misa Peligo)
136. Ridima Jisas Krais (Misa O God bilong graun)

### **SANTU HAT**

137. Hat blong Jisas, mak bilong sori
138. Jisas, Hat blong Yu i santu
139. Long dai bilong Yu, o gut Jisas
140. Jisas Godman, mi bilip tru
141. Hat blong Jisas, Hat blong laik tru
142. Mi blong Yu tru
143. Yu mekim gut, O Jisas

### **KRAIS I KING**

144. Jisas Ridima
145. Yumi sing long King bilong yumi
146. Krais yu Bikpela
147. Ol man, ol meri singsing amamas
148. Krais i King tru (lukim namba 45)

## **SANTU MARIA**

149. Maria Santu
150. Ave Kwin Maria
151. Ensel blong heven tokim Maria
152. Mi laikim Maria
153. Maria, yu Mama
154. Kwin blong heven
155. Ave Maria
156. Yu Kwin blong heven
157. O Virgo klin
158. Litani bilong Santu Maria
159. O Mama, yu karim Jisas i King
160. Maria, yu amamas
161. Bel bilong yumi onarim nem
162. Sol bilong mi i givim bikipela ona (Magnificat)
163. Maria gut Mama (Lourdes)
164. Harim mi, Maria
165. Maria Virgo tru
166. O Maria, yu Mama bilong God
167. Mama o-o, Mama Maria
168. Ave Rosa Mistika
169. Mama bilong Jisas (Lukim n. 318)
170. Santu Mama bilong Jisas (Misa Peligo wantaim kundu)

## **SANTU JOSEP NA OL SANTU**

171. O Josep, man bilong Maria
172. Pikinini bilong Devit
173. Santu Josep, pren blong Jisas
174. Pita To Rot, Pita To Rot
175. Ol pren blong God
176. Mipela sing long ol i winim pait

## **OL MANMERI I DAI PINIS**

- 177. O God, yu kisim ol
- 178. Jisas, yu dai long diwai kros
- 179. God, harim pre blong mipela

## **KAIN KAIN SINGSING**

- 180. Mi laikim lotu katolik
- 181. O God, mi holim strong tumas
- 182. Wanhaus God i sanapim
- 183. God, strongim Sios blong Yu
- 184. Onarim Lord(Sam 150)
- 185. Yumi amamas na sing
- 186. Kam singsing, pipel bilong God
- 187. Yumi singsing nau: Lord Yu kam
- 188. Tenkyu long God (Sam 111)
- 189. Ona long God i stap long antap
- 190. Dispela de i pinis nau (Singsing bilong nait)
- 191. Tenkyu, long skulim bilong Jisas
- 192. Tenkyu, mipela sing gut moning
- 193. Klostu long Yu, O God
- 194. Yes, laip blong yumi
- 195. Jisas, mi laikim yu
- 196. Mi laik bihainim Bikpela Jisas
- 197. O Godman Jisas Kraiss
- 198. Glori long God, glori (Sam 148)
- 199. Kirap na go long God (Sam 100)
- 200. Man i kaikai bodi blong Mi
- 201. Mi wasman blong yu (Sam 23)
- 202. Tenkyu na ona long Yu
- 203. Mama bilong Jisas (Edward Meli)
- 204. Yupela no ken sutim tok (Luk 6:37-38)
- 205. Yumi Sios. Yes. I Pipel blong God
- 206. Nau mi tenkim God long heven (Misa Boikin)
- 207. O God mi laikim Yu tumas (Misa Maiwara 3)
- 208. Papa God Yu gutpela (Misa Maiwara 3)

209. Tok blong Yu God (Misa Maiwara 1)
210. Yumi harim tok (Misa Maiwara 3)
211. Tenkyu O God (Misa Pur)
212. Tenkyu Papa long ol tok i stret (Misa Sumatin)
213. Tok blong God i kamap man (Misa Kalibobo)
214. Aleluya, mi laik harim (Misa Peligo)
215. Glori long Yu, glori
216. Mi soim rot, Mi givim laip
217. Blesim nem blong Lord

## **SINGSING BILONG MISA**

### **Bigin**

218. Amamas God i King
219. Olgeta man, kam singsing long God
220. Ol pipel bilong God kam sing
221. Yupela kam na singaut long God
222. Pris i kam long Misa nau
223. Yumi laik go long alta (Misa Boikin)
224. Yupela kam blong mekim lotu (Misa Maiwara 1)
225. Mipela i bung, Papa God (Misa Maiwara 3)
226. Redim nau ol tingting (Misa Pur)
227. Jisas mipela i kam (Misa Sumatin)
228. Yumi go klostu long God (Misa Kalibobo)

### **Ofa**

229. Lukim mipela
230. Mipela redim presen nau
231. Yumi bringim bret na wain
232. Oltaim mi ting long Yu
233. Yu lukim na Yu laikim, em presen bilong mipela
234. Lukdaun O God long bret na wain (Misa Boikin)
235. Yumi bringim nau long alta (Misa Maiwara 1)
236. Mipela O God i laik redi nau (Misa Maiwara 3)
237. Nau yumi givim ofa (Misa Pur)
238. Mipela bringim nau (Misa Sumatin)

- 239. Spirit kisim ofa hia (Misa Holi Spirit / Maiwara 2)
- 240. God i kisim dispela ofa (Misa Kalibobo)
- 241. God Yu lukim pris i putim (Misa Peligo)

**Pinis**

- 242. Yumi tenkyu long Lord
- 243. Yumi laik go nau (Misa Maiwara 3)
- 244. Pris i tok: Misa i pinis (Misa Sumatin)
- 245. Yumi go misa i pinis (Misa Kalibobo)
- 246. Em tasol misa blong yumi (Misa Pur)



### **1. Kamdaun, kamdaun, Ridima tru**

1. Kamdaun, kamdaun, Ridima tru. Oraitim pipel bilong Yu.  
Mipela nau i krai long Yu. Kamdaun, kamdaun, Ridima tru.
2. Kamdaun, kamdaun, Ridima tru. Oraitim pipel bilong Yu.  
Kam tekewe ol sin na pen. Kam bringim lait na helpim gen.
3. Kamdaun, kamdaun, Ridima tru. Oraitim pipel bilong Yu.  
Kam kwik mipela wet i stap. Kam mekim kingdom i kamap.

### **2. Yu kam, Yu kam, Ridima tru**

1. Yu kam, Yu kam, Ridima tru. Kam mekim stret pipel blong Yu.  
Ol ples i wetim Yu longtaim tru. Kamdaun na ol i lukim Yu. Kam,  
Jisas. Kam, Jisas, Ridima tru. Kam mekim stret pipel blong Yu.
2. Yu kam, Yu kam, Ridima tru. Kam mekim stret pipel blong Yu.  
Yu bringim lait bilong antap. Yu laitim ples i stap tudak. Kam,  
Jisas. Kam, Jisas, Ridima tru. Kam mekim stret pipel blong Yu.
3. Yu kam, Yu kam, Ridima tru. Kam mekim stret pipel blong Yu.  
Yu opim dua i pas longtaim na mekim pipel fri oltaim. Kam,  
Jisas. Kam, Jisas, Ridima tru. Kam mekim stret pipel blong Yu.

### **3. Ol manmeri, redi gut nau**

1. Ol manmeri, redi gut nau, King blong yumi laik kamap.  
Jisas, Godman, em Mesaia, na Ridima blong yumi.  
Em i laik kam mekim gut yu, i laik bringim yu long lait,  
i laik soim yu long heven, bambai yu go long en.
2. Ol manmeri bilong bilip, yupela i amamas!  
I no longtaim na Ridima Jisas Krai bai i kamap.  
Yupela i mekim redi rot bilong Mesaia hia,  
bambai i kam long yumi na i mekim gut yumi.
3. Sol blong mi yu hepi tru nau. Jisas Krai i laik kamap.  
Em i bringim yu long blesim, bai yu amamas i stap.  
Tasol yu, yumas bihainim rot blong em nau na oltaim,  
bambai yu painim heven, ples blong amamas oltaim.

#### **4. Emanuel, yu kam**

1. Emanuel, Yu kam, kam. Emanuel Yu kam, bringim lait bilong Yu, bai i lait long ol ples hia long graun. Emanuel Yu kam.
2. Emanuel, Yu kam, kam. Emanuel Yu kam, mekim stret Israel long taim tru ol i wet bai Yu kam. Emanuel Yu kam.
3. Emanuel, Yu kam, kam. Emanuel, Yu kam, opim dua i pas tru bringim ol i bin wet bai Yu kam. Emanuel Yu kam.
4. Emanuel, Yu kam, kam. Emanuel, Yu kam, bungim olgeta pipel mekim ol i kamap bratasusa. Emanuel Yu kam.

#### **5. Taim Lord i kam**

1. Taim Lord i kam blong mekim kot, (2x)  
Mi laik stap wantaim Jisas, taim Lord i kam blong mekim kot.
2. Taim ol ensel i bungim ol, ...
3. Taim ol i opim buk blong laip, ...
4. Taim Lord i kolim nem blong ol, ...
5. Taim Lord i tok: yupela kam, ...
6. Taim ol i amamas oltaim, ...
7. Taim ol i sing: Aleluia, ...

#### **6. Yu Mama blong Ridima tru**

1. Yu mama blong Ridima tru, Maria, ol i wetim yu.  
Ol profet i bin tok long yu, ol i singaut na krai long yu.
2. God harim krai blong daunbilo, Em salim santu Gabriel i bringim tok long Nasaret. I spik: “Maria, yu no pret.”
3. Maria, yu orait long tok, nau Jisas lusim ples antap.  
Yu Mama blong Ridima tru, yu karim Em i wokim yu.
4. Yu virgo na yu Mama tru, yu olsem dua blong heven tu,  
yu olsem sta i lait long nait, yu daunim sin na kros na pait.
5. Maria, mama, helpim mi. Sambai oltaim; yu no lusim mi.  
Mi laik bihainim Son bilong yu. Mi laik kamap long heven tu.

## **7. Kam Lord, soim pes blong Yu long mipela**

*Kam, Lord, soim pes blong yu long mipela.*

*Bai mipela orait, bai mipela orait.*

*Lord, Yu kam. Lord, Yu kam.*

1. Pipel blong God lukim Lord i laik i kam.  
Lord i laik i kam, Lord i laik i kam.  
Lord Yu kam. Lord, Yu kam.
2. Soim marimari bilong Yu long ol,  
Lord i klostu kam, Lord i klostu kam.  
Lord Yu kam. Lord Yu kam.

## **8. O kam, O kam, Emanuel**

1. O kam, O kam, Emanuel. Kam lusim pipel Israel,  
i pas long sin blong Adam na blong ol.  
Kam givim hop na stretim rong blong ol.  
*Kam daun, kam daun, Ridima, plis kam daun.*  
*Kam lusim rong long pipel bilong Yu.*
2. O kam na bringim save gen blong God.  
Kam skulim ol i pundaun tru long sin.  
Kam helpim ol bai ol i tanim bel,  
na ol i painim laip bilong oltaim.
3. O kam na bungim ol i lus long rot.  
Kam bungim wantaim ol i bel nogut.  
Kam soim ol long pasin blong sekan,  
na mekim ol i kamap brata tru.

## **9. Bipo ol sta i stap long skai**

1. Bipo ol sta i stap long skai, bipo biksan i brukim nait,  
Jisas, Ridima, Lait blong man, i makim taim blong kam long graun.
2. Jisas i tingim ol sinman, tudak i karamapim ol.  
Na i laik kam blong givim lait, long ol i lusim rot i stret.
3. God Papa salim Em i kam, i marimari long yumi;  
i lusim biknem bilong em. Jisas i kamap man nating.

4. Jisas i mekim wok blong God, i skulim ol long tok blong God.  
Jisas i kam blong stretim rong; i kam long dai blong rausim dai.
5. Tudak blong sin i daunim Lait. Tasol i no inap long win.  
Long Ista Krai i lusim hul, na nait blong sin i dai oltaim.
6. Jisas, Yu kam long mipela. Mipela wetim Yu i kam.  
Bambai tudak blong sin i go na ait blong Yu i lait oltaim.

### **10. Yumi ting long Jisas Krai**

1. Yumi ting long Jisas Krai, Em i kamap klostu nau.  
Yumi sing long em, yumi amamas. Yumi redi nau long em.  
Tokim ol pipel, Telimautim Krai i kam. (2x)
2. Long taim bipo God i promis bai i salim Krai i kam.  
Ol i wetim Em long planti yia. Ol i hop oltaim long em.  
Tokim ol pipel, Telimautim Krai i kam. (2x)
3. God i salim santu ensel long Maria. Em i spik:  
“Bambai yu karim Jisas. Em Ridima blong ol man.”  
Tokim ol pipel, Telimautim Krai i kam. (2x)
4. Yumi redim rot bilong Jisas, olsem Jon Baptais i tok.  
Yumi stretim pasin blong yumi. Tanim bel na kamap gut.  
Tokim ol pipel, Telimautim Krai i kam. (2x)

### **11. Redim rot long Bikpela (Misa Boikin)**

Redim rot long Bikpela stretim ol rot bilong Em.  
Bai olgeta man i lukim God i kisim bek yumi.  
Aleluia, alleluia. Ale, aleluia.



## KRISMAS



### 12. Kam yumi olgeta

1. Kam yumi olgeta, yumi amamas tru long Jisas i bebi i slip hia long krib. King bilong heven i kam daun long yumi.

*Yu kam, yumi adorim, yu kam, yumi adorim,*

*Yu kam, yumi adorim Jisas i King.*

2. Maria na Josep, tupela i lukluk long Jisas, Maria i karim tude. Jisas i God tru, man blong marimari.
3. Ol wasman blong sipsip, ol i harim ensel i toktok long Jisas i stap Betlehem. Ol i go lotu long Mesias Jisas.

### 13. Krismas nait, holi nait

1. Krismas nait, holi nait! Ol i slip, sta i lait.  
Nau Maria i karim God Son, liklik Jisas kamdaun hia long graun.

*Jisas Ridima i kam. Jisas Ridima i kam.*

2. Krismas nait, santu nait, Betlehem nau i lait.  
Wasman ol i kirap i go kwik, painim, lotuim Jisas long krib.
3. Krismas nait, holi nait! Ensel nau nais na wait  
ol i kam ol i singsing long God, bringim gutpela tok blong antap.

### 14. Wan bikpela lait

1. Wan bikpela lait i kamap long nait. Ol ensel i singsing,  
ol ensel i singsing long Jisas Ridima, long nupela king.
2. Yupela wasman, go kwik Betlehem. Go painim niu bebi,  
go painim niu bebi, yupela go painim i slip nau long krib.
3. Dispela niu king i kamdaun long graun. I God na i man tu,  
i God na i man tu. Yupela i painim em, tok hia i tru.
4. Husat i bilip, kam wantaim long ol. Kam adorim Jisas,  
kam adorim Jisas. i God tru i stap nau namel long yumi.

## **15. Yu liklik Jisas**

1. Yu liklik Jisas, pren blong mi, mi laik adorim yu.  
Yu lusim heven ples antap. God yet i salim yu. God yet i salim yu.
2. God em i Papa bilong yu; yu gutpela tumas.  
Maria Mama bilong yu. Yu God na man wantaim. Yu God na man wantaim
3. Maria Mama bilong yu i Mama bilong mi.  
Na God i Papa bilong yu. Mi brata bilong yu. Mi brata bilong yu.
4. Krais Jisas brata bilong mi, mi amamas long yu.  
Mi laik bihainim yu oltaim. Yu gutpela tumas. Yu gutpela tumas.

## **16. Wanpela liklik plaua**

1. Wanpela liklik plaua i kamap long Bet'lem.  
Mi amamas long em tru. Em i luk nais tumas.  
Ol profet blong bipo, ol i tok piksa pinis long em, bambai i kam.
2. Husat dispela plaua, profet i tok long en?  
Em Pikinini Jisas, Ridima blong yumi.  
Maria, virgo tru, em i karim em long biknait long taun bilong Devit
3. O Pikinini Jisas, mi amamas long yu.  
Mi tenkyu tru long Papa, em yet i salim yu.  
Yu kam. Yu stap long mi. Mi laik mi kamap holi. Yu no ken lusim mi

## **17. Husat i gat bilip**

1. Husat i gat bilip, yupela kam, Jisas i stap.  
Em i kamdaun long heven. Em i stap namel long yumi. Emanuel tru
2. Ol ensel bilong heven, ol tu i adorim God i kamap man.  
Na yumi kam wantaim ol ensel blong heven. Kam lotu long em.
3. Krais Jisas Ridima, mipela i hepi yu stap hia long graun.  
Yu kamdaun long heven bilong mekim mipela Manmeri blong God.
4. Krais Jisas mi tenkyu, yu stap tu long alta, olsem Betlehem.  
Haus lotu blong yumi, em i haus bilong God yet. Yu stap tru tude.

## **18. Yumi harim ensel nau**

1. Yumi harim ensel nau. Ol i singsing amamas.  
Ol i bringim tok i kam: Jisas i kamap tude.

*Gloria, Glori long yu God.*

*Gloria, Glori long Yu God Antap.*

2. Bipo tru manmeri i lus, ol i go longwe long God.  
Tasol Jisas Krai i kam. Em i soim rot blong laip.
3. God i sori long yumi, Em i salim Son blong Em.  
Yumi hepi tru long Em, singsing wantaim ol antap.

## **19. Taim ol man i slip long nait**

1. Taim ol man i slip long nait, Maria i wet i stap.  
Em i karim Son blong em, Jisas Krai i Son blong God.
2. Mama karamapim Em na i putim Em long krib.  
Josep tu i was long Em, no gat ples long ol haus slip.
3. Wasman i kalap nogut, ensel nau i tokim ol:  
“Yupela i no ken pret. Jisas i kamap tude.”
4. Kwiktaim Kwiktaim ol i harim tok, ol i go long Betlehem  
Ol i painim Krai long krib. Ol i pre, adorim Em.
5. Yumi tu adorim Em. Krai i God na man wantaim.  
Yumi tenkim Papa tu, Em i salim Ridima.

## **20. Yumi go long Betl’hem ples nau**

1. Yumi go long Betl’hem ples nau, yumi lukim Jisas. (2x)  
*Jisas Krai, Godman tru, Em i laikim yumi tu.*  
*Em i Godman, i Ridima. Jisas gut, Yu blong mi,*  
*mi blong Yu. Nau, mi kam, mi laikim Yu, Ridima tru.*
2. Em stap long haus blong sipsip, liklik pikinini. (2x)
3. Em i bosim graun na heven, Em i God antap tru. (2x)
4. Em i stap yet namel long yumi, long ol bratasusa (2x)

## **21. Yumi sing long Betlehem**

1. Yumi sing long Betlehem, Jisas i kamdaun long em.  
I kamdaun long Betlehem,  
Maria i karim Em. Maria i karim Em.
2. Yumi sing long Betlehem. Son blong God i stap long em.  
Son blong God na Son blong man,  
Maria i karim Em. Maria i karim Em.
3. Em i kam long mi na yu, na long ol manmeri tu.  
I kamdaun Ridima tru, rausim rong blong mi na yu.  
Rausim rong blong mi na yu.
4. Yumi sing long Betlehem, Ridima i stap long em.  
Yumi sing long Jisas lait  
I kamap long Krismas nait, i kamap long Krismas nait.

## **22. Yupela manmeri, yupela i kam**

1. Yupela manmeri, yupela i kam.  
Kam lukim Krais Jisas na givim welkam  
long son bilong Papa i God blong yumi  
i kamdaun long heven blong helpim yumi.
2. Kam lukim Ridima i slip nau long krib.  
I God strong olgeta tasol i man tru.  
I stap olsem yumi. I soim yumi  
long rot bilong stap gut na bung wantaim God.
3. Maria na Josep i amamas tru.  
Tupela i go pas long mekim lotu.  
Maria i harim ol tok bilong God  
Na karim Ridima i God na i man.

## **23. Kam Kristen Pipel kam**

1. Kam Kristen pipel kam, na sing long Jisas Krais i kamap King.  
Em i bosim heven na graun. I lusim heven i kamdaun,  
bai yumi ken go antap, i kam long graun blong stretim rong.  
Nau i slip long krib. Nau i slip long krib.

2. Kam Kristen pipel kam, na sing long Jisas Krai i kamap King.  
Em i sori long yumi. I soim yumi rot long God.  
Em i stap namel yumi blong kliaim tok na stretim rong.  
Yumi tenkim em tru. Yumi tenkim em tru.
3. Kam Kristen pipel kam, na sing long Jisas Krai i kamap King.  
Em i man blong harim tok, i harim Papa na kam daun.  
I no tingim laik blong em; Krai i daunim nem bilong em.  
Yumi amamas nau. Yumi amamas.

## **24. Long biknait wanpela lait i kamap**

1. Long biknait wanpela lait i kamap long Bet'lem  
Na ol wasman i lukim i pret nau long em.  
Nau wanpela tok i kam long ensel i lait:  
Yupela i no pret long dispela biknait.  
  
*Jisas Krai i kamap man. Amamas long en!  
Son bilong God i kamap long Bet'lem.*
2. Yupela mas hariap na go painim long krib  
wanpela liklik bebi i kamap tude.  
Plantim ensel nau i bung, ol i singsing wantaim:  
Glori long God antap na bel isi long man.
3. Ol i wokabaut kwiktaim, painim haus blong sipsip,  
na dispela bebi i stap nau long krib.  
Ol i painim em i stap, ol i lotu long em.  
Ol i save dispela i King blong heven.

## **25. Harim nau ol ensel sing**

1. Harim nau ol ensel sing: Glori long nupela King.  
Bel isi long ol blong graun, ol i kamap pren blong God.  
Yupela i harim tok, yupela kam bung na sing:  
  
*Jisas Krai i kamap man. Em i kamap blong stretim rong.  
Jisas Krai i stap hia tru. Yupela kam, lotu long em.*
2. Yupela i no ken pret, God i soim laik blong em.  
I kamap wanpela bebi, pikinini bilong man.  
Yupela i harim tok, yupela kam bung na sing:

3. Manmeri, yupela kam. God i laik oraitim yu.  
Em i kamdaun hia long graun, bai yupela go antap.  
Yupela i harim tok, yupela kam bung na sing:

## **26. Man longwe i lukim ol sta**

1. Man longwe i lukim ol sta na i painim nupela lait.  
Em i ting i makim nupela king i kamap long graun.  
*Sta blong God yu lait long nait, pulim ol i slip na hait.  
Bringim ol i kam long Jisas: lukim em na amamas.*
2. Em i bungim presen i stap, blong dispela Man blong Antap.  
Gol na sanda, paura i save lotuim God antap.
3. Yupela i laik save moa, yupela i laik kamap gut,  
Kam long Jisas, brukim skru na bilipim ol tok blong em.

## **27. Maria karim Jisas**

1. Maria karim Jisas biknait long Betlehem.  
Mi lukim Yu, O Jisas, yu stap yu slip long krib.  
Liklik Jisas, mi lukim Yu long krib.
2. Ol man bipo i wetim, i krai long Yu tasol.  
Nau Yu kamdaun Ridima, Yu lusim sin blong ol.  
Liklik Jisas, Yu lusim sin blong ol.
3. O liklik Pikinini, Mesaia na God Son,  
mi sing long Yu, mi lotulong Yu, O Godman tru.  
Liklik Jisas, Yu oltaim Godman tru.
4. Mi laikim Yu, O Jisas, mi laikim Yu tumas.  
Mi givim Yu, Ridima, nau bodi wantaim sol.  
Liklik Jisas, nau mi blong Yu tasol.

## **28. God Son i stap long Betlehem**

1. God Son i stap long Betlehem, ale, aleluia,  
long bus blong ol Jerusalem, aleluia, aleluia.
2. Wan sta antap i lait tumas, ale, aleluia,  
em wokabaut, em i go pas, aleluia, aleluia.

3. Tri king i lukim lait blong em, ale, aleluia,  
tri king i go bihainim em, aleluia, aleluia.
4. Tri king i kam long Betlehem, ale, aleluia,  
ol painim Jisas, lotuim Em, aleluia, aleluia.
5. Ol bringim insens, mir na gol ale, aleluia,  
ol on'rim King i man na God, aleluia, aleluia.
6. Nau, Jisas, ol i tenkim Yu, ale, aleluia,  
Yu kam long ol Ridima tru, aleluia, aleluia.

### **29. Olgeta hap blong graun**

1. Olgeta hap blong graun i lukim pinis  
Marimari bilong God blong yumi. (2x)
2. Singsing long God olgeta kantri  
God i soim marimari long ol pipel. (Olgeta hap...)
3. Aleluia, Aleluia.  
Aleluia, Aleluia. (2x)
4. Bikp'la lait i kamdaun tude  
Yup'la pipel kam adorim Lord. (Aleluia)

### **30. Krismas nait nau i lait**

Lida: Krismas nait nau i lait.

**Ol: Yumi go long Betlehem nau, (2x)**  
**Lukim Jisas kamdaun long graun long yumi stap hia wetim Em**  
**Aleluia, Aleluia, Aleluia.**

Lida: Yumi ol man olsem wasman lusim nau slip, mas kirap kwik.  
Yumi ol man olsem wasman lusim sipsip, go lukim krib.

**Ol: Krismas nait sta i lait. (2x)**  
**Krismas nait sta i lait, Aleluia, alleluia, alleluia.**

Lida: Yumi sing long liklik Jisas: Amamas.

**Ol: Yumi sing long liklik Jisas: Amamas.**  
**Aleluia, Aleluia, Aleluia, Aleluia.**



### 31. Ai blong mi

1. Ai blong mi i krai long Jisas i laik dai long diwai kros.  
I laik bekim ol sin blong mi. Man blong marimari tru.  
Nau mi tok: Mi laik stap gut. Mi no laik mekim sin gen.  
Jisas Gutpela Ridima, helpim mi na mekim strong mi.
2. Planti moa ol i no save long Jisas long diwai kros.  
Ol i no kamap long lait yet, ol i stap yet long tudak.  
Ai blong mi i krai long ol. Husat i ridimim ol?  
Jisas Gutpela Ridima, helpim mi na soim gut ol.
3. Planti ol i save pinis long marimari blong em.  
Ol i ranawe long Jisas. Ol i no moa laik stap gut.  
Satan i laik paulim ol. Ol laik ol i birua.  
Jisas, gutpela Ridima, bungim ol bai ol i no ken lus.

### 32. Yupela ensel, yupela kam lukim

1. Yupela ensel, yupela kam lukim  
Jisas Mesaia i dai long Golgota.  
Kam lukim han, lukim lek nil i brukim.  
Kam lukim blut i kapsait bikpela.  
  
*Jisas i dai. Em i win long sin blong yumi.  
Blut i kapsait bilong stretim ol rong.  
Mi sori tru. Mi no laik mekim sin gen.  
Gutpela Jisa, mi sori long yu.*
2. Jerusalem i no ting long Mesaia.  
Hetman i lap long ol pen bilong em.  
Ol i tok bilas long King bilong Juda.  
Em i no bekim, i pogivim ol.
3. Ples i tudak, san i hait, graun i guria.  
Ston bilong maunten i bruk; i pundaun.  
Kepten blong soldia i tok long ol Juda:  
Dispela man em i God, tru tumas.

### **33. Husat i save wari long mi?**

*Husat i save wari long mi, husat inap long helpim?*

*Husat i save wari long mi? Yu tasol Lord Jisas!*

1. Yu holim mi long han blong Yu, O yes, Lord.  
Na litimapim het blong mi, O yes, Lord.
2. Yu mekim mi i hepi tru, O yes, Lord!  
Nau mi inap long karim pen, O yes, Lord
3. Yu bringim mi long ples blong yu. O yes Lord.  
Long ples i no gat sin na pen. O yes Lord.

### **34. Lukim husat i kam klostu**

1. Lukim husat i kam klostu, taim ol man nogut i nilim  
han na lek blong Jisas Krais.
2. Mama yet i kam blong sambai, mekim sori tru long Jisas,  
karim pen nau wantaim Em.
3. Mi tu mi laik krai long Jisas, helpim karim pen nogut tru.  
Wantaim Mama bilong Em.
4. Sori, Mama, mi nau sem tru, rong blong mi tasol i kilim  
Pikinini bilong yu.
5. Mi laik mekim gut long Em gen, stretim bek ol rong mi mekim.  
Mama, yu mas helpim mi.

### **35. Kam klostu, Jisas Krais**

*Kam klostu Jisas Krais, oraitim mipela.*

*Tekewe sin blong mipela.*

1. Ol aipas i singaut bai yu kam helpim ol. Na yu kam klostu.  
Putim han antap long ol. Na ai i lait gut. Amamas i kambek gen.
2. Ol sikman i singaut bai yu kam helpim ol. Na yu kam klostu,  
Putim han antap long ol. Na sik i pinis. Amamas i kambek gen.
3. Ol sinman i singaut bai yu kam helpim ol. Na yu kam klostu,  
Putim han antap long ol. Na sin i pinis. Amamas i kambek gen.

### **36. O Yu ting long mi**

*O Yu ting long mi; Yu God bilong mi. (2x)*

1. Sori long mi, man blong sin, na helpim mi long laikim Yu,  
O God bilong mi: Yu gutpela.
2. Planti taim mi les long mekim wok blong mi; mi sori tru.  
Nau bai mi kirap gen na mekim gut.
3. Pulim ting blong mi i go long dai blong yu,  
Bai mi ken lusim rot nogut na tanim bel, kam bek gen.

### **37. O God Papa gut na strong (1)**

O God Papa gut na strong! Marimari helpim mi.  
Jisas Krai, Yu Son blong God! Marimari helpim mi.  
O God Holi Spirit! Marimari helpim mi!  
God Triwan, Yu santu tru! Marimari helpim mi.

1. Jisas! Jisas. Plenti swet i olsem blut tru i kamap long Yu, O Jisas.  
*Mi sori tru, mi sori tru, mi ting long Yu, O Jisas,  
Yu dai long santu kruse.*
2. Jisas! Jisas! Han blong Yu ol pas long pos nau.  
Ol i paitim skin blong Yu long wip.
3. Jisas! Jisas! Ol i raunim het long ropanil,  
Ol i paitim het blong Yu long stik.
4. Jisas! Jisas! Sol blong yu i pen long kruse,  
Na Yu pundaun planti taim tumas.
5. Jisas! Jisas! Han na lek i pas long nil nau,  
Yu sotwin na nek blong Yu i drai.
6. Jisas! Jisas! Yu bin dai long kisim bek mi.  
Helpim mi long tingim Yu oltaim.

### **38. Harim, God, long krai bilong mi**

*Harim, God, long krai bilong mi,  
Yu save mi no inap long Yu.  
Mi dai long Yu tru, Yu lewa blong mi.  
Harim, God, na bekim mi.*

1. Mi pilim olsem man i no gat ples blong em long slip.  
Mi askim Yu long haitim mi insait long han blong Yu.
2. Long laip blong mi, mi wari long ol samting nogut tru.  
Mi laik sindaun wantaim ol man long guttaim bilong Yu.

### **39. Long diwai kros Yu karim.**

*Long diwai kros Yu karim,  
Yu karim ol sin bilong mipela, Jisas Krai.*

1. Ol i sutim han na lek long nil na hangamapim Yu long kros, Jisas Krai.
2. Ol i mekim tok nogut tru, ol man nogut i lap long Yu, Jisas Krai.
3. “Pogivim ol lain hia Papa.” Yu pre olsem blong helpim ol, Jisas Krai.
4. “God blong mi, o God bilong mi! Long wanem Yu lusim mi olgeta,” Jisas Krai.
5. Yumi tu litimapim kruse, na karim pen na bihainim tru Jisas Krai.

### **40. Diwai Kros, gut tru na santu**

1. Diwai kros, gut tru na santu, oltaim mi laik ting long yu.  
Ol diwai long bus na gaden, ol i no inap long yu.  
*Diwai kros, gut tru na santu, oltaim mi laik ting long yu!  
Diwai kros, gut tru na santu, oltaim mi laik ting long yu!*
2. Diwai kros, gut tru na santu, Jisas Em i laikim yu.  
Em i bringim yu long maunten, Em hangap, i dai long yu.
3. Diwai kros, gut tru na santu, Jisas i mangal long yu. Diwai, yu mak bilong Jisas, Satan em i pret long yu.

#### **41. O Lord, mipela mekim rong**

1. O Lord, mipela mekim rong, mipela sori nau.  
Kam givim strong blong lusim rong, bambai mipela gut.
2. Yu paitim Satan daunim em taim em i traim Yu.  
Kam givim strong long mipela blong rausim Satan tu.
3. Stap wantaim pipel bilong Yu, na blesim ol long Len.  
Taim Ista De i laik kamap bambai ol kirap.

#### **42. O Jisas, Het bilong Yu**

1. O Jisas, Het bilong Yu ropnil i sutim tru. Ol nil i katim Yu tru.  
Yu karim planti pen.  
*O Jisas, marimari, mi sori tru long Yu.*  
*O Jisas, marimari, mi sori tru long Yu.*
2. O Jisas, het bilong Yu, mi lukim i gat blut, Ol man i spetim Yu tu.  
Ol i solapim Yu.
3. O Jisas, het bilong Yu, i luk nogut tumas. Ol man i lap long Yu tu,  
na ol i tok bilas.



**HOLI WIK**



**Pam Sande**

#### **43. Pikinini blong ol Juda**

1. Pikinini blong ol Juda, Pikinini blong ol Juda,  
Holim palmen, putim laplap litimapim nem blong Jisas,  
Pikinini bilong Devit. Hosana.
2. Jisas Kraiss, Yu King blong Israel. (2x)  
Nau mi laik kam lukim Yu hia, nau mi laik go wantaim Yu hia,  
karim kruse wantaim Yu hia. Hosana.
3. Mipela i bilip long Yu. Mipela i bilip long Yu.  
God i salim Yu blong stretim olgeta sin blong mipela.  
God i makim yu Ridima. Hosana.

#### **44. Bikpela King i Kamap**

*Bikpela King i kamap, opim ol dua nau.  
Opim ol dua i pasim yumi long heven.*

1. Pastaim ol man i tambu long kam insait hia;  
bikpela rong i pasim yumi olgeta.
2. Jisas i stretim rong blong yumi olgeta.  
Man i bilip long em inap kam insait hia.
3. Singsing na tenkim em long bikpela wok tru.  
Dai bilong em i opim dua bilong heven.

#### **45. Krai i King tru**

*Krais i King tru, Krais i win tru,  
Jisas Krais Em i Bikpela tru.*

1. Graun olgeta bilong God Papa,  
na olgeta samting i gat laip.
2. Em yet i wokim graun antap long ol wara.  
Em i wokim solwara wantaim ol ailan.
3. Yupela ol dua, yupela i mas go op nau,  
King bilong glori i laik kamap nau.
4. Dispela King bilong glori Em i husat?  
Em i Bikpela blong graun na heven.
5. Yupela ol dua, yupela i mas go op nau,  
King bilong glori i laik go insait nau.
6. Dispela King bilong glori Em i husat?  
Em i Bikpela tasol bilong oltaim oltaim.

## **Gut Fonde**

### **46. Mi Givim Nupela Lo**

1. Mi givim nupela lo long yupela. Yupela mas laikim tru ol brata.  
I olsem mi laikim yupela yet. Em tok bilong Lord.  
We stap God? Long ples ol i laikim ol, olsem ol brata,  
Long ples ol i save marimari, yu painim God. (3x)  
Mi givim nupela lo ..... Em tok b'long Lord.

### **47. Gut Fonde nait, O Jisas**

1. Gut Fonde nait, O Jisas, Yu blesim bret na wain.  
Yu tilim long Aposel, Yu tokim ol. Yu spik:
2. “Nau kisim, kaikai yupela, em bodi tru blong Mi.  
Na kisim dring long kalis, em tru i blut blong Mi.”
3. Long tok blong Yu, O Jisas, Yu tanim bret na wain.  
Long tupela Yu stap tru, tasol Yu haitim Yu.
4. Yes mi bilip, O Jisas, Yu yet Yu stap hia tru.  
Long santu bret blong alta mi laik adorim Yu.
5. O Jisas, pren na brata, kam mekim mi orait.  
Yu oltaim sori long mi na rausim rong long mi.
6. O kam long mi, O Jisas. O kam stap wantaim mi.  
Yu soim mi gutpasin, na strongim sol blong mi.
7. Long sakramen blong alta mi kisim mit na blut.  
Mi givim sol na bodi long Yu, O Jisas Krais.

### **48. Long Gut Fonde nait**

*Yu mas laikim tru brata bilong yu.*

*Yupela mas laikim tru brata bilong yu.*

1. Long Gut Fonde nait Krais i pasim taul,  
Em i wasim lek blong ol, wasim lek blong ol.
2. Saimon Pita tok: “Yu laik wasim lek?  
No ken wasim lek blong mi, wasim lek blong mi.”

3. “S’pos Mi no wasim yu, yu no inap stap, yu no inap stap long mi, inap stap long mi.”
4. “Tisa bilong mi, s’pos yu tok olsem, no ken wasim lek tasol, wasim han na het wantaim.”
5. Jisas sindaun gen, na askim ol olsem:  
Watpo mi bin wasim yu, mi bin wasim yu?
6. “Mi Bikpela tru, Tisa bilong yu.  
Nau mi wasim lek blong yu, wasim lek blong yu.”
7. “Mi g’vim nup’la lo, yupela wan wan yupela mas laikim tru, ol arapela tu.”
8. “S’pos yu laikim tru, ol arapela tu, bai ol i ken save tru, yu disaipel bilong mi.”

#### **49. Apinun long Holi Fonde**

1. Apinun long Holi Fonde i kamap Jerusalem.  
Jisas nau na ol aposel, ol i stap long haus blong ol bilong kaikai Lem blong Paska, pasin blong ol Israel bilong tingim ples blong Isip, ol i lusim bipo tru.
2. Pinis kaikai bilong Paska, Jisas nau i kisim bret.  
Na i kisim kap blong wain tu, Em i blesim na i tok:  
“Kaikai bodi hia bilong mi, dringim blut tu bilong mi.  
Tupela i holi kaikai, bilong tingim mi oltaim.”

#### **50. Yu mas laikim tru (Misa Boikin)**

*Yu mas laikim tru brata bilong yu.*

*Yupela mas laikim tru brata bilong yu.*

1. Long Gut Fonde nait Krais i pasim taul.  
Em i wasim lek blong ol, wasim lek blong ol.
2. “Mi bikpela tru, tisa bilong yu,  
nau mi wasim lek blong yu, wasim lek blong yu.”

## **Gut Fraide**

### **51. Diwai kros gutpela tru**

1. Diwai kros, gutpela tru, ol pipel i hop long yu.  
Nogat kru o lip o plaua ol i wankain olsem yu.  
Gutpela diwai, gutpela nil, gutpela bodi i stap long yu.

*Diwai kros, gut tru na santu, oltaim mi laik ting long yu.*

2. Maus blong mi i mas singaut nau, apim mak bilong yumi.  
Tokaut strong long Krai i win tru, na long prais em i givim,  
Ridima bilong yumi ofa bilong yu i win.
3. God i marimari long olmanmeri i mekim sin.  
Ol i kaikai prut blong diwai, God i tambuim long ol.  
Narapela diwai stretim rong, i kamap long Adam na Iv.
4. Wok blong sevim ol manmeri, God i plenim bipo tru.  
Em i winim trik blong Satan, na oraitim yumi tru.  
Diwai kros i stretim bek ol sin, tekewe ol samting nogut.
5. Olsem Papa marimari long ol manmeri i lus.  
Em i salim Pikinini, Maria i karim em.  
Olsem liklik bebi tru, em i kam namel long yumi.
6. Longtaim mip'la i bin wetim. Em i no kam olsem king.  
Em i redi long karim pen, na long dai blong sevim yumi.  
Ol i nilim em long diwai kros, na i kilim Lem blong God.
7. Save, strong na adoresen i mas go long God Triwan. Em i kisim  
bek mipela, long indai na kirap blong Krai. Nau, na ol lain i kam  
bihain, singaut oltaim, oltaim. Amen.

### **52. Lord blong mi**

1. Lord blong mi, ol i kalabusim Yu. (2x)  
O-o-o, mi sori tru long Yu. Jisas, Jisas, Jisas,  
Lord blong mi, ol i kalabusim Yu.
2. Lord blong mi, ol i putim Yu long kot. (2x)  
O-o-o, mi sori tru long Yu. Jisas, Jisas, Jisas.  
Lord blong mi, ol i putim Yu long kot.

3. Lord blong mi, ol i hangamapim Yu. (2x)  
O-o-o, mi sori tru long Yu. Jisas, Jisas, Jisas.  
Lord blong mi, ol i hangamapim Yu
4. Lord blong mi, ol i lap nogut long Yu. (2x)  
O-o-o, mi sori tru long Yu. Jisas, Jisas, Jisas.  
Lord blong mi, ol i lap nogut long Yu.
5. Lord blong mi, ol i kilim Yu indai. (2x)  
O-o-o, mi sori tru long Yu. Jisas, Jisas, Jisas.  
Lord blong mi, ol i kilim Yu indai.
6. Lord blong mi, ol i sutim Yu long spia. (2x)  
O-o-o, mi sori tru long Yu. Jisas, Jisas, Jisas.  
Lord blong mi, ol i sutim Yu long spia.
7. Lord blong mi, ol i planim Yu long hul. (2x)  
O-o-o, mi sori tru long Yu. Jisas, Jisas, Jisas.  
Lord blong mi, ol i planim Yu long hul.

### **53. Lukim man**

1. Lukim Man, sori long Em.  
Ol i paitim tru. Lukim man, sori long Em.
2. Lukim Man, sori long Em.  
Ol i sutim het. Lukim man, sori long Em.
3. Lukim man, sori long Em.  
Ol i lap long Em. Lukim man, sori long Em.
4. Lukim man, sori long Em.  
Ol i nilim Em. Lukim man, sori long Em.

### **54. O Jisas i dai**

O Jisas i dai. Yumi sori. O Godman. O Jisas, Ridima.  
Yumi sori, O Godman. (3x)

### **55. Yumi krai**

Yumi krai, Jisas i dai. Yumi krai,  
Ridima i dai, yumi krai, yumi krai,  
Godman i dai, yumi krai (x3)

## 56. O pipel bilong Mi

- L: O pipel bilong Mi, pren bilong Mi!  
Wanem rong Mi mekim long yu, mekim long yu?  
Kaman, kaman, kaman, bekim tok blong Mi!
- Ol: O pipel bilong Mi, pren bilong Mi!**  
**Wanem rong Mi mekim long yu, mekim long yu?**  
**Kaman, kaman, kaman, bekim tok blong Mi!**
- L: Mi lusim yu long han bilong ol Isip,  
na daunim ol birua blong yu long Ret Si.  
Na yu, na yu, na yu, yu bringim Mi long kot.
- Ol: O pipel bilong Mi, pren bilong Mi!**  
**Wanem rong Mi mekim long yu, mekim long yu?**  
**Kaman, kaman, kaman, bekim tok blong Mi!**
- L: Mi givim mana long yu long taim yu hangre,  
na Mi givim wara long yu long ples i drai tumas.  
Na yu, na yu, na yu, yu paitim pes blong Mi.
- Ol: O pipel bilong Mi, pren bilong Mi!**  
**Wanem rong Mi mekim long yu, mekim long yu?**  
**Kaman, kaman, kaman, bekim tok blong Mi!**
- L: Mi mekim yu i nambawan blong olgeta ples.  
Mi mekim yu i king i bosim ol ples. Na yu, na yu,  
na yu, nilim Mi long kruse.
- Ol: O pipel bilong Mi, pren bilong Mi!**  
**Wanem rong Mi mekim long yu, mekim long yu?**  
**Kaman, kaman, kaman, bekim tok blong Mi!**



ISTA



## 57. Em i orait gen

1. Em i orait gen. Jisas Krai i stap laip gen.  
I kirap gen long ol man i dai, Em Jisas i orait. (2x)
2. Em i orait gen. Yumi tu yumi orait.  
Em i win long dai na bambai yumi win tu long dai. (2x)
3. Em i orait gen. I go pas. Yumi bihain.  
I go pas long ples antap na bambai yumi kirap tu. (2x)

## **58. Jisas i kirap tude**

1. Jisas i kirap tude, i win long dai, Em i Man na God.  
Long diwai kros ol i lukim i dai, na ol i tingting i no ken orait.  
Tasol i win, i kirap gen long hul. Ona long Jisas, Aleluia.
2. Husat i no amamas? Bambai yumi kirap tu long dai.  
Jisas i dai, kirap gen long hul, bambai mekim yumi kirap tu.  
Jisas i win, i go pas long yumi. Ona long Jisas, Aleluia.
3. Husat i laik win long dai? Yu mas bilip tru long Jisas Krai!  
Jisas i dai bilong stretim ol rong. Em i kirap tu long bringim niu laip.  
Em i win i go pas long yumi. Ona long Jisas, Aleluia.

## **59. Jisas Ridima i kirap**

1. Jisas Ridima i kirap long hul blong graun na i orait.  
Yumi olgeta amamas long Jisas Krai i win long dai.  
Aleluia. Aleluia. I opim heven gen long yumi.
2. I win long Satan na long dai. I mekim yumi orait tru.  
Yumi olgeta amamas long Jisas Krai i win long dai.  
Aleluia. Aleluia. I opim heven gen long yumi.
3. Ol manmeri bilong bilip, yumi ken tenkim Jisas God.  
Yumi olgeta amamas long Jisas Krai i win long dai.  
Aleluia. Aleluia. I opim heven gen long yumi.

## **60. Jisas i kirap gen**

1. Jisas i kirap gen!  
Nau yumi amamas tasol. Long Jisas Godman i orait.  
I win long dai long strong blong em. I stretim rong na yumi ken sing: Aleluia, aleluia!
2. Jisas i kirap gen!  
Nau dai i lusim strong blong em. Ridima blong yumi i win.  
I winim birua blong ol man. I kisim laip na yumi ken sing: Aleluia, aleluia!
3. Jisas i kirap gen!  
Yumi bihainim Jisas God, bai ples blong yumi ken orait.  
Na yumi kamap brata tru wantaim long Krai, na yumi ken sing: Aleluia, aleluia!

## **61. Yumi singsing nau long Jisas**

1. Yumi singsing nau long Jisas. Yumi amamas long em.  
Em i win long dai blong bodi, i kirap long hul blong graun.  
Yumi singsing long Ridima. Jisas Godman em i kirap.  
Aleluia i kirap. I kirap. Jisas Godman i kirap.
2. Jisas Em i win long Satan. Em i win oltaim long sin.  
Na i opim dua blong heven long yumi i stap wetim.  
Yumi singsing long Ridima. Jisas Krais nau em i kirap.  
Aleluia i kirap. I kirap. Jisas Godman i kirap.

## **62. Aleluia, mipela i singsing**

*Aleluia, aleluia, aleluia.*

1. Mipela singsing long Yu, Lord Jisas,  
Yu nambawan i bin kirap long dai.
2. Mipela amamas yu win long dai.  
Pen na dai i no moa daunim yu.
3. Mipela i save yu Bikipela  
Strongim bilip bilong ol i stap hia.
4. Mipela i wetim kambek blong yu.  
Bai glori blong yu i kamap ples klia.

## **63. Maria Mama, yu no krai**

1. Maria Mama, yu no krai, aleluia!  
Nau Jisas i kirap long dai, aleluia!  
Nau pes na klos blong Em i lait, aleluia!  
Ol pen i pinis i orait, aleluia!  
Aleluia, aleluia, aleluia!
2. Maria Mama, amamas, aleluia!  
Son bilong yu Em i go pas. Aleluia!  
I win long dai i Godman tru, aleluia!  
Nau Em i stap gut wantaim yu, aleluia!  
Aleluia, aleluia, aleluia!

3. Maria, Mama, nau yu sing, aleluia.  
Son bilong yu i God na King. Aleluia!  
Ol man i singsing wantaim yu, aleluia!  
Ol i adorim Jisas tu, aleluia!  
Aleluia, aleluia, aleluia!

#### **64. Pipel blong God, kalap na sing**

1. Pipel blong God, kalap na sing! Sing aleluia!  
Long Jisas Em i God na King, Aleluia, nau singsing aleluia!
2. Tru, Jisas Em i dai bipo. Sing aleluia!  
Tasol i dai blong opim dua. Aleluia, nau singsing aleluia!
3. I brukim ston, i lusim hul, Sing aleluia!  
Bai yu bilip long Em tasol. Aleluia, nau singsing aleluia!
4. Pes bilong Em na bodi tu, Sing aleluia!  
I nais tumas, i gutp'la tru. Aleluia, nau singsing aleluia!
5. Ol sua blong bros, na lek na han, Sing aleluia!  
I lait tumas, olsem biksan. Aleluia, nau singsing aleluia!
6. God Son i putim ol bilas, Sing aleluia!  
Nau Em i King, bik King tumas. Aleluia, nau singsing aleluia!

#### **65. Jisas i kirap**

1. Jisas i kirap, Em i no moa stap long hul.  
Em i kisim laip i wokabaut long graun.  
Long diwai kros ol i lukim Em i dai.  
Ol i ting i pinis nau.  
*Tasol Em i win, i kirap gen long hul.*  
*Tasol Em i win, i kirap gen long dai.*
2. Jisas i bin dai bilong stretim rong blong mi.  
Em i lusim laip i dai long nem blong mi.  
Mi tingim dai na mi tingim kirap tu.  
Em i laikim mi tumas.
3. Man i laik stap gut, i ken painim em oltaim,  
Em i no longwe i stap klostu tasol.  
Wande bihain bai i kamap ples klia gen.  
Bilong bungim pren blong Em.

## **66. Jisas Krai i kirap gen**

1. Jisas Krai i kirap gen. Aleluia.  
Em i tok bai i kirap. Aleluia.  
Tok blong em i stret oltaim. Aleluia.  
Em i Godman tru i stap bipo yet. Aleluia.
2. Yumi sing long Em tude. Aleluia.  
Em i winim pen na dai. Aleluia.  
Em i winim birua. Aleluia.  
Jisas nau i stap wantaim yumi. Aleluia.
3. Kam bihainim tok blong em. Aleluia.  
Tok blong em i stret oltaim. Aleluia.  
Man i b'lip i no ken dai. Aleluia.  
Jisas bai i kirapim em long las de. Aleluia.

## **67. Aleluia, bikpela pait i kamap bipo**

*Aleluia, Aleluia, Aleluia.*

1. Bikpela pait i kamap bipo, Satan i winim Adam long en.  
Na God i tok: Yu mas lus bihain Aleluia.
2. Bikpela pen pen i painim yumi. Dai tu i daunim olgeta man.  
Ol man i wetim promis bilong God. Aleluia.
3. Krai i kam winim dispela pait. Em i win tru long pen wantaim dai.  
Em i kirap long matmat tude. Aleluia.

## **68. Kwin bilong heven, yu amamas long Son**

Kwin bilong heven, Kwin bilong heven,  
yu amamas long Son blong yu i kirap gen.  
Jisas, yu karim na i bin dai tru,  
nau Em i lusim hul na i kirap. Aleluia. Aleluia.  
Em i kirap olsem i tok. Em i kirap olsem i tok.  
Aleluia. Aleluia. Aleluia.  
Pre long mipela, Mama. Pre long mipela, Mama.  
Aleluia. Aleluia. Aleluia.

## **69. Kam bung wantaim**

1. Kam bung wantaim na sing long Krai na bikpela wok i bin mekim nau.  
I dai blong soim laik bilong Em. Tasol i kirap tru.  
Jisas i kirap long dai. Aleluia. Aleluia. Aleluia.
2. Kam bung na tingim wok blong Krai I winim nupela laip long yumi.  
Long dai blong Em i kamapim laip long ol i stap long graun.  
Jisas i pren blong yumi. Aleluia. Aleluia. Aleluia.
3. Kam na tenkim Krai long wok I winim ol wok bilong man bipo.  
I stretim rong naheven i op. Na yumi pren blong God.  
Na yumi kamap brata tru. Aleluia. Aleluia. Aleluia.

## **70. San i brukim moning**

1. San i brukim moning, nait i pinis nau.  
Taim ol meri painim Jisas Krai long hul.
2. Ol i kam long matmat, tingim ston i stap.  
Tasol i go pinis. Ensel nau i tok:
3. Krai i no moa stap hia long ol man i dai.  
Em i kirap pinis, olsem i bin tok.
4. Yupela i go kwik, tokim ol long Em.  
Jisas em i God tru, Em i winim dai.
5. Yumi harim stori bai yumi bilip.  
Yumi amamas nau, Jisas i win tru.

## **71. Hipurei long Lord**

1. Ol bilipmanmeri yumi amamas singsing hipurei long Lord,  
Em i gutpela, Em i stap wantaim yumi. Son blong Em, Jisas,  
i bin dai long kros, na tasol i kirap gen.  
Em i winim sin na dai na bai yumi olsem Em.  
Yumi amamas. Singsing hipurei long Lord.  
Em i gutpela. Em i stap wantaim yumi.
2. O Jisas Ridima na King, i tru sampela taim  
mipela i les long bihainim rot blong Yu.  
Yu sori long mipela ol man bilong sin, na yu helpim mipela,

Bai mipela i ken strong long bihainim Yu oltaim:  
Yumi amamas. Singsing hipurei long Lord.  
Em i gutpela, Em i strong bilong yumi.

3. Givim ona long Papa, na tu long Son bilong Em,  
na Holi Spirit givim Em wankain ona.  
I olsem bipo na olsem nau na oltaim bikpela ona long God.  
I olsem bipo na olsem nau na oltaim.  
Yumi amamas. Singsing hipurei long Lord.  
Em i gutpela, Em i stap wantaim yumi.

## **72. Mi kirap pinis**

*Mi kirap pinis. Mi kirap pinis.*

*Na nau Mi stap oltaim, na nau Mi stap oltaim wantaim yu.*

*Aleluia, Aleluia, Aleluia*

1. Yu putim han, yu putim han blong yu long mi,  
blong yu long mi, Aleluia. Aleluia. Aleluia.
2. Singsing long Lord, singsing long Lord, singaut long  
Em, singaut long Em. Aleluia. Aleluia. Aleluia.
3. Telimautim Gutnius, telimautim Gutnius long ol pipel, long ol pipel.  
Aleluia. Aleluia. Aleluia.

## **73. Aleluia, Krais i kirap**

*Aleluia, aleluia. aleluia, Krais i kirap*

1. Jisas dai long kruse long Jerusalem  
long de namba tri Em i kirap egen.
2. Ol aposel wari tru na ol i go lukim matmat,  
tasol Krais i no stap moa.
3. Angelo blong heven em i tok i spik: Jisas i kirap gen,  
bai yu lukim Em.

## 74. Taim angelo i rausim ston

*Taim angelo i rausim ston,  
taim angelo i rausim ston,  
san i kirap nau tasol na graun i guria strong tumas  
taim angelo i rausim ston.*

1. Nau ol meri i kam klostu, ol i lukim angelo.  
Em i givim gutnius: Krai Em i laip i stap.
2. Ol aposel i go lukim. Hul i no gat daiman moa.  
Tok i go, i go nau: Krai Em i laip i stap.
3. Na long nait ol i stap hait tru, Jisas yet i kam insait.  
Nau bilip i strong moa: Krai Em i laip i stap.



ASENSEN



## 75. Jisas i go antap tude

1. Jisas i go antap tude na klaut i haitim em long yumi.  
*Yumi olgeta amamas long Jisas, Godman i go pas.  
Aleluia. Aleluia. Jisas Krai i redim ples bilong yumi.*
2. Krai i nau King i stap antap, wantaim long papa bilong em.
3. Krai bai i kambek wanpela de blong mekim kot long ol i bin stap.

## 76. Jisas i win tru

1. Jisas i win tru. I win long wok blong Papa bilong em.  
*Jisas i Lord. Jisas i King. I King nau na oltaim.  
Aleluia. Aleluia.*
2. Jisas i win tru. I win long pen na dai na i kirap.
3. Jisas i win tru. I go antap long klaut long ples bilong em.

## 77. Ensel bilong heven opim dua

1. Ensel bilong heven opim dua i stap.  
Lukim King na Bikpela i laik kamap.  
Husat King na Bikpela i laik kamap?  
Jisas Kraais, Ridima, Em i go antap.

*Aleluia, aleluia, aleluia.*

2. Tru, Maria karim Em long Betlehem.  
Em i dai long kruse long Jerusalem.  
Em i tekewe ol sin bilong yumi.  
Jisas Kraais Ridima, Em i go antap.
3. Kraais i win long Satan, Em i kirap tru,  
Em i stap long heven; i wetim yu,  
Nau ol ensel na ol santu bung na sing:  
Jisas Kraais, Ridima, Em i go antap.



## PENTEKOS



## 78. Yu kam daun long mipela

1. Yu kam daun long mipela olgeta.  
Holi Spirit kam na givim laip.  
Yu soim mipela long rot i stret na tru,  
bai mipela inap wokabaut wantaim yu.
2. Yu kam daun long mipela olgeta.  
Holi Spirit kam na laitim paia.  
Kirapim mipela long wok bung wantaim yu,  
bai sindaun hia long graun i moa naispela tru.
3. Yu kam daun long mipela olgeta.  
Holi Spirit, kam na givim laip.  
Helpim mipela lusim pasin bilong graun;  
marimari long ol i nogut tumas.
4. Ona oltaim i go long God Papa  
na long Jisas Kraais i Son blong Em,  
wankain ona i go long Yu, Holi Spirit.  
Tripela i stap nau na oltaim, oltaim tru. Amen.

## **79. Kam God Spirit bilong laip**

1. Kam, God Spirit bilong laip. Kam long mi, mi wetim Yu.  
Mi laik amamas long Yu. Mi laik amamas long Yu.  
Kam long mi, mi wetim Yu. Yu God Spirit bilong laip.
2. Kam God Spirit bilong laip. Kam long mi, mi wetim Yu.  
Givim save tru long mi. Givim save tru long mi.  
Kam long mi, mi wetim Yu. Yu God Spirit bilong laip.
3. Kam God Spirit bilong laip. Kam long mi, mi wetim Yu.  
Mekim mi kamap holi tru. Mekim mi kamap holi tru.  
Kam long mi, mi wetim Yu. Yu God Spirit bilong laip.

## **80. Yu kam, God Spirit**

1. Yu kam, God Spirit bilong laip. Yu Spirit tru blong God antap.  
Yu bringim laip blong God i kam, na ol i kamap nupela gen.  
Yu Spirit i save bringim laip.
2. Yu kam, God Spirit bilong laip. Yu Spirit tru blong God antap.  
Yu soim ol long rot i go antap long Papa bilong ol.  
Yu Spirit i save bringim laip.
3. Yu kam, God Spirit bilong laip. Yu Spirit tru blong God antap.  
Yu strongim ol manmeri blong yu, na ol i ken bihainim yu.  
Yu Spirit i save bringim laip.

## **81. Kam Holi Spirit**

1. Kam Holi Spirit, kam daun long mipela.  
Yu givim laip long ol samting blong graun.  
Kam Holi Spirit, yu laip blong mipela.

*Kam long mi. Pulapim mi, na mi ken stap gut.*

*Kam, kam, pulapim mi, na mi bilong yu nau, blong yu tasol.*

2. Mipela stap hia na mipela wari.  
Mipela singaut long helpim blong yu.  
Kam Holi Spirit yu strongim mipela.
3. Kam Holi Spirit yu presen blong Jisas.  
Em i bin salim blong kliaim ol tok.  
Kam Holi Spirit, yu kam bringim save.

## **82. Yu, Holi Spirit, kam long mi**

1. Yu, Holi Spirit, kam long mi; mi askim yu kam nau.  
Kam givim lait long save gut, bai rot i klia long mi.
2. Yu, Holi Spirit, kam long mi; mi askim yu kam nau.  
Kam stiaim spirit bilong mi, bai mi inap stap gut.
3. Yu, Holi Spirit, kam long mi; mi askim yu kam nau.  
Kam laitim paia, winim strong. Bai mi no givap gen.
4. Yu, Holi Spirit, kam long mi; mi askim yu kam nau.  
Kam wokabaut wantaim long mi, bai mi no lusim rot.
5. Yu, Holi Spirit, kam long mi; mi askim yu kam nau.  
Kam blesim pipel i bung hia, bai ol i sindaun gut.

## **83. God Spirit**

1. God Spirit, Yu God i tru, Yu God, Yu God i tru.
2. God Spirit, Yu Strong blong God, Yu Strong, Yu Strong blong God.
3. God Spirit, Yu laik blong God, Yu laik, Yu laik blong God.
4. God Spirit, mi krai long Yu, mi krai, singaut long Yu.
5. God Spirit, mi wetim Yu, mi wetim, wetim Yu.
6. God Spirit, mi laikim Yu, mi laikim, laikim Yu.
7. God Spirit, mi tenkim Yu, mi tenkim,tenkimYu.

## **84. Kam nau, Holi Spirit**

1. Kam nau Holi Spirit, kam long mi, mi laikim Yu.  
Stap long mi olgeta. Yu tasol yu gut na tru,  
helpim mi, mi hop long Yu. Kam na stap olgeta!
2. Kam nau Holi Spirit, kam long mi, mi laikim yu.  
Stap long mi olgeta. Yu tasol ken givim strong,  
Yu ken tekewe ol rong. Kam na stap olgeta!
3. Kam nau, Holi Spirit, kam long mi, mi laikim Yu.  
Stap long mi olgeta. Kam long mi, mi wetim Yu,  
Mekim mi i haus blong Yu. Kam na stap olgeta!

## **85. Lord, taim yu stap long graun**

*Lord, taim Yu stap long graun Yu spik:*

*Bai Mi salim Spirit blong mi.*

*Em bambai i ken helpim tru*

*husat ol man i bilip long Yu.*

1. Yu go bek gen long God Papa na Yu stap wantaim Em.  
Salim Holi Spirit blong yu.  
Em bringim bek ol ting long skul na toktok blong Yu.  
Salim Holi Spirit blong Yu.
2. Em i kam i stap insait ol man i bilip long Yu.  
Salim Holi Spirit blong yu.  
Bambai mipela olgeta i stap brata blong Yu.  
Salim Holi Spirit blong Yu.
3. Mi laik soim ol manmeri nau: mi hepi tumas.  
Salim Holi Spirit blong Yu.  
Mipela olgeta i stap pikinini blong God.  
Salim Holi Spirit blong Yu.

## **86. Kam, Spirit**

1. Kam Spirit, Laik blong God, mi singautim Yu:  
(Aleluia, Aleluia, Aleluia, Aleluia)  
Kam long mi, helpim mi, bai mi stap gut tru.  
(Aleluia, Aleluia, Aleluia, Aleluia)
2. Kam Spirit, Strong blong God, mi singautim Yu:  
(Aleluia, Aleluia, Aleluia, Aleluia)  
Mekim mi strong, tekewe rong, bai mi no lusim Yu.  
(Aleluia, Aleluia, Aleluia, Aleluia)
3. Kam, Spirit, Lait blong God, mi singautim Yu:  
(Aleluia, Aleluia, Aleluia, Aleluia)  
Givim mi lait, mekim orait, bai mi save tru.  
(Aleluia, Aleluia, Aleluia, Aleluia)

## **87. Kamdaun nau, Holi Spirit**

1. Kamdaun nau, Holi Spirit, kamdaun long mi, mi wetim Yu.  
Kam helpim mi long strong blong Yu,  
bambai mi mekim gut long Yu.
2. Yu soim ol gut pasin tru long man blong graun i laikim Yu.  
Yu was long tok na haus blong God em oltaim gut na tru i stap.
3. Yu God tru, Holi Spirit, nau na bihain mi laikim Yu.  
Yu wantaim Papa wantaim Son, Yu oltaim stap, O God Triwan.

## **88. Spirit bilong God**

*Spirit bilong God Em i stap insait long mi.*

1. Spirit Em i strongim mi bilong mekim wok blong God.
2. Spirit Em i skruim tok bilong God long maus blong mi.
3. Spirit Em i helpim milong stap gut long laik blong God.

## **89. Long wanpela Spirit**

*Long wanpela Spirit yumi olgeta i kamap wanbel,  
i kamap wanbel.*

1. God Holi Spirit Em i wok insait long ol kristenman,  
long ol kristenman.
2. Long wanpela Spirit man inap long tok:  
Krais i Bikpela, Krais i Bikpela.
3. Long wanpela Spirit, God i save givim wanpela baptais,  
wanpela baptais.
4. Long wanpela Spirit yumi ken i stap wan bodi tasol,  
wan bodi tasol.
5. Nek blong Holi Spirit insait long yumi em i spik:  
“God Papa,” em i spik: “God Papa.”

## **90. Kam, o Holi Spirit, kam, mi wetim Yu**

*Kam, O Holi Spirit, kam, mi wetim Yu.*

1. Mi singaut long Yu, mi singaut long Yu.
2. Mi laik ting long Yu, (2x)
3. Mi laik sing long Yu, (2x)
4. Mi adorim Yu, (2x)
5. Mi laik tenkim Yu. (2x)
6. Yu laik helpim mi, (2x)
7. Yu laik strongim mi, (2x)
8. Yu laik kam long mi. (2x)

## **91. Kam, o Holi Spirit, kam strongim ol**

*Kam, o Holi Spirit, kam strongim ol,  
bai ol mekim gut wok blong ol, wok blong ol.*

1. Man i gat save blong helpim man,  
em mas mekim tru helpim ol, helpim ol.
2. Man i gat planti blong tilim ol,  
em mas givim tru laik wantaim, laik wantaim.
3. Man i gat save blong wok tisa, em mas mekim tru wok tisa,  
wok tisa.
4. Man i gat save blong autim tok,  
em mas autim tru tok blong God, tok blong God.
5. Man i autim tingting blong ol man,  
em mas autim tingting blong ol tru, blong ol tru.
6. Man i holim stret tru ol wok btong em,  
em mas holim tru long laik blong em, laik blong em.

## **92. Holi Spirit, Yu God tru (Misa Maiwara 2)**

1. Holi Spirit, Yu God tru, mipela adorm Yu.  
Yu stap wantaim God Papa na wantaim long Son blong Em.
2. Yu bin givim laip long man, taim Yu mekim graun.  
Yu lukautim ol i stap. Yu laik ol i sindaun gut.
3. Krais i salim Yu i kam, long ol man i gat bilip,  
Bai Yu kliaim tok long ol, bai Yu strongim bel blong ol.
4. Holi Spirit kam daun nau long mipela i bung hia.  
Givim lait na strong blong Yu, bai mipela i wanbel.

## **93. Kam God Spirit bilong laip**

*Kam God Spirit bilong laip.*

*Kam long mi, mi wetim tru Yu.*

1. Givim mi long save tru, givim mi long save tru.  
Kam long mi, mi wetim Yu. Yu Spirit bilong laip.
2. Strongim mi long gutpasin, strongim mi long gutpasin.  
Kam long mi, mi wetim Yu. Yu Spirit bilong laip.
3. Mekim mi kamap santu, mekim mi kamap santu.  
Kam long mi, mi wetim Yu. Yu Spirit bilong laip.



**GOD NA TRINITY**



## **94. Papa, mi bilip long yu.**

1. Papa, mi bilip long Yu. Yu stap klostu mi oltaim.  
Yu was gut long laip blong mi. Mi laik holim han blong yu.  
Mi laik stap wantaim long yu. Papa, harim pre blong mi.
2. Jisas mi bilip long Yu. Yu stap klostu mi oltaim.  
Yu was gut long laip blong mi. Mi laik holim han blong Yu.  
Mi laik stap wantaim long yu. Jisas, harim pre blong mi.
3. Spirit, mi bilip long yu. Yu stap klostu mi oltaim.  
Yu was gut long laip blong mi. Mi laik holim han blong Yu.  
Mi laik stap wantaim long Yu. Spirit, harim pre blong mi.

## **95. God, Yu strongpela tumas**

1. God, Yu strongpela tumas. Yu tasol kamapim ol samting.  
Yu bin wokim heven na graun, ol manmeri na olgeta ensel.

*Yu tasol i bin wokim ol. Yu tasol Yu strongpela.*

2. God, Yu holi, God Yu stret. Yu tasol gutpela olgeta.  
Na ol tok blong Yu i tru. Yu wanpela i tru oltaim.  
Yu tasol i stret oltaim. Yu tasol Yu holi tru.
3. God, Yu gutpela tumas. Yu sori long olgeta manmeri.  
Yu laik ol i kam long Yu. Yu laik ol i amamas.  
Yu sori tru oltaim long ol. Yu tasol Yu gutpela.

## **96. God Yu Santu, God Yu tru**

1. God Yu santu, God Yu tru, Yu Bikmasta strong olgeta!  
Ol blong graun na heven tu, ol i lotu, ol i beten.  
Kingdom, nem na wok blong Yu em stap oltaim, oltaim tru.
2. Kerubim na Serapim, ol aposel, ol profeta,  
Plenti martir, virgo tu, na ol angelo olgeta,  
Ol i stap long ai blong Yu, oltaim ol i sing long Yu.
3. Heven, san na mun na sta, klaut na si, ol bus, ol maunten,  
Hia long graun ol ples, ol man, plenti, plenti, huset kaunim?  
Ol blong Yu, blong Yu tasol, Yu lukaut, Yu was long ol.

## **97. Papa bilong mipela, Yu yet wokim ol samting**

*Papa bilong mipela, Yu stap long heven,  
na Yu stap long graun, long olgeta ples.*

1. Yu yet wokim ol samting: san, mun na star antap,  
Ol maunten long graun, na solwara tu.
2. Papa, Yu givim laip long mi, bai mi stap olsem Yu,  
na wantaim long Yu, nau na oltaim tu.
3. Papa, mipela amamas. Mipela tenkim Yu.  
Yu gutpela tru, Yu nambawan tru.

## **98. Yumi bung hia na singsing**

1. Yumi bung hia na singsing long Holu Trinitu.  
Tripela i stap oltaim, Tripela wankain tru.

*God i Triwan i antap, Em i wokim ol i stap,  
God i wan: Papa, Son, Holu Spirit, God Triwan.*

2. Yumi singsing long God Papa, i wokim heven na graun.  
Ol samting Em i wokim i gutpela tasol.
3. Yumi singsing long Jisas, i helpim ol i lus.  
I harim tok long Papa na dai long diwai kros.
3. Yumi singsing long Spirit, Jisas i salim Em.  
Blong helpim yumi stap gut na kamap long heven.

## **99. Yu Tripela i stap wankain**

1. Yu Tripela i stap wankain. Yu Tripela i God oltaim.  
Yu Tripela i antap tru. Mipela laik adorim Yu.
2. Yu Tripela i gutpela. Yu Tripela i wokim graun.  
Yu Tripela i givim laip. Mipela i laik tenkim Yu.
3. Yu Tripela i laikim man. Oltaim yu sori tru long em.  
Yu laik bai em i stap oltaim. Mipela amamas long yu.

## **100. Long dispela Pestode**

1. Long dispela Pestode yumi singsing, yumi pre.  
Yumi amamas long God. Em i gutpela tumas.
2. Long dispela Pestode yumi tingim Trinitu.  
Papa, Son, na Spirit tu, i stap oltaim, pastaim tru.
3. Long dispela Pestode yumi tenkim Tripela  
long ol presen nau i stap, na long laip bilong antap.

## **101. O Papa God (O Lord, my God)**

1. O Papa God, taim mi gat planti tingting  
long olgeta samting Yu yet wokim.  
Mi lukim sta, mi harim klaut i pairap,  
olgeta samting i soim strong blong Yu.

*Mi litimapim biknem bilong Yu. Yu yet Yu God, Yu Bikpela.  
Yu nambawan. Yu antap olgeta. YuWanpela. Yu Bikpela.*

2. Taim mi tingting, God i no pasim Jisas.  
Em i kam daun, i dai long helpim mi.  
Long diwai kros blut bilong Em i kapsait.  
Bel bilong mi i kirap nogut tru.
3. Taim Krai i kam, na singaut long ol Kristen,  
Na kisim mi i go long ples heven.  
Mi brukim skru, na givim biknem long Em:  
Tokaut long Em: O God, Yu nambawan.

### **102. God Papa, God Papa, bikpela tru**

1. God Papa, God Papa, bikpela tru.  
Mipela olgeta laik on'rim Yu, laik on'rim Yu.  
God Papa, God Papa, bikpela tru.
2. Krai Jisas, Krai Jisas. Ridima tru.  
Mipela olgeta laik tenkim Yu, laik tenkim Yu.  
Krai Jisas, Krai Jisas, Ridima tru.
3. God Spirit, God Spirit, God Spirit.  
O kamdaun, O kamdaun mi askim Yu, mi askim Yu.  
God Spirit, God Spirit. God Spirit.

### **103. Ona long God**

1. Ona long God i stap antap. Singsing na tenkim na onaim God.  
Em i lukautim na laikim yumi.
2. Ona long Jisas, Son bilong em. Singsing na tenkim na onaim God.  
Em i lukautim na laikim yumi.
3. Ona long Holi Spirit oltaim. Singsing na tenkim na onaim God.  
Em i lukautim na laikim yumi.

### **104. God i gutpela**

1. God i gutpela (3x) gutpela long mi. Mmmmmm.
2. Em i laikim mi (3x) gutpela long mi. Mmmmmm.

3. Na mi laikim em (3x) gutpela long mi. Mmmmmm.
4. Olsem mi stap fri (3x) gutpela long mi. Mmmmmm.
5. Krais i laikim mi (3x) gutpela long mi. Mmmmmm.
6. Spirit Spirit nau Yu kam (3x) gutpela long mi. Mmmmmm.

### **105. God i wokim mi**

1. God i wokim mi. God i wokim yu (2x)  
*Olgeta man i mas tenkim Em. (4x)*
2. God i helpim mi, God i helpim yu. (2x).
3. God i laikim mi, God i laikim yu. (2x).
4. God i blesim mi, God i blesim yu. (2x).



### **HOLI YUKARIS**



### **106. Jisas yu tok: Mi bret blong laip**

1. Jisas yu tok: Mi bret blong laip. Yu laik mipela i laikim Yu.  
Yu laik stap wantaim mipela na mekim mipela holi tru.
2. Jisas yu stap long hostia. Yu stap tru namel long mipela.  
Mipela laik adorim Yu. Mipela bilip oltaim long Yu.

### **107. Yumi adorim Jisas hia**

1. Yumi adorim Jisas hia. Em i stap long hostia.  
Yumi ken lukim bret tasol Jisas i stap long en.  
Em i wetim yumi long san na nait, i laik mekim yumi orait,  
Bambai yumi wantaim long em, yumi stap wanbel tru.
2. Jisas, yu gutpela tumas, yu stap long hostia.  
Mipela i kamap long yu. Yu blesim mipela.  
Yu strongim hop blong mipela bai mipela i ken painim yu.  
Long taim yu kam bek gen, na bungim lain blong yu.

3. Jisas, yu laikim mipela, ol pipel bilong yu.  
Yu givim yu long mipela, bambai mipela wantaim yu.  
Yu kam oltaim long mipela. Yu strongim laik bilong mipela.  
Bambai mipela wantaim Yu inap mekim wok bilong Yu.

### **108. Mi ting long yu, o Jisas**

1. Mi ting long yu, o Jisas, gutpela pren blong mi.  
Oltaim mi laik bilipim marimari blong Yu.  
Yu sori, Yu bihainim ol sipsip i bin lus.  
Yu man bilong marimari. Tru mi bilip long Yu.
2. Mi wet long Yu, o Jisas, gutpela pren blong mi.  
Oltaim yu laik pogivim mi. Yu baim sin blong mi.  
Mi sik nogut. Mi kranki. Mi ranawe long Yu.  
Yu man bilong marimari. Mi wet oltaim long Yu.
3. Mi laikim Yu, o Jisas, gutpela pren blong mi.  
Yu ting long mi bipo tru, taim mi no kamap yet.  
Yu mekim mi. Yu givim ol samting tu long mi.  
Yu man bilong marimari. Mi laikim Yu oltaim.

### **109. Lord Jisas, mi bilip yu stap**

1. Lord Jisas, mi bilip Yu stap long dispela Holi Sakramen.  
Mi laik Yu stap wantaim mi. Jisas Yu strongim mi na helpim mi.
2. Mi lukim marimari bilong Yu long dispela Holi Sakramen.  
Mi hepi tru Yu tingim mi oltaim. Mi adorim Yu, Jisas, Lord blong mi
3. Lord Jisas Krais, mi tenkim Yu. Mi mekim rong, tasol Yu laikim mi.  
Mi givim mi, Jisas, Yu holim mi. Yu no ken lusim mi, Jisas Krais.

### **110. Yumi laik adorim Jisas (1) (*Tantum ergo*)**

1. Yumi laik adorim Jisas i stap namel long yumi.  
Sakramen blong Em i stap hia bilong makim laik blong em.  
Bilip tasol i skulim yumi, Jisas Krais i stap hia tru.
2. Singsing ona long God Papa na long Jisas Son blong em.  
Wankain ona i mas go nau long God Spirit, God Triwan.  
Tripela i strong olgeta. Tripela i holi tru. Amen.

### **111. Yumi laik adorim Jisas (2) (*Tantum ergo*)**

1. Yumi laik adorim Jisas, em i stap hia long alta.  
Sakramen blong Em stap oltaim, bipo yet i no kamap.  
Nau bilip i skulim yumi, i hait tasol Em i stap.
2. Long God Papa na long Son tu, yumi givim ona nau.  
Na God Spiritu i Santu, yumi tu adorim Em.  
Em kamap long Son na Papa, wankain i ona long Em. Amen.

### **112. O Jisas God, o Jisas Man**

1. O Jisas God, o Jisas Man, Yu stap hia tru.  
Mipela laik adorim Yu na tenkim Yu.  
*Jisas Yu God, Yu givim laip, Bret blong heven.  
Mipela laik adorim Yu long hostia.*
2. Long Sakramen blong Bret na Wain Yu stap hia tru.  
Yu kaikai bilong strongim pipel bilong Yu.
3. Mipela amamas long Yu, Yu sori tru.  
Yu stap hia wantaim mipela ol lain blong Yu.

### **113. Kam long mi**

1. Kam long mi, mi laikim yu kam nau, mi bret blong laip, kam kisim mi.  
Sapos yu laik, orait yu kam nau.  
*Husat man i laik i kam, em i ken kam.*
2. Yu no ting yu rabis nating. Mi tokim yu, yu kam long mi.  
Mi tingim yu long taim bipo yet.
3. Brata kam, yumi stap wantaim. Yumi bung na wok wantaim.  
Bringim guttaim na bel isi.
4. Tenkyu Lord, mi kam long Yu nau. Mi hepi tru, Yu laikim mi.  
Mi pre olgeta i ken save.

### **114. Sol blong Ridima**

1. Sol blong Ridima, mekim holi mi.  
Bodi blong Jisas, givim laip long mi.

Blut blong Yu Jisas, mekim mi strong tru.  
Wasim mi long wara, long hapsait blong Yu.

2. Dai blong Yu, Jisas, i ken helpim mi.  
Gutpela Jisas, harim pre blong mi.  
Haitim mi oltaim long ol sua blong Yu.  
Bai mi no ken hambak, ranawe long Yu.
3. Long taim bilong traim, Jisas Yu sambai.  
Stap klostu, Jisas, taim i kam mi dai.  
Bambai long heven mi ken bungim Yu.  
Na wantaim ol santu mi ken tenkim Yu.

### **115. O Bret blong laip**

1. O Bret blong laip, o kap blong amamas.  
Yu haitim Krais tasol i stap hia tru.  
Holi, holi, holi.  
Nau yumi singaut strong wantaim: Holi.  
*Oltaim, oltaim Yu stap tru, tasol Yu man tu.  
Mipela bilip, hop na laikim Yu.*

2. O pren blong mi, yu dai blong helpim mi.  
Yu kirap tu, Yu Bikpela blong laip.  
Holi, holi, holi,  
Yu bin dai na kirap tru. Holi.
3. O pren blong mi. Mi amamas long Yu.  
Mi laik stap gut. Mi laik Yu helpim mi.  
Holi, holi, holi,  
Yu gutpela pren blong mi, Holi.

### **116. Jisas Em i sindaun**

1. Jisas Em i sindaun wantaim olgeta man, Em i sori tru long ol.  
Jisas Em i sindaun wantaim olgeta man, Em i sori tru i spik:
2. Ol i rabisman tru, ol i ken amamas, heven em i ples blong ol. (2x)
3. Ol i bagarap tru ol i ken amamas, bambai ol i hepi gen. (2x)
4. Ol i liklik man tru ol i ken amamas, ol i king long ai blong God. (2x)

5. Ol i sori long man ol i ken amamas, God i sori tu long ol. (2x)
6. Ol blong pasin i klin ol i ken amamas, bambai ol i lukim God. (2x)
7. Ol i man blong sekan ol i ken amamas, ol i brata tru blong Mi. (2x)
8. Yu bihainim Mi tru bai yu ken amamas, bambai yu stap wantaim Mi. (2x)

### **117. Jisas, Jisas, kam long mi.**

1. Jisas, Jisas, kam long mi. Marimari, helpim mi.  
Oltaim mi singaut long Yu. Mi laik stap nau wantaim Yu.
2. Jisas lusim rong blong mi. Mekim mi bihainim Yu.  
Helpim mi long laikim Yu. Kam, Jisas, stap wantaim mi.
3. Jisas, Jisas, was long mi. Mi laik stap wantaim long Yu.  
Was gut long ol brata bilong mi. Blesim ol manmeri blong Yu.

### **118 . Nau mi laik adorim Yu**

1. Nau mi laik adorim Yu, Jisas, Son blong God.  
Yu God tru na man wantaim.  
Yu stap narakain. Yu stap hia long bret na wain, Brata tru blong mi.  
Bel blong mi i laikim Yu, na Yu laikim mi.
2. Taim mi lukim bret na wain, mi no lukim Yu.  
Tok tasol blong Yu, o Lord, em i skulim mi.  
Ol samting Yu tok bipo, em i tru tumas.  
Nogat narapela tok, em i win long en.
3. Yu bin dai long diwai kros. Mi no lukim Yu.  
Nau Yu stap long Holi Bret. Mi no lukim Yu.  
Tasol mi bilipim tok. Tupela i tru.  
Na mi askim Yu, o Lord: strongim b'lip blong mi.
4. Tomas lukim sua blong Yu, na i bilip strong.  
Em i nildaun na singaut: Yu Lord God blong mi.  
Helpim mi bilip long Yu. Helpim mi long hop.  
Bai mi strong long laikim Yu, nau na oltaim.

## 119. Nau mi kisim Jisas Krai

*Nau mi kisim Jisas Krai na mi amamas long Em. (2x)*

1. Tok blong Jisas em i hia: Mi tasol Mi bret blong laip.  
Man i kisim mit blong Mi, em i kisim laip i stap.
2. Em i tok: Mi rot blong yu. Yu bihainim Mi oltaim,  
bai yu painim ples blong yu, bai yu go long heven tru.
3. Em i spik: Mi tru oltaim, Mi no save giaman tu.  
Yu bilipim tok blong Mi, bai yu hepi tru oltaim.
4. Em i tok, Mi laip i stap: Man i kisim laip blong Mi  
em i no ken moa indai, em i stap long Mi oltaim.

## 120. Singaut strong

*Singaut strong, bambai ol i kam*

*raun long alta wantaim Jisas Krai.*

*Em i kaikai, Em i dring, Em i mekim yumi sing:*

*Alelu, alelu, alelu, aleluia.*

1. Yumi bratasusa nau, brata bilong Jisas Krai.  
Krai i stap wantaim yumi, bai yumi wanbel tru.
2. Laip i no ken pinis moa, Krai i win na Em i stap.  
Yumi stap nau wantaim Em, kisim laip blong oltaim.
3. Nambawan mandato nau: Yu mas laikim tru ol man.  
Em i pasin bilong Krai, yumi mas bihainim.
4. Jisas Krai i Bikpela, wankain namba olsem God.  
Em i daunim Em yet tru, Em i dai long kruse.
5. Yumi laik bihainim Em, yumi mas dai wantaim Em,  
daunim bikhet pasin tru, rausim ol pekato.
6. Wok blong yumi em olsem: bringim wan wan man long bung  
wantaim Papa, wantaim Son, wantaim Holi Spirit.
7. Yumi bung nau wantaim Krai, kaikai bret na dring long kap,  
yumi autim tok i tru: Krai bambai i kam bek.

## 121. Sol bilong Jisas

1. Sol bilong Jisas, Yu laip blong mi.  
Bodi blong Jisas Yu strong blong mi.
2. Blut blong Jisas, Yu wasim mi.  
Wara blong sait, Yu klinim mi.
3. Pen bilong Jisas, Yu helpim mi.  
Gutpela Jisas, plis harim mi.
4. Long taim blong traim sambai long mi.  
Long taim blong dai Yu kisim mi.
5. Wantaim ol santu yu bungim mi.  
Mi laik stap oltaim wantaim Yu.

## 122. Yu Lord, o Yu Lord

*Yu Lord, o Yu Lord, o Yu ting long mi.  
O Yu Lord, o Yu Lord, o Yu ting long mi.  
Yu Lord, o Yu Lord, o Yu ting long mi.  
Yumi pre oltaim long Lord.*

1. Yumi gat wanpela ples em i stap long heven.  
O yumi gat wanpela ples em i stap long heven.  
Yumi gat wanpela ples em i stap long heven.  
Yumi pre oltaim long Lord.
2. Jisas Em i God Man, Em i Ridima.  
O Jisas Em i God Man, Em i Ridima.  
Jisas Em i God Man, Em i Ridima.  
Yumi pre oltaim long Lord.
3. Kaikai tru blong yumi, yumi kisim hia.  
O kaikai tru blong yumi, yumi kisim hia.  
Kaikai tru blong yumi, yumi kisim hia.  
Yumi pre oltaim long Lord.
4. Yumi kam long harim tok na bilip long en.  
O yumi kam long harim tok na bilip long en.  
Yumi kam long harim tok na bilip long en.  
Yumi pre oltaim long Lord.

## **123. Yumi bung wantaim long Jisas**

*Yumi bung wantaim long Jisas,  
Nau yumi amamas wantaim Em.*

1. Long Gut Fonde Jisas i bin kisim bret.  
Em i tok: Em hia nau, Bodi bilong Mi.
2. Em hia Blut blong Mi nau, wain i stap long kap.  
Em i blong bilip tru, ai i no inap.
3. Jisas, Yu laik mekim long dispela bret  
mipela wan bodi, Yu tasol Yu het.
4. God Holi Spirit, mipela laik bung  
wantaim tru long Yu na Papa wantaim Son.

## **124. Maus blong mi i singsing**

1. Maus blong mi i singsing amamas long Bodi na Blut bilong Jisas.  
Krais i givim olsem presen taim i wokabaut long graun.  
Nau dispela kaikai givim laip long ol manmeri blong graun.
2. God i salim em, na i kamap man long wanpela holi virgo.  
Em i kam blong mekim orait ol manmeri i bin lus.  
Taim i stap namel long ol yet, Em i kamapim presen hia.
3. Long Gut Fonde Jisas i sindaun wantaim ol Aposel bilong Em.  
Ol i tingim lo blong Paska, God i givim long ol Juda.  
Long dispela taim i givim Em yet i kaikai bilong ol.
4. Jisas i kisim bret long han blong Em, na i tok i Bodi bilong Em.  
Em i no moa bret blong bodi. Nau i kaikai tru blong sol.  
Ai blong yu i no 'nap lukim. Bilip i soim yu long Em.
5. Brata kam, yumi adorim Em long dispela Holi Sakramen.  
Na ol pasin blong bipotaim, i mas klia long pes blong Em.  
B'lip i givim strong blong painim, Jisas Godman i hait i stap.
6. Singsing ona long God Papa, na long Pikinini bilong Em.  
Litimapim nem blong ol nau. Givim glori singsing tru.  
Wankain ona yumi givim long Holi Spirit, God Triwan. Amen.

## **125. O Jisas hia long hostia**

1. O Jisas hia long hostia mi laik adorim Yu.  
Mi lotu long Yu, mi tenkim Yu, Jisas. Yu dai blong oraitim mi. Mi pre long Yu, Jisas, mi pre long Yu, o Jisas, mi daunim het blong mi. Mi mekim planti sin, mi mekim planti sin.  
Jisas oraitim mi, o Jisas.
2. O Jisas, God na Lord blong mi, Yu stap long mak bilong bret.  
Yu kam long graun, Yu stretim ol rong na mipela i orait.  
Mi tenkim Yu, Jisas, mi tenkim Yu o Jisas, long ofa bilong Yu.  
Yu dai antap long kruse, Yu dai antap long kruse.  
Jisas, oraitim mi, o Jisas.
3. O Jisas gutpela pren blong mi, Yu stap tru long hostia.  
Mi no lukim yu long ai bilong mi, bilip tasol soim Yu.  
Yu helpim mi, Jisas. Yu strongim mi, o Jisas. Sambai oltaim long mi.  
Na mi inap long stap gut, na mi inap long stap gut.  
Jisas, Yu helpim mi, o Jisas.

## **126. Jisas i wasman blong mi**

*Jisas Yu wasman blong mi,  
mi no sot long samting long banis blong Yu.*

1. Gutpela kaikai oltaim mi save kisim hia  
na malolo mi painim long wari bilong graun.
2. Em soim mi long rot tru, Yu stiaim laip blong mi.  
Samtaim mi stap long tudak, tasol mi no ken pret.
3. Long taim nogut stap klostu. Yu holim han blong mi.  
Yu bringim mi long Papa bai mi ken amamas.

## **127. Man i kaikai bodi blong Mi**

1. “Man i kaikai bodi blong Mi, bodi blong Mi,  
na i dringim blut blong Mi, yes blut bilong Mi,  
i stap long mi, Mi stap long em.” Lord Jisas i tok olsem.
2. “Papa yet i bin salim Mi, i bin salim Mi.  
Mi lusim heven na Mi kamdaun, na Mi kamdaun.  
Man i bilip long Mi, em kisim laip, i kisim laip bilong oltaim.”

3. Lord, mipela bilip long Yu, bilip long Yu,  
na i laik stap wantaim Yu, stap wantaim Yu,  
go wantaim Yu long Papa tru, go wantaim Yu long Papa tru.

### **128. Jisas, mi bilip long Yu**

1. Jisas, mi bilip long Yu, long Sakramento Yu haitim Yu.  
Olgeta ensel i kolim Yu King;  
mi man blong graun mi laik beten, mi sing.  
Mi laik adorim Yu, Godman tru. Jisas God Son, mi bilip long Yu.
2. Jisas God, mi hop long Yu. Olgeta tok blong Yu stret na tru.  
Yu givim grasia plenti long ol. Yu marimari,  
Yu rausim ol rong. "Mi go long heven," em tok blong Yu,  
Jisas God Son, nau mi hop long Yu.
3. Jisas Jisas gut, mi laikim Yu, Yu laikim mi oltaim strong na tru.  
Yu lusim heven, kamdaun hia long graun.  
Long Sakramento Yu strongim ol man.  
Mi givim bodi na sol long Yu. Jisas God Son, mi mas laikim Yu.

### **129. Hia long alta**

1. Hia long alta, long hostia, Yu tru i stap. Yu Lem blong God,  
Yu ofa bilong mipela.

*Ave Jisas, God na man tru, Kraus Jisas.  
Mi laikim Yu, O Jisas tru, mi laikim Yu.*

2. Long Sakramen blong bret na wain, Yu manna tru.  
Yu kaikai bilong mipela ol Kristenman.
3. Mipela i adorim Yu, Yu Godman tru.  
Yu stap hia wantaim mipela i lain blong Yu.

### **130. O Jisas, God, Yu stap long hostia**

1. O Jisas God. Yu stap long hostia.  
Yu Godman tru long holi Yukaris.

*Holi, holi, holi. God, Yu oltaim holi.  
Jisas nau mi lotuim Yu, lotuim Yu, O Godman tru.*

2. Mi kam long Yu, O God, lukdaun long mi.  
Yu helpim mi, Yu givim grasia.

### **131. Man i kaikai mit blong mi (Misa Maiwara 3)**

1. Man i kaikai mit blong Mi, na i dring long blut blong Mi,  
Em i stap insait long Mi. Em i stap insait long Mi.
2. Man i kaikai mit blong Mi, na i dring long blut blong Mi,  
Mi laik stap insait long em. (2x)
3. Man i kaikai mit blong Mi, na i dring long blut blong Mi,  
Em i brata tru blong mi. (2x)
4. Man i kaikai mit blong Mi, na i dring long blut blong Mi,  
i mas helpim tru ol man. (2x)
5. Man i kaikai mit blong Mi, na i dring long blut blong Mi,  
Em i gat laip blong oltaim. (2x)

### **132. Jisas mi bilip tru oltaim (Misa Pur)**

1. Jisas, mi bilip tru oltaim, Yu stap hia long bret na wain.  
Yu laikim tru mipela na Yu givim mipela long sakramen,  
sakrifais na kaikai bilong mipela nau.
2. Tenkim Jisas Lord, Em i marimari oltaim long yumi,  
long dispela Sakramen. Jisas, helpim mipela long laikim Yu,  
na soim marimari bilong Yu long ol man.
3. Givim oltaim bikpela ona, i golong God Papa,  
na tu long Son bilong Em. Givim wankain ona long Holi Spirit,  
God Triwan. Mipela lotu long Yu, oltaim.

### **133. Jisas mi bilip (Misa Sumatin)**

1. Jisas mi bilip: Yu stap tru oltaim long dispela Holi Sakramen.
2. Mi laik kam long Yu, bai mi ken stap gut.  
Kam nau Jisas insait bel blong mi.
3. Blesim mi oltaim. Blesim tu ol pren. Blesim papamama, tisa tu.
4. Givim bel isi. Tekewe ol pret, bai mipela amamas oltaim,  
bai mipela amamas oltaim.

### **134. Yumi kisim bret (Misa Kalibobo)**

*Yumi kisim bret na kaikai Bodi bilong Jisas.*

*Olsem na yumi olgeta kisim Laip bilong oltaim.*

1. Taim ol pipel i wokabaut long ples i no gat man,  
ol i pret bai ol i dai. Ol i krai long God long bret na dring.  
Mana i kamdaun long graun na wara i kamap long ston.
2. Taim ol pipel i sindaun Jisas lukim ol i stap hangre.  
Em i kisim sampela bret. Em i tenkim God na i tilim ol.  
Nau ol pipel ol i save: Jisas em i Bret blong Laip.

### **135. Yumi kaikai nau (Misa Peligo)**

1. Yumi kaikai nau long Bodi bilong Jisas, Son blong God.
2. Kros i pinis, no gat pait moa, yumi bratasusa tru.
3. God Yu helpim, mi laik stap gut, blong mi yet mi no inap.
4. Marimari long mipela, givim sekan bilong Yu.
5. Mi laik mekim gut long ol man, olsem Jisas skulim mi.

### **136. Ridima Jisas Krai (Misa O God bilong graun)**

Ridima Jisas Krai, bipo Yu tok long ol:

“Mit tru blong Mi na bodi i mekim gut long ol.”

Kam nau long mi, o Jisas, kam mekim mi gut tru.

Na bringim mi bihain taim long ples blong heven tu.



**SANTU HAT**



### **137. Hat blong Jisas, mak bilong sori**

1. Hat blong Jisas, mak bilong sori, Piksa tru blong laik bilong Krai.  
Taim ol soldia i bin sutim, wara wantaim blut i kamap.  
Tupela i soim yumi: Sios blong Jisas nau i kamap.
2. Wara blong Baptais i makim yumi nupela pipel blong God.  
Yumi kamap brata na susa: laip blong Krai i stap long yumi.  
Laip blong Krai i kirapim yumi. Yumi skruim wok bilong em.

3. Blut blong Jisas yumi nau lukim i ken strongim ol pipel blong God.  
Kam na dringim blut bilong Jisas, kam na strongim laip bilong yu.  
Kam na dringim blut bilong Jisas bai yumi ken i stap wanlain tru.

### **138. Jisas, Hat blong Yu i santu.**

1. Jisas, Hat blong Yu i santu. Em i gut na tru tasol.  
Blut blong Em i lus long kruse, Em i wasim rong blong ol.  
Blut blong Em i lus long kruse, Em i wasim rong blong ol.
2. Spia blong soldia em i sutim, em i opim Hat blong Yu.  
Olsem taim blong traim na trabel mi ken hait long Hat blong Yu.  
Olsem taim blong traim na trabelmi ken hait long Hat blong Yu.
3. Jisas, God blong mi, Ridima, hat blong mi, mi givim Yu. Mekim  
em gut tru na santu, olsem santu Hat blong Yu. Mekim em gut tru  
na santu olsem santu Hat blong Yu.

### **139. Long dai bilong Yu, o gut Jisas**

1. Long dai bilong Yu, o gut Jisas, yu tekewe sin bilong mi.  
Yu bringim mi bek gen long Papa. Mi no inap tenkim Yu tru.  
*O Santu Hat blong Jisas, Yu gupela pren blong mi. (2x)*
2. Long kruse mi lukim Yu Jisas. Mi lukim ol sua blong Yu.  
Yu karim ol rong blong mi Jisas, mi tenkim Yu nau na oltaim.
3. Long wara long hat blong Yu Jisas, Yu wasim mi na mi stap klin.  
Long blut blong Yu i bin kapsait, Yu strongim mi na mi orait.

### **140. Jisas Godman, mi bilip tru**

*Jisas Godman, mi bilip tru long yu, Yu pren blong mi.*

1. Bipo yu kam long graun  
na sori bilong God i kamap ples i klia, long ai blong man.
2. Yu skulim rabisman.  
Yu strongim ol i pas long sik, i pilim pen, i nogat pren.
3. Yu dai long diwai kros  
long nem blong ol i mekim sin, bai ol i sem na kam bek gen.

4. Long Santu Hat blong yu,  
mipela lukim laik blong yu i bikpela, i gutpela.

### **141. Hat blong Jisas, Hat blong laik tru**

1. Hat blong Jisas, Hat blong laik tru, mipela kam lukim Yu.  
Helpim mipela long laikim bratasusa olsem Yu.
2. Hat blong Jisas, Hat blong sori. Long ol man Yu brata tru.  
Skulim mipela long sori, karim hevi olsem Yu.
3. Hat blong Jisas, Hat bel isi. Yu oltaim pogivim sin.  
Strongim mipela long lusim ol i rongim mipela.
4. Hat blong Jisas, Hat i op tru, long ol man i nidim pren.  
Opim hat blong ol i stap hia, ol i sori olsem Yu.

### **142. Mi blong Yu tru**

1. Mi blong Yu tru, Yu laikim mi olgeta.  
Yu tingim mi long dai na kirap blong Yu.  
Yu raitim nem blong mi long Hat blong Yu.  
Em mak oltaim mi oltaim bilong Yu.  
Yu raitim nem blong mi long Hat blong Yu.  
Em mak oltaim, mi oltaim bilong Yu.
2. Mi sori tru, samting mi givim baksait.  
Mi go longwe. Mi no moa tingting long Yu.  
Tude mi kam. Yu lukim mi kirap.  
Mi bilong Yu, O Jisas tru antap.  
Tude mi kam. Yu lukim mi kirap.  
Mi bilong Yu, O Jisas tru antap.
3. Lukaut long mi. Lukaut tu ol brata,  
Sipsip blong Yu i lus long rot i longwe.  
Yu kisim ol i raun na paul nabaut,  
Na mipela i bung gen wantaim yu.  
Yu kisim ol i raun na paul nabaut,  
Na mipela i bung gen wantaim yu.

### 143. Yu mekim gut, O Jisas

1. Yu mekim gut, O Jisas, long de Yu dai for ol.  
Yu pe for ol pekato, Yu lusim rong blong ol.

*O santu Hat blong Jisas, Yu gut tumas long ol. (2x)*

2. Hat santu gut olgeta blong Yu Ridima tru.  
Long kruse ol i opim long spia i sap nogut.



### KRAIS I KING



### 144. Jisas Ridima

1. Jisas Ridima bilong mi. O ples antap i bilong Yu.  
Ol samting daun i soim mi ol strong bilong Yu, Jisas.

*Jisas Yu King blong heven na graun tu.*

*Mi laik bihainim ol lo bilong Yu.*

*Nau na oltaim inap mi dai.*

2. Mi bilong Yu, o Jisas King. Mi laik bihainim Yu tasol,  
Mi laikim tru bai kingdom blong Yu i kamap strong olgeta.
3. Bel bilong mi i hepi tru. Mi laikim Yu, o Jisas Krais.  
Na mi laik autim amamas long olgeta manmeri.

### 145. Yumi sing long King bilong yumi

1. Yumi sing long King bilong yumi. Yumi amamas long em.  
I nogat king i winim Jisas. Em i bikpela long ol.

*Yumi ting oltaim long Em. Yumi no ken lusim Em.*

2. Wantaim ol ensel, wantaim ol santu, yumi amamas long Krais.  
Em i bin dai tru, tasol i kirap. Em i King tru bilong laip.
3. Papa i makim Jisas i King tru, King blong heven, King blong graun.  
Krais bai i bosim olgeta pipel, ol i dai na ol i stap.

### **146. Kraiſ yu Bſkſela**

1. Mipela bung hia blong ſingaut long Wanpela i gut tru.  
I luſim laiſ long mipela na em i dai long kruse.

*Kraiſ yu Bſkſela, King blong mipela,  
Kraiſ Yu taſol, Yu Riſima.*

2. Long dai blong Em i mekim dai ol ſin i daunim yumi.  
Na yumi no ken pret long dai, bikos i opim heven.
3. Yu kirap gen long hul blong graun. Yu go paſ long mipela.  
Long hauſ blong Papa i gat rum. Yu ſtretim long mipela.

### **147. Ol man, ol meri ſingſing amamaſ**

1. Ol man, ol meri ſingſing amamaſ; (2x)  
long Jiſaſ i King. Em i King tru bilong oltaim.
2. Ol man, ol meri ſingſing amamaſ; (2x)  
long King blong yumi. Bſkſela nem givim long Em.
3. Singſing, ſingſing “Hoſana” long King; (2x)  
I kam long Papa. Paitim kundu, na amamaſ.
4. Bſknem, bſknem givim long Jiſaſ; (2x)  
long en, Em i King. God Papa yet mekim i King.
5. O King, O King. hoſana long Yu; (2x)  
mipela blong Yu. Bai mipela no luſim Yu.
6. O King, O King, Yu gutpela tru; (2x)  
long mipela man. Mipela amamaſ long Yu.
7. Ol man, ol meri ſingſing amamaſ; (2x) long King blong yumi.  
Tokim ol pleſ long Nem blong Em.

### **148. Kraiſ i King tru (*lukim namba 45*)**



## SANTU MARIA



### 149. Maria Santu

1. Maria Santu, i no gat rong long yu.  
Yu nambawan long ol meri long graun.  
Spirit i stap long yu. Em i bilasim yu.  
Yu kamap Kwin bilong heven na graun.

*Maria Mama, yu laikim mipela.*

*Harim mipela i singaut long yu. (2x)*

2. Maria Santu, strongpela meri tru.  
Satan i no inap mekim yu pundaun.  
Ensel i tokim yu: God i stap wantaim yu.  
Yu pre na mipela inap stap gut.

### 150. Ave Kwin Maria

1. Ave Kwin Maria, helpim mi oltaim.  
Virgo klin na Mama, helpim mi oltaim.  
Maria helpim mi long Jisas long askim bilong yu.
2. Yu no pundaun long sin, helpim mi oltaim.  
Mama bilong Jisas, helpim mi oltaim.  
Maria helpim mi long Jisas long askim bilong yu.
3. Mama blong mipela, helpim mi oltaim.  
Yu pulap long sori, helpim mi oltaim.  
Maria helpim mi long Jisas long askim bilong yu.

### 151. Ensel blong heven tokim Maria

1. Ensel blong heven tokim Maria:  
Yu yet yu karim Em, Jisas Ridima.

*Ave Maria, Ave Maria, Ave Maria,*

*Ave Maria Maria,*

*Ave Maria, Ave Maria.*

2. Ensel blong heven tokim Maria:  
Mi wokmeri blong God, Em i Bikpela tru.  
Mi harim tok blong em. Mi orait long tok blong em.

3. Ensel blong heven tokim Maria:  
Heven i op antap, na Tok blong God i man.  
Em i kam daun blong stap tru namel long yumi.
4. Ensel blong heven tokim Maria:  
God harim Maria i pre long mipela. Mipela i laik stap gut,  
olsem Mama bilong Jisas.

### **152. Mi laikim Maria**

1. Mi laikim Maria tude na oltaim.  
Long taim mi stap hepi, long taim bilong krai.  
Maria yu helpim mi long pre bilong yu,  
Bambai mi stap gut tru, O Mama blong God.
2. Jisas i bin tokaut: Yu mama blong Mi.  
Yu harim Em oltaim, na yu was gut long mi.  
Yu Mama blong Jisas, yu Mama blong mi.  
Long taim bilong traim lukaut gut long mi.
3. O Mama yu was gut long laip bilong mi.  
Yu stiaim ol tingting, ol pasin blong mi.  
Yu sambai long taim blong dai, yu no lusim mi.  
Bambai mi ken go stap oltaim wantaim yu.

### **153. Maria, yu Mama**

1. Maria, yu Mama, mi laikim yu tru.  
Yu oltaim lukautim, yu helpim mi tu.  
Mi kolim yu Mama, mi tingting long yu.  
Tude olsem oltaim mi singsing long yu.
2. Maria, yu Mama, yu karim God Son.  
Yu stap nau long heven, yu gut tru, yu strong.  
O Kwin marimari, lukdaun nau long mi.  
O gupela Mama yu beten long mi.
3. Maria, yu Mama, yu Virgo na Kwin.  
Yu santu olgeta, yu gut na yu klin.  
Ol santu blong heven, ol angelo tu,  
Manmeri blong graun hia, ol onarim yu.

### **154. Kwin blong heven**

1. Kwin blong heven, Maria, helpim mipela long pre.  
Sapos traim i kamap, givim strong long mipela.

*Yu gut tru, yu nais tru, yu go pas, Maria. (2x)*

2. Jisas yet i givim yu strong blong helpim mipela.  
Yu stap klostu nau long Em, Pikinini bilong God.
3. Jisas yet i makim yu: Kwin blong heven, Kwin blong graun.  
Yu ken helpim mipela, pikinini bilong yu.

### **155. Ave Maria**

1. Ave Maria, Lord i stap wantaim long yu.  
Yu karim Jisas Kraiss, Em Son tru bilong God.
2. Mama Maria, pre long mipela oltaim,  
bambai long taim blong dai mipela i orait.
3. Ave Maria, Lord i stap wantaim long yu.  
Yu karim Jisas Kraiss, Em Son tru bilong God.

### **156. Yu Kwin blong heven**

1. Yu Kwin blong heven, Yu Mama gut,  
Yu was long mipela i stap long graun.  
Mi laik singaut oltaim long yu,  
Yu rausim samting nogut long mi.

*Mama blong God, Mama blong mi,  
kam helpim mi na was gut long mi.*

2. Mi ting long yu, mi laikim yu.  
Mi laik stap oltaim wantaim yu.  
Long taim blong traim, long taim blong dai,  
Maria yu mas sambai long mi.
3. Yu Mama blong Kraiss. Yu Mama blong Sios.  
Lukim mipela i kam nau long yu.  
Long taim Kraiss i dai, Em i makim yu  
bambai yu lukautim mipela.

## 157. O Virgo klin

1. O virgo klin, Maria Kwin,  
yu Kwin blong heven, Kwin blong graun.  
Mi laikim yu, yu tingim mi.  
Yu Virgo Mama tru blong God. (2x)
2. O virgo tru, mi askim yu,  
harim ol pipel i singaut long yu.  
Was gut long ol na helpim ol.  
I laik bihainim yu tasol. (2x)
3. O virgo strong, mi mekim rong,  
kam helpim mi bambai mi ken stap gut.  
Sambai long mi long taim blong dai,  
na bringim mi long ples blong God, (2x)

## 158. Litani bilong Santu Maria

|                                      |                          |
|--------------------------------------|--------------------------|
| O God Papa long heven,               | Yu marimari long mipela. |
| God Son, Ridima blong graun,         | Yu marimari long mipela. |
| O God Holi Spirit,                   | Yu marimari long mipela. |
| God Triwan Holi, Holi,               | Yu marimari long mipela. |
| O Maria, mi onaim yu. (x2)           |                          |
| Maria, yu Mama blong God tru.        | Maria mi onaim yu        |
| Maria, yu Mama blong Jisas.          | Maria mi onaim yu        |
| Maria, yu Mama i Santu.              | Maria mi onaim yu        |
| Maria, yu Mama i gut tru.            | Maria mi onaim yu        |
| O Maria, mi singsing long yu. (2x)   |                          |
| Maria, yu Virgo oltaim.              | Maria mi onaim yu        |
| Yu Virgo i strong olgeta.            | Maria mi onaim yu        |
| Yu Virgo i stret olgeta.             | Maria mi onaim yu        |
| Maria yu Virgo na Mama,              | Maria mi onaim yu        |
| O Maria, mi pre oltaim long yu. (2x) |                          |
| Yu Mama blong marimari.              | Maria mi onaim yu        |
| Yu help bilong olgeta sikmanmeri     | Maria mi onaim yu        |
| Yu strong bilong ol i gat wari.      | Maria mi onaim yu        |
| Yu hop bilong ol i mas dai nau.      | Maria mi onaim yu        |

O Maria, mi singaut long yu.(2x)

Yu Kwin bilong olgeta ensel.

Yu Kwin bilong olgeta profet.

Yu Kwin bilong ol aposel.

Yu Kwin bilong olgeta martir.

Maria mi onaim yu

Maria mi onaim yu

Maria mi onaim yu

Maria mi onaim yu

O Maria, mi krai nau long yu. (2x)

Yu Kwin bilong marimari,

Yu Mama blong lain bilong Jisas.

Yu Virgo i paitim ol Satan.

Yu meri i daunim pekato.

O Maria, mi laikim yu tru. (2x)

Yu Kwin bilong santu korona.

Yu Kwin bilong gutpela taim tru.

Yu Kwin sin i no win long yu.

Yu Kwin i stap nau long heven.

Maria mi onaim yu

Maria mi onaim yu

Maria mi onaim yu

Maria mi onaim yu

Maria mi onaim yu

Maria mi onaim yu

Maria mi onaim yu

Maria mi onaim yu

### **159. O Mama, yu karim Jisas i King**

1. O Mama, yu karim Jisas i King. Aleluia. Aleluia, o Maria.

Bel bilong mi i on'rim King. Aleluia.

Yu karim Jisas King. Aleluia. Aleluia, o Maria.

2. O Mama, yu karim Jisas i King. Aleluia. Aleluia, o Maria.

Maus bilong mi singsing long King. Aleluia.

Yu karim Jisas King. Aleluia. Aleluia, o Maria.

3. O Mama yu karim Jisas i King. Aleluia. Aleluia, o Maria.

Wok bilong mi , mi givim King. Aleluia.

Yu karim Jisas King. Aleluia. Aleluia, o Maria.

4. O Mama yu karim Jisas i King. Aleluia. Aleluia, o Maria.

Bel bilong mi i on'rim King. Aleluia.

Yu karim Jisas King. Aleluia. Aleluia, o Maria.

### **160. Maria, yu amamas**

*Maria, yu amamas, God i stap wantaim yu. (2x)*

Ensel i tok olsem long Maria.

God i onarim yu moa long ol meri.

Na i litimapim nem bilong Jisas Krai,  
Pikinini bilong yu.

Santu Maria, Mama bilong God,  
helpim mipela ol manmeri bilong sin,  
nau na taim mipela i dai.

### **161. Bel bilong yumi onarim nem**

*Bel bilong yumi onarim nem, nem blong Bikpela, Bikpela.  
Nem blong Bikpela, Bikpela.*

1. Spirit bilong mi amamas long God helpim bilong mi, bilong mi, helpim bilong mi, bilong mi.
2. Mi samting nating, samting nating, wokmeri blong God, bilong God, wokmeri blong God, bilong God.
3. Nau na bihain tu manmeri bai i kolim mi gutpela, bai i kolim mi gutpela.
4. God i strong tumas i bin mekim samting tru long mi, samting tru. Bikipla samting tru, samting tru.
5. God i marimari long ol i stap aninit long Em, aninit long em, aninit, aninit long Em, aninit.
6. God i pulapim ol i hangre long pasin i stret, pasin stret, long pasin i stret, pasin stret.

### **162. Sol bilong mi i givim bikpela ona (*Magnificat*)**

1. Sol bilong mi i givim bikpela ona long Lord, bel blong mi i hepi tru long God i Ridima blong mi.
2. Em i lukdaun long wokmeri bilong Em, nau na oltaim olgeta man i givim biknem long mi.
3. God antap i mekim gut long mi, Em i marimari long ol i pret long Em.
4. Em i soim strong blong han blong Em, na daunim ol man i bikheth long Em.

5. Em i daunim ol man i strongpela,  
na putim antap ol man i stap daunbilo tru.
6. Em i givim ol gutpela samting long ol man i hangre,  
Em i rausim ol man i gat plenti samting.
7. Em i was gut long ol man blong Israel,  
olsem Em i promisim Abraham na lain bilong em.
8. Ona long Papa na long Son na long Spiritu Santu,  
olsem taim bipo na nau na oltaim. Amen.

### **163. Maria gut Mama (*Lourdes*)**

1. Maria gut Mama mi tingting long yu.  
Yu nambawan meri mi singsing long yu.  
*Ave, ave, ave Maria. (2x)*
2. Mi kolim yu Mama wantaim long Jisas.  
Yu oltaim lukautim, yu helpim mi tu.
3. Maria gut Mama mi laikim yu tru.  
Yu stap nau long heven, yu tingting long mi.
4. O Kwin bilong heven, lukdaun nau long mi.  
O gutpela Mama yu no lusim mi.

### **164. Harim mi, Maria**

1. Harim mi, Maria, nau mi askim yu, was long sol na bodi,  
mi laik givim yu. Blesim papa, mama, bratasusa tu.  
Lainim ol long beten, mekim ol stap gut.  
Ol bihain long heven lukim pes blong yu.
2. Lukim mi, Maria, harim mi egen,  
blesim papa santu givim strong long em.  
Blesim tu ol bisop, pris na tisa tu.  
Lainim ol long beten, mekim ol stap gut.  
Ol bihain long heven lukim pes blong yu.

4. Blesim tu, Maria, pren na birua tu, man blong graun olgeta,  
ol mas laikim yu. Mekim nau na oltaim, ol i harim yu.  
Lainim ol long beten, mekim ol stap gut.  
Ol bihain long heven lukim pes blong yu.

### **165. Maria Virgo tru**

1. Maria Virgo tru, mi oltaim sing long yu, long yu, Maria.  
Lukdaun, lukdaun long mi, yu oltaim helpim mi. Yu Mama santu.
2. God Em i laikim yu, i amamas long yu, long yu, Maria.  
Yu karim Son blong Em, yu was lukaut long Em. O Mama santu.
3. Ol man i hop long yu, ol i singaut long yu, long yu, Maria. Ol i  
laik lukim yu na Jisas, Son blong yu, long ples blong heven.

### **166. O Maria, yu Mama bilong God**

O Maria, yu Mama bilong God, yu mama bilong mi.  
Yu harim mi singaut long yu. (2x)

Maria holi-i, yu harim pre blong mi. (2x)

Yu no ken pasim yau long pre blong mi.  
Mama bilong mi-i, Maria Imakulata.

### **167. Mama o-o, Mama Maria**

Mama o-o, Mama Maria. Soim mi rot, rot i go-o long heven. (2x)

Mi i ye-t i olsem aipas man, mi painim rot, rot i go-o long Papa. (2x)

*O Mama, long aiwara blong yu tasol. (2x)*

*I olsem dispela sta, i save kamap klostu long moning.*

### **168. Ave Rosa Mistika**

Ave Rosa Mistika, yu kam bungim mipela.

Yu kam bungim mipela, Rosa-a-a wan famili (2x)

Bihain bai mi go long heven, mi gat famili i stap.

Bai mi wari long wanem samting. Mama em i stap (2x)

### **169. Mama bilong Jisas**

**(Lukim n. 318)**

## **170. Santu Mama bilong Jisas (Misa Peligo wantaim kundu)**

1. Santu Mama bilong Jisas, mi singaut nau tu long yu.
2. Bringim tenkyu blong mipela, tenkyu tru i go long God.
3. Aleluia, aleluia, amen, amen, tenkyu tru.



### **SANTU JOSEP NA OL SANTU**



## **171. O Josep, man bilong Maria**

1. O Josep, man bilong Maria. Yu man blong harim tok tasol.  
Yu was long Jisas hia long graun na Krai i kolim yu papa.  
*O Josep, man blong Maria. Yu was oltaim long mipela.*
2. Long taim King Herot i gat kros long liklik Jisas, King na God,  
na i laik kilim nupela King, Yu bringim em long ples longwe.
3. O Josep, man blong Maria, pasin blong yu i stret oltaim.  
Pasin blong yu i klin oltaim na Jisas amamas long harim yu.

## **172. Pikinini bilong Devit**

1. Pikinini bilong Devit, man bilong Maria,  
Jisas Godman bilong heven Em i kolim yu: papa.  
Yu o Josep, yu gat strong tru; holim mi long han blong yu.  
Mi no strong, mi oltaim pundaun, Josep yu sambai long mi.
2. Taim Ogastus i laik kauntim ol manmeri bilong em,  
yu bin harim tok blong Sisa, yu bihainim lo blong em.  
Yu stap wantaim long Maria long haus sipsip long Bet'lem.  
Hia Maria i bin karim Jisas Ridima blong man.
3. Yu bin was oltaim long Jisas na yu skulim Em wantaim.  
Yu bin holim wok bilong yu gut tumas inap yu dai.  
Nau yu stap antap long heven. God yet i bilasim yu.  
Josep yu lukdaun long mi nau; helpim mi bihainim yu.

### **173. Santu Josep, pren blong Jisas**

1. Santu Josep, pren blong Jisas, lukim nau mi kam long yu.  
Nau yu stap antap long heven, harim singsing bilong mi.

*Santu Josep, papa tru, harim mi singaut long yu, Santu Josep, papa tru.*

2. God i makim yu i was gut long Maria, Jisas tu.  
Ol i kisim klos na kaikai, kisim tru long han blong yu.
3. Planti yia yu skulim Jisas, na yu wok wantaim long Em.  
Jisas lainim tok bilong yu, tok blong yu i stret na tru.
4. Yu no slek long wok blong yu. Yu mekim tru inap yu dai.  
Nau yu stap antap long heven. Harim singsing bilong mi.

### **174. Pita To Rot, Pita To Rot**

*Pita To Rot, Pita To Rot, Pita To Rot,  
God i makim yu, yu wokman bilong Em.  
Pita To Rot, Pita To Rot,  
mipela i onarim nem bilong yu.*

1. Yu bilip long tok bilong God, yu no pret long dai.  
God i wokabaut wantaim yu. Yu strong na yu win tru.  
Yu soim mipela long pasin bilong bilip tru. Yu strong yu gut.  
Mi amamas long yu tude.
2. Yu go pas long Sios blong Krai hia long Niu Briten.  
Na yu strongim wok blong Sios long Papua Niu Gini.  
Yu pre long God blong helpim mi long pasin bilip tru.  
Mi litimapim nem blong yu, yu gutpela.
3. Tok blong God i strong bilong yu. Yu bihainim tru.  
Amamas long wok bilong God i pulapim yu tru.  
Yu putim God long bel bilong yu. Yu laik em i win tru.  
Na God i amamas long yu, i blesim yu

## 175. Ol pren blong God

1. Ol pren blong God kam amamas, yupela winim pinis wok.  
God yet i bungim yupela long bikp'la amamas blong Em.

*Mipela tu i laik kamap long yupela long ples antap,  
long God na Papa blong yumi.*

2. Maria nambawan long ol na Josep wasman bilong Krai,  
ol Patriak na Profet tu, ol santu Hetman tu i stap.
3. Na ol Aposel bilong Krai, ol Martir na ol Virgo klin,  
Yupela i singaut long God, bambai mipela i stap gut.

## 176. Mipela sing long ol i winim pait

1. Mipela sing long ol i winim pait,  
long ol i gut inap long taim blong dai.

*Lord Jisas Krai long nem blong Yu ol i win. Aleluia, Aleluia.*

2. Yu strongim ol taim ol i pilim pen.  
Na samting hia i no bin daunim ol.
3. Ol Virgo klin, ol martir, tisa tu,  
i winim wok, bikos yu helpim ol.
4. Mipela tu inap kamap santu,  
sapos mipela pre oltaim long yu.



**OL MANMERI I DAI PINIS**



## 177. O God, yu kisim ol

1. O God, Yu kisim ol i wet long lukim yu.  
Yu marimari long ol sol i karim pen.  
Ol i no lukim yu. Na ol i sori tru.  
O God, yu kisim ol na ol i malolo.
2. Jisas i baim ol; i dai long diwai kros.  
Em yet i givim Yu long pe i bikpela tru.  
Em pe mi kisim nau, mi givim Yu long en.  
O God, yu kisim ofa na Yu kisim ol.

3. Maria santu tru. Mama blong Jisas Krais.  
Yu marimari, helpim ol i lusim graun.  
Askim Son bilong yu, bai ol i kamap gut,  
bai ol i kam bung wantaim yu long amamas.

### **178. Jisas, yu dai long diwai kros**

1. Jisas, Yu dai long diwai kros. Yu stretim rong long blut blong Yu.  
Ridima, marimari tru long ol i stap long klinpaia.
2. Taim ol i stap yet hia long graun, ol i bilip long Yu, O God.  
Ol i bihainim tok blong Yu. Nau givim malolo long ol.
3. Plis kisim ol i go antap, bai ol i painim amamas.  
Na ol i stap wantaim long Yu. Na ol i tenkim Yu oltaim.

### **179. God, harim pre blong mipela**

1. God harim pre blong mipela long ol i lusim graun.  
Nogut ol i no stretim sin. Marimari long ol.
2. Mipela mekim planti rong. Mipela i no strong.  
Yu sori na Yu harim pre, mipela mekim nau.
3. Papa, Yu harim ol i krai, na givim lait long ol.  
Na bringim ol long ples blong Yu, bai ol i amamas.
4. Maria, helpim mipela i pilim sori nau.  
Go askim Krais long strongim hop long de blong kirap gen.



### **KAINKAIN SINGSING**



### **180. Mi laikim lotu katolik**

Mi laikim Lotu Katolik. Em Lotu bilong Jisas Krais.  
Ol skul blong Em i stret oltaim. I kamap tru long Jisas yet.

*Mi laik mi Katolik oltaim, inap long de mi dai long en.  
Mi promis tru long Yu O Lord.*

Bipo mi kisim Baptismo. Na laip blong God i stap long mi.  
Papa i laikim mi wantaim long Jisas. Mi brata tru blong Jisas.

*Mi no ken laikim Satan gen. Mi lusim pasin bilong em.  
Mi promis tru long Yu, O Lord.*

Jisas i givim Em yet long mi, taim yumi Misa wantaim em.  
Em i laik strongim mi long stap gut, nau mi laik wok wantaim long em

*Mi laik mi Katolik oltaim, inap long de mi dai long en.  
Mi promis tru long Yu O Lord.*

### **181. O God, mi holim strong tumas**

1. O God, mi holim strong tumas ol tok bilong baptismo.  
Yu, Jisas, Yu stap wantaim mi, Yu harim tok blong mi nau:

*Mi blong eklesia katolik, mi harim tok blong em i tru.  
Mi laik stap gut olgeta.*

2. Em tok i tru: wan God i stap, tasol i tri persona.  
Bihain mi dai, i peim mi na bekim ol pekato.
3. Mi save: Jisas laikim mi, mi tu mi laikim Jisas.  
Go, Satan, mi no laikim yu, mi rausim yu olgeta!

### **182. Wanhaus God i sanapim**

1. Wanhaus, God i sanapim haus holi bilong em.  
Jisas yet i kamapim em long Spirit bilong Em.  
*God, mi tenkim Yu, mi adorim Yu,  
Yu laik mi bringim ollong haus blong Yu tasol.*
2. Em haus blong nau, blong oltaim, ol pos i stret, i strong.  
Em i sanap antap long ol Aposel na Bisop tu.
3. Ol samting bilong laip, oltaim yu painim hia.  
Ofa blong Krais, ol sakramen i strongim gut yumi.

### **183. God, strongim Sios blong Yu**

1. God, strongim Sios blong Yu. Mipela singaut long Yu.  
Yu Bikipela tru. Kam helpim nau ol pipel blong Yu.  
God, strongim Sios blong Yu.

2. God strongim hop blong Sios. Mipela trastim Yu tru,  
Yu lusim sin oltaim. Yu peim gut ol wok i stret tasol.  
God, strongim hop blong Sios.
3. God, strongim laik blong Sios. Mipela laik mekim gut  
long bratasusa nau. Mi tingim oltaim pasin bilong Kraiss.  
God, strongim laik blong Sios.
4. God, givim bel isi. Long taim blong kros na long pait,  
taim bel i hat tumas, Yu strongim mipela long sekan kwik.  
God, givim bel isi.

### **184. Onarim Lord (Sam 150)**

*Onairm Lord long lotu bilong Em.*

*Onarim Em long haus bilong Em antap.*

1. Tok gut long ol wok bilong Em.  
Em i bikpela moa long olgeta samting.
2. Onarim God long han na long maus.  
Onarim Em long string na long mambu.
3. Onarim Em long gita na long kundu,  
long singsing na long pestode.
4. Yupela olgeta i gat laip bilong oltaim,  
yupela olgeta i mas onarim Em tru.

### **185. Yumi amamas na sing**

1. Yumi amamas, yumi amamas, yumi amamas na sing.  
O Kraiss Em i stap wantaim yumi, yumi amamas na sing.
2. Yumi mas sekan, yumi mas sekan, yumi mas sekan long ol.  
O Kraiss ..... Yumi mas sekan long ol.
3. Yumi no ken pret, yumi no ken pret. Yumi no ken pret long ol.  
O Kraiss ..... Yumi no ken pret long ol.
4. Yumi brata tru, yumi brata tru, yumi brata tru blong ol.  
O Kraiss ..... Yumi brata tru blong ol.
5. Yumi amamas, yumi amamas, yumi amamas na sing.  
O Kraiss ..... Yumi amamas na sing.

## **186. Kam singsing, pipel bilong God**

1. Kam singsing, pipel bilong God: Tenkyu, O God!  
Adorim Em i stap antap: Tenkyu, O God!

*Sing wantaim kundu na gita: Tenkyu long san na mun na sta.  
Tenkyu, O Papa gut. Tenkyu tru!*

2. Long ren na san, long win na klaut: Tenkyu, O God!  
Long kaikai, dring na paia tu: Tenkyu, O God!
3. Long maunten na long solwara: Tenkyu, O God!  
Long pik na pis, long balus tu: Tenkyu, O God!
4. Oltaim Yu gut long mipela: Tenkyu, O God!  
Yu givim Son bilong Yu tu: Tenkyu, O God!

## **187. Yumi singsing nau: Lord Yu kam**

1. Yumi singsing nau: Lord Yu kam. (3x) O Lord Jisas kam! (2x)
2. Yumi singaut nau: Lord Yu kam. (3x) O Lord Jisas kam! (2x)
3. Yumi pre oltaim: Lord Yu kam. (3x) O Lord Jisas kam! (2x)

## **188. Tenkyu long God (Sam 111)**

1. Tenkyu long God, Em i gutpela, aleluia.  
Tenkyu long Em i antap tru, aleluia.

*Em tru i gut tumas long yumi, oltaim, oltaim.*

2. Long soim yumi strong blong Em, aleluia,  
San, mun na sta Em i wokim, aleluia.
3. Gutpela kaikai Em i givim, aleluia.  
Em kolim yumi pikinini, aleluia.

## **189. Ona long God i stap long antap**

1. Ona long God i stap long antap.

*Singsing na tenkim na onarim God,  
Em i lukautim na laikim yumi.*

2. Ona long Jisas, Son bilong God.
3. Ona long Holi Spirit oltaim

### **190. Dispela de i pinis nau** *(Singsing bilong nait)*

1. Dispela de i pinis nau, tudak i karamapim graun, tasol Yu Papa bilong san na nait, oltaim Yu save stap klostu.
2. Lukautim ol i slip tunait. Nogut wanpela painim sik. Tasol yu givim bel isi long ol, bai ol i no wari na slip.
3. Tenkyu God Papa tru long lait. Tenkyu long malolo blong nait. Tenkyu long helpim mi long mekim wok. Strongim mi gen long slip tunait. Amen.

### **191. Tenkyu, long skulim bilong Jisas**

1. Tenkyu, long skulim bilong Jisas, tenkyu, long dai bilong Em tu. Tenkyu, long strongim mipela gen, tenkyu, Papa tru.
2. Tenkyu long helpim bilong Pater. Tenkyu long skulim bilong em. Tenkyu long bret i kam long heven, tenkyu, Papa tru.
3. Tenkyu, long ol i bung hia wantaim. Tenkyu long pre na singsing tu. Tenkyu long ol i laik stap gut nau, tenkyu, Papa tru.

### **192. Tenkyu, mipela sing gut moning**

1. Tenkyu, mipela sing gut moning, tenkyu, nupela de i stap. Tenkyu, mipela pikinini bilong Yu tasol.
2. Tenkyu, Yu givim papamama, tenkyu, ol i lukautim mi. Tenkyu, Yu givim bratasusa blong stap wantaim mi.
3. Tenkyu, mipela kain kain pipel, tenkyu, bihainim Jisas Krais. Tenkyu, Yu mekim mipela i stap wanbel blong Yu.
4. Tenkyu, mipela kristen pinis, tenkyu, mipela lain blong Yu. Tenkyu, mipela kisim pinis laip bilong Yu yet.
5. Tenkyu, mipela bikhet samtaim, tenkyu, mipela sori nau. Tenkyu, Yu lusim rong bilong mipela oltaim gen.

### **193. Klostu long Yu, O God**      *(Nearer my God to Thee)*

1. Klostu long Yu, O God, klostu long Yu.  
Kruse ken bringim mi klostu long Yu.  
Hevi na pen i kam, mi no ken lusim Yu.  
Mi laik stap wantaim Yu, klostu long Yu.
2. Ol pren i lusim mi, tru mi laik krai.  
Bel i nogut tumas, mi laik indai.  
Yu oltaim gut long mi, nau mi ken go long Yu,  
klostu long Yu, O God, klostu long Yu.
3. Planti taim tru tumas rot i no lait.  
Mi olsem aipas man i stap long biknait.  
Yu yet Yu lait blong mi, taim mi stap wantaim Yu,  
klostu long Yu, O God, klostu long Yu.
4. Jisas, Yu dai long mi na Yu kirap.  
Mi laik bihainim Yu, mi no ken pret.  
Taim mi mas karim pen, mi ken sanap klostu,  
klostu long Yu, O God, klostu long Yu.

### **194. Yes, laip blong yumi**      *(Song in the field)*

*Yes, laip blong yumi i naispela tru,  
taim Krai i stap klostu.*

*Yes, laip blong yumi i naispela tru,  
taim Krai i stap klostu long yumi.*

1. Yumi painim belgut pinis, em i helpim yumi nau.  
Bai olgeta pipel painim belgut bilong Jisas Krai.
2. Yumi painim brata pinis, em i helpim yumi nau.  
Bai olgeta pipel painim brata, Em i Jisas Krai.
3. Yumi painim lait tru pinis, em i helpim yumi nau.  
Bai olgeta pipel painim lait tru bilong Jisas Krai.
4. Yumi painim laik tru pinis, em i helpim yumi nau.  
Bai olgeta pipel painim laik tru bilong Jisas Krai.

### **195. Jisas, mi laikim yu**

Jisas, mi laikim Yu, Jisas.  
Mi singim song bilong mi.  
Yu mekim gut long mi, na Yu oraitim mi.  
Jisas mi laikim Yu.  
Yu yet i Bikpela, tasol yu daunim Yu,  
Yu yet i bikpela tru.  
Jisas mi laikim Yu, mi singim song long Yu.  
Yu yet, Yu song bilong mi. Jisas mi laikim Yu,  
Mi singim song long Yu,  
Yu yet Yu song bilong mi.

### **196. Mi laik bihainim Bikpela Jisas**

1. Mi laik bihainim Bikpela Jisas. (3x) Mi no go bek. (2x)
2. Maski ol hevi, mi karim kruse. (3x) Mi no go bek. (2x)
3. Mi ting long heven, mi ting long Jisas. (3x)
4. Mi no go bek. (2x) La la la la la la (3x) Mi no go bek. (2x)

### **197. O Godman Jisas Kraiss**

1. O Godman Jisas Kraiss, mi lotu nau long Yu.  
Bipo Yu lusim heven, Yu kam long mipela.  
Yu kam blong stretim rong, Yu mekim ol gut wok.  
O Godman Jisas Kraiss, mi tenkim Yu oltaim.
2. O Godman Jisas Kraiss, mi lotu nau long Yu.  
Yu harim tok blong Papa, yu dai long diwai kros.  
Yu stretim rong blong mi.  
Yu dai long nem blong mi.  
O Godman Jisas Kraiss, mi tenkim Yu oltaim.
3. O Godman Jisas Kraiss, mi lotu nau long Yu.  
Yu win long dai na Satan. Yu opim heven tu.  
Yu redim rum blong mi, long haus bilong Papa.  
O Godman Jisas Kraiss, mi tenkim Yu oltaim.

## **198. Glori long God, glori (Sam 148)**

*Glori long God, glori, o singsing alehula.*

*Glori long God, glori, o sing long nem bilong Lord.*

1. Givim ona, ol wok bilong Lord, na ol samting Em i mekim.
2. San na mun, sing long Lord, singsing tu ol sta blong heven.
3. Paia tu, sing long Lord, sing long Lord ol klaut na ren.
4. De na nait, sing long Lord, sing long Em tulait na tudak.
5. Olgeta graun, sing long Lord, sing long Lord, ol bus na gaden.
6. Maunten tu, sing long Lord, na ol tri na ol kain plaua.
7. Riva na si, sing long Lord, sing long Lord, ol win na wara.
8. Pisin long skai, sing long Lord, sing long Lord, ol pis long si.
9. Olgeta man, sing long Lord, litimapim nem blong Em.
10. Na ol pris tu, sing long Lord, on'rim Em long de na nait.
11. Singsing tu ol Santu blong Lord, na ol man long ol hap bilong graun.
12. Glori go long Papa, glori long Son, na long Holi Spirit, God Triwan.

## **199. Kirap na go long God (Sam 100)**

*Kirap na go long God. Yumi ken hepi na singsing long Em.*

1. Singaut long God i strong olgeta,  
stap gut long wok bilong Em, kamap long Em, stap hepi.
2. Save gut Lord Em i God, Em yet i wokim yumi,  
Em i was long ol sipsip blong Em.
3. Go long haus bilong God, go insait, singsing long Em,  
givim tenkyu long nem bilong Em.
4. Givim ona long Papa strong olgeta, long Jisas, Son bilong Em,  
na long Spirit i strong blong yumi.

## **200. Man i kaikai bodi blong Mi**

1. “Man i kaikai bodi blong Mi, bodi blong Mi,  
na i dringim blut blong Mi, blut bilong Mi,  
em stap long mi, Mi stap long em.” Lord Jisas i tok olsem.
2. “Papa yet i bin salim Mi, i bin salim Mi.  
Mi lusim heven na Mi kamdaun, na Mi kamdaun.  
Man i bilip long Mi, em kisim laip, em kisim laip bilong oltaim.”
3. Lord, mipela bilip long Yu, bilip long Yu,  
na i laik stap wantaim Yu, stap wantaim Yu,  
go wantaim Yu long Papa tru, go wantaim Yu long Papa tru.

## **201. Mi wasman blong yu (*Sam 23*)**

1. Yu karim bikpela hevi tumas, nau yu mas kam klostu long Mi.  
Mi givim naispela ples bilong slip, nau yu ken sindaun malolo.  
Ol man God Papa i givim long Mi, bambai ol i laik kam long Mi.  
*Mi wasman blong yu, Mi givim laip blong Mi,  
Mi givim laip blong Mi long yupela.*
2. Man i lukautim na painim Mi tu, bambai Mi no laik rausim em.  
Yu nau sapos yu laik stap wantaim Mi,  
yu pastaim mas daunim yu yet.  
Yu tu mas karim ol kruse blong yu, na kam long bihainim Mi tru.
3. Taim laip blong Mi i go lus long indai. Mi kisim bek nupela laip.  
Yu yet sapos yu laik holimpas laip, bai laip bilong yu i go lus.  
Man i laik ofaim laip bilong em bai laip bilong em i ken stap.
4. Ol man i laikim ol tok bilong Mi, bambai ol i laikim Mi tu.  
Papa i kam stap long haus bilong em,  
na Mi tu Mi kam bungim em.  
Spiritu Santu bai pulap long em, bambai em i hepi tumas.

## **202. Tenkyu na ona long Yu**

*Tenkyu na ona long Yu, O Jisas, God na Ridima,  
Yu laikim mipela tru, mipela tu laikim Yu.*

1. Pastaim Melkisedek ofrim long God hap bret wantaim wain.  
Mipela ofarim tru Blut wantaim Bodi blong Yu.

2. Yuda i hangre, nau Mana pundaun, em kaikai blong ol. Yu mekim Yu yet i bret, Mana blong laip bilong oltaim.

### **203. Mama bilong Jisas (Edward Meli)**

*Maria o mama yu mama bilong Jisas yu mama bilong God.  
God i givim ona na biknem long yu  
o Maria yu pre bilong mi, yu helpim mi.*

1. Taim mama i karim yu, yu bin stap klinpela tru, pekato blong kamap i no bagarapim yu, Maria Virgin klin oltaim.
2. God i givim yu bai yu mama bilong mi, yu presen bilong God o yu skulim mi, long harim tok blong God oltaim.
3. Bikpela amamas God i givim nau long yu, mipela i kolim yu mama bilong Santu Hat, bilong Jisas Pikinini bilong God

### **204. Yupela no ken sutim tok (Luk 6:37-38)**

1. Yupela no ken sutim tok long ol man, na skelim ol, na skelim ol olsem jas.
2. Yupela i mas lusim sin bilong ol, pogivim sin, pogivim sin bilong ol.
3. Bambai ol man i skelim gutpela moa long yupela, long yupela skelim gut.
4. Long skel blong yu bai God ilaik skelim yu, long skel blong yu, long skel blong yu skelim stret.

### **205. Yumi Sios. Yes i Pipel blong God**

*Yumi Sios. Yes!  
I pipel blong God stap laip long Kraiss  
i Rot, Tok Tru na i Laip.  
Yumi Sios. Yes!  
I Bodi blong Kraiss, stap wan wantaim Em  
i Rot, Tok Tru na i Laip.*

1. Yumi bihainim rot bliong Jisas, olsem brata na susa blong em.  
Krais em i rot bilong yumi, i bringim yumi long God.
2. Yumi autim tok tru bilong Jisas Na telimautim laik bilong em.  
Krais em i Tok Tru bilong yumi, i mekim yumi kamap fri.
3. Yumi bihainim laik bilong Jisas na stap tru long singaut bilong em.  
Krais em i Laip bilong yumi, Laip tru – presen bilong God.

## **206. Nau mi tenkim God long heven (Misa Boikin)**

1. Nau mi tenkim God long heven.  
Em i Papa blong mipela, Em i gut na marimari.
2. Em i kisim bek mipela, mekim bel blong mi i hepi,  
maus blong mi i amamas tru.
3. Mi inap long telimautim: Lord i stap i no ken dai moa,  
em i givim laip blong oltaim.

## **207. O God mi laikim Yu tumas (Misa Maiwara 3)**

1. O God, mi laikim Yu tumas, Yu harim maus blong mi oltaim. (2x)
2. Yu putim yau long pre blong mi, Olsem mi mas singautim Yu. (2x)
3. Mi laik singautim nem blong Yu, bikos mi stap nogut tumas. (2x)
4. O God, Yu save mekim stret, na nau Yu marimari gen. (2x)
5. Nau mi ken stap bel isi gen, bikos Yu mekim gut long mi. (2x)
6. Mi wokabaut long ai blong God, long taim mi stap yet hia long graun. (2x)
7. Yu God, Yu helpim gut tumas, tru mi ken wok long bekim Yu. (2x)
8. Bai mi laik kisim kap blong Yu, em mak blong laik blong Yu long mi. (2x)
9. Em ofa bilong tenkim Yu, na tu long on'rim nem blong Yu. (2x)

## **208. Papa God Yu gutpela (Misa Maiwara 3)**

1. Papa God Yu gutpela, yu lukautim mipela.  
Mipela i adorim Yu. Nau mipela givim ona tru long Yu, God.  
Yu stap King bilong mipela. Ol gut samting i kam long Yu.  
Mipela i tenkim Yu.

2. Jisas Kraiss, Yu Son blong God, Yu bin bringim tok blong Em.  
Mipela i adorim Yu. Yu kirap long ol i dai na Yu stap laip gen. Yu  
oraitim ol manmeri. Na Yu stap wantaim mipela.  
Mipela i tenkim Yu.
3. Holi Spirit bilong God, Yu bin strongim mipela.  
Mipela i adorim Yu. Nau Yu skruim wok blong Kraiss long olgeta ples.  
Kisim ona blong mipela, wantaim Papa na wantaim Son.  
Mipela i tenkim Yu.

### **209. Tok blong Yu God (Misa Maiwara 1)**

1. Tok blong Yu God, em i swit tumas,  
i swit tru, em i swit tumas.

*Aleluia, aleluia, ale, aleluia.*

2. Mi mas oltaim ting long tok blong Yu,  
mi mas bihainim tok blong Yu.
3. Mi laik oltaim holim han blong Yu,  
God mi laik holim han blong Yu.

### **210. Yumi harim tok (Misa Maiwara 3)**

1. Yumi harim tok Kraiss i tisim ol. (2x)  
Yumi putim yau long tok blong Kraiss,  
bai i strongim bel blong olgeta man.
2. Yumi bringim tok Kraiss i givim ol. (2x)  
Yumi autim tok blong Kraiss long ol,  
bai i helpim ol long stap gut tumas.
3. Yumi mekim wok Kraiss i soim ol. (2x)  
Yumi mekim gut ol wok blong Kraiss,  
bai givim ting long olgeta man.

### **211. Tenkyu O God (Misa Pur)**

1. Tenkyu, o God, Yu skulim mipela long santu tok,  
na i tanim bel na lewa-i.  
Papa, mipela i bilipim em tok hia blong Yu.

Salim Spirit blong Yu i kam,  
bai Em helpim mipela long bihainim ol tok blong Yu.

*Yu yet Yu laikim tru mipela i stap wantaim Yu,  
na Yu salim Son bilong Yu bilong soim mipela long rot  
i go long Yu, o God.*

2. Laik bilong Yu bipo Yu soim long ol profet,  
nau i kamap long ples kilia-i.  
Taim tok bilong Yu i kamap man. Em Jisas God - man.  
Dispela nau i laik blong yu, bai mipela ol Kristen  
mas bilip tru long Son blong Yu.

## **212. Tenkyu Papa long ol tok i stret (Misa Sumatin)**

Tenkyu Papa long ol tok i stret. Stiaim mipela oltaim long en.  
Tenkyu Jisas long ol tok blong Yu. Helpim mipela bihainim tru.

## **213. Tok blong God i kamap man (Misa Kalibobo)**

*Tok blong God i kamap man. Mipela i tenkim God.  
Jisas Kraus Yu Tok bilong God. Mipela i tenkim Yu.*

1. Yupla manmeri i karim bikpela hevi,  
kam long mi long painim malolo.  
Kruse mi givim long yupela manmeri, i nogat hevi  
na i no hatwok tru. Jisas i tok olsem.
2. Yupla manmeri i save tingting planti,  
wari tumas long ol samting bilong graun.  
Yupla painim pastaim Kingdom bilong heven,  
wantaim ol stretpela pasin bilong em. Jisas i tok olsem.
3. Bihainim tok, olsem sipsip harim wasman.  
Stap wantaim mi, olsem han long diwai wain.  
Stap wanpela, olsem Mi stap wantaim Papa,  
wanpela Spirit i stap long yupela. Jisas i tok olsem.

## **214. Aleluya, mi laik harim (Misa Peligo)**

Aleluia, (4x).

Mi laik harim skul blong God nau,  
mi laik harim skul blong Em.

Aleluia. (4x)

## **215. Glori long Yu, glori**

*Glori long Yu, glori, mipela amamas tru.*

*Glori long Yu, glori, Yu God blong mipela.*

1. Krais i bingim tok blong Yu long mipela.
2. Krais i bringim lait blong Yu long mipela.
3. Krais i soim rot blong Yu long mipela.

## **216. Mi soim rot, Mi givim laip.**

1. Mi soim rot, Mi givim laip. Na Mi tasol Mi save.  
Na i nogat i painim Papa, sapos Mi yet no bringim.  
Husat i laikim Mi tasol, em i bihainim tok blong Mi.  
Em yet i go long heven.
2. Husat i skruim wok blong Mi? Husat i helpim ol brata?  
Husat i bringim tok blong Mi i go long ol i no save?  
Husat i tok i laikim Mi, em mas helpim tu ol brata.  
Kam na bihainim Mi.

## **217. Blesim nem blong Lord**

1. Blesim nem blong Lord (3x)  
Blesim Lord. Blesim nem blong Lord (3x)  
Blesim Lord.
2. Mip'la blong Em. (3x)  
Blesim Lord. Mip'la blong Em. (3x)  
Blesim Lord.
3. Mip'la laikim Em. (3x)  
Blesim Lord. Mip'la laikim Em. (3x)  
Blesim Lord.

4. Holi Spirit kam. (3x)  
Blesim Lord. Holi Spirit kam. (3x)  
Blesim Lord.



## **SINGSING BILONG MISA**



### **BIGIN**

#### **218. Amamas God i King**

1. Amamas, God i King, Em i King. Lain blong God amamas,  
God i King.

*God blong yumi Em i gat strong. Em i gat strong. Em i King.  
Em i win. Em i win.*

2. Graun i stap long han blong Em, long han blong Em.  
Solwara na maunten tu ol blong Em.

#### **219. Olgeta man, kam singsing long God**

*Olgeta man, kam singsing long God, onarim Em antap.*

1. Kam nau long God, pre gut na singsing, long taim  
yu sanap long ai bilong Em.
2. Kam insait nau, yumi wan pipel, blong tenkim na  
givim lotu long Em.
3. God Em i gut, i laikim yumi, na tok bilong Em i  
helpim ol man.
4. Ona long God, ona long Jisas, na ona long  
Holi Spirit. Amen.

#### **220. Ol pipel bilong God kam sing**

1. Ol pipel bilong God kam sing. Kam sing na pre long Jisas King.  
Long dai blong Em i daunim dai blong sin. Na ofa hia i makim win.
2. Kam harim tok i bringim lait. Kam kisim Bret i givim Laip.  
Bai yumi wantaim Jisas yumi win, na lusim pasin bilong sin.

3. Kam bung wantaim ol brata tu. Long baptais Krai i pasim yu.  
Long bodi wantaim blut blong Em, Jisas i strongim yumi gen.

### **221. Yupla kam na singaut long God**

1. Yupla kam na singaut long God. (2x)  
Em i nambawan na naispela tru. (2x)  
Em i strong na i gut long yumi, long yumi.
2. Mip'la kam blong lotu long Yu. (2x)  
Yu tasol yu wokim heven na graun. (2x)  
Yu strong tru na Yu stap, oltaim tru, oltaim tru.
3. Harim pre blong mipela nau. (2x)  
Blesim mipela i onarim Yu. (2x)  
Givim strong na sekan na belgut, na belgut.

### **222. Pris i kam long Misa nau**

1. Pris i kam long Misa nau. Yumi mekim ofa bilong Krai.  
Bai i blesim ol i bung wantaim, na marimari long yumi.  
*Jisas, Yu King blong marimari. Godman,  
Yu kam helpim mipela.*
2. Mipela kam blong adorim Yu. Mipela i bilip tru long Yu.  
Yu bin dai blong bungim mipela, ol sipsip i ranawe long God.
3. Wantaim ol ensel na santu, mipela i kam bilong brukim skru.  
Wantaim ol i wetim heven tu, mipela i hop oltaim long Yu.

### **223. Yumi laik go long alta (Misa Boikin)**

- Yumi laik go long alta, mekim gut long God Papa. (2x)  
Em i Bikpela blong heven na tu bilong graun. (2x)

### **224. Yupela kam blong mekim lotu (Misa Maiwara 1)**

- Yupla kam blong mekim lotu long God tru antap.  
Yupla kam sanap long pes blong em.  
Tenkyu tru long God, litimapim nem blong Em i nambawan King.  
Yumi bung long nem bilong Lord Jisas Krai i Son bilong God. (2x)

## **225. Mipela i bung, Papa God (Misa Maiwara 3)**

1. Mipela i bung, Papa God, long onrim Yu  
na long tenkim Yu tu. (2x)  
Long dispela lotu ol pipeli bung wantaim Yu.
2. Mipela i bung, Papa God, hia wantaim Kraisi;  
Em i stap namel long sios. (2x)  
Long dispela lotu ol pipel i wan wantaim Yu.
3. Mipela i ting, Papa God, long ol i stap  
hia long dispela ples. (2x)  
Long dispela lotu ol pipel i onarim Yu.
4. Mipela i bung, Papa God, long brukim bret  
wantaim lain bilong Yu. (2x)  
Long dispela lotu ol pipel i tenkim Yu tru.

## **226. Redim nau ol tingting (Misa Pur)**

Redim nau ol tingting bilong yumi, bai yumi Misa.  
Yumi bai bungim Kraisi Jisas long dispela Misa. (2x)  
God mipela nau i kam long Yu, mipela i laik Misa.  
Jisas hia wantaim mipela.  
God mipela nau i kam long Yu.  
God mipela nau i kam long Yu, mipela i laik Misa  
Jisas hia wantaim mipela.  
God mipela nau i kam long Yu. God mipela nau i kam long Yu.

## **227. Jisas mipela i kam (Misa Sumatin)**

Jisas mipela i kam long haus blong Yu.  
Mipela i laik harim tok na skul blong Yu.  
Mipela i laik kisim kaikai blong Yu  
bai mipela oltaim i pren blong Yu.  
Na mipela i ken wokabaut wantaim Yu.  
Na mipela i ken amamas oltaim tru.

## **228. Yumi go klostu long God (Misa Kalibobo)**

*Yumi go klostu long God. Nau yumi lotu long Em.*

*God Em i olsem Papa bilong yumi. Na yumi olsem pipel bilong Em.*

*Yumi go klostu long God. Na yumi lotu long Em.*

1. Olgeta man na meri long olgeta graun,  
y'pela singim song blong amamas.
2. Olgeta lain bilipman i bihainim Krais,  
y'pela kam adorim Bikpela.
3. Olgeta pikinini na ol yangpela,  
y'pela litimapim nem blong God.
4. Olgeta trangu sikman, bikman, man nating,  
y'pela tenkim Jisas Bikpela

## **OFA**

### **229. Lukim mipela**

Lukim mipela, mipela kam nau, bringim bret na wain long alta.  
Mipela pas tu wantaim long ofa, pris nau i putim long tebol.  
Papa yu kisim, na givim blesim; mekim ol samting hia holi.  
Blesim mipela wantaim long ofa; mekim mipela aposel.  
Salim mipela blong mekim holi, ol man na meri blong kantri.

### **230. Mipela redim presen nau**

*Mipela redim presen nau blong tenkim Yu God Papa tru.*

*Mipela bringim bret na wain, ol i kamap long wok blong manmeri.*

1. Dispela bret em i kaikai blong graun, em i givim laip long mipela.  
Bai em i bret blong laip blong oltaim long wok bilong Holi Spirit.
2. Dispela wain em i dring blong graun, manmeri dring na amamas.  
Bai em i dring blong laip blong oltaim long wok bilong Holi Spirit.

### **231. Yumi bringim bret na wain**

1. Yumi bringim bret na wain. Em i go long God Bikpela.  
Bambai i tanim em long mit na long blut blong Jisas,  
Em i ridimim yumi bipo, long dai bilong Em long diwai kros.

*Nau yumi givim ofa blong Jisas, na yumi singsing long God Bikpela.  
Ona long God em i gutp'la tru. Tenkyu, tenkyu, tenkyu.*

2. Olsem liklik wara hia em i bung long wain long Misa,  
olsem yumi olgeta, yumi bung wantaim long Krai nau.  
I givim laip bilong Em bipo, bambai yumi ken orait oltaim.

### **232. Oltaim mi ting long Yu**

1. Oltaim mi ting long Yu, God Papa. Ol wok blong Yu i gutp'la tru.  
Mi laik stap klostu long Yu oltaim, inap long Taim mi lukim Yu.  
Na stap oltaim wantaim long Yu.
2. Yu givim Jisas long mipela. Em yet i rot i go long Yu.  
Mipela harim tok blong Jisas. Mipela bung nau wantaim Em,  
bambai mipela painim Yu.
3. Plis kisim nau dispela ofa, mipela mekim hia tude.  
Blong tingim Yu na Pikinini, na laip na amamas oltaim,  
Na laip na amamas oltaim.

### **233. Yu lukim na Yu laikim, em presen bilong mipela**

1. Yu lukim na Yu laikim, em presen blong mipela.  
Em pris i stap long alta, i ofaim nau long Yu.  
Bambai i go antap antap long Yu long heven.  
Yu kisim em, Bikpela. Yu amamas long em.
2. Mipela ting long Jisas, na bringim presen hia.  
Bambai i kam na tanim dispela bret na wain.  
Mipela wantaim Jisas, wantaim long presen hia.  
Nau lotu blong mipela, i tru inap long Yu.

### **234. Lukdaun O God long bret na wain (Misa Boikin)**

Lukdaun, O God, long bret na wain,  
pris nau i putim long alta.  
Mipela givim ol ting na tok na wok. (2x)

### **235. Yumi bringim nau long alta (Misa Maiwara 1)**

Yumi bringim nau long alta ol presen bilong yumi,  
bai God i ken amamas tru na blesim yumi. God Yu gut tru, God yu gut.  
Mi laik mekim gut long Yu. (2x)

### **236. Mipela O God i laik redi nau (Misa Maiwara 3)**

1. Mipela, o God laik redi nau. Ofa blong Krai i bikpela tru.  
Mipela, o God, i redi nau.
2. Mipela, o God, i laik bringim Yu kap i gat wain na sampela bret.  
Mipela, o God, i bringim Yu.
3. Mipela, o God, i laik givim Yu wok wantaim tok na mipela yet.  
Mipela, o God, i givim Yu.
4. Mipela, o God, i laik redi nau. Ofa blong Krai i bikpela tru.  
Mipela, o God, i redi nau.

### **237. Nau yumi givim ofa (Misa Pur)**

1. Nau yumi givim ofa long han bilong pris.  
Yumi givim yumi tu wantaim ofa hia.  
Bai yumi wantaim Jisas yet i ofa long God Papa.
2. Ofa hia i soim yumi sindaun wanbel.  
Yumi rausim ol belhat na pasin tok stil.  
Bai Jisas inap i kisim tu ofa bilong yumi.
3. Jisas yet em i nambawan King blong sekan.  
Yumi ofa wantaim na sindaun wanbel tu.  
Bambai ol ples bilong yumi i ken nambawan tru.

### **238. Mipela bringim nau (Misa Sumatin)**

Mipela bringim nau bret na wain.  
Mipela bringim tu mipela yet.  
Gutpela Jisas Yu kisim wantaim  
na mekim mipela kamap narakain.  
Mekim mipela i gut olsem Yu.  
Mekim mipela i kamap santu.

### **239. Spirit kisim ofa hia (Misa Holi Spirit)**

1. Spirit, kisim ofa hia, mipela i bringim nau. Bret na wain na mip'la yet. Mekim holi. Mekim gut.
2. Yu tasol yu givim laip: laip long bodi, laip long sol. Givim nau dispela laip long mipela i bung hia.
3. Spirit strongim mipela long dispela bret na wain. Mekim mipela i stap bodi, blut blong Jisas Krai.
4. Spirit pasim mipela oltaim, wantaim Jisas yet, Bai mipela i sindaun olsem bratasusa tru.

### **240. God i kisim dispela ofa (Misa Kalibobo)**

*God i kisim dispela ofa long han blong yumi. (2x)*

1. Nau mipela bringim long Em dispela bret wantaim wain, i kamap long rop wain na long graun, na long hatwok bilong man.
2. Blong adorim na onaim bikpela nem bilong Em.  
Na blong blesim yumi na Holi Katolik Sios bilong Em.

### **241. God Yu lukim pris i putim (Misa Peligo)**

1. God, Yu lukim pris i putim bret na wain hia long alta.
2. Bret na wain i nau blong Yu, blong mekim Yu i amamas.
3. Yu bin mekim tu mipela pikinini bilong Yu.

## **PINIS**

### **242. Yumi tenkyu long Lord**

*Yumi tenkyu long Lord, yumi tenkyu long Lord,  
yumi tenkyu long Lord. Aleluia.*

1. Nau yumi go bek long ples blong yumi na mekim gut long ol man.
2. Mi no ken pret long ol samting blong graun, mi pikinini blong God.
3. Mi laik oltaim telimautim long ol man: yumi mas onaim God.

### **243. Yumi laik go nau (Misa Maiwara 3)**

1. Yumi laik i go nau, Misa i pinis.  
Yumi laik i go long ples na long haus.  
Yumi laik i go mekim ol wok blong yumi.  
Yumi nau go stretim sindaun blong yumi.
2. Yumi harim pinis tok bilong Jisas.  
Yumi traim skruim tok bilong Em.  
Yumi go sindaun wantaim ol lain blong yumi  
long mekim tok long skul bilong Krais.
3. Yumi kisim pinis help bilong Jisas.  
Yumi laik stat mekim wok bilong Em.  
Yumi givim help long ol man i stap klostu,  
bai sindaun blong yumi i stretpela tru.

### **244. Pris i tok: Misa i pinis (Misa Sumatin)**

1. Pris i tok: Misa i pinis, yumi ken go nau.  
Krais i stap wantaim long yumi. Yumi no ken pret.
2. Krais i salim yumi long mekim wok blong em.  
Helpim manmeri i kamap bratasusa tru.
3. Yumi autim tok blong Jisas, mekim gut long ol.  
Bai ol ples i kamap gut tru, na i no gat pret.
4. Jisas mipela i hepi, Yu bin kam long graun.  
Na mipela i ken stap gut, wantaim strong blong Yu.

### **245. Yumi go misa i pinis (Misa Kalibobo)**

*Yumi go, Misa i pinis. Nau yumi tenkyu tru long God.  
God Em i olsem Papa bilong yumi, na yumi olsem Pipel bilong Em.  
Yumi olgeta i go nau. Na yumi skruim wok blong Krais.*

1. Olgeta man na meri long olgeta graun,  
Yupela autim Gutnius bilong Krais.
2. Olgeta lain manmeri i bihainim Krais,  
Yupela go kirapim Sios long ples.

3. Olgeta pikinini na ol yangpela,  
Yupela helpim kantri bilong yu.
4. Olgeta papamama long ol family,  
Yupela autim Gutnius bilong Kraus.
5. Olgeta man blong bisnis, wokman na bosman,  
Yupela strongim wok blong Sios long ples.
6. Olgeta lida, tisa komiti na jas,  
Yupela helpim kantri bilong yu.

### **246. Em tasol misa blong yumi (Misa Pur)**

1. Em tasol Misa blong yumi. God i stap wantaim long yumi.  
Tenkyu tru Jisas, Yu marimari na mipela nau i wan long Yu.  
*Na yumi ken go nau wantaim Jisas yet  
na mekim gut pasin long helpim blong Lord.  
Tenkim Lord, amamas long Em.*
2. Yumi go na stap bel isi, Pait long laik nogut blong yumi.  
Jisas sanap wantaim mipela, na mipela man inap long win.
3. Tenkyu tru long Yu, Lord. Helpim mi, O Lord long laikim Yu,  
na mi bihainim Yu, oltaim.

